

U
NONGPYNIM
JONG NGA



REFERENCE

Not to be Lent out

U NONGPYNIM JONG NGA

KI SAW GOSPEL

BA LA PYNLONG


TANG KAWEI KA JINGIATHUHKHANA

KAT KUM KI JINGJIA TER - TER

Ha ka Ktien Khasi da

U H. Elias, S.D.B.

2ND EDITION



1963

Don Bosco Technical School - Shillong

**Library books will give you Joy for Long
If handled carefully with clean hands**

IMPRIMATUR

✠ S. FERRANDO, S.D.B., D.D.

Episcopus Shillong,ensis,

24 Martii, 1943.

Printing completed
on 19th March, 1963
at the Don Bosco
Technical School,
Shillong.

REFERENCE



Nga long ka Lynti

(lo 14,6)

REFERENCE
Not to be Lent out

KA 'TIENKHMAT

Ka Gospel ka long ka kot jingblei kaba iathuhkhana shaphang ka jingim jong u Trai jong ngi u Jisu Krist - Ka Jingkha, ki kam phylla, ka jinghikai, ka jingiap jong U halor ka Diengphna bad ka Jingnihpai jong U.

Dong sawngut ki nongthoh Gospel - u Matheus Bakhuid, u Markus Bakhuid, u Lukas Bakhuid, bad u Ioannis Bakhuid. La kine ki la thoh la ka jong ka jong ka kitab, hynrei ka Gospel ka la long tang kawei. Ki jynthoh baiapher jong ki, ki long kum saw tylli ki kjat sngi baphyrnai rong kiba thaba lang hajuh, bad hangta, ban pynphalang ia ka Dur Blei jong u Nongsiewspah ka pyrthei.

Ym don kot ha ka pyrthei kaban iaryngkat bad ka Gospel jong u Jisu Nongpynim, namar kane ka long ka sur ba-im jong u Blei bashisha bad u Briew bashisha, da kaba U kren ha ka pyrthei baroh, khamtam ha kito kiba ieid ia U. Hynrei ka Gospel u Jisu, ym tang ba ka iapher na kiwei pat ki kot ka pyrthei. "Tang ban shu iohi ia kane ka kot jingblei," ong uwei u 'riewkhuid, "ka pynkhlaif ia ngi kham palat ban ia ka pop." Ka la biang tang ban shu ktah ia ka Gospel, bad ki jingmut jingpyrkhat jong ngi baroh ki khuid bad

Library books will give you joy for long
If handled carefully with clean hands

ki jan ia u Blei; namar na man la ka kyntien jong ka Gospel ka mih ka bor-bah kaba phrang, ba pynkoit bad pynkhlaif ban ialeh pyrshah ia ki buit sianti sniew jong u ksuid.

Dei na kine ki daw keif ba ki Kristan mynbarim ki rah ia ka Gospel kat sha ba leit ba wan, bad ki kwah ban buh halor ka metiap la jong kum ka boina jong ka jingsuk hymjukut.

Khnang ba ki paidbah kin dup suk ban minot bad ngam jylliew ha ka jingim jong u Nongsiewspah la jong, man ka por ki 'riewkhuid bad ki 'riewstad ki trei shitom shibun ban pynlong ia kito ki saw jingathuhkhana tang kawei, hynrei, khlem pyntam ne pynduna eiei na kaba la thoh da ki Saw Nongthoh Gospel.

Ha kane ka kot kaba ngi tyrwa ha phi, ym tang ba la pynbeit kumba la ong haneng, hynrei la buh ruh ter-ter katkum ka por bad ki jingjia.

Kumta shah ba ka Gospel kan rung ha man la ki iing Kristan: ba man la u Katholik un pule bad puson ia ka, khnang ban dup nang san ha ka jingtip bad ka jingieid ia u Trai Jisu Nongpynim.

✠ STEPHANUS, *Bishop*

*Ka sngi jingpynbna u Angel
ha ka Maria, 1943.*

CORRIGENDA

<i>Sla</i>	<i>Line</i>	<i>Don</i>	<i>Dei ban long</i>
3	6	dong	don
13	16	“ Ym don	“ Ba ym don
47	14	mynba	ynda
	18	ki baroh	ki baroh
67	14	lyngknot	lyngkhot
114	28	bad bad	bad
118	18	sngewthuh	sngewthut
159	4	ban pynim ia la ka mynsiem na ka bynta tPcmf	rangbah lyngdoh bad ki Pharisi. Bad ki pat ki la
161	19	Ngfia	Nga
211	9-10	(line 2, 1)	(line 1, 2)
211	13-14	(line 2, 1)	(line 1, 2)
273	28	ia	ai
289	25	'Ban	'Bad

KA JINGKDEW - SLA

Sla

Ka 'Tien-lamphrang jong ki Nongthoh Gospel. 1

1. Ka 'Tien-lamphrang jong u Lukas Bakhuid. - 2. Ka 'Tien-lamphrang jong u Ioannis. Ka Ktien ka la mandoh.

KA BYNTA BANYNGKONG

KA GOSPEL

JONG KA JINGLONG-KHYNNAH

3. U Angel u pynbna ia ka jingkha ia u Ioannis Bakhuid. - 4. U Angel u pynbna ia ka jingkha ia u Jisu. - 5. Ka Maria ka leit-jngoh ia ka Elisabeth. - 6. Ka jingrwai jong ka Maria Theisotti. - 7. Ka jingkha ia u Ioannis Baptis. - 8. Ka jingrwai iaroh jong u Sakharas. - 9. U Josep u shim ia ka Maria. - 10. Ka jinghiar-pateng jong u Jisu Krist. - 11. Ka jingkha ia u Trai. - 12. Ka khubor jong ki Angel sha ki Nongaplangbrot. - 13. Ka nguh-ka-dem jong ki nongaplangbrot. - 14. Ka jingotsher ia u Krist. - 15. Ka jingaiti ia u Jisu. - 16. U Simeon nongiathuhlypa. - 17. Ka Anna Nongiathuhlypa. - 18. Ka nguh-ka-dem jong ki 'riewstad. - 19. Ka jingphet sha ri Ejipt. - 20. Ka jingpyniap ia ki balui-lui. - 21. U wan-phai sha Nasareth. - 22. U Krist hapdeng ki nonghikai aifn. Ka jingim barieh.

KA BYNTA BA-AR

KA JINGIALAP IA KA GOSPEL

Ka Lynnong I. Ka jingtrei jong u Ioannis Bakhuid 33

23. U Ioannis Baptis u wan sha Jordan. - 24. Ka jing-
kyntu ban leh pynshitom kylla-jingmut. - 25. U Ioannis
u kyntu ban leh icid bad leh hok. - 26. U pynbna
shaphang u Krist. - 27. U pynbaptis ia u Krist. - 28. Ka
Jingshah-jingit jong u Krist bad ka jingpynshoi ia U. -
29. Ka sakhi jong u Ioannis - Ka ktien jong uba pyrtā
ha ri kynjah. - 30. Ka sakhi bathymmai jong u Ioannis
Bakhuid. 31. Ki Synrau banyngkong jong u Jisu. -
32. U Andrias u ialam ia u Petrus sha u Krist. - 33. U
Krist u khot ia u Philip bad u Nathanael. - 34. Ka kha-
wai shongkurim ha Kana. - 35. U Krist u hiar sha Ka-
pharnaum.

Ka Lynnong II. Ka Suem Banyngkong . . . 46

1. Ha Jerusalem, Judia bad Samaria . . . 46

36. U Krist U beh noh ia kiba iadie-iathied na ka tem-
pel. 37. Ka jinglot jinggeit jong ki babun. - 38. U
Nikodemus u wan mynmiet sha u Jisu. - 39. Ka jing-
nathuh lyngkot shaphang ka jinghikai jong u Krist. -
40. Ka jingialap ha Judia. Ka sakhi bakhah-duh jong
u Ioannis bakhuid. - 41. La set phatok ia u Ioannis. U
Jisu U leit biang sha Galileia. - 42. Ha ka pukri jong u
Jakob. - 43. Bun ki nongSamaria ki la ngeit ha u
Krist.

2. Ha Galileia 55

44. U Jisu U wan sha Galileia. - 45. U pynkoit ia
u khun jong u nongsynshar. - 46. U Trai U sdang
ban ialap shaphang ka Hima jong u Blei. - 47. Ka jing
khot ia ki synrau banyngkong bad ka jingngat dohkha
baphylla. - 48. U Krist U hikai ha 'ka Sinagog ha Ka-
pharnaum bad U beh noh ia u mynsiem bymkhuid.
- 49. U pynkoit ia ka syngkenkurim jong u Petrus -
50. Hadien ka sngi Sabbat, bun la pynkoit. - 51. U
Krist U leit duai ha ka jaka kynjah. - 52. U Krist U
ialap ha Galileia. - 53. U pynkhuid ia uba pang iang-
lyngkut. - 54. U Jisu U pynkoit ia uba pang iapshi-
liang ha Kapharnaum. - 55. Ka jingkhot ia u Matheus:
- 56. Shaphang kaba shah-jingit.

Ka Lynnong III. Ka Snem Ba-ar 68

1. Ka Jingleit sha Jerusalem 68

57. U Krist U pynkoit ia u bapang, ha ka pung. -
58. U Krist U kren ha ki Pharisi.

2. Ha Galileia 72

59. Ki Synran ki kheit ia ki soh-kew ha ka Sabbat. -
60. Ha kawei pat ka Sabbat U pynkoit ia uba pang-iap
ka kti. 61. Ki Pharisi ki iasuh-buit han pyniap ia u
Krist. - 62. U Krist U leit sha ka duriaw Genasareth,
ha kaba U pynkoit bun ngut. - 63. U khot ia ki Khat-
ar ngut ki Apostol. - 64. Ka jingiathuhkhana halor
u lum. - 65. Ki Jingsuk bad ki Jingkordit. - 66.
Ka mluh jong ka ram-ew; ka jingshai jong ka pyrthei.
67. U Krist bad ka Aia. - 68. Ka jingbatar bad ka jing-
buhnud. - 69. Ka jingklm bad ka jingbrai-thala. - 70.
Ka jingpyllait-tnga. - 71. Ka jingsmai lamler bad kaba
smal. 72. Ka aia han pynhiar-kput. - 73. Ka jingieid
ia ki nongshun. - 74. Ki jingthmu babha haba ai isy-
nei. 75. Ki jingthmu babha haba duai. - 76. Ka jing
duai u Trai. - 77. Ka jingthmu babha haba shah-jingit
78. Ka spah-bneng. - 79. Ka khmat, ka sharak jong ka
met. - 80. To shakri tang ia uwei u Blei. - 81. Sha-
niah ha u Blei ia ki jingdonkam pyrthei. - 82. Wat bi-
shar. Katto katne ki jingsueng. 83. Ka jingshaniah
haba duai. - 84. Ka lynti ksar jong ka jingieid. - 85.
Ki khyrdop bad ki lynti. - 86. To sumar na ki nong-
iathuhlvpa balamler. - 87. Ka kam, ym ki ktien, kan
pynim ia phi. - 88. Ka jingpynkut : Ka ing ba la tei
halor u Mawsiang. - 89. Ha Kapharnaum : U pynkoit
ia u shakri jong u Rangbah shipai. - 90. Ha Naim :
La pynim biang ia u khun jong ka 'riew-kynthai. - 91.
U Ioannis Bakhuid u phah ia la ki synrang sha u Krist.
- 92. U Krist U iarah ia u Ioannis. - 93. U Krist U
kynnoh-pop ia kane ka pateng. - 94. Ka Nongpop ka
pynsleh ia ki kjat jong u Krist. - 95. Ki kynthai ba-
riewblei kiba shakri ia u Krist. - 96. Ka Kapharnaum.
Ka jingsheptieng jong ki kur jong u Krist. - 97. La
beh noh ia u ksuid. - 98. U Krist U pynrem ia ka

jingujor jong ki Pharisi. - 99. Ki jingkren-beiñ-blei pyrshah ia u Mynsiem Bakhuid. - 100. Ka jingpynrem ia ki Pharisi. - 101. Ka Kmie bad ki hymmen-para jong u Trai. - 102. Ka Pharshi shaphang u nongbet. - 103. Balei u Krist U hikai da ki Pharshi. - 104. U batai ia ka pharshi shaphang u nongbet. - 105. Kiwei pat ki jingkren jong u Trai. - 106. Ka pharshi shapang u symbai uba mih hi. - 107. Ka pharshi shaphang u kynbat. - 108. Ka pharshi shaphang u symbai tyrso. - 109. Ka pharshi shaphang u thiat. - 110. U Krist U hikai ia ki paidbah da ki pharshi. - 111. Ka jingbatai ia ka pharshi shaphang u kynbat. - 112. Ka pharshi shaphang ka jingkyshew bad ki paila. - 113. Ka pharshi shaphang ka jar. - 114. Kaba kut ki pharshi. U nongthoh bastad.

3. Ha ka ri jong ki Gerasen 109

115. Ka jingpyn-jai-jai ia ka 'eriong. - 116. U Krist U beh ia u paid ksuid.

4. U phai sha Galileia 113

117. U Jairus u kyrpad ia u Trai ban pynkhiah ia ka khun. - 118. La pynkoit ia ka kynthei ba pang mih-snam. - 119. U Trai U pynim ia ka khun jong u Jairus. - 120. U Krist U pyn-ïohi ia kiba mat-lah arngut. - 121. U Krist U pynkoit ia u briew ubym nang-kren uba shong-ksuid. - 122. U wan sha Nasareth, U hikai bad U shah lehbeiñ. - 123. Ka jingialap jong u Krist bad ka jingphah ia ki Apostol. - 124. Ki jingbthah ia ki Apostol. - 125. Ki jingbthah na ka bynta ka kam ialap. - 126. Ki jingbthah kiba donkam man ka por. - 127. U Krist U iaid ban ialap bad la ki Apostol. - 128. Ka nam jong u Krist ka poi sha u Herod. - 129. Ka jingiap Martir jong u Yoannis.

5. Ha ka jingjar-jar jong ka Bethsaida . . 126

130. Haba ki synrang ki la wan phai biang, u Jisu U leit bad ki sha Bethsaida. - 131. Ka Jingbsa phylla banyngkong.

6. Ka jingleit phai sha Galileia 130

132. U Krist U iaïd halor duriaw bad U pynjai-jai ha ka kynti ba-ar ka 'eriong. - 133. Ha ri Jenasaret, u Krist U leh bun ki Kambah. - 134. U Paidbah ba wad ia u Krist. U phai sha Kapharnaum. - 135. U Kpu jong u Blei. - 136. "Nga long u Kpu jong ka Jingim". - 137. "Ka Doh jong Nga ka long shisha ka jynbam". - 138. Ka jingkhlad katto-katne ki Synran. Ka jing-ngeit jong u Petrus.

Ka Lynnong IV. Ka Snem Ba-lai 138

1. U leit lyngba ka Phenisia, Dekapolis bad Sesaria 138

139. U Krist U iasaid bad ki Nongthoh bad ki Pharisi. - 140. U batai ha la ki Synran ia ka pharshi. - 141. Ha Phenisia. La pynkhiah ia ka khun jong ka brierw kaba na Kanaan. - 142. Ha Dekapolis. - U Krist U pynkoit ia u bakyllut bad bymnangkren. - 143. U pynkoit bun kiwei pat. - 144. Ka jingkhawai phylla ba-ar ia u paidbah. - 145. Ha Dalmanutha. Ka dak-ka-shin na Bneng. - 146. U thiat jong ki Pharisi. - 147. Hajan Bethsaida, u Krist U pynpeit ia ki khmat u bamatlah. - 148. Hajan Sesaria Philipi. Ka sakhi jong u Petrus bad ka jingkular ia ka jinglongrangbah jong u. - 149. U Krist U iaïthuhlypa ia la ka jingshah-shitom bad ia la ka jingmihpat. - 150. Ka jingdonkam ban len ia lade. - 151. Ka Jingkylla-dur. - 152. Ka Jingwan jong u Elias. - 153. U Krist U pynkoit ia u khynnah uba pangbhur. - 154. Ka bor jong ka Jingduai bad ka Jing-shah jingit.

2. Ka jingleit sha ka jingkhawai ingtrep 154

155. U Krist U leit sha Jerusalem. - 156. U Krist U leit ha ka tempel bad U hikai. - 157. Ki Ju ki pyrsang ban kem ia u Krist. - 158. Ka sngi khatduh jong ka jingkhawai: ka jingkular ia u Mynsiem Bakhuid. - 159. Ka jingiapher jingmut jong ki paidbah shaphang u Krist. - 160. Ka jingiapratt ha ka dorbar-

bah shaphang u Krist. - 161. Hadien ka jingkhawai ing-trep: ka briew kaba klim. - 162. U Krist U pynksan ia la ka jinghikai. - 163. "Sha ba Nga leit, phim lah ban wan." - 164. Ki Ju kim long ki khun jong u Blei, hynrei ki khun jong u ksuid. - 165. "Nga don shuwa ban thaw ia u Abraham. - 166. U Krist U pynkoit ia u briew ba la kha matlah. - 167. "Nga long ka jynkhang." "Nga long u Nongsharu babha."

3. Ha Galileia 172

168. Ka jinguthulya ka ba ar shaphang ka jingshah-shitom bad ka jingmih-pat. - 169. Ka stater hapoh shyntur jong ka dohkha. - 170. Mano uba kham khraw ha ka hima bneng? - 171. U nongbeh-ksuid bym-ithuh. - 172. "Kordit ia ka pyrthei namar ki jingpynthut". - 173. Ka Pharshi shaphang ka Mluh. - 174. Ka Pharshi shaphang ka 'langbrot ba la jah noh. - 175. Ka jingsneng. Ka bor Apostol. Ka bor jong ka jingduai. - 176. To map ia la ki hymmen-ki-para. Ka pharshi shaphang u shakri bym-isynai.

4. Ka jingleit sha ka Jingkhawai jong ka Jingkyutang ia ka Tempel 179

177. Ha Samaria: Ym shym la pdiang ia u Krist. - 178. Ka jingkhut ia ki laingut. Kumno ban bud ia u Krist. - 179. Ha Peria: U phah ia ki hynñiewphew-ar ngut ki Synran. - 180. Kordit ia pha Korosain. Bethsaida Kapharnaum. - 181. Jar uba sngap ia phi u sngap ia Nga. - 182. Ki synran ki wan phai. - 183. Ka jingkmien jong ka Dohnud u Jisu. - 184. Ka Pharshi shaphang u nong-Samaria babha. - 185. Ha Bethania. Ka Martha bad ka Maria. - 186. Ha lum Olib: Ka rukom had ka bor jong ka jingduai. - 187. Ha Jerusalem. "Manga bad u Kpa Ngi long shitylli."

5. U Jisu u phai biang sha Peria 190

188. U Krist U beh ia u ksuid. Ki jingtuitsniew jong ki nongshun jong U. - 189. Ka jinglong bakhatduh jong uta u briew ka kham sniew ban ia kaba myn-

shuwa. - 190. Suk ka kpoh kaba la pun ia Me. - 191. Ka dak-ka-shin jong u Jonas, u nongiatuhlypa. - 192. Ka khmat ka sharak jong ka met. - 193. U Krist U pynrem ia ki Pharisi bad Sadusi ha ing jong uwei u Pharisi. - 194. U thiat jong ki Pharisi, ne ka jingarsap jong ki. - 195. Sumar na ka jingklwan-lalot. Ka Pharshi shaphang u 'riewspah babiej. - 196. Wat diaw na ka bynta la ka jingim. - 197. Ka pharshi shaphang ki shakri basharai. - 198. Ka pharshi shaphang u Sordar ba lah ban shaniah bad u shakri hym lah ban shaniah. - 199. Ki jingkren bapher. Ki dak-ki-shin jong ka por. - 200. Ha Peria: Ka jingdonkam jong ka jingkylla jingmut; ka pharshi shaphang u Diengdumbur balyng-ki. - 201. Ka nongpang. - 202. Ka pharshi shaphang u symbai 'Tyro bad u Thiat.

6. Ka jingleit sha Judia 203

203. Ha ka lynti sha Jerusalem. Kiba la jied. 204. Hajan Jerusalem. Ki jingbyrngem jong u Herod. "Jerusalem. Jerusalem!". - 205. Ha Jerikho: u Krist U pynkoit ia u nongpang ha ing jong u Pharisi. - 206. Ka jingkyntu sha ka jingsngewrit bad ka jingieid. - 207. Ka pharshi shaphang ka jingkhawai-miet. - 208. Ban buid ia u Krist dei ban kyntait lut baroh. Ka pharshi shaphang ka kut bad shaphang u syiem. - 209. Ka pharshi shaphang ka mluh. - 210. Ka pharshi shaphang ka 'langbrot ba la jah bad ka drakhma ba la jah. - 211. Ka pharshi shaphang u khun pynsywa. - 212. Ka pharshi shaphang u sordar bymhok. - 213. U kynteit ia ki Pharisi bakhwan. - 214. Ka pharshi shaphang u riewspah bad u Lasarus. - 215. U Lasarus u iohpang bad u iap. - 216. Ka jingsngewsih jong ka Martha bad ka Maria. - 217. U Lasarus u mihpat. - 218. Ki rangbah ki iakut-jingmut ban pyniap noh ia u Jisu. - 219. U Krist u phet sha Ephrem. - 220. Sumar ban ym pynthut. Ka jingmap. - 221. Ka jingngeit. "Ngi long ki shakri bymlarkam."

7. Sha Jerusalem ha ka Niam ka Jinglait bakhatduh 222

222. Ha lynti sha Jerusalem. Shiphewngut kiba sa-
ñianglyngkut. - 223. Lano kan wan ka Hima jong u
Blei? - 224. Ka pharshi shaphang u nongbishar bym-
hok bad ka 'riewkynthei. - 225. Ka pharshi shaphang
u Pharisi bad u Nongkhrong. - 226. Ha Peria. - Ka
Jingteh-shongkurim bymlait shuh. - 227. U Krist U
kyrkhu ña ki khynnah. - 228. U Samla bariewspah. -
229. Ka Jingmynsaw jong ka spah. Ka bainong jong
ka Jingkyrduh. - 230. Ka pharshi shaphang ki nong-
trei ha ka brisoh. - 231. Hajan Jerusalem. Ka jing-
iathuhlypa ka balai shaphang ka jingshah-shitom. -
232. Ka jingkwah pawkhmat jong ki khun u Sebedi.
233. U Krist U wan ha Jerikho bad u Sakheus u
pdiang sngewbha ña U. - 234. Ka pharshi shaphang
ki Sbai-rupa. - 235. La pynkoit arngut ki matlah. -
236. Ha Bethania. Ka Maria ka pynsleh ña u Trai.

KA BYNTA KA BALAI KA JINGURLONG

Ka Lynnong I. Ka jingsdang jong ki Jingsha-
shitom 243

1. Ka sngi nyngkong jong ka taiew, 10 ta-
rik u bnai Nisan 243

237. U Jisu U rung ha Jerusalem. - 238. U Trai U ñam
na ka bynta ka Jerusalem. - 239. U Krist U rung ha ka
nongbah bad hapoh ka tempel.

2. Ka sngi ba-ar jong ka taiew, 11 tarik u
bnai Nisan 248

240. U tim ña u Dieng-dumbur. - 241. U Krist U beh
na tempel ña ki nongdie-nongthied. - 242. Ki jentil
kiba kwah ban iohi ña u Krist.

3. Ka sngi balai jong ka taiew, 12 tarik u
bnai Nisan 251

243. U dieng-dumbur ba-tram. Ka bor jong ka jing-ngeit bad jong ka jingduai. - 244. "Da ka bor aiü." 245. Ka pharshi shaphang arngut ki khun ba la phah sha ka brisoh. - 246. Ka pharshi shaphang ka brisoh. - 247. Ka pharshi shaphang ka jingkhawai shongkurim jong u khun syiem. - 248. Ka khajna ha u Kaisar. - 249. Ka jingkylli ki Sadusi shaphang ka jingmihpat. - 250. Ka hukum bakhraw. - 251. U Krist U long u Khun bad u Trai jong u Dabid. - 252. Sumar na ki Nongthoh bad ki Pharisi. - 253. Ka jingïathuhlypa shaphang ka jingjot jong ka Jerusalem. - 254. Ka shiteng-peisa jong ka 'riewkynthei. - 255. Ka jingbymngeit jong ki Ju.

4. Ka jingpynsluotom bad ka jingïap. Ka jingïathuhlypa shaphang ka jingjot jong ka Jerusalem bad ka jingwai jong ka pyrthai 266

256. Ka jingjot jong ka tempel. Ha lum Olib. - 257. Ki dak-ki-shin kiban paw shuwa ka jingjot jong ka tempel bad jong ka nongbah. - 258. Ka Jingjot jong ka tempel had ka nongbah. - 259. Ki dak kiban paw shuwa ka jingwan ba-ar jong u Krist. - 260. Ka Jingwan jong u Khun u briew. - 261. Ka por jingjot jong ka Jerusalem. - 262. Ka por jong ka jingwan ba-ar jong u Krist. - 263. To sharail Ka pharshi shaphang ka Jynriam bad shaphang u Nongtuh. - 264. U Shakri ba-iaineh bad u Shakri hymiaineh. 265. Ka pharshi shaphang ki 'theisotti. - 266. Ka pharsi shaphang ki Talen. - 267. Ka jingbishar bakhatduh. - 268. Ka kam jong u Krist ha kine ki sgni bakhatduh.

5. Ka sngi ba-saw jong ka taiew, 13 tarik u bnai Nisan 278

269. Ka jingïasylla jong ki Ju bad ka jingshetkylla jong u Judas.

6. Ka sngi basan jong ka taiew, 14 tarik u bnai Nisan 279

270. Ka jingpynkhreh ia ka jingkhawai-miet bakhatduh.

7. Ka Jingkhawai Paskha bad ka Eukharis Bakhuid. 280

271. Ka jingsdang jong ka jingkhawai-miet. - 272. Ka jingiasaid jong ki Apostol. - 273. U Trai U sait-kjat ia la ki synran. 274. U Krist U iathuh mano u nong-shetkylia ia U. 275. Kaba buh ia ka Eukharis Bakhuid.

8. Ka ktien bakhatduh jong u Krist lia la ki synran 287

276. Ka burom jong u Krist. Ka hukum bathymmai. - 277. U Krist U iathuhlypa ia ka jinglen jong u Petrus. - 278. Ki ktien pyntngen: "Ngan wan biang." - 279. Nga long ka Lynti. - 280. Ki soh jong ka jing ngeit. - 281. U Nongpyntngen. - 282. "Ngam iehnoh khunswet ia phi." - 283. Ia ka jingsuk jong Nga. Nga ai ha phi. - 284. U Diengwaiñ bad ki Tnat. - 285. Ka hukum jong ka jingieid. - 286. Ka jingisih jong ka pyrthei. - 287. Ka kam jong u Mynsiem Bakhuid. - 288. "Phin tohi biang ia Nga". - 289. "Nga la jop ia ka pyrthei." - 290. U Krist U duai na ka bynta ia lade. - 291 U Krist U duai na ka bynta la ki Synran. - 292. U Krist U duai na ka bynta ka Ba-lang.

Ka Lynnong II. Ka Jingshashitom jong u Trai jong ngi. 302

1. Ha ka kper 302

293. U poi ha ka kper. - 294. U Krist U duai bad U pisa. - 295. U Krist U iakynduh bad u Judas. - 296. U Judas bad ki shipai. - 297. Ka jingdoh jong u nong-shetkylia. - 298. Ki shipai ki kyllon ha madan. - 299. U Petrus u pom ia u Malkhus. - 300. U Krist U pynrem ia la ki nongshun. - 301. Ia kem ia u Krist. Ki synran ki phet.

2. Ka Bishar Niam. 309

302. U Krist ha khmat u Annas. - 303. U Krist bad u Kaiphas. - 304. U Krist U shah-rkhie-beiñ. - 305.

Ka Jinglen banvngkong jong u Petrus. - 306. Ka jinglen ka ba-ar. - 307. Ka jinglen balai. 308. La pynskhem ia ka rai. 309. U Juda u phasi ia lade - 310. Ka Lyngkha Snam.

3. Ka Bishar Slimong 316

311. U Pilatus bad ki nongmudui. 312. Ka Jingmudui jong ka doibar Ju. 313. Ka jingtohkit jar-jar. 314. Sa kiwei pit ki Jingmudui. 315. U Krist hi khmat u Herod. 316. "Ngan sympat ia U". 317. "Barabbas ne u Jisu" - 318. Ka tnga jong u Pilatus. 319. "Pillat hi ngi ia u Barabbas" - 320. "Ngan leh kunino ia u Jisu?" - 321. Li pillat ia u Barabbas. 322. U Krist U shuh-sympat. Ka panngiat shiah. 323. "Ngim shem daw tnei ha U." 324. Ki bor u Pilatus. - 325. U Pilatus u wad buit ban pillat ia u Jisu. - 326. Ki Jingtai ban sahnuphni.

4. Ka Jingpyuslutom bad ka Jingiap . . 327

327. U Jisu U kiew sha Kalbari. 328. Ki kynthei Jeusalem. - 329. Ha Golgotha. - 330. Ka Jynthoh ha khlich ka diengphna. 331. Ki jaiñ jong u Jisu. - 332. Ki Jingkren beñ ia u Jisu. 333. U Nongtuh uba kylla-jingmut. 334. Ka Kmie jong u Krist bad ka Kmie jong ngi ruh. 335. Ki kten bakhatduh. 336. "Ka la dep" - 337. Ka Pyrthei Mariang ka iam-briew. - 338. "Shisha Une U dei u Khun jong u Blei" - 339. Ki lok jong u Jisu. 340. U Shipu u dung ia ka krung u Jisu. 341. Kiba pynhai ia ka met jong u Jisu. 342. Li tep ia ka met jong u Krist. - 343. Ki kynthei ki pynkhreh ia ki jingkyllan bad jingsleh. - 344. Ki nongaphira jyntep.

Ka Lynnong III. Ka Jingmihpat jong u Jisu 339

1. U paw ha Judia 339

345. Ki kynthei bad arngut ki synran ki leit sha jyntep. - 346. U Angel u kren ia kita ki kynthei. - 347. Kita ki kynthei ki iaphet noh. - 348. U Petrus bad

u Yoannis ki wan sha jyntep. - 349. U Krist U paw ha ka Maria Magdalena. - 350. U Krist U paw ha ki kynthei, kiba leit iathuh ha ki Apostol ia kaba ki la iohi. - 351. Ki shipai ki bam-tyngka. - 352. U Krist U paw ha lynti sha Emmaus. - 353. U Krist U paw ha ka jingialang jong ki Apostol. - 354. Ka Jingpaw ha u Thoma.

2. U paw ha Galileia 350

355. U Jisu U paw ha duriaw Tiberia. - 356. U Krist U aiti ia la ki 'langbrot bad ki blang ha u Petrus. Ka jingiap jong u Petrus. - 357. U Krist U paw ha u lum Galileia ha ki Apostol. - 358. Kiwei pat ki jingpaw jong u Jisu.

3. Ka Jingkiew u Jisu sha bneng. . . . 355

359. Ki Jingkyntu bakhatduh. - 360. U Krist U kiew sha bneng. 361. Ka Jingpynkut jong u Ioannis.

KA 'TIEN-LAMPIIRANG
JONG
KI NONGTHOH GOSPEL

1. Ka 'tien-lamphrang jong u Lukas Bakhuid
Lk. 1:1-4.

Namar don bun¹ shisha kiba la shim-ti ban thoh ryntih ia ka jing'iathulkhana shaphang kiei-kiei ia kiba la pyndep hapteng jong ngi, kumba ki la ai-pateng ha ngi, kito kiba naduh myn-nyngkong kiba la iohi bad la long ki shakri jong kata ka ktien : ka la ibit ha nga ruh, ynda nga la tohkit bniah ia kiei-kiei baroh naduh basdang. ban thoh ryntih ha me, ko Theophilus babha tam, ha men dup tip ia ka jingshisha jong kito ki ktien. ia kiba la hikai ha me.

2. Ka 'Tien-lamphrang jong u Ioannis. Ka Ktien
ka la man-doh. Ioan. 1:1-18.

Nyngkong-nyngshap la don ka Ktien,²
Bad ka Ktien ka la don bad u Blei,
bad u Blei u la long kata ka Ktien.

(1) La don katto-katne ki jingthoh lyngkhot shaphang ka jing-im jong u Jisu, hynrei hapteng jong ki la don ruh kibym da thikna bha.

(2) U Blei uba long u Khun.

Kane Ka la don naduh nyngkong-nyngshap bad
u Blei.

Da Ka la thaw ïa kiei-kiei baroh, bad khlem
Ma-Ka ym shym la thaw eiei ruh kaba la thaw.

Ha Ka hi la don ka jingim,

bad kata ka jingim ka la long ka jingshai jong
ki briew.

Bad kata ka jingshai ka la shai ha ka jingdum,
bad ki jingdum kim lah ban klum ïa Ka.

La don u briew ba la phali na u Blei.

Ka kyrteng jong u ka la long u Yoannis.

Une u la wan ïa ka jingsakhi

ba un dup ïeng-sakhi ïa kata ka jingshai.

ba baroh kin ïoh ban ngeit da u.

Ym dei ma-u kata ka jingshai.

Kata ka la long ka jingshai bashisha.

Hynrei ba un dup ïeng-sakhi ïa ka jingshai.

Kaba pynshai ïa u briew baroh

uba wan ha kane ka pyrthei.

Ka la don ha ka pyrthei,

bad ïa ka pyrthei la thaw ma-Ka.

bad kata ka pyrthei kam ithuh ïa Ka.

Ka la wan ha la ki jong,

bad kita ki jong Ka kim pdiang ïa Ka.

Hynrei kat kiba la pdiang ïa Ka,

Ka ai ha ki ïa ka bor ban long ki khun jong u Blei.

ha kito kiba ngeit ha ka kyrteng jong Ka :

ïa kiba la kha, ym na ka snam,

lymne na ka mon jong ka doh,

lymne na ka mon jong u briew,

hynrei na u Blei.

Bad kata ka **Ktien** ka la man-doh,

bad Ka la sah ha ngi ;

bad ngi iöhi ia ka burom¹ jong Ka.
(kata ka burom kaba long kum ka jong u Khun
bakha-marwei na u Kpa.)

Kaba dap da ka jingaiei bad ka jingshisha.

U Ioannis u sakhi ia U,

bad u pyrta, u ong :

“Dei shaphang une uba nga la ong :

Uta uban wan hadien jong nga,

u la long mynshuwa ia nga,

naba u la shuwa ia nga.”

Bad na ka jingdap jong U

ngi baroh ngi la iöh-pdiang,

bad ia ka jingaiei halor ka jingaiei.

Naba ia ka aiñ la ai u Moses,

ia ka jingaiei bad ka jingshisha la pynlong u Jisu
Krist.

Ym pat don mymo-mynmo ruh uba la iöhi ia
u Blei ;

U Khun ba la kha marwei hi,

Uba don ha ka shadem jong u Kpa.

U la pynbna.

(1) Ka burom jong u Krist kaba u Ioannis nongthoh Gospel.
(Ebanjelis) u iöhi ha u Lam Thabor, mynba u Jisu u la kella-

KA BYNTA BANYNGKONG

KA GOSPEL

JONG

KA JINGLONG-KHYNNNAH

3. U Angel u pynbna ia ka jingkha ia u Yoannis Bakhuid. Lk. 1:5-25.

Ha ki sngi jong u Herod, u syiem Judia, la don uwei u lyngdoh uba kyrteng u Sakharias, na ka liang u Abias, bad ka tnga jong u na ki khun jong u Aaron, kaba kyrteng ka Elisabeth. Te baroh arngut ki la long ki bahok ha khmat u Blei, ki ia'id khlem budnam ha ki hukum bad ki hok baroh jong u Blei. Bad kim shym la don khun, naba kata ka Elisabeth ka la long ka balyngki, bad baroh arngut ki la noh la ki sngi-ki-ryta.

Te ka la jia, haba u dang pyndep katkum la ka pali, ia la ka kam-lyngdoh ha khmat u Blei, kumba ju dei ka dustur lyngdoh, la hap bynta ha u ban thang jingiwbihi, haba u rung ha ka tempel¹ jong u Trai ; bad u paidbah baroh u nang iaduai habar, ha ka por jingiwbihi. Te u Angel jong u Trai u la paw ha u, u ieng ha kamon jong ka duwan jingiwbihi. Bad u Sakharias haba u io'hi ia u, u la pisa jingmut, bad ka jingtieng ka la tyллеp ia u. Hyn-rei u Angel u la ong ha u :

“Ko Sakharias, wat sheptieng, naba ia ka jing-duai jong me la shah-shkor ; bad ka tnga jong me ka Elisabeth kan punkhun ha me, bad men khot

(1) Ka jakakytang ha kaba don ka Duwan thang jingiwbihi. Kane ka la long ka ieng ha kaba ki Ju ki leit duai bad knia ha u Blei.

kyrteng ia u, u Ioannis ; bad ka jingkmén bad ka jingsngewbha kin long ha me, bad bun kin iakmén ha ka jingkha ia u. Naba un long u bakhraw ha khmat u Trai ; bad un ym dih ia ka waiñ bad ka jingdih bapynbuaid ; bad naduh kpoh ka kmie, yn pyndap ia u da u Mynsiem Bakhuid ; bad bun na ki khun Israel un pyngylla sha u Trai u Blei jong ki. Bad ma-u un leit ha shuwa jong U da ka mynsiem bad ka bor jong u Elias, ha un dup pyngylla sha ki khun, ia ki dohnud jong ki kpa, bad ia ki bymgeit sha ka jingsian ki bahok, ban pyngkreh u paidbah bajanai ia u Trai”.

Te u Sakharias u la ong ha u Angel :

“Nangno ngan tip ia kane ? Namar nga la tym-men, bad ka tnga jong nga ka la noh la ki sngi-ki-ryta”.

U Angel pat u phai-ktien, u la ong ha u :

“Nga dei u Gabriel, uba ieng ha-khmat u Blei ; bad la phah ia nga ban kren ha me bad ban ai khubor babha ha me. Te hakhmih men teh-thylliej, bad men ym lah ban kren haduh ka sngi ba kine kiei-kiei kin jia, namar mem shym la ngeit ia ki ktien jong nga, ia kiba yn pyndep ha ka ia jong ki”.

Bad u paidbah u la dang ia-ap ia u Sakharias : bad u la ialyngngoh ha u slem hapoh ka tempel. Hynrei haba u la mih, um shym lah ban kren ha ki, bad ki la sngewthuh ha u la ioh-i-paw ha ka tempel. Te u la shu pyni dak ia ki, bad u la sah khlem nang kren. Te ka la jia, ynda ki sngi treikam jong u ki la dep, u la leit noh sha la ing. Bad hadien kito ki sngi, ka Elisabeth, ka tnga jong u, ka la punkhun, bad ka la buhrieh ia lade san bnai, ka ong :



*"Khuhlei, kaba dap da ka jingaiei, u Trai
u don bad Pha, la kyrkhu ia Pha napdeng
ki kynthei."*

"Kumne u Trai u la leh ïa nga ha ki sngi kiba U la bit ban weng noh' ïa ka jingñiewbein ïa nga hapdeng ki briew".

4. U Angel u pynbna ïa ka jingkha ïa u Jisu.

Lk. 1:26-38

Te ha u bnai u bahynriew, la phah na u Blei ïa u Angel Gabriel sha ka shnong jong ka Galileïa, kaba kyrteŋ Nasareth, sha ka "Theisotti kaba la ïateh-ktien bad u briew uba kyrteŋ u Joseph, na ka ïng u Dabid, bad ka kyrteŋ jong kata ka "Theisotti ka la long ka Maria. Bad ynda u Angel u la rung, u la ong ha ka :

"Khublei, kaba dap da ka jingaiei : u Trai u don bad pha ; la kyrkhu ïa pha napdeng ki kynthei". Ynda ka la iohsngew. ka la pisa-jingmut ïa kata ka jingong jong u, bad ka la pyrkhat ka jingkhublei aïu kum kane. Bad u Angel u la ong ha ka :

"Ko Maria, wat sheptieng, naba pha la shem jingaiei ha u Blei ; hakhmih phan pun ha ka kpoh, bad phan kha ïa u khun, bad phan khotkyrteŋ ïa u, u Jisu. Une un long u bakhraw, bad yn khot u Khun jong u Bahakhlieh tam, bad u Trai u Blei un ai ha U ïa ka khet jong u Dabid u kpa jong U : bad un synshar junom la-junom ha ka ïng jong u Jakob, bad ka hima jong U kan ym don jingkut." Te ka Maria ka la ong ha u Angel :

"Da kumno kane kan long, namar ngam ithuh u briew?"

(1) Ban ym don khun don ksiew, ki ju ki khein ba ka long ka jingpynshitom u Blei bad ka jingjah-burom hapdeng jong ki hi.

Bad u Angel u la phai-ktien, u la ong ha ka .

"U Mynsiem Bakhuid un hiar ha pha, bad ka bor jong u Bahakhlieh tam kan kah-syrngiew ia pha. Namarkata keiñ, ia uta u Bakhuid, uba yn kha na pha, yn khot u Khun jong u Blei. Bad hakhmih ka Elisabeth, ka kur jong pha, ma-ka ruh ha la jinglong-tymmen ka la pun u khun-shynrang ; bad une u long u bnai u bahynriew ha ka, ia kaba la khot ka halyngki ; namar ym don ka ktien kabyin lah long ha u Blei."

Te ka Maria ka la ong :

"Hakhmih ka shakri jong u Trai, to kan long ha nga katkum ka ktien jong Me."¹

Te u Angel u la leit noh na ka.

5. Ka Maria ka leit-jngoh ia ka Elisabeth.

Lk. 1:39-45.

Te ka Maria ka la ieng ha kita ki sngi, ka la leit kyrkich sha ri lum, sha ka shnong u Juda.²

Bad ka la rung ha ka ing u Sakharias, bad ka la khublei ia ka Elisabeth. Bad ka la jia ba, haba ka Elisabeth ka la iohsngew ia ka jingkhublei jong ka Maria, i khunlung ha ka kpoh jong ka i la kyn-jih. Bad ka Elisabeth ka la dap da u Mynsiem Bakhuid : bad ka la pyrta da ka sur bajam, bad ka la ong :

(1) Naduh kane ka khyllipmat kata ka ktien ka la man-doh. u Blei U la shim ia ka jinglongbriew, bad U long u Blei bashisha bad u briew bashisha.

(2) Ka Maria ka la dei ban raid da ka kjat kumba laisngi.

“La kyrkhu ïa pha napdeng ki kynthei, bad la kyrkhu ïa u soh ka kpoh jong pha. Bad hangno kumne ïa nga, ba ka kmie jong u Trai jong nga ka wan sha nga? Naba ha-khmih, nga tang shu ïoh-sngew ha la ki shkor ïa ka ktien jingkhublei jong pha, i khunlung ha ka kpoh jong nga i kynjih da ka jingkmien. Bad suk ma-pha kaba la ngeit, naba ïa kita kiekie kiba u Trai u la ong ha pha, yn pyndep.”

6. Ka jingrwai jong ka Maria Theisotti. Lk. 1:46-55.

Bad ka Maria ka la ong :

“Ka dohnud jong nga ka pynkhraw ïa u Trai, bad ka mynsiem jong nga ka risa ha u Blei u Nongpynim jong nga.

“Namar u la ñiew-burom ïa ka jinglongrit jong ka shakri jong U : namarkata, hakhmih, naduh mynta ki pateng-byndiew baroh kin khot ïa nga ka ba-la-kyrkhu.

“Naba uta u badonbor u la leh ha nga ïa kiekie ki bakhraw, bad ka kyrteng jong u ka bakhuid.

“Bad ka jingisynei jong u ka long pateng la pateng, ha kito kiba sheptieng ïa u.

“U la pyni ïa la ka bor da ka ksangkti la jong : U la pynsakma ïa ki basarong ha ka jingpyrkhat jong ka dohnud jong ki.

“Ïa ki bakhraw-bor u la pynhiar na ka khet, bad ïa ki rit-ki-ria u la kyntiew.

“Ïa ki bathngan u la pyndap da kiekie-kie ki babha : bad ïa ki bariewspah u la phah thylli.

“U la kynthup ïa u Israel, u shakri jong U, ha U kynmaw ïa ka jingisynei jong U.

"Kumba u la kren ha ki kpa jong ngi, ha u Abraham bad ha u symbai jong u junom-junom."

7. Ka jingpha ia u Yoannis Baptis. *Lk. 1:56-66.*

Te ka Maria ka la sah bad ka kumba lai bnai ; bad ka sa leit phai noh sha la ing. Te ka por ha ka Elisabeth kan kha ka la pura, bad ka la kha ia u khunshynrang. Bad ki marjan-marpa bad ki kur-ki-kha jong ka ki la iohsngew ba u Trai U la pynkhraw ha ka ia ka jingisyncei jong U, bad ki la iakme i lem bad ka. Bad ka la jia ha ka sngi ka baphra, ki la wan ban ot-she ia u khunlung, bad ki la jer ia u da ka kyrteng jong u kpa jong u, u Sakharias. Te ka kmie ka jubab, ka la ong :

"Ym dei kumta hynrei yn khot Yoannis ia u." Bad ki la ong ha ka :

"Ym don ha ki kur-ki-kha jong pha, uba la khot da kane ka kyrteng."

Te ki la pyui dak ia u kpa jong u, kumno u kwah ban khot ia u. U la pan ia ka lyntang lyngkniap, u la thoh u ong . "Ka kyrteug jong u ka long ioannis." Bad baroh ki la lyngngoh ngaiñ. Markunta hi ka shyntur jong u ka la plie, u thylliej jong jong u ruh, bad u la kren, u iarah ia u Trai. Te ki marjan-marpa jong ki baroh ki la sngewsheptieng ; bad kine ki ktien baroh ki la par kylleng ka-ri lum Judia : bad baroh kito kiba la iohsngew ia ki, ki buh khop¹ ha la ka dohnud, ki ong :

"Une u khunlung, phi tharai, un long uba kumno ? Naba ka kti jong u Trai ka la don lem bad u."

(1) Ka ru'om kren ki Ju kaba mut ban puson bha ha la ka mynsiem.

8. Ka jingrwai iaroh jong u Sakharias. Lk. 1:67-80.

Bad u Sakharias u kpa jong u, u la dap da u Mynsiem Bakhuid, bad u la iathuhlypa, u ong :

"Yn iaroh ia u Trai u Blei jong u Israel, naba U la wan jngoh, bad U la pynlong ka jingsiewspah ia la u paid; bad U la pynmih ha ngi ka reng¹ jong ka jingpynim ha ka ing u Dabid, u shakri jong U, kumba U la kren da ka shyntur jong ki nongiatuhlypa bakhuid jong U, kiba long naduh nyngkong-nyngshap : ka jinglait-im na ki nongshun jong ngi, bad na ka kti jong kito baroh kiba isih ia ngi : ban leh isynei ia ki kpa jong ngi, bad ban kynmaw ia ka jutang bakhuid jong U.

"Ka jingsmai ia kaba U la smai ha u Abraham u kpa jong ngi, ba Un ai ha ngi, ba ynda la lait na ka kti jong ki nongshun jong ngi, ngin lah, khlem sheptieng, ban dup shakri ia U, ha ka jingkhuid bad ka hok hakhmat jong U, baroh ki sni jong ngi.

"Bad me pat, ko khun, yn khot ia me u nongiatuhlypa jong u Bahakhlieh tam : naba men leit ha shuwa ka khmat jong u Trai ban pynkhreh ia ka lynti-syngkien jong U, ban ai ia ka jingtip jong ka jingpynim ha ki paid jong U, na ka bynta ka jingmap ia ki pop jong ki ; da ki khyllai jong ka jingisynei u Blei jong ngi, da kiba u Mihsngi na jrong U wan jngoh ia ngi : ban pynshai ia kito kiba shong ha ka jingdum bad ha ka syrugiew ka jingiap, ban ialam ia ki kjat jong ngi sha ka lynti ka jingsuk."

(1) Ka jingkhlañ, ka bor kaba pynim ia ngi.

Te u khunlung u la nangsán, bad nangkhlaín ha ka mynsiem : bad u la don ha ri kynjah haduh ka sngi jong ka jingpaw jong u ha Israel.

9. U Joseph u shim ía ka Maria. Mt. 1:18-25.

Te ka jingkha ía u Krist ka la long kumne : Ynda ka kmie jong U, ka Maria ka la íateh-ktien bad u Joseph, shuwa ba kin íapoi, la shem ba ka la pun na u Mynsiem Bakhuid. Kunta u Joseph u tnga jong ka. ba u long u bahok, bad um kwah ban thad-rong ía ka, u la mut ban pyllait-noh ía ka jar-jar. Hynrei katba u la dang pyrkhat shaphang kine kiei-kiei, hakhmih u Angel jong u Trai u la paw ha u haba íohthiah, u ong :

“Ko Joseph, ko khun u Dabid, wat khaweit ban shimti ía ka Maria, ka tnga jong me, naba ita iba ka la seng I long na u Mynsiem Bakhuid. Te kan kha u khun bad men khot-kyrteng Jisu ía U, naba Un pyllait ía la ki paid na ki pop jong ki : ”

Bad ía kane baroh la leh ban íoh pyndep ía kaba u Trai u la kren da u nongíathuhlypa, u ong (Is. 7 : 14) :

“Hakhmih, ka Theisotti kan punkhun bad kan kha ía u khun-shynrang, bad kin khot-kyrteng Emanuel ía u, kaba mut haba la batai, u Blei lem bad ngi.”

Haba u Joseph u la khie na ba thiah, u la leh kumba u Angel jong u Trai u la bthah ía u, bad u la shimti ía la ka tnga. Bad um shym la ithuh¹ ía ka haduh ba kan da la kha ía u khun phrang-sngi jong ka ; bad u la khot kyrteng Jisu ía U.

(1) Ka Maria bad u Joseph ki la sah sotti borabor haduh ka jingiap.


10. Ka jinghiar-pateng jong u Jisu Krist.

Mt. 1:1-17.

Lk. 3:23-38.

Ka Kitab jinghiar-pateng jong u Jisu Krist, u khun u Dabid, u khun jong u Abraham: U Abraham u la pynkha ïa u Isaak, bad u Isaak u la pynkha ïa u Jakop. Bad u Jakop u la pynkha ïa u Judas bad ïa ki hymmen-para jong u. U Judas pat u la pynkha ïa u Phares bad ïa u Sara na ka Thamar. U Phares pat u la pynkha ïa u Esron. U Esron pat u la pynkha ïa u Aram. U Aram pat u la pynkha ïa u Aminadab. U Aminadab pat u la pynkha ïa u Naason. U Naason pat u la pynkha ïa u Salmon. U Salmon pat u la pynkha ïa u Bus na ka Rahab. U Bus pat u la pynkha ïa u Obed na ka Ruth. U Obed pat u la pynkha ïa u Jesse. U Jesse pat u la pynkha ïa u Syiem Dabid.

Te u Jisu hi haba u sdang u la long kumba laiphew snem ka ryta: U khun, kumba la tharai, jong u Joseph, uba na u Heli, uba na u Mathat, uba na u Lebi, uba na u Melkhi, uba na u Janne, uba na u Joseph, uba na u Mathathias, uba na u Amos, uba na u Nahum, uba na u Hesli, uba na u Nagge, uba na u Mathathi, uba na u Mathathias, uba na u Semei, uba na u Joseph, uba na u Juda, uba na u Ioanna, uba na u Resa, uba na u Sorobabel, uba na u Salathiel, uba na u Neri, uba na u Melkhi, uba na u Addi, uba na u Kosan, uba na u Helmadan, uba na u Her, uba na u Jisu, uba na u Elieser, uba na u Jorim, uba na u Mathat, uba na u Lebi, uba na u Simeon, uba na u Judas, uba na u



U Syiem Dabid pat u la pynkha ïa u Solomon na kata kaba la long ka tnga jong u Uria. U Solomon pat u la pynkha ïa u Roboam. U Roboam pat u la pynkha ïa u Abias. U Abias pat u la pynkha ïa u Asa. U Asa pat u la pynkha ïa u Josaphat. U Josaphat pat u la pynkha ïa u Joram. U Joram pat u la pynkha ïa u Osias. U Osias pat u la pynkha ïa u Joatham. U Joatham pat u la pynkha ïa u Akas. U Akas pat u la pynkha ïa u Esekias. U Esekias pat u la pynkha ïa u Manasses. U Manasses pat u la pynkha ïa u Amon. U Amon pat u la pynkha ïa u Josias. U Josias pat u la pynkha ïa u Jekonias bad ïa ki hymmen-ki-para jong u ha ka jingringmraw sha Babilon.

Bad hadien ka jingringmraw sha Babilon, u Jekonias u la pynkha

Josep, uba na u Jona, uba na u Eliakim, uba na u Melea, uba na u Menna, uba na u Mathatha, uba na u Nathan, uba na u Dabid, uba na u Jesse, uba na u Obed, uba na u Bus, uba na u Salmon, uba na u Naason, uba na u Aminadab, uba na u Aram, uba na u Esron, uba na u Phares, uba na u Judas, uba na u Jakob, uba na u Isaak, uba na u Abraham, uba na u Thare, uba na u Nakhor, uba na u Sarug, uba na u Ragan, uba na u Phaleg, uba na u Heber, uba na u Sale, uba na u Kainan, uba na u Arphaksad, uba na u Sem, uba na u Noa, uba na u Lamekh, uba na u Mathusalem, uba na u Henok, uba na u Jared, uba na u Malalil, uba na u Kainan, uba na u Henos, uba na u Seth, uba na u Adam, uba na u BLEI.

(nang bteng u Matheus)

ia u Salathiel. U Salathiel pat u la pynkha ia u Sorobabel. U Sorobabel pat u la pynkha ia u Abiud. U Abiud pat u la pynkha ia u Eliakim. U Eliakim pat u la pynkha ia u Asor. U Asor pat u la pynkha ia u Sadok. U Sadok pat u la pynkha ia u Akhim. U Akhim pat u la pynkha ia u Eliud. U Eliud pat u la pynkha ia u Eliasar. U Eliasar pat u la pynkha ia u Mathan. U Mathan pat u la pynkha ia u Jakob. U Jakob pat u la pynkha ia u Josep, u tnga jong ka Maria, na kaba la kha ia u Jisu, ia uba la khot u Krist.

Kumta ki pateng baroh naduh u Abraham haduh u Dabid, ki long khatsaw pateng. Bad naduh u Dabid haduh ka jingringmraw sha Babilon, ki long khatsaw pateng; bad naduh ka jingringmraw sha Babilon haduh u Krist ki long khatsaw pateng.

11. Ka Jingkha ia u Trai : Lk. 2:1-7.

Te ha kito ki sngi ka la jia ba la mih ka hukum na u Kaisar Augustus ban thoh khana-samari ia ka pyrthei baroh. Ia kane ka khana-samari banyngkong la pynlong da u Kirinus, u lat jong ka Syria. Bad baroh ki la leit ban ai jingkheifi ia lade-lade ha shnong la jong. Te u Josep ruh u la kiew na Galileia, na ka shnong Nasareth sha Judia, sha ka shnong u Dabid, kaba la khot Bethlehem, namar u la long na ka ing bad ka jait u Dabid, ban ai jingkheifi ryngkat bad ka Maria, ka tnga iatehktien jong u, kaba punkhun. Te la jia, haba ki dang don hangta, ki sngi ba kan kha, ki la pura. Bad ka la kha ia la u khun-phrangsngi, bad ka la sop



*"Ka la kha ia u Khun nyngkong...
bad ka la pynthiah ia U ha ka shyngoid."*

ia U da ki jaiñsop, bad ka la pynthiah ia U ha ka shyngoid,¹ naba ym don jaka ia ki ha ñng-basa.

12. Ka khubor jong ki Angel sha ki Nongaplangbrot.

Lk. 2:8-14.

Te ha kata kajuh ka ri, la don ki nongaplangbrot kiba sharai bad kiba sumar peitngor ia la ka kynhun. Hakhmih ruh, u Angel jong u Trai u la ñeng ha syndah jong ki, bad ka jingthaba jong u Blei ka la thaba sawdong ia ki, bad ki la sheptieng ym don pyrthei shuh. Bad u Angel u la ong ha ki:

“Wat sheptieng, namar hakhmih, nga wan-rah khubor ha phi ia ka jingkmén bakhraw, kaban long ha ki byuriew baroh : naba mynta ka sngi, ha ka shnong u Dabid, la kha ha phi ia u Nongpynim, uba long u Krist u Trai. Bad kane ka dak ia phi : Phin lap ia i khunlung ba la sop da ki jaiñ-sop, bad ba la buh ha ka shyngoid.”

Te markumta hi, la don bad uta u Angel u paid-bah kynhun bneng, uba iaroh ia u Blei bad ia-ong:

“Ka burom ha u Blei sha jrong eh, bad ka jingsuk ha ka pyrthei ha ki briew kiba don ka mon babha.”

13. Ka nguh-ka-dem jong ki nongaplangbrot.

Lk. 2:15-20.

Te ka la jia, ynda kita ki Angel ki la khlad noh na ki sha bneng, kita ki nongaplangbrot ki la ia-ong paraki hi :

(1) Kata ka shyngoid ka la long ka thliew ba la khlong ha kynroh jong ka krem kaba ki jynri ki leit rich ne shongtngen.

“Ya ngin leit sha Bethlehem, bad ngin iakhmih ia kane ka ktien kaba la jia, kaba u Trai u la pyni ha ngi.”

Kumta ki la ia-wan kyrkieh, bad ki la shem ia ka Maria bad ia u Josep, bad ia u khunlung ba la buh ha ka shyngoid. Te haba iöhi, ki la shemphang ia ka ktien kaba la ong ha ki shaphang une u Khynnah. Te baroh kiba la iöhsngew, ki la lyngngoh : bad ia kito kiei kiei kiba ki nongap-langbrot ki la iathuh ha ki. Ka Maria pat, ka la ri khop ia kine ki ktien baroh, ka puson ha la ka dohnud. Kita ki nongap-langbrot ruh ki la leit noh, ki pyn-donburom bad ki iaroh ia u Blei, na ka bynta kito kiei-kiei baroh kiba ki la iöhsngew, bad la iöhi, kumba la iathuh ha ki.

14. Ka jingotsher ia u Krist. *Lk.* 2:21.

Te ynda la dap phra sngi ba yn dup otsher¹ ia u khynnah, la jer-kyrteng Jisu ia U, kaba la jer da u Angel, shuwa ban seng ia U ha ka kpoh.

15. Ka jingaiti ia u Jisu. *Lk.* 2:22-24.

Te ynda la pyndep katkum ka aiñ u Moses, ia ki sngi jingpynkhuid² ia ka, ki la leit-lam ia U sha Jerusalem, ban kyntang ia U ha u Trai: kumba la thoh ha ka aiñ jong u Trai: ‘Ba man u shyn-

(1) Kane ka long ka jinglehniam kaba ki Ju ki pynlong phra sngi hadien ka jingkha ia u khun-shynrang. Da kane ka jinglehniam uta uba shah otsher u kylla long uwci na ki paid jong u Blei.

(2) Sawphew sngi hadien ka jingkhakhun.

rang-briew ba la kha phrangsngi, yn fiew u` bakhuid ha u Trai.' (Eks. 13 : 2; 12 : 15) : bad ban ai jynkñia kat kumba la ong ha ka hukum jong u Trai, shijur ki lyngdkhur, ne artylli ki khun-paro, (Leb, 12 : 8; 5 : 11.)

16. U Simeon nongĩathuhlypa. Lk. 2:25-35.

Te hakhmih, la don ha Jerusalem u briew uba kyrteng u Simeon ; une u briew u bahok bad hariewblei, uba khmih-lynti ãa ka jingpyntngen u Israel, bad u Mynsiem Bakhuid U la don bad u. Bad u la ïoh-ktien na u Mynsiem Bakhuid ba un ym ïohi ãa ka jingiap, lymda u ïohi shuwa ãa u Krist u Trai. Bad da u Mynsiem u la wan sha ka tempel. Te haba ki kmie-ki-kpa jong U ki la wanlam ãa u khunlung Jisu ban dup leh ãa U katkum ka dustur jong ka aifi, u ruh u la kdup ãa U ha la ki ksang'ti, bad u la ãaroh ãa u Blei bad u la ong :

"Ko Trai, mynta Men pyllait-noh ãa la u shakri ha ka jingsuk, katkum ka ktien jong Me ; namar ki khmat jong nga ki la ïohi ãa ka jingpynim jong Me, kaba Me la pynkhreh hakhmat ki bynriew baroh : Ka jingshai ban pynshai ãa ki 'jentil, bad ka burom jong u paid Israel jong Me."

Te u kpa bad ka kmie jong U ki la sngewphylla ãa kine kiei-kiei ba la ong shaphang jong U. Bad u Simeon u la kyrkhu ãa ki bad u la ong ha ka Maria ka kmie jong U :

"Khmih, la buh ãa Une na ka bynta ka jingkylon, bad na ka bynta ka jingmihpat ki babun ha



*"Ki la rah ia U sha Jerusalem ban aiti ia
U ha u Trai."*

Israel, ¹ bad ka dak-ka-shin ba yn leh pyrshah. Bad ka waitlam kan dung syllut ia ka mynsiem jong pha hi, ban dup pynpaw ia ki jingpyrkhat na ki dohnud babun."

17. Ka Anna Nongiathuhlypa. Lk. 2:36-38.

Bad la don ka Anna, ka nongiathuhlypa, ka khun jong u Phanuel, na ka jait Aser ; kaba la slem eh ka ryta, bad ka la im bad la u tnga hynñiew snem naduh ka jinglongsotti jong ka. Bad ka la sah 'riewkynthei haduh phraphew-saw snem; kabym ju mih-noh na ka tempel, ka shakri synñia-sngi, da ki jingshah-jingit bad da ki jingduai: Kane ruh, haba ka wan-lap ha kata ka por, ka la phla ia u Trai; bad ka la kren shaphang jong U ha kito baroh kiba khmih-lynti ia ka jingsiewspah ia u Israel.

18. Ka nguh-ka-dem jong ki 'riewstad. Mt. 2:1-12.

Namarkata, haba la kha ia u Jisu ha Bethlehem Juda, ha ki sngi jong u syiem Herod, hakhmih, ki 'riewstad na ri mihngi ki la wan sha Jerusalem, ki ong :

"Hangno U don, ia Uba la kha u Syiem jong ki Ju ? Naba ngi la iohi ia u khlur jong U ha mihngi, bad ngi la wan ban mane ia U."

Haba u syiem Herod u la iohsngew, u la pisa-jingmut, bad ka Jerusalem baroh ryngkat bad u.

(1) Kito kiba kyntait ia u Krist kin long kiba la rem, hynrei kito kiba ngeit ha U kin lait-im.

Te haba u la lum-lang ia ki rangbah-lyngdoh bad ia ki nongthoh jong u paidbah, u la tohkit na ki hangno ba yn kha ia u Krist. Hynrei ki la ong ha u :

“Ha Bethlehem Juda, naba la thoh kumta da u nongiatuhlypa (Mik. 5 : 2) : Bad pha ko Bethlehem, ka ri u Juda, pham long ka barit tam hapdeng ki bakhraw-batri ka Juda ; naba na pha un mih u Nongialam, uban synshar ia u paid Israel jong Nga.”

Kumta u Herod, da kaba khot jar-jar ia kita ki 'riewstad, u la kylli bniah na ki ia ka por ba uta u khlur u la paw ha ki. Bad da kaba phah ia ki sha Bethlehem, u la ong :

“To khie, bad to kylli bniah shaphang uta u khunlung ; bad ynda phi la shem, to pyntip pat ia nga, ba nga ruh ngan wan mane ia U.”

Ki pat ynda ki la iohsngew ia u syiem, ki la leit noh ; bad hakhmih, uta u khlur uba ki la iohi ha mihngi, u la leit hakhmat jong ki haduh ban da poi, bad u la sangeh halor ka jaka ha kaba U don. Te haba iohi ia u khlur ki la kmen ym don pyrthei shuh. Bad haba ki rung hapoh ing, ki la lap ia u Khunlung lem bad ka Maria ka kmie jong U, te ki dem ngon ki la iamane ia U ; bad haba ki la loit ia la ki song, ki la tyrwa ha U ia ki jynai-sngewbha, ka ksiar, ka jingiwbihi, bad ka mirra.¹ Bad haba ki la ioh-ktien haba ki dang ioh-thiah, ban ym leit phai sha u Herod, ki la leit-noh sha la ka ri na kawei pat ka lynti.

(1) Ka jingkyllan baiwbih ba ju kyllan ia ki met-iaap ba kin ym pyut.

19. Ka jingphet sha ri Ejipt. Mt. 2:13-15.

Ynda ki la leit-noh, hakhmih u Angel u Trai u la paw ha u Josep haba u ioh-thiah, u ong:

“To ieng, bad to shim ia u Khunlung bad ia ka kmie jong U, bad to phet sha ri Ejipt : to sah ruh hangta haduh ba ngan da ong ia me. Namar kan jia ba u Herod un wad ia u Khunlung ban dup pynduh thiaw ia U.”

Haba u la khie joit, shimiet-shimiet u la shim ia u Khunlung bad ia ka kmie jong U, bad u la kyn-riah noh sha Ejipt : Bad u la sah hangta haduh ka jingiap jong u Herod ; ba yn ioh-pyndep ia kaba u Trai u la kren da u nongiathuhlypa, u ong (Os. 11 : 1) :

“Na Ejipt Nga la khot ia u Khun jong Nga.”

20. Ka jingpyniap ia ki balui-lui. Mt. 2:16-18.

Kumta u Herod haba u iohi ba kita ki 'riewstad ki la shukor ia u, u la ingkhong khait, bad u la phah-pyniap noh ia ki khun-shynrang kiba la don ha Bethlehem bad ki khap jong ka baroh, naduh arsnem ka ryta shapoh, katkum ka por ba u la tohkit bniah na ki 'riewstad. Kumta la pyndep ia kaba la kren da u Jeremias nongiathuhlypa, uba ong (31 : 15) :

“Ha Rama¹ la iohsngew ia ka sur, ka jingiam-

(1) Ka *Rama* ka long ka shnong shaphang shatei na Jerusalem, ha kaba u Nabukhodonosor, u syiem Babilon u set koidi ia ki Ju, shuwa ban ring-mraw ia ki sha Babilon, haba u hiar-thma ia ka Jerusalem. Ka *Rakhel* ka long ka kmie jong u Benjamin; ka jyntep jong ka ka don hajan Bethlehem, ka shnong ha kaba la pyniap ia ki khunlung balui-lui.

briew bad ka jinglynñiar bakhraw ; ka Rakhel ka ïam ïa la ki khun, bad kam kwah ba yn pyntngen, naba kim don."

21. U wan-phai sha Nasareth. Mt. 2:19-23.

Te haba u Herod u la ïap, hakhmih u Angel u Trai u la paw ha u Josep haba u ïohthiah, ha ri Ejipt, u ong :

"To ïeng, bad to shim ïa u Khunlung bad ïa ka Kmie jong U, bad to leit sha ri Israel; naba kito ki-ba wad ïa ka mynsiem jong u Khynnah, ki la ïap."

Haba u la khie joit, u la shim ïa u Khynnah bad ïa ka Kmie jong U, bad u la wan sha ri Israel. Hynrei haba ïohsngew ba u Arkhelaus u la syn-shar ha Judia, ha ka jaka u Herod, u kpa jong u, u la khaweit ban leit shata ; bad haba la maham ïa u ha ka jingïohthiah, u la kynriah noh sha ki thaiñ Galileïa. Bad u wan, u la shong la sah ha ka shnong ba la khot Nasareth : ba yn ïoh pyndep ïa kaba la ong da ki nongiathuhlypa : Naba yn khot ïa U, u nong-Nasareth.

22. U Krist hapdeng ki nonghikai aiñ. Ka jingim barieh. Lk. 2:39-52.

Te ynda la lah pyndep ïa kiei-kiei baroh katkum ka aiñ jong u Trai, ki la leitphai sha Galileïa, sha la ka shnong Nasareth. Bad uta u Khynnah U la nang-san, bad U la nang-khlaiñ, U dap da ka jingstad : bad ka jingaiei u Blei ka la don bad U. Bad ki kmie-ki-kpa jong U ki leit sha Jerusalem man

ka snem, ha ka sngi bakhraw jong ka Paskha. Te haba U la dap khat-ar snem ka ryta, katkum ka dustur jong ki sngi-khawai ki la kiew sha Jerusalem, bad ynda ki la lah pyndep ia kito ki sngi, mynba ki leit-phai noh, u Khynnah Jisu U la sah ha Jerusalem; bad ki kmie-ki-kpa jong U kim shym la tip eiei. Kumta ba ki nangtharai ba U don bad kiba ialet-iaawan lang, ki la wan shisngi lynti, bad ki la wad ia U hapteng ki kur-ki-jait bad ki lok-ki-jor. Bad haba kim shem, ki la leit phai biang sha Jerusalem, ki iawad ia U. Te ka la jia ba hadien laisngi ki la shem ia U ha ka tempel ba u shong hapteng ki nonghikai, U sngap ia ki bad U kylli jingkylli ia ki. Te baroh kito kiba la sngap ia U ki la dum-buit ia ka jingstad bad ia ki jubab jong U. Te haba iohi, ki la lyngngoh. Bad ka kmie jong U ka la ong ia U :

“Ko Khun, balei Me leh kumne ia ngi? Peit, u kpa jong Me bad nga ngi la wad ia Me da kaba khuslai.”

Bad U la ong ha ki :

“Balei phi iawad ia Nga? Phim tip ba dei ba Ngan don ha kiei-kiei kiba long ki jong u Kpa jong Nga ?”¹

Ki pat kim shym la sngewthuh ia kata ka ktien kaba U la kren ha ki. Bad U la hiar arsut bad ki bad U la poi ha Nasareth; bad U la pynhapoh ia lade ha ki. Bad ka Kmie jong U ka la sumar kydong ha la ka dohnud ia kine ki ktien baroh. Bad u Jisu u la nang-roi ka jingstad bad ka ryta, bad ka jingaiei hakhmat u Blei bad ki briew.

(1) Ka Maria lymne u Josep Bd. kim shym la sngewthuh ia kine ki ktien; hynrei ki la bat ha la ki dohnud.



*"Ki la shem ia U ha ka tempel, ba U
shong hupdeng ki 'riewstad... bad U kylli
jingkylli ia ki."*

KA BYNTA BA-AR

KA JINGĬALAP
ĬA KA GOSPEL



*Namarkata keiñ, ia uta u Bakhuid, uba
yn kha na Pha, yn khot u Khun jong
u Blei. (Page 11)*

KA LYNNONG I

KA JINGTREI
JONG U IOANNIS BAKHUID

23. U Yoannis Baptis u wan sha Jordan.

Mt. 3:1-6. Mk. 1:1-6. Lk. 3:1-6.

Ka jingsdang jong ka Gospel jong u Jisu Krist, u Khun u Blei.

Te ha ka snem kaba khat-san jong ka jingsynshar u Kaisar Tiberius, mynba u Pontius Pilatus u long u lat jong ka Judia, bad u Herod u tetrark¹ ka Galileia, u Philip pat, u para jong u, u tetrark ka Ituria bad ka thain Trakhonitis, bad u Lisanias u tetrark ka Abilina, mynba u Annas bad u Kaiphas ki long lyngdoh rangbah, u Blei u la kren ha ri kynjah, ha u Yoannis, u khun jong u Sakharias. Bad u la wan ha ka ri baroh jong ka Jordan, u ia-lap ia ka baptisma pynshitom kylla-jingmut na ka bynta ka jingmap ia ki pop. Bad u la ong: "To leh pynshitom kylla-jingmut naba ka hima bneng ka la jan."

Naba dei une, uto ba la kren da u Isaïas Nong-ïathuhlypa, u ong:

"Hakhmih, Nga phah ia la u Angel ha shuwa

(1) U Tetrark u long u nongsynshar uba synshar shibynta na ka sawbynta jong ka ri ne ka hima.

ka khmat jong Me, uban pynkhreh ia ka lynti ha-khmat jong Me." (Mal. 3:1)

"Ka ktien jong uba pyrta ha ri kynjah :¹ To iapynkhreh ia ka lynti-bah jong u Trai, to pynbeit ia ki lynti-synkien jong U. Ia ka them baroh yn pyndap; bad ia u lum-bah bad lum-rit baroh yn pynhiar hapoh : bad ia ki bakdor yn pynbeit bad ia ki lynti khohruh khohram yn pynmadan." (40:3).

Te ka Jerusalem ka la leit sha u, bad ka Judia baroh, bad baroh ka thaiñ ha ki phang Jordan; bad la pynbaptis da u ha ka wah Jordan, ki da iaphla ia la ki pop.

Te u Ioannis u la kup da u shñiuh-ut, bad u panpoh ia la ka syngkai da u panpoh-snieh; bad u la bam da ki puit bad ka ngap-khlaw.

24. Ka jingkyntu ban leh pynshitom kylla-jingmut.

Mt. 3:7-10. Lk. 3:7-9.

Te haba iohi bun ki Pharisi² bad ki Sadusi³, ba ki iawan sha ka baptisma jong u, u la ong ha ki paidbah kiba leit shah-pynbaptis ha u :

(1) Kumba u Sangot u pynbna bad u phah pynkhreh ia ka jingwan jong u Syiem, kumta u Ioannis ruh u pynbna bad u pynkhreh ia ki mynsiem jong ki briew ha shuwa jong u Jisu uba long u Syiem jong ki syiem.

(2) Ki *Pharisi* ki long ki Ju kiba pynsarong ia lade ba ki sumar bha ia ka aifi jong u Blei. Hynrei ka jingsumar aifi jong ki ka long tang na sla, ban dup ioh burom bad jingiäroh na ki briew. Ki ngeit ia ka jingmih-pat.

(3) Ki *Sadusi* ruh ki long ki Ju, kum ki pharisi hi, hynrei kim ngeit ia ka jingmih-pat. Kine ruh ki wad tang ia ka burom pyrthei. Ka ktien hi ka mut : ki bahok. Hynrei kane ka pynsarong ia ki.



*U Jisu U la wan na Nusaret jong ka Galileia,
bad la pynbaptis ha ka Jordan da u Ioannis."*

"Phi ki khun-ki-ksiew jong ki 'seiñpuh, mano ba la pyni ha phi ban phet na ka jingbitar kaban sa wan? Kumta, to sei ia u soh uba dawa ia ka jing-pynshitom kylla-jingmut, bad wat sdang ban ong ha lade : Ngi dei kpa ia u Abraham. Naba nga ong ha phi, ba u Blei u lah ban pynmih khun ha u Abraham, na kine ki maw. Namar mynta la buh ia u sdie ha u thied jong ki dieng. Namarkata, u dieng baroh ubym seiso babha, yn khet-noh bad yn bret hapoh ding."

25. U Yoannis u kyntu ban leh ieid bad leh hok.

Lk. 3:10-14.

Te kita ki paidbah ki la kylli ia u, ki ong :

"Namarkata, ngin leh aiü?"

Te u jubab, u la ong ha ki :

"Jar uba don artylli ki sopti-lor, un ai ha uto ubym don ; bad jar uba don ka bam-ka-sa, to un leh kumjuh."

Te ki nongap-khrong ruh ki la wan ba yn dup pynbaptis, bad ki la ong ha u :

"Ko Nonghikai, ngin leh aiü?"

Hynrei u la ong ha ki :

"Wat palat ia kata kaba la buh ia phi ban khrong."

Te ki shipai ruh ki la kylli ia u, ki ong :

"Ngi pat ngin leh aiü?"

Bad u la ong ha ki :

"Wat leh-jubor iano-iano ruh, lymne wat leh-klop ; bad to sngewhun ia la ka tulop."

26. U pynbna shaphang u Krist.

Mt. 3:11-12. Mk. 1:6-8. Lk. 3:15-18.

Namar ki paidbah ki peit lyngngoh bad ki pyrkhat ha la dohnud ia u Ioannis, ba ioh u dei pynban u Krist, u Ioannis u la jubab, u ong ha ki baroh :

“Shisha, nga pynbaptis ia phi da ka um na ka bynta ka jingpynshitom kylla-jingmut, hynrei hadien jong nga, un wan Uwei Uba kham khraw-borban ia nga, ia ka jynteh juti jong U ngam shonghok ban dem bad han loit; Uta keiñ Un pynbaptis ia phi da u Mynsiem Bakhuid bad da ka ding. U bat ha la ka kti ia la ka jynpeh bad Un pynkhuid ia la ka kyntem, bad Un lum ia u kew ha la ka thiar, hynrei ia u skum Un thang da ka ding bymjulip.”

Bad bun ruh kiei-kiei u la ialap, u kyntu ia u paidbah.

27. U pynbaptis ia u Krist.

Mt. 3:13-17. Mk. 1:9-11. Lk. 3:21-22.

Te ka la jia, haba la lah pynbaptis ia uta u paidbah baroh, u Jisu U la wan na Galileia sha Jordan ha u Ioannis ban shah-pynbaptis ha u. Hynrei u Ioannis u la khang ia U, u ong :

“Nga dei ban shah-pynbaptis ha Me, Me pat Me wan ha nga?”

Hynrei u Jisu U phai-ktien, U la ong ha u:

“Ieh mynta ka mat; naba kumne keiñ ka dei ba ngin pyndep ia ka hok baroh.”

Kumta u la shah ia U. U Jisu, ynda la lah pynbaptis, U la wan-noh shisyndon na ka um. Bad ha

khmih, katba U dang duai, ka bneng ka la plie ha U bad U la iöhi ia ki bneng ba la plie bad ia u Mynsiem jong u Blei, u Mynsiem Bakhuid, ba U hiar ha ka dur-met kum ka paro, ba U wan halor jong U bad U sah ha U. Bad hakhmih, ka ktien na bneng ka la wan :

“Une U long u khun baïeid jong Nga, ia Uba Nga sngewbha eh.”

“Me long u Khun baïeid jong Nga, ia Me Nga sngewbha.”

28. Ka Jingshah-jingit jong u Krist bad ka jing-pynshoi ia U. *Mt. 4:1-11. Mk. 1:12-13. Lk. 4:1-13.*

Te u Jisu Uba dap da u Mynsiem Bakhuid, U la leit-noh na ka Jordan, bad u Mynsiem U la ialam ia U sha ri kynjah, ba yn pynshoi u ksuid. Bad U la sah ha ri kynjah sawphew sngi bad sawphew miet bad la pynshoi da u soitan; bad U la don bad ki mrad-khlaw. Bad ha kito ki sngi, Um shym la bam eiei ruh; hynrei ynda ki la kut, U la thngan. Te u nongpynshoi u wan, u la ong ha U :

“Lada Me long u Khun u Blei, hukum ia kine ki maw ba kin kylla kpu.”

Hynrei U la phai-ktien bad U la ong ;

“La thoh : ym tang da u kpu hi u briew u im. hynrei da ka ktien baroh kaba mih na ka shyntur jong u Blei.” (Deut. 8 : 3)

Nangta u ksuid u la rah ia U, bad u la ialam ia U sha Jerusalem, sha ka nongbah bakhuid, bad u la pynieng ia U ha kliar jong ka tempel bad u la ong ha U :

“Lada Me long u Khun u Blei, to pynnoh ia lade nangne, naba la thoh :

"U la ai hukum ha la ki Angel ban sumar ia Me, bad kin rah ia Me ha la ki kti, ioh kumno-kumno Me jynthut la ka kjat ha u maw." (Ps. 90 : 11-12)

U Jisu U la ong ha u :

"La thoh ruh : Men ym tynjuh ia u Trai u Blei jong Me." (Deut. 6 : 16)

U ksuid u la rah biang ia U halor u lum bajrong bha, bad shikhyllipmat u la pyni ha U baroh ki hima jong ka pyrthei bad ka burom jong ki. Bad u la ong ha U :

"Ngan ai ha Me ia kane ka bor baroh, bad ia ka burom jong ki ; naba la ai ia ki ha nga, bad ha uba nga mon, nga ai ia ki. Namarkata, lada, da kaba dem-ngon, Men mane ia nga, baroh kan long ka jong Me."

Te u Jisu U ong ha u :

"Phet-noh Soitan, naba la thoh ; Men mane ia u Trai u Blei jong me, bad tang ia U hi men shakri." (Deut. 6 : 13)

Kumta haba la kut ki jingpynshoi baroh, u ksuid u la iehnoh ia U shipor; ¹ bad hakhmih, ki Angel ki la wan bad ki la shakri ia U.

29. Ka sakhi jong u Yoannis - Ka ktien jong uba pyrta ha ri kynjah. Ioan. 1:19-28.

Bad kane ka la long ka sakhi jong u Yoannis, haba ki Ju na Jerusalem ki la phah ia ki lyngdoh bad ki Lebi, ban dup kylli ia U :

(1) U ksuid un wan biang ban pynshoi ia u Jisu ha ka por ba Un shah-shitom na ka bynta jong ngi.

“Me dei u-ei ?”

Bad u la phla, bad um shym len : bad u la phla :

“Ngam dei u Krist.”

Te ki la kylli ia u :

“Kumno kata ? Me dei u Elias ?”

Bad u la ong :

“Ngam dei.”

“Me dei u nongiathuhlypa ?”

Bad u la jubab :

“Em.”

Namarkata ki la ong ha u :

“Me dei u-ei, ba ngin dup ai jubab ia kito kiba la phah ia ngi ? Me ong kumno shaphang ia lade ?”

U la ong :

“Nga dei ka ktien jong uba pyrta ha ri kynjah : To pynbeit ia ka lynti-bah jong u Trai, kumba la ong u Isaias Nongiathuhlypa.” (40 : 3)

Bad kita ia kiba la phah, ki la long na ki Pharisi. Bad ki la kylli ia u, bad ki la ong ha u :

“Te kata balei me pynbaptis, lada mem dei u Krist, lymne u Elias, lymne u nongiathuhlypa ?”

U Ioannis u la jubab ia ki, u ong :

“Nga pynbaptis da ka um ; hynrei hapdeng jong phi U la ieng Uba phim ithuh. Une keiñ U long Uta Uban wan hadien jong nga, Uba la long ha shuwa jong nga : ia ka jynteh juti jong U ngam shonghok ban loit.”

Ia kine kiei-kiei la leh ha Bethania ha shiliang ka Jordan, ha kaba u Ioannis u pynbaptis.

30. Ka sakhi bathymmai jong u Yoannis Bakhuid.
Ioan. 1:29-34.

Ha ka sngi kaba bud u Yoannis u la iöhi ia u Jisu ba U wan sha u, te u ong :

“Hakhmih u¹ Khun-Langbrot jong u Blei, hakhmih Uba kit noh ia ka pop jong ka pyrthei. Dei Une, shaphang Uba nga la ong : Nadien jong nga, U wan u Briew Uba la long shuwa ia nga, na ba U la long ha shuwa jong nga. Bad ngam shym ithuh ia U, hynrei ba yn dup iöh pynpaw ia U ha Israel, nga la wan khnang da kaba pynbaptis da ka um.”

Bad u Yoannis u la sakhi, u ong :

“Nga iöhi ia u Mynsiem ba U hiar na bneng kum ka paro, bad U sah halor jong U. Bad ngam shym la ithuh ia U; hynrei Uta Uba phah ia nga ban pynbaptis da ka um, U la ong ha nga : Halor Uta Uba men iöhi ia u Mynsiem ba U hiar bad U sah halor jong U, Uta keiñ U dei Uba pynbaptis da u Mynsiem Bakhuid. Bad nga la iöhi; bad nga ieng-sakhi ba Une U long u Khun jong u Blei.”

31. Ki Synran banyngkong jong u Jisu.
Ioan. 1:35-40.

Ha ka sngi kaba bud pat, u Yoannis u la ieng bad arngut ki synran la jong. Bad haba iöhi ia u Jisu ba U iaïd u ong :

(1) Hynñiew spah snem mynshuwa, u Isaías u la iathuh-lypa shaphang u Krist ba Un wan ha kane ka pyrthei ban kit noh ia ki pop jong ka pyrthei, ba yn ialam ia U sha ka jingiap kumba ialam ia i khunlangbrot.

“Hakhmih u Khun-langbrot jong u Blei.”

Bad kita ki synran arngut ki la iöhsngew ia u ba u kren, bad ki la iabud ia u Jisu. Te u Jisu haba U phai bad iöhi ia ki ba ki iabud ia U, U la ong ha ki :

“Phi iawad aüu?”

Ki la ia-ong ha U :

“Ko Rabbi (kaba mut haba la batai, nonghi-kai) hangno Me shong?”

U ong ha ki :

“Ale wan peit.”

Ki la wan bad ki la iöhi hangno ba U shong, bad ki la sah ryngkat bad U ha kata ka sngi : bad ka la long kum ha ka kynta bashiphew. Te u Andrias, uba shipara bad u Simon Petrus u la long uwei na kita ki arngut kiba la iöhsngew ia u Ioanis bad kiba la bud ia U.

32. U Andrias u ialam ia u Petrus sha u Krist.

Ioan. 1:41-42.

Une u la wad nyngkong ia u Simon shipara la jong, bad u ong ha u :

“Ngi la shem ia u Messia” (kaba mut haba la batai, u Krist). Bad u la ialam ia u sha u Jisu. Te haba u Jisu U la peit-shaiñ ia u, U la ong :

“Me long u Simon u khun jong u Jona, yn khot ia me u Kephas” (kaba mut haba la batai, u mawsiang).¹

(1) Kephas ka long ka ktien Grik kaba mut Petrus : mawsiang.

33. U Krist u khot ia u Philip bad u Nathanael.

Ioan. 1:43-51.

Kum lashai U la kwah ban leit sha Galileia, bad U la iakynchuh ia u Philip. Bad u Jisu U la ong ha U :

“To bud ia Nga.”

Te u Philip u la long na Bethsaida, ka shnong jong u Andrias bad u Petrus. U Philip u iakynchuh ia u Nathanael, bad u ong ha u :

“Ngi la shem ia Uba u Moses ha ka aia bad ki nongiatuhlypa ki la thoh, ia u Jisu u Khun jong u Josep uba na Nasareth”.

Bad u Nathanael u la ong ha u :

“Lah ban mih kaci-kaei ka babha na Nasareth?”

U Philip u la ong ha u :

“Ale, to peit.”

U Jisu U la iohi ia u Nathanael ba u wan sha U bad U ong ha u :

“Hakhmih u Israel bashisha, ha uba ym don jingarsap.”

U Nathanael u ong ha U :

“Hangno Me ithuh ia nga?”

U Jisu U la phai-ktien, bad U la ong ha u :

“Shuwa ba u Philip un khot ia me, mynba me don hapoh u diengdumbur, Nga la iohi ia me.”

U Nathanael u la phai-ktien ia U, bad u ong :

“Ko nonghikai, Me long u Khun jong u Blei, Me long u Syiem Israel.”

U Jisu U la phai-ktien bad U la ong ha u :

“Me ngeit naba Nga la ong ha me, Nga iohi ia me, hapoh u diengdumbur : men iohi ia kiei-kiei kiba kham khraw ban ia kine.”

Bad U la ong ha U :

"Shisha, shisha Nga ong ha phi, phin iöhi ia ka bneng ba ka plie, bad ia ki angel jong u Blei ba ki iäkiew-iahiair halor u Khun jong u brieve."

34. Ka khawai shongkurim ha Kana. Ioan. 2:1-11.

Te ha ka sngi ka balai la don ka jingkyntiew-kurim ha Kana jong ka Galileia : bad ka Kmie jong u Jisu ruh ka la don hangta. La khot ia u Jisu bad ia ki synran jong U ruh sha kata ka jingkyntiew-kurim. Te haba ka waiñ ka lut noh, ka Kmie jong u Jisu ka ong ha U :

"Kim don waiñ."

Bad u Jisu U la ong ha ka :

"Ko Brieve, sa-lei ia Nga bad ia Pha? ¹ Ka por jong Nga kam pat poi."

Ka Kmie jong U ka la ong ha ki shakri :

"Kat kaba Un ong ha phi, to leh."

Te la don hangta hynriew tylli ki khra-um kiba da ki maw, ba la buh katkum ka jingpyn-khuid jong ki Ju, kiba ngiam uwei-uwei ar ne lai thew ² U Jisu U ong ha ki :

"To pyndap ia ki khra da ka um."

Bad ki la pyndap shoiñ ia ki. Bad u Jisu U ong ha ki :

"Tong mynta, bad to rah sha u rangbah jingkhawai."

(1) Kane ka long ka rukom kren jong ki Ju, kaba ha ngi, ngi sngewtohmet, hynrei kaba mut pynban "wat khuslai maphi, nga la tip hi manga." Bad dei na kane ba ka Maria ka la ong ha ki shakri : "Kat kaba Un ong ha phi, to leh".

(2) Ha ka ktien Grik *methretes*-malu-mala kumba shimon ne.

Bad ki la rah. Bad haba uta u rangbah-jing-khawai u la mad ia kata ka um ba la kylla waiñ, bad ba um tip nangno ka long, (tang ki shakri kiba la tong ia kata ka um ki tip) uta u rangbah jing-khawai u la khot ia u nongleit-kurim, bad u ong ha u :

“U brieve baroh u buh nyngkong-nyngshap ia ka waiñ ka babha, bad haba ki la iashongshit, sa ia kata kaba kham sniew; me pat me la tyngkai ia ka waiñ ka babha haduh mynta.”

Ia kane ka banyngkong na ki kam-bah, u Jisu U la leh ha Kana jong ka Galileia : bad U la pyn-paw ia la ka burom, bad ki synran jong U, ki la ngeit ha U.

35. Krist u hiar sha Kapharnaum. *Ioan. 2:12.*

Hadien kane U la hiar sha Kapharnaum, ma-U bad ka Kmie jong U, bad ki hymmen-ki-para jong U, bad ki synran jong U : bad ki la sah hangta katto katne sngi.

KA LYNNONG II

KA SNEM BANYNGKONG

1. Ha Jerusalem, Judia bad Samaria

36. U Krist U beh noh ïa kiba ïadie-ïathied na ka tempel. *Ioan. 2:13-22.*

Te ka Paskha jong ki Ju ka la jan, bad u Jisu U la leit sha Jerusalem. Bad U la lap ha ka tempel ïa kiba ïadie masi bad blang bad paro, bad ïa ki nongïapeiñ peisa-tyngka, kiba shong. Te ynda U la shna kum u shabuk da ki tyllai, U la beh noh ïa ki baroh na ka tempel, bad 'langbrot bad masi, bad U la theh pashait ïa ki tyngka-peisa jong ki nongïapeiñ bad pynkylla-khongpong ïa ki miej. Bad ha kito kiba die paro U la ong :

“To shim noh nangne ïa kine bad wat pyn-long ïa ka ïng jong u Kpa jong Nga ka ïng-khai”.

Te ki synran jong U ki la kynmaw ïa kaba la thoh : “Ka jingshitrhem ïa ka ïng jong Me, ka bam ïa nga.” (Ps. 68 : 9.) Ki Ju, namarkata, ki la phai-ktien, bad ki la ong ha U :

“Ka dak-ka-shin aïu Me pyni ha ngi haba Me leh ïa kine kiei-kiei ?”

U Jisu U la jubab, bad U la ong ha ki :

“To pynjot ia kane ka tempel, bad lai-sngi Ngan pynieng pat ia ka.”

Kumta ki Ju ki la ong :

“La sawphew hynriew snem ba tei ia kane ka tempel, Me pat Men pynieng ia ka lai sngi?”

Hynrei ma-U, U la kren shaphang ka tempel jong ka met la jong. Namarkata, mynba U la mih-pat na ki baiap, ki synran jong U ki la kynmaw ba U la ong ia kane, bad ki la ngeit ia ki jynthoh bad ia ka ktien ba u Jisu U la ong.

37. Ka jinglot jingngeit jong ki babun.

Ioan. 2:23-25.

Hynrei mynba U la don ha Jerusalem ha ka Paskha, ha ka sngi jingkhawai, bun ngut ki la ngeit ha ka kyrteng jong U, haba iohi ia ki dak-ki-shin ba U la leh. Hynrei u Jisu Um shym la shaniah ia lade ha ki, naba U hi U la tip ia k ibaroh, bad namar Um shym donkam ba uno-uno un ieng sakhi ia u briew : naba U hi U la tip ia kaba don ha u briew.

38. U Nikodemus u wan mynmiet sha u Jisu.

Ioan. 3:1-15.

Te la don u briew uba na ki Pharisi, uba kyrteng u Nikodemus, u rangbah jong ki Ju. Une u la wan mynmiet ha u Jisu, bad u la ong ha U :

“Ko Nonghikai, ngi tip ba Me long u nonghikai Uba la wan na u Blei : namar ym don u

briew uba lah ban leh ia kine ki dak kiba Me leh, lynda u Blei U don ryngkat bad u."

U Jisu U la phai-ktien bad U la ong ha u :

"Shisha, shisha, nga ong ha me, lynda kha pat ia u briew,¹ un ym lah ban iöhi ia ka hima jong u Blei.

U Nikodemus u ong ha U :

"Kumno lah ban kha ia u briew haba u la tymmen? Hato u lah ban rung biang ha ka kpoh jong ka kmie la jong, bad ban kha pat?"

U Jisu U la phaiktien :

"Shisha, shisha, Nga ong ha me, lynda kha pat ia u briew na ka um bad na u Mynsiem Bakhuid, un ym lah ban rung ha ka hima jong u Blei. Kata kaba la kha na ka doh, ka long doh; bad kata kaba la kha na u mynsiem, ka long mynsiem. Wat lyngngoh ba Nga ong ha me dei ban kha biang ia phi. Ka lyer ka pyrsad kat shaba ka mon; ba me iöhsngew ia ka sur jong ka, hynrei mem tip nang-no ka wan, ne shano ka leit : kumta u long baroh uba la kha na u Mynsiem."

U Nikodemus u la phai-ktien bad u la ong ha U :

"Kumno kine kiei-kiei ki lah ban long?"

U Jisu U la jubab bad U la ong ha u :

"Me long u nonghikai ha Israel, bad mem tip ia kine kiei-kiei? Shisha, shisha, Nga ong ha me, ba ngi kren ia kaba ngi tip, bad ngi sakhi ia kaba ngi la iöhi, hynrei phim pdiang ia ka sakhi jong ngi. Lada Nga la kren ha phi shaphang kiei-kiei

(1) Kane ka long ka jingkha bathymmai da ka baptisma, ha kaba u briew u sait ia la ka mynsiem bad u iöh jingmap na ka bynta la ki pop, u kylla ruh u khun-ting jong u Blei.

jong ka pyrthei bad phim ngeit, kumno, lada Ngan kren ha phi shaphang kiei kiei jong ka bneng, phin ngeit? Bad ym don uba la kiew sha bneng, lait-tang Uta Uba don ha bneng, u Khun jong u briew, Uba don ha bneng. Te kumba u Moses u la kyntiew ia u bseifn ha ri kynjah, kumta ruh dei ban kyntiew¹ ia u Khun jong u briew : ba jar uba ngeit ha U, un ym jot, hynrei un ioh ka jingim bymjukut."

39. Ka jingiathuh lyngkot shaphang ka jinghikai jong u Krist. Ioan. 3:16-21.

"Naba u Blei u la ieid katta-katta ia ka pyrthei haduh ba U la ai-noh ia la u Khun bamarwei; ba baroh uba ngeit ha U, un ym jot, hynrei un ioh ka jingim bymjukut. Naba u Blei um shym phah sha ka pyrthei ia la u Khun, ba Un dup bishar ia ka pyrthei, hynrei ba yn ioh pynim da U ia ka pyrthei. Uta uba ngeit ha U, um shah-bishar. Hynrei uta ubym ngeit, u la shah-bishar lypa : namar um ngeit ha ka kyrteng jong u Khun bamarwei jong u Blei. Te kane ka long kata ka jingbishar : ba ka jingshai ka la wan ha ka pyrthei, bad ki briew ki kham ieid shibun ia ka jingdum ban ia ka jingshai; namar ki jingleh-jingkam jong ki, ki long ki basniew. Naba baroh uba leh ia ka basniew, u isih ia ka jingshai, bad um wan sha ka jingshai, ba yn ym ioh-kren pyrshah ia ki jingleh-jingkam jong u. Hynrei uta uba leh ia ka bashisha, u wan sha ka jingshai, ba yn ioh pypaw ia ki jingleh-jingkam jong u, ba la leh ia ki ha u Blei."

(1) Da ka jingkyntiew halor ka Diengphna.

**40. Ka jingialap ha Judia. Ka sakhi bakhat-duh
jong u Yoannis bakhuid. Ioan. 3:22-36.**

Hadien kine kiei kiei u Jisu lem bad la ki syn-
ran U la wan ha ri Judia; bad U la sah ryngkat bad
ki hangta bad U la pynbaptis. Te u Yoannis ruh u
la dang pynbaptis ha Ennon, ha khap Salim; naba
la don hangta bun ka um, te ki la wan, bad la pyn-
baptis. Namar ia u Yoannis ym pat shym set-pha-
tok. Hynrei la mih ka jingiasaid hapdeng ki syn-
ran jong u Yoannis bad ki Ju shaphang ka jing-
pynkhuid. Te ki la iawan sha u Yoannis bad ki la
ong ha u :

“Ko Nonghikai, Uto Uba la don ryngkat bad me
ha shiliang ka Jordan, ia Uba me ieng-sakhi, ha-
khmih U pynbaptis bad baroh ki leit ha U”.

U Yoannis u la phai-ktien bad u la ong : U
briew un lah ban ioh eiei ruh em, lymda
la ai ha u na bneng. Maphi hi phi iaieng-sakhi
ia Nga, ba Nga la lah ong : Ngam long u Krist,
hynrei ba la phah ia nga ha shuwa jong U. Uta
uba don ia ka nongleitkurim, dei u¹ nongleitkurim:
hynrei u lok jong u nongleit-kurim, uba ieng bad
uba shah-shkor ia u, u dap da ka jingkmn namar
ka ktien jong u nongleit-kurim. Namarkata, kane
ka jingkmn jong nga ka la dap. Ka dei ba Un
nang-roi bad nga pat ba ngan nang-duna. Uta uba
wan na jrong u long halor baroh. Uta uba na ka
khyndew, u long na ka khyndew, bad u kren
shaphang ka khyndew. Uta Uba wan na bneng U

(1) U Krist u long u nongleitkurim bad ka Balang ka long ka
nongleitkurim jong U.

long halor baroh. Bad ia kaba U la iohi bad ioh-sngew ia kata U sakhi : hynrei ia ka sakhi jong U ym don u brieve uba pdiang. Uta uba la pdiang ia ka sakhi jong U, u la shon-shap ba u Blei U long U bashisha. Naba Uta Uba u Blei U la phah, U kren ki ktien jong u Blei, namar u Blei Um ai ia u Mynsiem kumba da thew. U Kpa u ieid ia u Khun, bad U la ai baroh khoit ha ka kti jong U. Uta uba ngeit ia u Khun, u ioh ka jingim bym-jukut : hynrei uta ubym ngeit ia u Khun, un ym iohi ia ka jingim, hynrei ka jingbitar jong u Blei ka iai-sah ha u."

41. La set phatok ia u Ioannis. U Jisu U leit biang sha Galileia. Mt. 4:12. Mk. 1:14. Lk. 3:19-20; 4:14. Ioan. 4:1-3.

Hynrei u Herod Tetrark ynda la sneng da u¹ na ka bynta ka Herodia, ka tnga u para jong u, bad na ka bynta ka jingsniew baroh kaba u Herod u la leh, u la kynton sa kane halor baroh, ba u la set ha phatok ia u Ioannis.

Namarkata, haba u Jisu u la sngewthuh ba ki Pharisi ki la iohsngew ba u Jisu u la pynlong bad pynbaptis kham bun ki synran ban ia u Ioannis (la u Jisu hi Um shym pynbaptis, hynrei ki synran jong U), bad haba U la iohsngew ba la aiti-noh ia u Ioannis, U la iehnoh ia ka Judia, bad da ka bor u Mynsiem, U la leit biang sha Galileia.

(1) Da u Ioannis.

42. Ha ka pukri jong u Jakob. Ioan. 4:4-26.

Te donkam ba Un ïaid lyngba ïa ka Samaria. U la poi, namarkata, ha kawei ka nongbah jong ka Samaria, kaba la khot Sikhar, hajan ka khyn-dew-ka-shyiap kaba u Jakob u la ai ha u Josep, u khun jong u. Te ka pukri jong u Jakob ka la don hangta. U Jisu, namarkata, ba U la thait na kata ka jingleit, U la shong noh halor kata ka pukri. Ka la long kum ha ka por hynriew baje. Kawei ka briew na Samaria ka la wan tong-um. U Jisu U la ong ha ka :

“To ai ba nang dih:”

Naba ki synran jong U ki la leit shapoh shnong ban thied jynbam. Kumta kata ka kynthei nong-Samaria ka la ong ha U :

“Kumno ma-Me u Ju, Me pan ban dih na nga, kaba long ka kynthei Samaria?¹”

Namar ki Ju kim ïalok bad ki nongSamaria. U Jisu U la jubab bad U la ong ha ka :

“Ba phan da tip ïa ka jingaiei jong u Blei, bad dei Uei Uba ong ha pha, To ai ba ngan dih. pha hi lehse phan jin da pan na U, bad Un jin da la ai ha pha ïa ka um ba-im.”

Kata ka briew ka la ong ha U :

“Ko Kynrad, Me’m don jyntong eiei bad ka pukri ruh ka bajylliew : te nangno Me’n ïoh ïa ka um ba-im ? Hato me kham khraw ma-Me ban ïa u kpa jong ngi u Jakob, uba la ai ha ngi ïa ka pukri, bad u la dih ruh na ka, bad ki khun jong u.

(1) Ki Ju kim ïasuk bad ki Samaria bad ki kheĩn-poh shibun ïa ki.

bad ki jynri-jyndub jong u?"

U Jisu U la jubab bad U la ong ha ka :

"Jar uba dih ia kane ka um, un sliang biang; hynrei uba dih ia ka um kaba Nga Ngan ai ha u, un ym sliang junom. Te kata ka um ba Ngan ai ha u, kan long ha u ka umpohliw kaba kyrsoi sha ka jingim bymjukut."

Kata ka briew ka la ong ha U :

"Ko Kynrad, to ai ha nga ia kane ka um, ba ngan ym thynrang, lymne wan hangne ban tong."

U Jisu U la ong ha ka :

"Khie khot ia u tnga jong pha, bad to wan hangne."

Kata ka briew ka la phai-ktien bad ka la ong :

"Ngam don tnga."

U Jisu U la ong ha ka :

"Pha kren kaba dei : ngam don tnga ; naba pha la ioh san ngut ki tnga, bad uba pha ioh mynta um dei u tnga jong pha : ia kane pha la kren hok."

Kata ka kynthei ka la ong ha U :

"Ko Kynrad, nga iohi ba Me long u nongia-thuhlypa. Ki kpa jong ngi ki la mane ha une u lum, phi pat phi ong, ba ha Jerusalem ka long ka jaka ha kaba dei ban mane."

U Jisu U ong ha ka :

"Ko kynthei, to ngeit ia nga, ba ka ia ka poi, haba phin ym iamane ia u Kpa, ha une u lum ne ha Jerusalem. Phi iamane ia kaba phim tip : ngi mane ia kaba ngi tip; naba ka jingpynim ka long na ki Ju. Hynrei ka ia ka poi, bad ka dei mynta, haba ki nongmane bashisha kin mane ia u Kpa ha ka mynsiem bad ha ka jingshisha. Namar u Kpa ruh U wad ia kiba kum kita ban mane ia U. U Blei u long u mynsiem : te kita kiba mane ia

U, ki dei ban mane ha ka mysiem bad ha ka jingshisha."

Kata ka briew ka ong ha U :

"Nga tip ba u Messia u wan, (ia uba la khot u Krist) : namarkata, ynda U wan, Un pynbna ha ngi ia kiei kiei baroh."

U Jisu U ong ha ka :

"Dei ma-Nga, Uba kren bad pha.

43. Bun ki nong Samaria ki la ngeit ha u Krist.

Ioan. 4:27-42.

Hamar hangta ki synran jong U ki la wan : bad ki la lyngngoh ba U iakren bad ka kynthei. Pynban ym shym don ba kylli :

"Me wad aïu, ne balei Me iakren bad ka?"

Kumta kata ka briew ka la iehnoh ia la u khiew-um bad ka la leit shapoh shnong, bad ka la ong ha ki briew hangta :

"Ale, to wan-peit ia u briew uba la iathuh ha nga baroh kat kiba nga la leh. Hato yn dei une uta u Krist?"

Namarkata, ki la iamih napoh shnong bad ki la wan sha U.

Ha kajuh ka por, ki synran ki la iakyrpad ia U ki ong :

"Ko Nonghikai, to bam,"

Hynrei U la ong ha ki :

"Nga don ka jynbam ban bam, kaba phi phim iatip."

Namarkata, ki synran ki la iaong para-ki hi :

"Don mano-mano ba la wan rah jynbam ia U ?"

U Jisu U la ong ha ki :

"Ka jynbam jong Nga ka long ba Ngan dup leh

ia ka mon jong Uta Uba la phah ia Nga, ba Ngan ioh pynjanai ia ka kam jong U. Hato phim ong, sa saw-bnai ka poi ka aiom-ot? Hakhmih nga ong ha phi : to khmied la ki khmat bad to jngoh ia ki ri, naba ki la lieh lypa na ka bynta ka aiom-ot. Te uta uba ot u ioh ka bainong, bad u lum soh ha ka jingim bymjukut, ba uta uba bet un ioh kmen bad uta uba ot. Namar ha kane, ka jingong ka long ka bashisha : ba don uba bet, bad don uba ot. Nga la phah ia phi ban ot ia kaba phi phim shym la trei : kiwei pat ki la trei, bad maphi phi la rung ha ki jingtrei jong ki."

Te bun ki nongSamaria na kata ka shnong ki la ngeit ha U, namar ka ktien jong kata ka brieve ka ieng sakhi : "U la iathuh ha nga baroh kat kaba nga la leh".

Kumta haba ki nongSamaria ki la wan ha U, ki la kyrpad ia U ba Un sah hangta. Bad U la sah hangta arsngi. Te kham bun shuh shuh ki la ngeit ha U na ka bynta ka ktien jong U. Bad ki la ong ha kata ka brieve :

"Mynta ngi ngeit, ym na ka bynta ka ktien jong pha : namar da lade hi ngi la iohsngew, bad ngi tip ba Une U long shisha u Nongpynim jong ka pyrthei."

2. Ha Galileia

44. U Jisu U wan sha Galileia. *Ioan. 4:46-54.*

Te hadien arsngi U la leit noh nangta : bad U la wan sha Galileia. Naba u Jisu hi U la sakhi ba u nongiathuhlypa um ioh burom ha la ka ri. Te

haba U la poi ha Galileia, ki nong-Galileia ki la pdiang ia U, ba ki la iohi baroh kaba U la leh ha Jerusalem ha ka sngi jingkhawai : namar maki ruh. ki la leit sha kata ka sngi jingkhawai.

45. U pynkoit ia u khun jong u nongsynshar.

Ioan. 4:46-54.

Kumta U la wan biang sha Kana jong ka Galileia ha kaba U la pynkylla waiñ ia ka um. Te la don uwei u nongsynshar uba u khun jong u, u la pang ha Kapharnaum. Ma-u haba u iohsngew ba u Jisu U la wan na Judia sha Galileia, u la leit sha U, bad u la kyrpad ia U ba Un hiar bad ba Un pynkoit ia u khun jong u : naba u la poi ha tmier ka jingiap. Kumta u Jisu U la ong ha u :

“Lymda phi iohi ia ki dak bad ki kam-phylla, phin ym ngeit.”

Uta u nongsynshar u la ong ha U :

“Ko Trai, to hiar shuwa ba u khun jong nga un iap.”

U Jisu U la ong ha u :

“To khie-leit : u khun jong me u im.”

Uta u briew u la ngeit ia ka ktien ba u Jisu U la ong ha u, bad u la leit noh. Te katba u dang hiar, ki shakri ki la wan-tan ia u, bad ki la iathuh da kaba ong, ba u khun jong u u im.

Namarkata, u la kylli ha ki ia ka por, ha kaba u la kham shait. Te ki la ong ha u :

“Mynhynnin, ha ka por¹ hynñiew baje, ka khieshoh ka la pyllait ia u.”

Kumta uta u kpa u la tip, ba ka la dei ha kata

(1) Kumba shi baje mynsngi.

ka por ha kaba u Jisu U la ong ha u : “U khun jong me u im” ; Te ma-u hi u la ngeit bad ka ing-ka-sem jong u baroh. Sa kane pat ka kam-bah ba-ar u Jisu U la leh, haba U la wan na Judia sha Galileia.

46. U Trai U sdang ban ialap shaphang ka Hima jong u Blei. *Mt. 4:13-17. Mk. 1:14-15. Lk. 4:14-15.*

Bad ynda U la iehnoh ia ka shnong Nasareth. U la wan bad U la shong la sah ha Kapharnaum harud duriaw, ha ki khap jong ka Sabulon bad Nephthali : ba yn pynurlong ia kaba la ong da u Isaias Nongiathuhlypa (8:23; 9:1):

“ Ka ri Sabulon bad ka ri Nephthali, ka lynti ka duriaw sha shiliang ka Jordan, ka Galileia jong ki Jentil : u paidbah uba la shong ha ka jingdum, u la iöhi ia ka jingshai bakhraw ; bad ha kita kiba shong ha ka ri jong ka syrngiew ka jingiap, la thaba ka jingshai.”

Naduh kata ka por u Jisu U la sdang ban ialap bad ban ong :

“To kylla-jingmut bad to ngeit ia ka Gospel, la pyndep ia ka ia, bad ka hima ki bneng ka la jan.”

Te ka nam jong U ka la phriang kylleng ka ri baroh. Bad U la hikai ha ki Sinagog jong ki, bad baroh ki la pyndonburom ia U.

47. Ka jingkhöt ia ki synran banyngkong bad ka jingngat dohkha baphylla. *Mt. 4:18-22. Mk. 1:16-20. Lk. 5:1-11.*

Te katba u Jisu U dang iaid harud ka duriaw Galileia, u la iöhi arngut shipara, u Simon ia uba

la khot Petrus, bad u Andrias uba shipara bad u, ba ki dang iabret ia ka jar ha duriaw (naba ki la long ki nongtongdohkha). Te ka la jia ba haba kita ki paidbah ki la iatur sha U ban sngap ia ka ktien jong u Blei, U pat U la ieng harud ka pung Genasareth bad u la iohi artylli ki lieng kiba ieng harud ka pung: hynrei ki nongtongdohkha ki la hiar noh bad ki dang sait ia la ki jar. Bad haba U la kiew ha kawei na kita ki lieng, kaba long ka jong u Simon, U la ong ia u ban fiat kham pajih na ryngkew. Ynda U la shong U la hikai ia kita ki paidbah na kata ka lieng. Te haba U la kut kaba kren, U la ong ha u Simon :

“Lam sha bajylliew, bad to pynnoh ia la ki jar ban dup ngat.”


Bad u Simon u la phaiktien u la ong ha U :

“Ko Kynrad, baroh shimiet ngi la trei shitom, khlem da ngat eiei ruh; hynrei namar ka ktien jong Me, ngan pynnoh ia ka jar.”

Bad ynda ki la leh ia kane, ki la ngat shistai ki dohkha hynrei ka jar jong ki ka la praid. Te ki la khawoit ia la ki paralok kiba la don ha kawei pat ka lieng, ba kin wan bad iarap ia ki. Te ki la wan bad ki la pyndap ia ki lieng baroh artylli, haduh ba ki la jan ngam. Haba u Simon Petrus u la iohi ia kata, u la dem khrup ha ki khohsiew jong u Jisu, u ong :

“To leit noh na nga, ko Trai, namar nga long u nongpop.”

Namar u la lyngngoh ngaiñ, lem bad kita baroh kiba la don ryngkat bad u, ia kata ka jingngat dohkha kaba ki la ngat. Bad u Jisu U la ong ha u Simon :



*"Ki la ngat shistai ki dohkha, hynrei ka jar
jong ki ka la praid."*

“Wat sheptieng; naduh mynta men sa tong briew.”

Bad ynda ki la ñiah ña ki lieng sha ryngkew, haba ki la iehnoh ña kiei-kiei baroh, ki la bud ña U. Te katba U dang ñaid nangta, U la ñohi sa kiwei pat arngut shipara, u Jakob u khun jong u Sebedi, bad u Yoannis, u para jong u, ha ka lieng ryngkat bad u Sebedi, u kpa jong ki, ba ki dang ñasyrdep la ki jar : bad U la khot ña ki. Maki pat, markumta hi da kaba iehnoh ña ki jar bad ña la u kpa lem bad ki nongbylla, ki la ñabud ña U.

48. U Krist U hikai ha ka Sinagog¹ ha Kapharnaum bad U beh noh ña u mynsiem bymkhuid.
Mk. 1:21-28. Lk. 4:31-37.

Bad ki la rung ha Kapharnaum : te markumta ha ka sngi Sabbat haba U la rung ha ka Sinagog, U la hikai ña ki. Bad ki la sngew-lyngngoh ña ka jing-hikai jong U; naba U hikai ña ki kum Uba don bor, ym kum ki Nongthoh bad ki Pharisi.

Te ha kata ka Sinagog la don u briew uba ñoh ksuid bymkhuid, bad u la pyrta da ka sur bajam shibun :

“Yeh-noh, ngi ñadonkam aïu bad Me, ko Jisu na Nasareth? Me wan ban pynjot ña ngi? Nga tip ba Me dei U-ei, u Bakhuid jong u Blei.”

Te u Jisu U la byrngem ña u, U ong :

“Sngap jar, bad to mih-noh na u briew.”

Bad haba uta u mynsiem bymkhuid u la lympat ña u hapdeng, da kaba ring kyrthat ña u bad da

(1) Sinagog : ka jaka ialang ki Ju.

kaba pyrtá jam, u la mih-noh na u bad um shym pynmysaw eiei ía u.

Te baroh ki la lyngngoh, haduh ba ki la íakylli para-ki hi, ki ong :

“Kaei kane? ka jinghikai thymmai aïu kane? Naba da ka bor bad da ka i-ktiar U hukum wat ía ki mynsiem bymkhuid, bad ki kohnguh ía U bad ki mih-noh.”

Te ka nam jong U ka la phriang shisyndon ha ka ri Galileia baroh.

49. U pynkoit ía ka syngkenkurim jong ‘u Petrus.
Mt. 8:14-15. Mk. 1:29-31. Lk.4:38-39.

Ynda u Jisu U la íeng, ki la mih-noh shisyndon na ka Sinagog, bad ki la wan ha íng jong u Simon bad u Andrias, lem bad u Jakob bad u Ioannis. Te ka kmie jong ka tnga u Simon ka thiah-pang na ka khieshoh ka bajur, bad ki la íathuh kloi-lan ha U shaphang jong ka. U la wan bad U la bat ía ka na ka kti, bad haba U íeng hajan jong ka, U la hukum ía ka khieshoh, bad markumta kata ka khieshoh ka la pyllait ía ka; te ka la íeng bad ka la shakri ía ki.

50. Hadien ka sngi Sabbat, bun la pynkoit.
Mt. 8:16-17. Mk. 1:32-34. Lk. 4:40-41.

Te janmiet haba ka sngi ka la sep, baroh kat kiba la don nongpang da ki jingpang bun jait, ki la wanlam ía ki ha U. Te baroh shishnong ki la wan íalum lwui ha ka jynkhang. Ma-U pat da kaba buh ía la ki kti halor uwei-pa-uwei na ki, U la

pynkoit ia ki baroh : ba yn ioh pynurlong, ia kaba la kren u Isaias Nongiathuhlypa, uba ong (53 : 4) :

"U la shim ia ki jingkhrew jong ngi, bad U la kit-noh ia ki jingpang jong ngi."

Ki la wanlam ha U bun kiba shongksuid : bad U la beh-noh da ka ktien ia kita ki mynsiem. Bad ki ksuid ruh ki la mih na ki bun ngut, ki da pyrta, bad da ong :

"Me long u Khun jong u Blei."

Te da kaba kynteit ia ki, Um shym la shah ba kin kren, naba ki la tip ba U long u Krist.

51. U Krist U leit duai ha ka jaka kynjah.

Mk. 1:35-38. Lk. 4:42-43.

Haba U la khie dang step phyrngap, U la mih haba la sngi, bad U la leit sha ka jaka kynjah bad U la duai hangta. Te u Simon lem bad kita kiba la don ryngkat bad U, ki la bud ia U. Bad haba ki la shem ia U, ki la ong ha U :

"Baroh ki iawad ia Me."

Bad U la ong ha ki :

"Ia ngin ialeit sha ki shnong bad ki 'nongbah bamarkhap, ba Ngan ioh ban ialap hangta ruh; naba na ka bynta kane Nga la wan."

Bad ki paidbah ki la iawad ia U, bad ki la wan ha U, bad kin jin da la pynsah ia U ba Un ym leit-noh na ki. Hynrei U la ong ha ki :

"Nga dei ban ialap ia ka hima jong u Blei ha kiwei pat ki shnong ruh, namar na kane ka daw la phah ia Nga."

52. U Krist U ialap ha Galileia.

Mt. 4:23. Mk. 1:39. Lk. 4:44.

Bad u Jisu U la leit kylleng ka Galileia baroh, U hikai ha ki Sinagog jong ki, bad U ialap ia ka Gospel jong ka hima, bad U pynkoit ia ki jait jingpang baroh hapdeng ki paidbah, bad U beh noh ia ki ksuid.

53. U pynkhuid ia uba pang nianglyngkut.

Mt. 8:1-4. Mk. 1:40-45. Lk. 5:12-16.

Te ka jia, haba U la don ha kawei ka nongbah, hakhmih u briew uba dap da u nianglyngkut, u la wan sha U, bad haba u la iohi ia u Jisu, u la dem khrup bad u la mane ia U, bad u la kyrpad ia U, u ong :

“Ko Trai, lada Me mon, Me lah ban pynkhuid ia nga.”

Bad naba U la sngewsynei, U la kner ia la ka kti, bad U la ktah ia u, bad U la ong ha u :

“Nga mon. To khuid noh.”

Bad U tang shu lah ong, uta u nianglyngkut u la jah noh na u, bad u la khuid. Te U la bidong tynggeh ia u bad U la phah noh ia u shisyndon. Bad U la ong ha u :

“Peit ban ym iathuh hano-hano ruh : hynrei khie, to pyni ia lade ha u rangbah lyngdoh bad tyrwa ia ka jingainguh kaba u Moses u la hukum na ka bynta ka jingpynkhuid ban long ha ki ka sakhi.”

Hynrei ma-u pat, u leit bad u la sdang ban pynbna bad pynphriang kylleng ia kata ka ktien,

haduh ba u Jisu Um lah leit shuh ha kaba paw ha kata ka 'nongbah, hynrei U la sah shabar ha ki jaka kynjah.

Hynrei ka ktien shaphang jong U ka la nang phriang kylleng, bad ki paidbah babun ki la wan lang ha U ban dup iöhsngew bad ba yn dup pynkoit ia ki jingkhrew-jingswai jong ki. U pat U la kynriah-noh sha ri kynjah bad U la duai.

54. U Jisu U pynkoit ia uba pang iapshiliang ha Kapharnaum. Mt. 9:1-8. Mk. 2:1-12. Lk. 5:17-26.

Te hadien khyndiat sngi ynda U la leit biang ha Kapharnaum, la bna ba U don ha ing. Bad bun ki la wan ialum, haduh ba ym lait jaka shuh, wat ha jynkhang ruh, bad U la ialap ha ki ia ka ktien. Te la don ki Pharisi bad ki riew-said kiba iashong, kiba la wan na ki shnong baroh ha Galileia, bad Judia bad Jerusalem; bad ka bor jong u Trai ka la don bad U ban pynkoit-pynkhiah.

Te hakhmih, ki rangbah ki iabah ha ka jynthiah ia u briew uba pang-iap-shiliang: bad ki la wad lad ban pynrung ia u bad ban buh ha khmat jong U. Bad haba kim shem lynti ban pynrung, namar uta u paidbah, ki la kiew halor ing¹, ki la lied ia ka jynsop hamar ba don ma-U, bad haba ki la pyllait thliew, ki la pynhiar hapdeng ha-khmat u Jisu, ia ka jynthiah ha kaba la thiah uta uba pang-iap-shiliang. Haba iöhi ia ka jingngeit jong ki, U la ong ha uta uba pang-iap-shiliang:

"To shaniah, ko khun, la map-noh ia ki pop jong me".

(1) Ha ri Palestina ki tnum-ing ki long ki bamadan.

Te ki Nongthoh bad ki Pharisi ki la sdang ban pyrkhat, ki ong :

“Balei Une U kren kumne? U-ei Une Uba kren beif-blei? Mano ba lah ban map-pop, lait tang u Blei hi?”

Hynrei u Jisu Uba tip shisyndon ha la ka myn-siem, ba ki iäpyrkhat kumta hapoh lade hi, U la ong ha ki :

“Balei phi iäpyrkhat sniew ha ki dohnud jong phi? Kano kaba kham jem ban ong ha uba pang-iäp-shiliang: ‘La map-noh na me iä ki pop jong me,’ ne ban ong: ‘To ieng, to rah iä la ka jynthiah, bad to iaid?’ Hynrei ba phin dup tip ba u Khun jong u briew U don-bor ha ka pyrtnei ban map pop, (hangta U la ong ha uba pang-iäp-shiliang) : Nga ong ha me : ‘To ieng, to rah iä la ka jynthiah bad to leit sha la iing’.”

Te markumta hi da kaba ieng ha-khmat jong ki, u la rah iä ka jynthiah ha kaba u thiah bad u la leit-noh sha la iing, u da pyndon burom iä u Blei. Te baroh ki la lyngngoh ngaiñ, bad ki la pyndon burom iä u Blei, Uba la ai kat kata ka bor ha u briew. Bad ki la sngew-khaweit, ki ong :

“Ngi la iöhi kiei kiei baphylla mynta ka sngi. Mynno-mynno ruh ngim ju iöhi kum kane”.

55. Ka Jingkhot iä u Matheus.

Mt. 9:9-13. Mk.2:13-17. Lk. 5:27-32.

Bad haba u Jisu u la leit-noh nangta, U la leit biang sha rud-duriaw : te u paidbah baroh, u la wan ha U, bad la hikai iä ki.

Te haba U dang iaid nangta, U la iohi ia u nongkhrong-khajna uba kyrteŋg u¹ Matheus ba u shong ha iŋg ap-khronŋ bad U la onŋ ha u :

“To bud ia Nga”.

Te haba u la iehnoh baroh, u ieng joit bad u la bud ia U. Bad u Matheus u la pynlong na ka bynta jong U kawei ka jingkhawai ka bakhraw, ha la iŋg. Te ka la jia katba U dang shong-bam ha kata ka iŋg, ba bun ki nong-ap-khronŋ bad ki nongpop ki la iashong ryngkat bad u Jisu, lem bad ki synran jong U, namar ki la iadon shibun, bad ki la iabud ia U.

Ki Nongthoh bad ki Pharisi, haba ki iohi ba U bam ryngkat bad ki nong-khronŋ bad ki nongpop, ki la iakhñium ia ki synran jong U, bad ki la onŋ :

“Balei u Nonghikai jong phi U bam bad U dih ryngkat bad ki nongkhronŋ bad ki nongpop?”

Haba u Jisu U la iohsngew ia kane, U la onŋ ha ki :

“Kito ki bakoit bakhiah kim donkam ia u nong-pynkoit, hynrei kito ki bapang keiñ. Kumta to leit, to hikai ka mut aiu kane : ‘Ka jingisynei nga kwah, ym ka jingñia.’ (Os. 6 : 6). Naba Ngam shym wan ban khot ia ki bahok, hynrei ia ki nongpop ban kylla jinmut.”

56. Shaphang kaba shah-jingit.

Mt. 9:14-17. Mk. 2:18-22. Lk. 5:33-39.

Te ki synran jong u Ioannis bad jong ki Pharisi ki shah-jingit : bad ki la wan, bad ki onŋ ha U :

“Balei ki synran jong u Ioannis ki shah-jingit

(1) “Lebi” Mk. 2:14 bad Lk. 5:27.

bunsien bad ki duai, bad kumjuh ruh ki synran jong ki Pharisi, hynrei ki jong Me ki bam bad ki dih?"

Te u Jisu U la ong ha ki :

" Ki lah ma ki lok jong u nongleit-kurim ban shah-jingit katba u nongleitkurim u dang sah bad ki? Katba ki dang don u nongleitkurim lem bad ki, kim lah ban shah-jingit. Hynrei ki sngi kin poi haba yn shim noh na ki ia u nongleitkurim, te kumta ha kito ki sngi kin shah-jingit".

Bad U la kren ruh ha ki kawei ka pharshi :

"Ym don uba syrdep da ka lyngkhot jaiñ thym-mai ia ka jaiñkup barim, lada kumta, un pynjot noh ia ka bathymmai ruh, bad kata ka lyngknot thymmai kan ym iadei bad ka barim. Ym don ruh uba buh ia ka waiñ thymmai ha ki lwa-snieh barim; lada kumta, kata ka waiñ kan pynpdang ia kita ki lwa-snieh, ka hi ruh kan jaw noh bad ki lwa-snieh kin jot-ei. Hynrei ia ka waiñ thym-mai dei ban buh ha ki lwa-snieh thymmai; bad baroh ar kin sah. Bad ym don uno-uno haba u la dih ia ka barim, u kwah ia ka bathymmai; namar u ong : 'Ka barim ka kham¹ bha'.

(1) Ka jingmut jong kine ki phawer ka long ba u Krist U wan ym ban pynthymmai ia ka niam ki Ju-kumban syrdep da ka jaiñthymmai ia ka jaiñ-rim-hynrei ban seng ia ka Balang Bakhuid jong U, ha kaba U buh ia ki rukom-niam bathymmai kiba long ki dak bashisha jong ka Jutang Barim. Ki Ju ki buh waiñ ha ki lwa-snieh; kumba ka waiñ thymmai ha ki lwa thymmai, ka kylla rim katba nang-iaid ka por, bad ka nang bang artat, kumta ka Balang u Blei ruh, katba ki snem ki nang-iaid, katta ka nang-roi bad nangipuh-ipheng.

KA LYNNONG III
KA SNEM BA-AR

1. Ka Jingleit sha Jerusalem

57. U Krist U pynkoit ia u bapang, ha ka pung.
Ioan. 5:1-18.

Hadien kine kiei-kiei la long ka sngi-khawai jong ki Ju, te u Jisu U la leit sha Jerusalem. Te la don ha Jerusalem kawei ka pung, ba la khot¹ Probatika, ia kaba la khot ha ka ktien Hebru Bethsaida, kaba don santylli ki tyngkong. Ha kine byllien ki thiah ki paid nongpang, ki matlah, ki dkoh, ki bapang-ïap-shiliang, ba ki ia-ap ia ka jingkhieh jong kata ka um. Ba u Angel jong u Trai u hiar katkum ka por, ha kata ka pung; bad la pynkhieh ia ka um. Te jar uba hiar nyngkong ha kata ka pung hadien ka jingkhieh jong ka um, la pynkoit-pynkhieh noh na kano-kano ka jingpang ba u don. Te la don hangta uwei u briew, uba la pang la lai-phewphra snem. Haba u Jisu U la iöhi ia une ba u thiah, bad ba U la tip ba u la don hangta la slem bah, U la ong ha u :

(1) Ka Phalorblang kaba don shaphang shatei mih-ngi jong ka tempel.

"Me kwah ban koit?"

Uta u bapang u la phai-ktien :

"A Trai, ngam ioh briew, uban pynngam ia nga ha ka pung, haba la pynkhih ia ka um; naba katba manga nga dang wan, uwei pat u la lah hiar shuwa ia nga".

U Jisu U la ong ha u :

"To ieng, to rah ia la ka jynthiah bad to iaid".

Te markumta hi, uta u briew u la koit, bad u la rah ia la ka jynthiah bad u la iaid. Hynrei kata ka sngi ka la long ka Sabbath. Namarkata ki Ju ki la ong ha uta ia uba la pynkoit :

"Dei ka Sabbath, ym bit ba men rah noh ia la ka jynthiah¹".

U la phai-ktien ha ki:

"Uta Uba la pynkoit ia nga, U la ong ha nga : To rah ia la ka jynthiah bad to iaid".

Namarkata, ki la kylli ia u :

"Mano uta u briew uba la ong ha me : To rah ia la ka jynthiah bad to iaid?"

Hynrei uta uba la koit um shym la tip ba dei mano. Namar u Jisu U la kynriah noh na u paid-bah uba iaieng ha kata ka jaka. Hadien u Jisu U la iashem bad u ha ka tempel, bad U la ong ha u:

"Hakhmih, la pynkoit ia me; kumta wat leh pop shuh, ioh kan ngat ha me kaba kham sniew".

Uta u briew u la leit noh, bad u la iathuh ha ki Ju ba dei u Jisu uba la pynkoit ia u. Namarkata, kita ki Ju ki la leh-beif ia u Jisu, naba U la leh ia kine kiei kiei ha ka Sabbath. Hynrei u Jisu U la phai-ktien ia ki:

(1) Ha ka sngi Sabbath ki Ju ki pyrkhing eh wat ban rah ia i-ei i-ei barit eh bad kim shah ruh ban leit jingleit sha jngai.

"U Kpa jong Nga U trei haduh mynta, Nga ruh Nga trei".¹

Te kumta kita ki Ju ki la nang-wad-dong ban pyniäp äa U, namar ym tang ba U la pynkheifi äa ka Sabbat, hynrei U la ong ruh ba u Blei U la long u Kpa jong U, bad U pynryngkat ialade bad u Blei.

58. U Krist U Kren ha ki Pharisi. Ioan. 5:19-47.

Kumta u Jisu U la phai-ktien bad U la ong ha ki:
"Shisha, shisha Nga ong ha phi : u Khun Um lah ban leh eiei ruh da lade hi, lait-tang kaba U iöhi ba u Kpa U leh : naba kat kaba ma-U U leh, äa kane u Khun ruh U leh lem. Namar u Kpa U iëid äa u Khun bad U pyni ha U baroh la kaba U hi U leh. Bad Un pyni ha U äa ki kam kiba kham khraw äa kine, ba maphi phin dup lyngngoh. Naba kumba u Kpa U pynmih äa ki baiäp, bad U pynim, kumta ruh u Khun, U pynim äa kiba U mon. Namar u Kpa Um bishar iäno-iäno ruh, hynrei äa ka jingbishar baroh U la ai ha u Khun, ba baroh kin dup burom äa u Khun, kumba ki burom äa u Kpa. Uta ubym burom äa u Khun, um burom äa u Kpa Uba la phah äa U. Shisha, shisha, Nga ong ha phi, ba uta uba shahshkor äa ka ktien, bad uba ngeit ha Uta Uba la phah äa Nga, u iöh äa ka jingim bymjukut, bad un ym hap ha ka jingbishar, hynrei u la lait shiliang na ka jingiäp sha ka jingim. Shisha, shisha, Nga ong ha phi ba ka äa ka

(1) U Blei Um pud ban trei wat tang shikhyllipmat ruh, namar lada Um sumar-sukher ma-U äa ka pyrthei, kumno kiei kiei baroh kin kylla-long? Kumta namar u Jisu U long u Blei, U pynkoit ha kano kano ka sngi ruh.

poi, bad ka dei mynta, haba ki¹ baiap kin ioh-sngew ia ka sur jong u Khun u Blei, bad kita kiba shahshkor kin im. Naba kumba u Kpa U don ka jingim ha lade hi, kumta U la ai ha u Khun ruh ban ioh jingim ha lade hi : U la ai ruh ha U ia ka bor ban bishar-khadar, namar U long u Khun jong u briew. Wat lyngngoh ia kane, namar ka poi ka por ha kaba baroh kito kiba don hapoh jyntep, kin iohsngew ia ka sur jong u Khun u Blei; bad kito kiba la leh ia ka babha kin mih sha ka jingmih-pat jong ka jingim : hynrei kito kiba la leh ia ka basniew, sha ka jingmih-pat jong ka jingbishar. Da lade hi Ngam lah ban leh eiei ruh em. Kumba Nga iohsngew, Nga bishar; bad ka jingbishar jong Nga ka long ka bahok, naba ngam wad ia la ka mon, hynrei ia ka mon jong Uta Uba la phah ia Nga.

"Lada Nga ieng-sakhi ialade hi, ka sakhi jong Nga kam long ka bashisha. Don Uwei pat Uba iengsakhi ia Nga; bad Nga tip ba kata ka sakhi kaba U sakhi ia Nga ka long ka bashisha. Maphi hi phi la iaphah ha u Yoannis bad u la ieng-sakhi ia ka bashisha. Pynban Ngam pdiang ia ka sakhi na u briew : hynrei Nga ong ia kine kiei kiei ba phin dup lait-im. Ma-u, u la long ka sharak bamah bad batyngshaiñ. Ma-phi pat phi la kwah tang shipor ban iakmen ha ka jingshai jong u. Hynrei Nga Nga don ka sakhi kaba kham khraw ban ia ka jong u Yoannis. Naba ki kam kiba u Kpa U la ai ha Nga ba Ngan pyndep, kita hi ki kam kiba Nga Nga leh ki ieng-sakhi ia nga, ba

(1) Kiba la iap ka mynsiem. Kita kiba shahshkor ia ka ktien jong U, wat lada ki iap, ka mynsiem kan lai-im.

u Kpa U la phah ia nga. Bad Uta u Kpa hi ruh Uba la phah ia Nga, ma-U hi U ieng-sakhi ia Nga. Mynno mynno ruh phim shym iohsngew ia ka sur jong U, lymne iohi ia ka dur-ka-dar jong U. Bad phim don ia ka ktien jong U ba kan iaisah ha phi: naba ia Uba ma-U U la phah, ia Uta phim ngei. Phi it bniah ia ki Jynthoh, naba phi tharai ban ioh ha ki ia ka jingim bym-jukut, bad maki dei kiba ieng-sakhi ia Nga bad phim treh ban wan ha Nga ban dup ioh ia ka jingim. Ngam pdiang ia ka burom na ki briew. Hynrei Nga tip ia phi, ba phim don ha lade ka jingieid jong u Blei. Nga Nga la wan ha ka kyrteng jong u Kpa jong Nga, bad phim pdiang ia Nga; lada uwei pat u wan ha ka kyrteng la jong, ia uta phin pdiang. Kumno maphi phi lah ban ngeit, phi kiba iapdiang ia ka burom uwei na uwei pat: bad ia ka burom kaba tang na u Blei hi phim iawad? Wat tharai ba Nga Ngan mudui ia phi ha uta u Kpa; don uba mudui ia phi, u Moses, ha uba phi iakyrmen. Namar lada phi ngeit ha u Moses, phin ngeit ha Nga ruh; namar u la thoh shaphang jong Nga. Hynrei lada phim ngeit ia ki jynthoh jong u, kumno phin ngeit ia ki ktien jong Nga?"

2. Ha Galileia

59. Ki Synran ki kheit ia ki soh-kew ha ka Sabbat.
Mt. 12:1-8. Mk. 2:33-28. Lk. 6:1-5.

Te ka la jia biang mynba u Trai U la iaid lyng-ba ia ki lyngkha-kew ha ka ar Sabbat banyng-

kong, ba ki synran jong U haba ki la thngan, ki la sdang, katha ki nang-iaid, ban¹ kheit ia ki tyr-jup kew. Bad ki la bam, ki kyrjaw ia ki ha la ki kti. Hynrei ki Pharisi, haba ki la iohi ia kata, ki la ong ha U :

“Hakhmih, balei ba ki synran jong Me ki leh ha ka sngi Sabbat ia kaba ym bit ban leh ha ka Sabbat?”

Te u Jisu U la phai-ktien ia ki, U la ong :

“Phim pat shym pule aïu u Dabid u la leh, mynba u la donkam, bad u hi u la thngan, lem bad kita kiba la iadon bad u? Kumno ba u la rung ha ka ïng u Blei, ha ka por u Abiathar, u rangbah lyngdoh, bad ba u la shim bad la bam ia ki Kpu-pyni, ia kiba ym bit ban bam lait-tang ki lyngdoh, bad ba u la ai ruh ha kita kiba la don lem bad u? Ne, phim shym pule ha ka aïñ, ba ha ka sngi Sabbat ki lyngdoh ha ka tempel ki pynkheifñ ia ka Sabbat bad ki long khlem pop? Hynrei Nga ong ha phi, ba don hangne Uba kham khraw ban ia ka tempel. Hynrei lada phi la tip ka mut aïu kane : ‘Ia ka jingisynei Nga kwah, bad ym ia ka jingkñia’ (Os. 6 : 6), phin ym da la pynrem ia ki balui-lui.”

Te U la ong ha ki :

“Ia ka Sabbat la thaw na ka bynta u briew, ym ia u briew na ka bynta ka Sabbat. Kumta u Khun jong u briew U long u Trai jong ka Sabbat ruh.”

(1) Ha ri mihngi, ki trai-kper kim ujur eiei ban kheit bam-rwing ia ki kynja jynbam ne soh.

**60. Ha kawei pat ka Sabbat U pynkoit ia uba pang-
iap ka kti. Mt. 12:9-13. Mk. 3:1-5. Lk. 6:6-10.**

Te haba U la leit noh nangta, ka la jia sa ha kawei pat ka Sabbat, ba U la rung biang ha ka Sinagog jong ki, bad U la hikai. Te la don hangta u briew uba ka kti-kamon jong u ka la iap. Hangta ki Nongthoh bad ki Pharisi ki la thap ia U, la Un pynkoit ma ha ka Sabbat, ba kin dup ioh mudui pyrshah ia U. Te ki la iakylli ia U, ki ong :

"Hato ka bit ban pynkoit ha ka Sabbat?"

Hynrei ma-U, U la tip ia ka jingmut jong ki, bad U la ong ha uta u briew uba la don ka kti ba la iap :

"Khie joit bad to ieng hapdeng."

Te u la khie bad u la ieng joit. Bad u Jisu U la ong ha ki :

"Nga kylli ia phi lada ka bit, ha ki sngi Sabbaton, ban leh bha ne ban leh sniew; ban pynim ia ka jingim, ne ban pynjot ia ka?"

Hynrei ki la sngap la ka sngap. Te U la ong ha ki :

"Uno u briew napdeng jong phi, uba don kawei ka langbrot, bad lada kata ha ka Sabbat, ka hap ha ka thliew, un ym bat bad un ym sei ia ka? Katno u briew, u kham bha ban ia ka langbrot! Namarkata ka bit ban leh bha ha ka Sabbat".

Te da kaba khmih sawdong ia ki, da ka jingbitar, ba U sngewsih ia ka jingmatlah jong ka dohnud jong ki, U la ong ha uta u briew :

"To kner ia la ka kti".

Te u la kner ia ka, bad ia ka kti jong u la pynkoit, kum kata kawei pat.

61. Ki Pharisi ki iasuh-buit ban pyniäp ia u Krist.
Mt. 12:14. Mk. 3:6. Lk. 6:11.

Hynrei ki Pharisi ki la dap da ka jinglamwir bad ki la iasylla para-ki hi, äiu, ba kin dup leh ia u Jisu. Te haba ki la iamih-noh, shisyndon ki la iasylla pyrshah ia U bad ki nongbud u Herod, kumno ba kin iöh pynduh-noh ia U.

62. U Krist U leit sha ka duriaw Genasareth, ha kaba U pynkoit bun ngut.
Mt. 4:24-25; 12:15-21. Mk. 3:7-12. Lk. 6:17-19.

Hynrei u Jisu ba U tip ia ka jingmut jong ki, U la kynriah noh lem bad la ki synran sha duriaw. bad u paidbah byllien u iabud ia U, na Galileia bad Judia, bad na Jerusalem, bad na Idumia, bad na Dekapolis, bad na sha shiliang ka Jordan. Bad kito kiba na ki thairi Tyrus bad Sidon, u paidbah byllien, haba iöhsngew ia kiei-kiei ba U leh, ki la iawan ha U. Te U la ong ha la ki synran ba ka lieng-rit kan ap hajan jong U, na ka daw jong uta u paidbah, ba iöh ki iaphnian ia U. Namar U la pynkoit bun ngut, haduh ba baroh kita kiba don jingpang ki la iatur sha U ban dup iöh ktah ia U. Te ki la wanlam ha U ia kita baroh kiba la pang, ia kiba la ngat ha ki jingpang bad ki jingkordit har rukom, ia kiba shongksuid bad ki balamwir bad kiba pang iap-shilliang. Bad U paidbah baroh u la iawad ban iöh-ktah ia U, naba ka bor ka la mih na U bad U la pynkoit ia ki baroh. Te haba ki mynsiem bymkhuid ki la iöhi ia U, ki la dem ngon ha-khmat jong U bad ki pyrta, ki ong:

"Me long u Khun jong u Blei".

Ma-U pat U la maham tynggeh ia ki ba kin ym pynbna ia U : ba yn ioh pyn-urlong ia kaba la ong da u Isaïas Nongïathuhlypa, uba ong (42 : 1-4.):

"Hakhmih u shakri jong Nga, Uba Nga la jied, U baïeid jong Nga, ha Uba ka mynsiem jong Nga ka sngewbha eh. Ngan buh ia u Mynsiem jong Nga halor jong U, bad Un pynbna ia ka jingbishar ha ki bynriew. Un ym iengïaleh, lymne pyrta, lymne yn ym don ba iohsngew ia ka sur-ktien jong U ha ki lad. Un ym kdïah ia u khah ba la kheïñ, bad Un ym pynlip ia u ksai ba sah tдем : tat haduh ba U phah ia ka jingbishar sha ka jingjop. Bad ha ka kyrteng jong U ki bynriew kin kyrmen."

63. U khot ia ki Khat-ar ngut ki Apostol.

Mt. 5:1; 10:1-4. Mk. 3:13-19. Lk. 6:12-16.

Te ka la jia ha kito ki sngi, ba haba iohi ia ki paidbah, U la kiew sha u lum ban duai, bad U la sah baroh shimiet ha kaba duai ia u Blei. Bad haba la mih ka sngi, U la khot ia ki synran, bad U la jied khat-ar ngut napdeng jong ki, ia kiba U la khot Apostol¹. Bad U la thung ia ki khat-ar ngut ba kin dup long lem bad U, bad ba Un dup ioh phah ia ki ban ialap. Bad U la ai-bor ha ki ban pynkoit ia ki jingpang bad ban beh noh ia ki ksuid.

Bad ki kyrteng jong kita ki khat-ar ngut ki Apostol ki long kine :

U banyngkong u Simon, ia uba la khot u Petrus,

(1) Ki Nonglamkten.

bad u Andrias uba shi-para bad u, u Jakob u khun jong u Sebedeus bad u Ioannis u para jong u (bad u la sin ia ki Boanerjes, kaba mut, ki khun u pyr-that), u Philip bad u Bartholomeus, u Thomas bad u Matheus u nong-ap-khrong, bad u Jakob u khun u Alpheus, bad u Thaddeus, u Simon Kananeus ia uba la khot u bashitrhem, bad u Judas Iskariot, uba la long u nongshet-kylla.

64. Ka jingäathuhkhana halor u lum.

Mt. 5:1-2. Lk. 6:17-20.

Te haba U la hiar arsut bad ki, U la ieng ha ka jaka madan, bad shibun na ki synran jong U, bad u paidbah byllien na baro' ka Judia, bad Jerusalem, bad na ki rud-duriaw bad na Tyrus bad na Sidon, kiba la wan ban sngap ia U bad ba yn pynkhiah ruh na ki jingpang jong ki. Bad haba U la shong, ki synran jong U ki la wan ha U. Te haba U la mied ia la ki khmat sha la ki synran, U la ang ia la ka shyntur bad U la hikai ia ki, U ong :

65. Ki Jingsuk bad ki Jingkordit.

Mt. 5:3-12. Lk. 6:20-26.

"Suk ki baduk ha ka mynsiem, naba ka hima ki bneng ka long ka jong ki. Suk ki bajemnud, naba kin ioh ia ka khyndew. Suk kito kiba iam, naba yn pyntngen ia ki. Suk kito kiba thngan bad kiba sliang ia ka hok, naba yn pynkdang ia ki. Suk kiba isynei, naba yn isynei ia ki. Suk ki bakhuid dohnud, naba kin iohi ia u Blei. Suk

kiba pyniasuk, naba yn khot ia ki ki khun jong u Blei. Suk kito kiba shahlehbein na ka bynta ka hok, namar ka hima ki bneng ka long ka jong ki. Suk maphi haba kin tim ia phi bad lehbein ia phi, bad kin kren baroh ka basniew pyrshah ia phi, da kaba lamler, na ka bynta jong Nga. Suk maphi haba ki briew kin isih ia phi, haba kin kyntait ia phi, kin bein bad kin pynsahjied ia ka kyrteng jong phi kum ka basniew, na ka bynta jong u Khun u briew. To kmen bad to risa ha kito ki sngi, naba ka bainong jong phi ha bneng ka long ka bakhraw. Naba kumta hi ki la leh-bein ia ki nongiathuhlypa kiba la don shuwa ia phi.

“Hynrei kordit ia phi ki bariewspah, naba phi la ioh ia la ka jingtngen. Kordit ia phi kiba la kdang, naba phin thngan. Kordit ia phi kiba rkhe mynta, naba phin sngewsih bad phin iam. Kordit ia phi haba ki briew kin iaroh ia phi, naba kumne ki kpa jong ki ki la leh ia ki nongiathuhlypa balamler.”

66. Ka mluh jong ka ram-ew; ka jingshai jong ka pyrthei. Mt. 5:13-16.

“Phi long ka¹ mluh jong ka ram-ew, hynrei lada ka mluh ka blad noh, da-ei yn pynbang pat ia ka? Kam larkam eiei shuh, sa tang ban shu bret noh shabar, bad ba yn iuh ki briew. Phi long ka jingshai jong ka pyrthei. Ym lah ban

(1) Kumba ka mluh ka da na ka jingpyut bad jingbiah-phongrai, kumta ki Apostol ruh ki da ia ka pyrthei da ki kam bad ki jingduai jong ki.

buhrieh ia ka nongbah kaba don halor u lum. Kim thang ia ka sharak bad buh ia ka hapoh ka pyrha. hynrei halor ka diengpynieng sharak, khnang ba kan dup pynshai ia baroh kiba don ha ing. Kumjuh to ai ba ka jingshai jong phi kan tyngshaiñ ha khmat ki briew, ba kin dup iohi ia ki kam babha jong phi, bad kin dup pyndon burom ia u Kpa jong phi Uba ha bneng.”

67. U Krist bad ka Aifñ. *Mt. 5:17-20.*

“Wat mut ba Nga la wan ban pynduh-pyndam noh ia ka aifñ, ne ia ki nongiathuhlypa : Ngam wan ban pynduh-pyndam hynrei ban pyndep. Namar, shisha Nga ong ha phi, haduh ban da duh noh ka bneng bad ka khyndew, iwei i dak-rit, ne i dong in ym duh noh na ka aifñ, tat ynda la pyndep baroh. Uta, namarkata, uban pynkheifñ iwei na kine ki hukum barit eh, bad uban hikai kumta ia ki briew ruh, yn khot u barit tam ha ka hima ki bneng. Hynrei uta uban leh bad uban hikai, ia u yn khot u bakhrav ha ka hima ki bneng. Namar Nga ong ha phi ba lynda ka hok jong phi ka palat ban ia ka jong ki Nongthoh bad ki Pharisi, phin ym rung ha ka hima ki bneng.”

68. Ka jingbitar bad ka jingbuhnud. *Mt. 5:21-26.*

“Phi la iohsngew ba la ong ha kiba mynhyndai (Eks. 20 : 13...) : Men ym pyniap. Naba uno-uno uban pyniap un hap ha ka jingbishar. Hynrei Nga ong ha phi, ba uno-uno uba bitar ia la u hymmen-u-para, un hap ha ka jingbishar. Uto pat uban ong

ia la u hymmen-u-para : "Raka," un hap ha ka dorbar. Uto pat uban ong : "Me u biej," un hap ha ka dujok-ding. Namarkata, lada me tyrwa ia ka jingainguh jong me ha ka duwan, bad ha shen me kynmaw ba u hymmen-para jong me u don eiei pyrshah ia me, to iehnoh hangta ha-khmat ka duwan ia la ka jingainguh, bad to leit ban iasuk shuwa bad la u hymmen-u-para, te hadien haba me wan men tyrwa ia la ka jingknia. To mynjur pynkloi bad u nongialeh-pyrshah jong me, katba me dang don bad u ha lynti, ioh ba uta u nongialeh-pyrshah u aiti ia me ha u nongbishar bad u nongbishar u aiti ia me ha u shakri, bad yn thep ia me hapoh patok. Shisha Nga ong ha me, ba men yn mih noh nangta, tat haduh ba men da siew dep ia ka damli bakhatduh."

69. Ka jinglim bad ka jingbrai-thala. Mt. 5:27-30.

"Phi la iohsngew ba la ong ha kiba mynhyndai (Eks. 20 : 14) : Men ym klim : Hynrei Nga ong ha phi, ba jar uba peit ia ka kynthei ban brai thala bad ka, u la lah klim lypa ia ka ha la ka dohnud. Lada ka khmat kamon jong me ka pynthut ia me, to khlaw noh ia ka, bad to bret noh na me, naba ka kham bha ia me ba kawei na ki dkhot-met kan duh noh ban ia kaban bret ia ka met jong me baroh kawei hapoh dujok. Bad lada ka kti kamon jong me ka pynthut ia me, to ot noh ia ka bad to bret noh na me : naba ka kham bha ia me ba kawei na ki dkhot-met jong me kan duh noh, ban ia kaba ka met jong me baroh kawei kan leit sha dujok."

70. Ka jingpyllait-tnga. Mt. 5:31-32.

"La ong ruh (Deut. 24 : 1) : Kat uba beh noh ia la ka tnga, un ai ha ka ia ka kot iapyllait. Hynrei Nga ong ha phi ba jar uba beh noh ia la ka tnga, lait na ka daw klim, u pynklim ia ka : bad uta uba iapoi bad kata kaba la shah beh, u klim."

71. Ka jingsmai lamler bad kaba smai.

Math. 5:33-37.

"Phi la iöhsngew ruh ba la ong ha kita kiba mynhyndai (Eks. 20 : 7...) : Men ym smai lamler, hynrei men pyndep ia la ki jingsmai ha u Trai. Ma-Nga pat Nga ong ha phi ban ym smai satia, lymne da ka bneng, naba ka long ka khet jong u Blei; lymne da ka ram-ew, ba ka long ka jingüh-kjat jong U; lymne da ka Jerusalem, ba ka long ka nongbah jong u Syiem bakhraw; lymne men ym smai da la ka khlieh, naba mem lah ban pynlieh ne pyniong ia uwei u 'ñiuh-khlieh. Hynrei ka jing-kren jong phi to kan long, hooid, hooid : em, em; naba kaba palat na kine, ka long na ka basniew."

72. Ka aiñ ban pynhiar-kput.

Mt. 5:38-42. Lk. 6:29-30.

"Phi la iöhsngew ba la ong (Leb. 24 : 19) : Ka khmat na ka bynta ka khmat, bad ka bniat na ka bynta ka bniat. Hynrei Nga ong ha phi ban ym ieng pyrshah kyliang ia ka basniew; hynrei lada uno-uno u thab ia me na ka ngap kamon jong me, to pynshah ha u sa kawei pat : bad ha uta uba

kwah ban tian-bishar ia me, bad ban shim noh ia ka sopti-lor jong me, to ieh ha u ia ka jaiñ-kup ruh : Bad ha uta uba shim noh na me ia ka jaiñ-kup jong me, wat khang ba un shim ia ka sopti-lor ruh. Bad uno-uno uban ring-bor ia me shihajar jam, to leit bad u sa arhajar. To ai ha uta uba pan na me; bad na uba kwah ban pan kylliang na me, wat phai noh, bad na uta uba shim ia kiei-kiei ki jong me, wat pan biang."

73. Ka jingieid ia ki nongshun.

Mt. 5:43-48. Lk. 6:27-28; 31-36.

"Phi la iohsngew ba la ong (Leb. 19 : 18) : Men ieid ia la u paramarjan bad men isih ia u nongshun jong me. Hynrei Nga ong ha phi kiba ia-sngap : To ieid ia ki nongshun jong phi, to leh bha ia kito kiba isih ia phi. To kyrkhu ia kito kiba tim ia phi, bad to duai na ka bynta kito kiba leh-beiñ bad kiba kynnoh-sniew ia phi, ba phin dup long ki khun jong u Kpa jong phi Uba ha bneng, Uba pynmih ia la ka sngi ha ki babha bad ki basniew, bad Uba pynslap ha ki bahok bad ki bymhok. Bad kumba phi kwah ba ki briew kin leh ia phi, to leh kumjuh ia ki maphi ruh. Namar lada phi ieid ia kito kiba ieid ia phi, phin ioh 'nong aiu? Hato ki nong-ap-khrong ruh kim leh ia kane? Bad lada phi leh bha ia kito kiba leh bha ia phi, phi ioh jingnguh aiu? Wat ki nongpop ruh ki leh ia kane. Bad lada phi ai-kylliang ha kito na kiba phi kyrmen ban ioh biang, phi ioh jingnguh aiu? Naba ki nongpop ruh ki ai-kylliang ia ki nongpop, ban dup ioh katjuh. Hynrei to ieid ia ki nongshun jong phi;

to leh bha bad to ai-kylliang, khlem kyrmen eiei na kata : bad ka bainong jong phi kan long ka bakhraw, bad phin long ki khun jong U bahalor tam : naba U long U basbun ia ki bymsngewnguh, bad ia ki basniew. Namarkata, to long ki bajanai, ki baisynei, kumba u Kpa-bneng jong phi ruh, U long u bajanai, u baisynei."

74. Ki jingthmu babha haba ai isynei. Mt. 6:1-4.

"To sumar ban ym leh ia ka hok jong phi ha khmat ki briew, ba kin dup iohi : lada kumta, phin ym ioh ka bainong na u Kpa jong phi Uba ha bneng. Namarkata, haba me ai isynei, wat put turoi ha shuwa jong me, kumba leh ki arsap ha ki sinagog bad ki surok-bah, ba yn dup burom ki briew. Shisha Nga ong ha phi, ki la ioh ia la ka bainong. Hynrei haba me ai isynei, wat ai ba ka 'ti-kadiang jong me kan tip ia kaba ka 'ti-kamon jong me ka leh; khnang ba kata ka jingai-isynei kan long ha kaba rieh, bad u Kpa jong me Uba iohi ha kaba rieh, Un siew-kylliang ia me."

75. Ki jingthmu babha haba duai. Mt. 6:5-8.

"Bad haba phi duai, wat long kum ki arsap, kiba ieid ban ieng bad ban duai ha ki Sinagog bad ki 'dong jong ki surok-bah, ba yn dup iohi ki briew; shisha Nga ong ha phi, ki la ioh ia la ka bainong. Me pat haba me duai, to rung ha la ka

‘pulit¹, bad ynda la khang ia ka jynkhang, to duai ia u Kpa jong me ha kaba rieh : bad u Kpa jong me Uba iohi ha kaba rieh Un siewkyliliang ia me. Bad haba phi duai, wat bun-ktien, kum ki jentil; naba ki tharai yn shahshkor ia ki na ka pyrthei; naba ki tharai yn shahshkor ia ki na ka bynta ka jingbun-ktien jong ki. Namarkata, wat long kum maki, naba u Kpa jong phi U tip ia kaba phi donkam, shuwa ba phin pan na U.”

76. Ka jingduai u Trai. Mt. 6:9-15.

“Namarkata, phin duai kumne : Ko Kpa jong ngi Uba ha bneng, kan long bakhuid ka kyrteng jong Me, kan wan ka hima jong Me. Kan long ka mon jong Me, ha ka khyndew kumba ha bneng. To ai ha ngi mynta ka sngi ia ka jynbam ba donkam jong ngi. Bad to map ia ngi ia ki ryngkang jong ngi kumba ngi ruh ngi map ia kiba leh sniew ia ngi. Bad wat ialam ia ngi sha ka jingpynshoi; hynrei to pyllait ia ngi na ka basniew.

Naba lada phin map ia ki briew ia ki pop jong ki, u Kpa-bneng jong phi ruh Un map ia phi ia ki pop jong phi. Hynrei lada phin map ia ki briew, u Kpa jong phi ruh Un ym map ia phi ia ki pop jong phi.”

77. Ka jingthmu babha haba shah-jingit.

Mt. 6:16-18.

“Te haba phi shah-jingit, wat leh sngewsih kum ki arsap. Naba ki pynran la ka khmut-kakhmat ba kin dup paw shah-jingit ha ki briew. Shi-

(1) I kamra rit.

sha Nga ong ha phi, ki la ioh la ka bainong. Mépat, haba me shahjingit, to sleh umphniang ia la ka khlieh, bad to bta ia la ka khmut-ka-khmat : ha men ym paw ha ki briew ba me shah-jingit, hynrei ha u Kpa jong me Uba don ha kaba rieh; bad u Kpa jong me Uba iohi ha kaba rieh; Un-siew-kylliang ia me."

78. Ka spah-bneng. Mt. 6:19-21.

"Wat kynshew spah ia phi hi ka kane ka pyr-thei, ha kaba ka sarang bad ki khñiang ki bam-duh, bad ha kaba ki nongtuh ki tih bad ki tuh. Hynrei to kynshew ia phi hi, ki spah ha bneng, ha kaba lymne ka sarang lymne ka khñiang kin ym bam-duh bad ha kaba ki nongtuh kin ym tih, ne tuh. Naba ha kaba ka spah jong me ka don, hangta ka dohnud jong me ruh ka don."

79. Ka khmat, ka sharak jong ka met. Mt. 6:22-23.

"Ka sharak jong ka met jong me, ka long ka khmat jong me. Lada ka khmat jong me ka sngur, baroh ka met jong me kan shai. Hynrei lada ka khmat jong me ka jngut, baroh ka met jong me kan dum. Te kumta lada ka jingshai kaba ha me ka dum, katno kata ka jingdum hi kan long!"

80. To shakri tang ia uwei u Blei. Mt. 6:24.

"Ym don uba lah ban shakri arngut ki kynrad; naba un isih ia uwei, bad un ieid ia uwei pat : ne un iashah bad uwei, bad un ibeiñ ia uwei pat. Phim lah ban shakri ia u Blei bad ia ka spah."

81. Shaniah ha u Blei ia ki jingdonkam pyrthei.

Mt. 6:25-34.

Namarkata, Nga ong ha phi, wat diaw na ka byuta la ka jingim, daei ba phin bam, lymne na ka byuta la ka met, daei ba phin kup phin sem. Hato ka jingim kam kham-kor ban ia ka jynbam, bad ka met ban ia ka kup-ka-sem? To khmih-thuh ia ki sim jong ka suiñ-bneng, namar kim iabet, lymne kim ia-ot, lymne kim ialun ha ki thiar; bad u Kpa-bneng jong phi U bsa ia ki. Hato phim kham-kor shibun ban ia ki? Te uno na phi, da kaba pyrkhat u lah ban pyntam shipruh ia la ka rynieng? Bad halei phi diaw na ka bynta ka kup-ka-sem? To peitthuh ia ki 'tiew-lili ka lyngkha, kumno ki san : kim trei lymne kim thir. Hynrei Nga ong ha phi ba wat u Salomon ha ka burom jong u baroh, um shym la kup kum uwei na kine. Te lada ia u phlang ka lyngkha uba mynta ka sngi u don bad lashai la bret noh ha ka lawar-ding, u Blei U pynkup kumta, jin katno lei-lei ia phi, ki barit jingngeit! Namarkata wat diaw da kaba ong : Da-ei ngin bam, ne da-ei ngin dih, ne da-ei ngin kup? Naba ia kine baroh ki jentil ki wad. Namar u Kpa jong phi U tip ba phi donkam ia kine baroh. Namarkata. to wad shuwa ia ka hima jong u Blei, bad ia ka hok jong U, te ia kine baroh yn sa ai-tam lang ha phi. Te kumta wat diaw ia kaba lashai, naba ka sngi kaba lashai kan diaw ia lade hi. Ka bïang ia ka sngi la ka jong ka jingsniew."

82. Wat bishar. Katto katne ki jingsneng.

Mt. 7:1-6. Lk. 6:37-42.

“Wat bishar, te yn ym bishar ia phi. Wat pynrem, te yn ym pynrem. Naba da kata ka jingbishar ba phi bishar, yn bishar ia phi. To map, te yn map ia phi. To ai, te yn ai ha phi : ia ka jingthew babha, bad ba la tynñian, bad ba la kyr-ih, bad ba la shlei kin ai ha ka shadem jong phi. Naba da kajuh ka jingthew kaba phi thew, yn thew pat ha phi.”

Te U la kren ha ki ka pharshi ruh :

“U bamatlah u lah ma ban ialam ia u bamatlah? hato kin ym hap baroh arngut hapoh khap? U synran um long halor u nonghikai; hynrei baroh un long u bajanai, lada u long kum u nonghikai jong u. Te balei me khmih ia u thngiat ha ka khmat u para jong me hynrei ia u khung uba ha ka khmat la jong mem pyrkhat? Ne kumno me lah ban ong ha la u para : Ko hep, diang ngan khlaw noh ia u thngiat na ka khmat jong me, haba me hi ia u khung uba ha ka khmat la jong mem iohi? Ko arsap, to khlaw noh shuwa ia u khung na la ka khmat : te men iohi bha ban khlaw noh ia u thngiat na ka khmat jong u para jong me. Wat ai ia ka bakhuid ha ki ksew; lymne wat bret ia ki mawlynnai jong phi ha klumat ki sniang, ba ioh ki kyrdem ia ki da la ki kjat, bad da kaba phai-kylla, kin tar ia phi.”

83. Ka jingshaniah haba duai. *Mt. 7:7-11.*

“Pan, te yn sa ai ha phi; wad, te phin sa shem; tied, te yn sa plie ia phi. Naba baroh uba pan, u

ioh-pdiang; bad uba wad, u shem; bad ha uba tied yn plie. Ne uno u briew na phi, uba lada u khun jong u un pan ia u kpu, un ai pynban ha u da u maw? Ne lada un pan ia ka dohkha, un ai ha u da u bseiñ? Te lada maphi kiba long ki basniew, phi tip ban ai ki jingai babha ha la ki khun, katno lei-lei u Kpa jong phi Uba ha bneng, Un ai ia kiei-kiei ki babha ha kita kiba pan na U?"

84. Ka lynti ksiar jong ka jingieid. Mt. 7:12.

"Namarkata, ia kiei-kiei baroh kiba phi kwah ba ki briew kin leh ia phi, te leh maphi ruh ia ki. Naba kane ka long ka aiñ bad ki nongiathuhlypa."

85. Ki khyrdop bad ki lynti. Mt. 7:13-14.

"To bsut na ka khyrdop bakhim : naba ka kyl-luid ka khyrdop bad ka iar ka lynti, kaba lam sha ka jingjot, bad don bun kiba rung na kata. Katno ka rit ka khyrdop, bad ka khim ka lynti kaba lam sha ka jingim, bad don tang khyndiat kiba shem ia ka."

86. To sumar na ki nongiathuhlypa balamler.
Mt. 7:15-20. Lk. 6:43-45.

"To sumar na ki nongiathuhlypa balamler, kiba wan ha phi da ki jaifikup snieh-langbrot, hynrei hapoh ki long ki suri ba pynjot. Na ki soh jong ki phin ithuh ia ki. Ki ju kheit ma ia ki soh-waiñ na ki shiah, ne ia ki soh-dumbur na ki fiutshiah?"

Kumta man la u dieng babha u sei ki soh babha; hynrei u dieng basniew u sei ki soh basniew. U dieng babha um lah ban sei ia ki soh basniew, lymne u dieng basniew ia ki soh babha. Man u dieng ubym sei ia u soh babha, yn khet noh bad yn bret hapoh ding. Namarkata na ki soh jong ki phin ithuh ia ki. Naba ia uwei-pa-uwei u dieng yn ithuh na u soh jong u. Namar kim kheit ia ki soh-dumbur na ki shiah : lymne ia u soh waiñ na u ñiut-shiah. U briew u babha, na ka khuñ jingbha jong ka dohnud jong u, u sei ia ka babha : bad u briew u basniew na ka khuñ jingsniew, u sei ia ka basniew. Naba na ka jingshlei jong ka dohnud, ka shyntur ka kren."

87. Ka kam, ym ki ktien, kan pynim ia phi.

Mt. 7:21-23. Lk. 6:64.

"Te balei phi khot ia nga : Ko Trai, ko Trai, bad phim leh ia kiba Nga ong? Ym uto uba ong ha Nga : Ko Trai, ko Trai, un rung ha ka hima ki bneng; hynrei uto uba leh ia ka mon jong u Kpa jong Nga Uba ha bneng, uto keiñ un rung ha ka hima ki bneng. Bun kin ia-ong ha Nga ha kata ka sngi : "Ko Trai, ko Trai, hato ngim shym la iathuhlypa ha ka kyrteng jong Me, bad ngim shym la beh noh ia ki ksuid ha ka kyrteng jong Me, bad ha ka kyrteng jong Me ngim shym la leh bun ki kam phylla?" Te Nga ruh Ngan phla ha ki : 'Namar Ngam ju ithuh ia phi : to leit noh na Nga, phi kiba leh bymman."

88. Ka jingpynkut : Ka ñng ba la tei halor u Maw-siang. *Mt. 7:24-29. Lk. 6:47-49.*

“Namarkata, jar uba wan ha Nga bad uba sngap ña kine ki ktien jong Nga, bad uba leh ña ki, Ngan pyni ha phi ñano u syriem. Yn pynsyriem ña u bad u briew u bastad uba la tei ña la ka ñng halor u mawsiang. Te u slap u la hap, bad ki wah ki la shlei, bad ki lyer ki la beh, bad ki la shoh ña kata ka ñng, bad kam kyllon : naba la pynshong-nongrim ña ka halor u mawsiang. Bad jar uba sngap ña kine ki ktien jong Nga, bad um leh ña ki, yn pynsyriem bad u briew u habiej uba la tei ña la ka ñng halor u shyiap, khlem nongrim. Te u slap u la hap, bad ki wah ki la shlei, bad ki lyer ki la beh, bad ki la shoh ña kata ka ñng, bad kumta-kumta hi ka la kyllon, bad ka jingjot jong ka ka la long ka bakhraw.”

Te ka la jia, haba u Jisu U la kut ña kine ki ktien, ki paidbah ki la sngewphylla ña ki jinghikai jong U. Naba U la hikai ña ki kum uba donbor, bad ym kum ki Nongthoh jong ki bad ki Pharisii.

89. Ha Kapharnaum : U pynkoit ña u shakri jong u Rangbah shipai. *Mt. 8:5-13. Lk. 7:1-10.*

Te ynda U la dep la ka jingkren baroh ha kaba ñohsngew u paidbah, U la rung ha Kapharnaum. Te u shakri jong uwei u rangbah shipai, ña uba u kheĩn-kor shibun, u pang, u la don ha tmier ka jingiap. Te haba u la ñohsngew shaphang u

Jisu, u la phah sha U ia ki tymmen-ki-san jong ki Ju, u kyrpad ia U ban wan, bad ban pynim ia u shakri jong u, u ong :

"Ko Kynrad, u shakri jong nga u thiah pang-iaap-shiliang ha ing bad u shitom jur".

Te haba ki la poi ha u Jisu, ki la kyrpad-kyrpon eh ia U, ki ong ha U :

"U shong-hok ba Men leh ia kane ha u. Naba u ieid ia ka jait-ka-kynja jong ngi : bad u la tei kawei ka sinagog ia ngi".

Te u Jisu U la ong :

"Ngan wan bad Ngan pynkoit ia u".

Te u Jisu U la leit ryngkat bad ki. Te haba Um jngai shuh na ka ing, u rangbah-shipai u la phah sha U ia la ki lok, u ong :

"Ko Kynrad, wat pynshitom ia lade, naba ngam long u ba-shong-hok ba men wan rung hapoh ka ing jong nga. Na kajuha ka daw ngam sngew ba manga hi ruh nga shong-hok ban wan sha Me; hynrei shu ong da ka ktien bad yn pynkoit ia u shakri jong nga. Naba nga ruh nga long u briew uba dei hapoh ka bor, uba don ki shipai hapoh jong nga, bad nga ong ha uwei : Khie-leit, bad u leit; bad ha uwei pat : Ale, bad u wan; bad ha la u shakri : To leh ia kane, bad u leh."

U Jisu haba U la iohsngew ia kata U la lyngngoh : bad haba U la phai sha uta u paidbah uba iabud ia U, U la ong :

"Shisha, Nga ong ha phi, wat ha Israel Ngam pat shym shem kat kane ka jingngeit. Te Nga ong ha phi ba bun kin wan na mihngi bad na sepngi, bad kin shong sadhai bad u Abraham, bad u Isaak bad u Jakob, ha ka hima ki bneng : hynrei ia ki khun jong ka hima yn shop noh sha ki jingdum

habar : kan don hangta ka jingiam bad ka jing-
kyriat-bniat."

Bad u Jisu U la ong ha uta u rangbah-shipai :

"To leit, bad kumba me la ngeit, kan long ha
me."

Bad ia u shakri jong u la pynkoit ha kata
hi ka por. Te haba kita ia kiba la phah, ki la leit
phai biang sha kata ka ing, ki la shem ia uta u
shakri uba la pang, ba u koit.

**90. Ha Naim : Ia pynim biang ia u khun jong ka
'riew-kynthei.**

Lk. 7 : 11-17.

Te ka la jia hadien ba U la leit sha ka shnong
ba la khot Naim; te ryngkat bad U ki la leit ki
synran jong U, bad u paidbah byllien. Bad haba
U la poi hajan khyrdop jong ka shnong, hakhmih
la bah ia u baiap, u khun marwei jong ka kmie
jong u; bad ma-ka ka la long ka 'riewkynthei : bad
u paid babun jong ka shnong u la don ryngkat
bad ka. Haba u Trai U la iohi ia ka, U la sngew-
synei ia ka, U la ong ha ka :


"Wat iam."

Bad U la tur shajan bad U la ktah ia ka krong.
Te kita kiba iabah ki la sangeh. Bad U la ong :

"Ko samla, Nga ong ha me, to ieng".

Te uta uba la iap u la khie-shong, bad u la
sdang ban kren. Bad U la ai ia u ha la ka kmie.
Te ka jingsheptieng ka la par ha ki baroh : bad
ki la pyndonburom ia u Blei, ki ong :

"U nongiathuhlypa bakhraw u la mih hapdeng
jong ngi, bad u Blei U la wan jngoh ia la ki
briew."



“Te uta uba la iap u la khie-shong, bad u
la sdang ban kren.”

Bad kane ka ktien shaphang jong U ka la phriang kylleng ka ri Judia baroh, bad kylleng ka ri baroh kaba marjan.

91. U Yoannis Bakhuid u phah ia la ki synran sha u Krist. *Mt. 11:2-6. Lk. 7:18-23.*

Bad ki synran jong u Yoannis ki la iathuh ha u shaphang kine kiei-kiei baroh, Te haba u Yoannis u la iohsngew na byndi ia ki jingleh jong u Krist, u la khot arngut na ki synran la jong, bad u la phah sha u Jisu, u ong :

“Dei ma-Me Uta Uban sa wan, ne ngin ia-ap ia uwei pat?”¹

Te haba kita ki briew ki la poi ha U, ki la ong :

“U Yoannis nongpynbaptis u phah ia ngi sha Me, u ong :

“Dei ma-Me Uta Uban sa wan, ne ngin ia-ap ia uwei pat?”

(Te ha kata hi ka por, U la pynkoit bun ngut na ki jingpang, na ki jingpang-mynsaw, bad na ki mynsiem bymman : bad ia ki bun ngut ki matlah, U la pynpeit.) Haba U phai-ktien, U la ong ha ki :

“To khie leit iathuh ha u Yoannis ia kaba phi la iohsngew bad la iohi: ba ki matlah ki iohi, ki dkoh ki iaaid, ia kiba sa-ñianglyngkut la pynkhuid, ki kyl-lut ki iohsngew, ki baiap ki mihpat, ha ki baduk la ialap ia ka Gospel: bad suk uta uban ym thut ha Nga.”

(1) U Yoannis u la tip ba u Krist U long uta u Nongpynim ba la khmih-lynti, hynrei u la phah-kylli khnang ba ki paid-bah kin iohsngew ia ka jubab na ka shyntur jong u Jisu hi.

92. U Krist U iarah ia u Yoannis.

Mt. 11:7-15. Lk. 7:24-30.

Te haba ki nonglam-ktien jong u Yoannis ki la leit noh, u Jisu U la sdang ban kren ha ki paidbah shaphang u Yoannis.

“Aiu phi la leit ban jngoh ha ri kynjah? Ia u khah ba khynñiuh ka lyer? Hynrei aiu phi la leit jngoh? Ia u briew uba kup da ki jaiñ-bani? Hakhmih kita kiba kup jaiñ-kordor bad kiba im sadhai, ki don ha ki ñng-syiem. Hynrei aiu phi la leit jngoh? Ia u nongiathuhlypa? Hooid, Nga ong ha phi, bad ia uba kham khraw ia u nongiathuhlypa : dei shaphang une keiñ ba la thoh (Is. 35 : 5-6) : Hakhmih, Nga phah ia la u Angel ha shuwa jong Me, uban pynkhreh ia ka lynti jong Me ha shuwa jong Me. Naba Nga ong ha phi : Hapdeng kiba la kha na ki kynthei, ym don u nongiathuhlypa uba kham khraw ban ia u Yoannis nongpynbaptis; pynban uto uba kham rit ha ka hima jong u Blei, u long kham khraw ban ia u.”

Te u paidbah-paidsan baroh uba iasngap, bad ki nongap-khrong, ki la pynksan ia U Blei, kiba la pynbaptis da ka jingbaptis jong u Yoannis. Hynrei ki Pharisi bad ki 'riewsaid ki la kyntait na lade ia ka jingsneng jong U Blei, kiba ym shym la pynbaptis da u. Te naduh ki sngi jong u Yoannis nongpynbaptis haduh mynta, ka hima bneng ka shah leh-jubor, bad kiba leh-jubor-justi ki rong bak ia ka. Naba baroh ki nongiathuhlypa bad ka aiñ, ki la iathuhlypa haduh u Yoannis.

“Bad lada phi kwah ban pdiang, dei ma-u u Elias, uban sa wan. Uba don ki shkor ban sngap to un shah-shkor.”

93. U Krist U kynnoh-pop ia kane ka pateng.
Mt. 11:16-19. Lk. 7:31-35.

Te U Trai U la ong :

“Namarkata, bad ei Ngam pynsyriem ia ki briew jong kane ka pateng? Bad ei ki iasyriem? Ki syriem ia ki khynnah kiba shong ha ka jaka-iew, bad kiba iakren paraki hi, bad ki ong: Ngi la put la tem na ka bynta jong phi, te phim shym la shad : ngi la rwai-bynñiaw, hynrei phim shym iām. Naba u Ioannis Nongpynbaptis u la wan, um bam kpu lymne dih waiñ, te phi ong: u shongksuid. U Khun jong u briew U la wan, U bam bad U dih, te phi ong : Hakhmih u briew u bajlawnguid, bad Uba dih waiñ, u lok jong ki nongapkhrong bad ki nongpop. Bad ia ka jingstad la pynksan da ki khun jong ka baroh.”

94. Ka Nongpop ka pynsleh ia ki kjat jong u Krist.
Lk. 7:36-50.

Te uwei na ki Pharisi u la khot ia U ban bam ryngkat bad u. Kumta U la leit ha ing jong uta u Pharisi, bad U la shong ban bam. Te hakhmih ka briew kaba ha kata ka shnong, ka nongpop, haba ka la tip ba U shong-bam ha ing jong u Pharisi, ka la wan-rah ia u kum-mawpleit uba don ka jynsleh; bad da kaba ieng nadien hajan ki kjat jong U, ka la sdang ban sait ia ki kjat jong U da la ki ummat, bad ka la fñiad ia ki da la u shñiuhkhlieh, bad ka la doh ia ki kjat jong U, bad ka la pynsleh da kata ka jynsleh. Te uta u Pharisi uba la khot ia U, haba u iohi, u la kren ha la ka mynsiem, u ong :

"Une ba Un ða dei u nongiathuhlypa, Un jin da la tip, kaei bad ka briew kaba kumno kaba ktah ïa U, naba ka long ka nongpop."

Bad u Jisu U phai-ktien, U la ong ha u :

"Simon, Nga don eiei ban ong ha me."

U pat u la ong :

"Ko Nonghikai, to ong."

"Uwei u nongairam u la don arngut ki nongkitram : uwei u la kitram sanspah ana bad uwei pat sanphew. Bad namarba kim don eiei ruh ban siew, u la map noh ïa ki baroh arngut. Namar-kata uno u kham ïeid ïa u?"

U Simon u phai-ktien, u la ong :

"Nga tharai uta uba u la map kham bun."

Bad U la ong ha u.

"Me la bishar hok."

Bad haba U la phai sha kata ka briew, U la ong ha u Simon :

"Me ïohi ïa kane ka briew? Nga la rung hapoh ka ïng jong me, mem shym ai um ïa ki kjat jong Nga : hynrei maka da ki ummat ka la sait ïa ki kjat jong Nga, bad ka la ñiad da u shñiuh la jong. Mem shym la doh ïa Nga; hynrei kane naduh ba ka la rung, kam shym sangeh ban doh ïa ki kjat jong Nga. ïa ka khlieh jong Nga mem shym pynsleh da ka umphniang : hynrei kane da ka jynsleh ka la pynkyllan ïa ki kjat jong Nga. Kumta Nga ong ha me : La map ïa ki pop babun jong ka, namar ka la ïeid shibun. Hynrei uta ïa uba la map khyndiat, u ïeid khyndiat."

Te U la ong ha ka :

"La map noh ïa ki pop jong pha."

Te kita kiba ïashong-bam lem bad U, ki la sdang ban ong hapoh lade :

"Uei Une Uba map pop ruh de?"

Bad U la ong ha kata ka brierw :

"Ka jingngeit jong pha, ka la pynim ia pha. To leit suk."

95. Ki kynthei bariewblei kiba shakri ia u Krist.

Lk. 8:1-3.

Bad ka la jia hadien kata ba U la leit jingleit lyngba ki 'nongbah bad ki 'nongheh, U da ialap bad U da pynbna ia ka hima jong u Blei; bad ryngkat bad U ki khatar-ngut, bad ki kynthei ia kiba la pynkoit na ki mynsiem bymman bad ki jingkhrew : Ka Maria ba la khot Magdalena, na kaba la mih hynñiew ngut ki ksuid, bad ka Ioanna, ka tnga jong u Khusa, u sordar jong u Herod, bad ka Susanna, bad bun kiwei de, kiba la shakri ia U na la ka kamai-kajih.

96. Ka Kapharnaum. Ka jingsheptieng jong ki kur jong u Krist.

Mk. 3:20-21.

Te ki la iawan sha ing, bad u paidbah u la wan ialum biang haduh ba kim lah shuh wat ban bam jynbam. Te haba ki kur jong U ki la bna, ki la ia-leit ban bat ia U, namar ki la ong : "U la lamwir."

97. La beh noh ia u ksuid.

Mt. 12:22-23.

Hadien kata, la wanlam ha U ia uwei u ba-shongksuid, bamatlah bad bymnangkren : bad U la pynkhiah ia u, kumta ba u la kren bad u la iohi,

bad ki paidbah baroh ki la sngewkyndit bad ki la
ia ong :

"Hato Une Um long u khun jong u David"?

98. U Krist U pynrem ia ka jingujor jong ki Pharisi.

Mt. 12:24-30. Mk. 3:22-27.

Hynrei ki Pharisi bad ki Nongthoh kiba la wan
na Jerusalem, haba ki la iohsngew ia kata, ki la
ong :

"Une u briew U don Belsebub, bad Um beh
noh ia ki ksuid lait-tang da u Belsebub, u rangbah
ki ksuid."

U Jisu pat ba U tip ia ki jingpyrkhat jong ki,
ynda la khot lang ia ki, U la kren ha ki da ki
pharshi.

"Ka hima baroh kaba ialeh makynti kan jot,
kata ka hima kam lah neh; bad ka shnong baroh
ne ka ing kaba ialeh makynti kan ym neh. Bad
lada u Soitan u beh noh ia u Soitan, u pynpait
ialade hi : te kumno ka hima jong u kan neh?
Te lada ma-Nga, da u Belsebub, Nga beh noh ia
ki ksuid, dano ki khun jong phi ki beh noh ia ki?
Namarkata, ki hi kin long ki nongbishar jong
phi. Hynrei lada ma-Nga, da u Mynsiem u Blei,
Nga beh noh ia ki ksuid, kumta te ka hima u Blei
ka la wan ha phi. Lane, kumno uno-uno u lah
ban rung hapoh ka ing jong u bakhlain bad ban
kurup ia ki mar-ki-mata jong u, lynda u khum
shuwa ia uta u bakhlain? Ynda kumta te un sa
kurup ia ka ing jong u. Uta ubym long bad Nga,
u long pyrshah ia Nga : bad uta ubym ialum bad
Nga, u pynsaphret.

99. Ki jingkren-beiñ-blei pyrshah ia u Mynsiem Bakhuid. *Mt. 12:31-32. Mk. 3:28-30.*

“Namarkata Nga ong ha phi: Ia ka pop baroh bad ka jingkrenbeiñ-blei yn map ia ki briew; hynrei ia ka jingkrenbeiñ ia u Mynsiem¹ yn ym map. Bad ia uno uno uban kren ka ktien pyrshah ia u Khun jong u briew, yn map ia u; hynrei ia uta uban kren pyrshah ia u Mynsiem Bakhuid, yn ym map ia u, la ha kane ka pyrthei, lymne ha ka pyrthei ka ban wan, hynrei un kit-pop da ka pop bymjukut.”

Naba ki la ong : “U don mynsiem bym-khuid.”²

100. Ka jingpynrem ia ki Pharisi. *Mt. 12:33-37.*

“Phi ñiew u dieng u babha, bad u soh u babha; ne phi ñiew u dieng u basniew, bad u soh jong u u basniew : namar na u soh la ithuh ia u dieng. Ko khun-ko-ksiew jong ki 'seiñpuh, kumno phi lah ban kren ka babha haba phi long ki bymman? Naba na ka jingshlei ka dohnud, ka shyntur ka kren. U briew u babha, na ka khuiñ babha, u sei ia kiei kiei ki babha; bad u briew u basniew, na ka khuiñ basniew, u sei ia kiei kiei ki basniew. Hynrei Nga ong ha phi, ba ia ka ktien thala baroh ba ki briew kin kren, kin ai jingkheif shaphang

(1) Ka pop pyrshah ia u Mynsiem Bakhuid ka long kane : ban ong ba ki kam jong u Mynsiem Bakhuid ki long ki kam jong u ksuid. Jar uba leh pyrshah ia ka dtong jong ka jingaiei, u kyntait ia ka jingpynim. Katba u nang dem mutlop ha kane ka jingmut, um long uba dawa ia ka jingmap.

(2) Ia u Jisu.

kata ha ka sngi bishar. Naba na ki ktien jong me yn pynksan ia me, bad na ki ktien jong me yn pynrem ia me”.

101. Ka Kmie bad ki hymmen-para jong u Trai.

Mt. 12:46-50. Mk. 3:31-35. Lk. 8:19-21.

Te katba U dang kren ha ki paidbah, hakhmih ka kmie jong U bad ki hymmen-para jong U ki la iawan sha U, da kaba wad ban iakren bad U. Hynrei kim shym lah ban iakynduh bad U, namar uta u paidbah. Bad katba ki dang iaieng habar, ki la phah-khot ia U. Bad uta u paidbah u la iashong tawiar ia U, bad ki la ong ha U :

“Hakhmih ka kmie jong Me bad ki hymmen-para jong Me habar, ki iawad ia Me.”

Hynrei da kaba phai-ktien U la ong ha uta u-ba la iathuh ia U :

“Mano ka kmie jong Nga bad mano ki hymmen-para jong Nga?”

Te da kaba kner ia la ka kti sha la ki synran, bad haba U la peit baroh sawdong ia kita kiba shong tawiar ia U, U la ong :

“Hakhmih ka kmie jong Nga bad ki hymmen-para jong Nga. Naba uno-uno uban leh ia ka mon u Blei, jong u Kpa jong Nga uba ha Bneng, uta keif u long u para jong Nga, bad ka para jong Nga bad ka Kmie”.

102. Ka Pharshi shaphang u nongbet.

Mt. 13:1-9. Mk. 4:1-9. Lk. 8:4-8.

Ha kata hi ka sngi u Jisu haba U la mih na ing, u la shong harud-duriaw. Bad u la sdang

biang ban hikai harud-duriaw; te haba u paidbah byllien u la iawan lang bad u la iamih kyrkieh sha U, na ki nongbah, haduh ba U la kiew ha ka lieng, U la shong ha duriaw, bad uta u paidbah baroh u la long harud-duriaw halor ryngkew. Bad U la hikai ia ki bun kiei kiei da ki pharshi, bad U la ong ha ki ha ka jinghikai jong U :

"To shah-shkor : hakhmih, u nongbet u la leit ban bet, bad katba u dang bet, katto katne u la hap harud-lynti, bad la iuh-roit, bad ki sim na suiñ ki la wan bad ki la puh noh ia u. Bad uwei pat u la hap ha ka 'dew-maw ha kaba ym don bun ka khyndew : te shen u la speh naba um ioh khyndew jylliew : bad haba ka sngi ka la mih, u iapstai, bad namarba um don thied, u tyrkhong noh. Bad uwei pat u hap hapteng ki shiah : te ki shiah ki ia-san ryngkat bad ki kjap noh ia u, bad um seisoheiei. Bad uwei pat u la hap ha ka khyndew babha : bad u la sei u soh ba mih bad ba roi; te u la sei, uwei laiphew, uwei pat hynriewphew bad uwei pat shispah".

Bad U la ong :

"Uta uba don ki shkor ban sngap, to un shah-shkor".

103. Balei u Krist U hikai da ki Pharshi.

Mt. 13:10-17. Mk. 4:10-12. Lk. 8:9-10.

Bad haba U la don tang marwei, ki synran jong U ki la iawan bad ki la ong ha U :

"Balei Me kren ha ki da ki pharshi?"

U pat U la jubab, U la ong ha ki :

"Naba ha phi la ai ban tip ia ki jingmaia jong

ka hima ki bneng, hynrei ha kita kiba habar ym shym la ai, bad na ka bynta jong ki ia kiei kiei baroh yn leh ha ki pharshi. Naba ha uta uba don, ha u yn ai, bad un pahuh-pahai : hynrei uta ubym don, yn shim noh na u wat ia kata kaba u don. Namarkata keifi, Nga kren ha ki da ki pharshi : naba da kaba peit kim ioi, bad da kaba shahshkor kim iohsngew, lymne sngewthuh. Bad la pyndep ha ki ia ka jingiathuhlypa jong u Isaias uba ong : 'Ia kaba iohsngew phin iohsngew, bad phin ym sngewthuh, bad ia kaba ioi phin ioi, bad phin ym shemphang. Naba ka dohnud jong une u paidbah ka la bthi, bad ki shkor ki la set-kyllut, bad ki la khapbrip ia la ki khmat : ioh ba ha kano kano ka por kin ioi da la ki khmat, bad iohsngew da la ki shkor, bad sngewthuh da la ka dohnud, bad ba kin kylla-jingmut bad ngan pynkhiah ia ki !'

"Hynrei suk ki khmat jong phi ba ki ioi, bad ki shkor jong phi ba ki iohsngew. Naba shisha Nga ong ha phi, bun ki nongiathuhlypa bad ki 'riewhok ki la kwah ban ioi ia kiei kiei ba phi ioi, hynrei kim shym la ioi, bad ban iohsngew ia kiei kiei ba phi la iohsngew, hynrei kim shym la iohsngew."

104. U batai ia ka pharshi shaphang u nongbet.

Mt. 13: 18-23. Mk. 4:13-20. Lk. 8:11-15.

Bad U la ong ha ki : "Phim tip ia kane ka pharshi? Kumno te phin tip ia ki pharshi baroh? Namarkata, to sngap ia ka pharshi shaphang u nongbet. Uta uba bet, u bet ia ka ktien. Baroh uta uba iohsngew ia ka ktien jong ka hima bad um shem-

phang, u soitan u wan kloi-lan, bad u rong noh
ia ka ktien ba la bet ha ka dohnud jong u. Une u
long uta ia uba la bet harud-lynti”.

“Te uta ia uba la bet ha ka jaka-maw u long
uta uba iöhsngew ia ka ktien bad uba pdiang
kloi-lan ia ka da kaba kmen. Hynrei ubym don
thied ha lade bad u long tang shipor; te haba jia
ka jynjar bad ka jinglehbeif na ka bynta ka ktien,
u thut noh shen”.

“Uta te ia uba la bet hapdeng ki shiah, u long
uta uba iöhsngew ia ka ktien, bad ki jingkhuslai
jong kane ka pyrthei bad ka jingshukor ka spah
ki kjap ia ka ktien, bad um seiso shuh”.

“Hynrei uta ia uba la bet ha ka khyndew babha
u long uta uba iöhsngew ia ka ktien, bad u shem-
phang, bad u seiso ha ka jingiaishah bad u pyn-
mih uwei uba shispah shah, uwei pat uba hyn-
riewphew, bad uwei pat uba laiphew.”

105. Kiwei pat ki jingkren jong u Trai.

Mk. 4:21-25. Lk. 8:16-18.

Bad U la ong ha ki :

“Ym don u briew uba thang ia ka sharak, u tap
ia ka da u khiew, ne u buh ia ka hapoh ka jyn-
thiah : hynrei u buh halor ka dieng-pynieng sha-
rak, ba kita kiba rung kin iöhi ia ka jingshai.
Naba ym don kaba rieh ia kaba yn ym pynpaw,
lymne kaba la buhrieh, kaba yn ym tip bad kaba
yn ym paw. Lada uno uno u don ki shkor, to un
shahshkor.”

Te U la ong ha ki :

“To sumar, namarkata, kumno phi shah-shkor.

Da ka jingthew ba phi thew, yn thew pat ia phi, bad kham bun yn sa ai ia phi. Naba jar uba don, ha uta yn ai; bad jar ubym don, wat ia kata ka-ba u tharai ba u don, yn knieh noh na u."

106. Ka pharshi shaphang u symbai uba mih hi.

Mk. 4: 26-29.

Te U la ong :

"Kumta ka long ka hima jong u Blei, kumba la-da u briew un bet ia u symbai ha ka khyndew, bad un iohthiah, bad un khie mynmiet bad mynsngi, bad u symbai u nang mih bad nang san kat-ba ma-u pat um tip. Namar ka ram-ew na lade hi ka seisoh, nyngkong u speh, nangta ka kob, hadien kata, u soh-kew ba la met ha ka kob. Te haba u soh u la ih, u sei shisyndon ia la ka rashi, naba ka aiom ot ka la poi."

107. Ka pharshi shaphang u kynbat.

Mt. 13:24-30.

Kawei pat ka pharshi U la tyrwa ha ki U da ong :

"Ia ka hima jong ki bneng la pynsyriem bad u briew uba la bet ha la ka lyngkha, ia u symbai babha. Hynrei hamar ba ki briew ki dang iohthiah, la wan u nongshun jong u bad u la bet sa da u kynbat hapteng u kew, bad u la phet noh. Te ynda u seilung u la san bad u la seisoh, uta u kynbat ruh u la paw. Te ki shakri jong u trai-ing ki iawan bad ki la ong ha u :

"Ko kynrad, hato mem shym la bet da u symbai babha ha la ka lyngkha? Te nangno ka ioh kynbat?"

Bad U la ong ha ki :

"U nongshun u la leh ia kane."

Hynrei kita ki shakri ki la ia-ong ha U :

"Me kwah ba ngin leit ban lum noh ia u?"

Bad U la ong :

"Em, ioh ba haba phi ialum ia u kynbat phin kum thiew lang bad ia u kew de. Yeh kin ia-san lang baroh ar haduh ka aiom-ot, te ha ka por ot ngan sa ong ha ki nong-ot : To ialum shuwa ia u kynbat, bad to teh-song ia u ban thang, hynrei ia u kew to lum ha ki thiar jong nga."

108. Ka pharshi shaphang u symbai tyrso.

Mt. 13:31-32. Mk. 4:30-32.

Sa kawei pat ka pharshi U la tyrwa ha ki; U da ong :

"Bad ei ngin pynsyriem ia ka hima jong u Blei? Ne bad ka pharshi aiu ngin ianujor ia ka? Ka hima bneng ka syriem ia u phniang jong u symbai tyrso, ia uba u briew u la shim bad u la bet ha la ka lyngkha, uba long shisha u barit tam na ki symbai baroh kiba don ha ka ram-ew, hynrei ynda u la san, u kham heh ban ia ki kynja jhur baroh bad u kylla long u dieng, bad u sei ki tnat-bah haduh ba ki sim ka suiñ ki iawan bad ki iadem ha ki tnat jong u bad ha ka syrngiew jong u."

109. Ka pharshi shaphang u thiat. *Mt. 13:33.*

Sa kawei pat ka pharshi U la kren ha ki :

“Ka hima bneng ka syriem ia u thiat uba ka brierw ka la shim bad la btep hapoh laipyrha u 'pu-rew, haban da siep baroh.”

110. U Krist U hikai ia ki paidbah da ki pharsi.

Mt. 13:34-35. Mk. 4:33-34.

Ia kine kiei kiei u Jisu U la kren ha ki paidbah, da ki pharshi bad da ki bun ki pharshi kiba kum kine U la kren ha ki ia ka ktien, katba ki lah ban shemphang. Bad khlem pharshi Um shym la kren ha ki : ba yn ioh pyndep ia kata kaba la ong da u nongiaathuhlypa, uba ong (Ps. 77 : 2) :

“Ngan ang ia la ka shyntur ha ki pharshi : Ngan pynbna ia kiei kiei kiba la buhrieh na myndang long ka pythei.”

Hynrei kyrpang, U la batai ia kiei kiei baroh ha la ki synran.

111. Ka jingbatai ia ka pharshi shaphang u kynbat

Mt. 13:36-43.

Te, ynda U la phah noh ia ki paidbah, U la wan sha ing, bad ki synran jong U ki la iawan ha U, ki ia-ong :

“To batai ha ngi ia ka pharshi shaphang u kynbat ka lyngkha.”

Ma-U da kaba jubab U la ong ha ki :

“Uta uba bet ia u symbai babha u long u Khun jong u brierw. Bad kata ka lyngkha ka long ka

pyrthei; u symbai babha pat, ki long ki khun jong ka hima. Hynrei u kynbat ki long ki khun jong u bymman. Bad u nongshun uba la bet ia ki, dei u ksuid. Ka aïom-ot pat ka long ka jingwai jong ka pyrthei. Bad kita ki nongot ki long ki angel. Namarkata, kumba la lum ia u kynbat, bad la thang da ka ding, kumta kan long ha kaba wai ka pyrthei. U Khun u briew Un phah ia la ki angel, bad kin sa lum na ka hima jong U ia ki jingpynthut baroh, bad ia kita kiba leh bymman. Bad kin bret ia ki ha ka lawar ding; hangta kan long ka jinglynñiar bad ka jingkyriat bniat. Te ki bahok kin tyngshaiñ kum ka sngi, ha ka hima jong u Kpa la jong. Uba don ki skhor ban sngap to un shah-shkor."

112. Ka pharshi shaphang ka jingkynshew bad ki paila. *Mt. 13:44-46.*

"Ka hima bneng ka syriem ia ka jingkynshew ba la buhrieh ha ka lyngkha; ia kaba ynda u briew u la shem, u la buhrieh; bad da ka jingkmien ia ka, u la leit bad u la die baroh katba u don bad u thied ia kata ka lyngkha. Ka hima bneng ka syriem ruh ia u nongkhaï uba wad ia ki paila babha. Bad ynda u la shem ia uwei u paila bakordor, u la leit bad u la die noh baroh katba u don bad u la thied ia uta."

113. Ka pharshi shaphang ka jar. *Mt. 13:47-50.*

"Ka hima ki bneng ka syriem ruh ia ka jar ba la pynnoh ha duriaw bad kaba tong lang ia ki jait dohkha baroh, kaba haba la dap, ynda ki la ring

shabar bad la iashong harud duriaw, ki iajied ia ki babha ha ki jyndiang, hynrei ia ki basniew ki ia-bret noh. Kumta kan long ha kaba wai ka pyrthei. Ki angel kin leit, bad kin pynkhlad noh ia ki bymman na pdeng ki bahok, bad kin bret ia ki ha ka lawar-ding : hangta kan long ka jinglynñiar bad ka jingkyryiat-bniat."

114. Kaba kut ki pharshi. U nongthoh bastad.
Mt. 13:51-52.

"Phi la sngewthuh ia kine kiei kiei baroh?"
Ki ia ong ha U :

"Ho-oid."

U la ong ha ki :

"Namarkata, man la u nongthoh u banang shaphang ka hima ki bneng, u syriem ia u briew, u trai-ing uba sei na la ka khuñ ia kiei-kiei ki bathymmai bad ki barim." ¹

3. Ha ka ri jong ki Gerasen

115. Ka jingpyn-jai-jai ia ka 'eriong.
Mt. 8:23-27. Mk. 4:35-40. Lk. 8:22-25.

Bad U la ong ha ki ha kata ka sngi, haba la premmiet :

"Ia ngin ialeit sha shiliang ka pung."

(1) Lehse ka jingmut kan long kumne: na kine ki pharshi u dei ban sngewthuh ia ki jingiapher hapdeng ka balang barim jong ki Ju bad ka Balang Bathymmai jong u Krist.

Bad da kaba phah noh ia u paidbah, ki la ialam ia U, kumba U la long ha ka lieng. Sa kiwei pat ki lieng ruh ki la don lem bad ki. Hynrei kat-ba ki nang pyniaid, la beh ka 'eriong-'erngit bad hakhmih ka 'er-bah bajur ka la khie ha ka duriaw, bad ki jingat-phyllung ki la shoh ia ka lieng, haduh ba ia ka lieng la tylllep da ki jingat-phyllung bad ma-ki ki la don ha ka jingma.

Ma-U pat U la don ha tdong jong ka lieng, U ioh thiah halor ka syngkhlieh. Te ki synran jong U ki la iawan sha U bad ki la kysiew ia U, ki da ong :

"Ko Kynrad, Mem pyrwa ba ngi iap? Ko Trai, to pynim ia ngi, ngi la iap."

Bad u Jisu U la ong ha ki :

"Balei phi sheptieng, phi ki barit jingngeit?"

Te ynda U la khie, U la dumok ia ka lyer bad ia ki jingat-phyllung, bad U la ong ha ka duriaw :

"Keiñ, to jai-jai."

Te ka lyer ka la sangeh, bad la don ka jingjai-jai ka bakhraw. Te U la ong ha ki :

"Balei phi khaweit? hato phim pat don ka jingngeit?"

Ki briew pat ki la sngewlyngngoh bad ki la sheptieng haduh katta katta bad ki la ia-ong para-ki hi :

"U-ei une phi tharai, ba ka lyer bad ka duriaw ruh ki kohnguh ia U?"

116. U Krist U beh ia u paid ksuid.

Mt. 8:28-34. Mk. 5:1-20. Lk. 8:26-39.

Te ki la iawan sha shiliang jong ka duriaw ha ka ri jong ki Gerasen, kaba mar-pyrshah ia ka

Galileia. Bad katba U mih noh na ka lieng, bad U hiar ha ryngkew, shisyndon la wan tan ia U na ki mot jyntep, u briew uba don u mynsiem bym-khuid. Bad la slem eh um ju kup jaiñ ne shong ha ing, hynrei ha ki mot jyntep. Te ym don mano-mano ba lah ban khum ia u, wat da ki kynjri. Namar la ju khum jyndeï ia u da ki nar-kjat bad ki kynjri; ia ki kynjri u bthat, bad ia ki nar-kjat u pynkheñ lyngkhot-lyngkhai. Bad ym don ba lah ban pynjuh-pynjem ia u. Te u la don synñia-sngi ha ki motjyntep bad ha ki lum, u da lynñiar bad da ot ia lade da ki maw. Hynrei haba iöhi ia u Jisu na jngai, u la mareh, bad u la dem khrup bad u la mane ia U. Te u la lynñiar da ka ktien ka bajam u la ong:

“Me donkam aïu bad nga ko Jisu, ko Khun u Blei Uba ha khlieh tam? Hato Me la wan shane ban pynkordit ia ngi shuwa ka por? Nga pynsmai ia Me da u Blei, wat pynshitom ia nga.”

Namar U la ong ha u:

“To mih noh na u briew, me u mynsiem bym-khuid.”

Te u Jisu U la kylli ia u:

“Kaei ka kyrteng jong me?”

Bad u la ong ha U:

Ka kyrteng jong nga ka long u paid, namar ngi long shibun.” (Naba bun ki ksuid ki la rung ha u.)

Bad u la kyrpad jur ia U, ba Un ym beh noh ia ki na kata ka ri. Te la don hangta ha pajih, ha sharing lum, ka kynhun bah ki sniang kiba dang iabam. Bad kita ki ksuid ki la iakyrpad ia U da kaba ong:

“Lada Me beh noh ia ngi nangne, to phah ia

ngi sha ki sniang ba ngin rung hapoh jong ki."

Bad u Jisu, shisyndon U la shah ia ki :

Te ki mynsiem bymkhuid ki la mih noh na u briew bad ki la rung hapoh ki sniang. Bad hakhmih, baroh kawei ka kynhun ka la noh arsut shapoh duriaw, ki la long kumba arhajar, bad ki la iap-op hapoh ka duriaw. Kita ki nongap pat haba ki la iöhi ia kaba la jia, ki la phet-iap phet-im bad ki la pynbna ha ki 'nongbah bad 'nongkyndong. Te hakhmih, ka 'nongbah baroh ka la leit iakynduh ia u Jisu, khnang ban khmih ia kata kaba la jia. Bad ki iawan ha u Jisu bad ki la iöhi ia uta uba la shongksuid ba u shong ha kjat jong U, u la kup jaiñ bad u tip-briew, te ki la sheptieng. Bad kita kiba la iöhi, ki la iathuh ha ki kumno la leh ia uta uba la shongksuid, bad kumno ba la pyllait ia u na u paid, bad shaphang kita ki sniang ruh. Te baroh u paitbah jong ka ri ki Gerasen u la kyrpad ia U ban leit noh na ka ri jong ki, namar ki la sheptieng than eh.

Bad katba U dang kiew ha ka lieng, uta uba la juh pynshitom da u ksuid, u la kyrpad ia U ba Un dup ioh long ryngkat bad U. Hynrei Um shym shah ia u, U ong pynban ha u :

"To leit phai sha la ing, sha la ki kur ki-jait bad to iathuh ha ki katno kiei kiei ki bakhraw u Blei U la beh ia Me bad kumno U la isynei ia me."

Te u la leit noh, bad u la sdang ban pynbna ha ka nongbah baroh kawei bad ha Dekapolis, katno kiei kiei ki bakhraw u Jisu U la leh ia u. Te baroh ki la sngew-kyndit.

4. U phai sha Galileïa

117. U Jairus u kyrpad ia u Trai ban pynkhiah ia ka khun. *Mt. 9:18-19. Mk. 5:21-24. Lk. 8:40-42.*

Te haba u Jisu U la leit biang da ka lieng sha shiliang, u paidbah byllien u la wan ialum ia U : naba baroh ki dang iakhmih-lynti ia U. Ma-U pat U la don harud-duriaw. Te hakhmih uwei na ki rangbah Sinagog uba kyrpeng u Jairus, u la wan sha U; bad haba iohi ia U, u la dem ha kjat jong U, bad u la mane ia U bad u la kyrpad-kyrpon jur ia U ba' Un leit sha ing jong u; namar u la don ka khun marwei kaba la jan dap khatar snem ka ryta, bad ka don ha tmier ka jingiap; u da ong :

“Ko Trai, ka khun jong nga ka don ha tmier ka jingiap, hynrei ale, to buh ia la ki kti halor jong ka, ba kan dup lait-im, bad kan dup im.”

Te u Jisu U la ieng joit, U la leit bad u, ryngkat bad la ki synran.

118. La pynkoit ia ka kynthei ba pang mih-snam. *Mt. 9:20-22. Mk. 5:24-34. Lk. 8:42-48.*

Hynrei katba U dang leit, uta u paidbah u la iatur sha U. Bad kawei ka kynthei kaba la don ka jingmihsnam la khat-ar snem, bad kaba la shah bun kiei kiei na ki bun ngut ki nongpynkhiah, bad la pynlut baroh katba ka la don ha ki nongai dawai, khlem ioh-bor eiei, hynrei nang kham jur

pynban, haba ka la iöhsngew shaphang u Jisu ka la wan nadien hapdeng uta u paidbah, bad ka la ktah ia ka rymiang jong ka jaiñkup jong U. Namar ka la ong ha lade hi :

“Lada ngan ktah tang ia ka jaiñkup jong U, ngan sa koit.”

Te shisyndon kata ka umpohliew snam jong ka, ka la rngat, bad ka sngew ha la ka met ba ka la koit na ka shitom. Hynrei u Jisu, shisyndon ba U tip ha lade ia ka bor kaba mih noh na U, U phai sha u paidbah, U la ong :

“Mano ba la ktah ia ki jaiñ jong Nga?”

Haba baroh ki len, u Petrus bad kita kiba la iadon ryngkat bad U ki la ong :

“Ko Kynrad, Me iöhi ia u paidbah ba iatur bad iaphngian ia Me, te Me ong : Mano ba ktah ia Nga?”

Bad u Jisu U la ong :

“Don mano-re-mano ba la ktah ia Nga; namar Nga tip ba ka bor ka la mih noh na Nga.”

Te U la phai sawdong ban peit ia kata kaba la leh ia kane. Hynrei kata ka briew haba ka iöhi ba kam lah shuh ban rieh, da kaba sheptieng bad kyüh, da kaba tip ia kaba la jia ha lade, ka la wan bad ka la dem khrup ha khmat jong U, bad ka la kren ha U ia ka jingshisha baroh, bad ka la iathuh ha khmat kita ki briew baroh, na kano ka daw ba ka la ktah ia U, bad bad kumno ba la pynkoit ia ka shisyndon. Bad U la ong ha ka :

“To shaniah ko khun, ka jingngeit jong pha ka la pynkoit ia pha; to leit suk, bad to koit to khiah na ka jingpang jong pha.”

Bad kata ka briew ka la köit la khiah naduh kata ka por.

119. U Trai U pynim ia ka khun jong u Jairus.

Mt. 9:23-26. Mk. 5:35-43. Lk. 8:49-56.

Katba U dang kren, la wan kiba na u rangbah Sinagog, ki da ong :

"Ka khun jong me ka la iap; ban lei men dang pynshitom shuh ia u Nonghikai?"

Hynrei u Jisu haba U iohsngew ia ka ktien ba la kren, U la ong ha u rangbah Sinagog :

"Wat sheptieng, shu ngeit bad kan koit."

Te um shym la shah iano iano ruh ban leit ryngkat bad U, lait tang u Petrus, u Jakob, bad u Yoannis u para jong u Jakob. Kumta ki la poi ha ing jong uta u rangbah Sinagog bad Um shym la shah iano iano ruh ban leit rung bad U, lait tang u Petrus, u Jakob bad u Yoannis bad u kpa bad ka kmie jong kata ka samla. Bad baroh ki dang ia-iam bad ialynñiar namar jong ka, bad U iohi ia ki duhalia bad ia u paidbah uba iawin, bad ia ki briew kiba ia-iam bad ialynñiar jur. Bad ynda U la rung, U la ong ha ki :

"Balei phi iakhynwin bad ia-iam? Wat iam : Ka samla kam shym iap, hynrei ka iohthiah."

Hynrei maki pat ki la iarkhie-bein ia U, naba ki tip ba ka la iap. Kumta U la ong :

"Pyllait jaka."

Bad ynda la pynmih noh ia ki baroh shabar, U la ialam ia u kpa bad ia ka kmie jong kata ka khynnah, ryngkat bad kita kiba la don bad U, bad U la rung hangta haba thiah ha khynnah. Te haba U la bat na ka kti ia kata ka khynnah, U la ong ha ka :

"*Talitha kumi*" (kaba mut haba la batai :

“Ko khynnah, Nga ong ha pha, to ieng”)

Bad ka mynsiem jong ka ka la wan phai pat, bad shisyndon kata ka khynnah ka la ieng joit, bad ka la iaid : naba ka la khat-ar snem. Te ki kmieki-kpa jong ka ki la lyngngoh ngaiñ da ka jinglyngngoh ka bakhraw. Hynrei U la adong tyng-eh ia ki ban ym iathuh hano hano ruh ia kata kaba la jia, ba yn ym don ba tip ia ka; bad u la ong ban ai jynbam ia ka. Te ka nam jong kane ka la phriang kylleng kata ka ri.

120. U Krist U pyn-iohi ia kiba mat-lah arngut.

Mt. 9:27-31.

Te katba u Jisu U dang iaid nangta, arngut ki matlah ki la bud ia U, ki iapyrta bad ki ia-ong :
“To isynei ia ngi, ko khun u Dabid.”

Hynrei ynda U la poi ha ing, kita ki matlah ki la wan sha U. Te u Jisu U ong ha ki :

“Phi ngeit ba nga lah ban leh ha phi ia kane?”

Ki la ia-ong ha U :

“Haoid, ko Trai.”

Te U la ktah ia ki khmat jong ki, U ong :

“To kan long ha phi katkum ka jingngeit jong phi.”

Bad ki khmat jong ki ki la iohi; u Jisu pat U la maham ia ki, U ong :

“Peit ban ym don ba tip ia kane”.

Ma ki pat da kaba leit noh, ki la pynbna ia ka nam jong U kylleng kata ka ri baroh.

121. U Krist U pynkoit ia u briew ubym nangkren uba shongksuid. Mt. 9 : 32-34.

Te ynda ki la leit noh, hakhmih ki la wanlam ha U ia u briew ubym nang kren, uba shongksuid. Ynda la beh noh ia u ksuid, uta u biej u la kren, bad ki paidbah ki la sngewphylla, ki ia-ong :

"Mynno-mynno ruh ym pat ju iöhi kum kane ha Israel".

Hynrei ki Pharisi ki la ong :

"Da u ranngbah jong ki ksuid, U beh noh ia ki ksuid".

122. U wan sha Nasareth, U hikai bad U shah lehbein. Mt. 13:53-58. Mk. 6:1-6. Lk. 4:16-30.

Ynda U la leit noh nangta, U la wan poi sha la ka ri, ha Nasareth, ha kaba la pynsan-pynrangbah ia U; bad ki synran jong U ki la bud ia U; te U la rung, kumba U ju leh, ha ka Sinagog ha ka sngi Sabbat, bad U la ieng ban pule. Te la ai ha U ia ka kitab u Isaias nongiathuhlypa. Bad haba U la khyllied ia kata ka kitab, u la shem ia ka jaka ha kaba la thoh : (16 : 1-2).

"U Mynsiem jong u Trai U don ha Nga, namar U la pynsleh ia Nga ban ialap ia ka Gospel ha ki baduk, U la phah ia Nga ban pynkoit pynkhiah ia kiba sngewsih ka dohnud, ban pynbna ia ka jingsiewspah ha kiba shong-byndi, bad ia ka jingimat ha ki bamtlah, ban pyllait ia kiba jynjar, ban ialap ia ka snem jong ka jingmap u Trai bad ia ka sngi jong ka jingsiewspah".

Ynda U la kli ia kata ka kitab, U la ai noh ha

u nongpyniaid bad U la shong. Te ki khmat jong kita baroh ha ka Sinagog ki la peit ia U dngong. Kumta U la sdang ban ong ha ki :

"Mynta ka sngi la pyn-urlong ia kane ka jynthoh, ha ki shkor jong phi".

Te baroh kiba iohsngew ki la sakhi ia U : bad ki la sngewlyngngoh ia ki ktien bakordor kiba la mih na ka shyntur jong U bad ki la ong :

"Nangno Une U la ioh ia kine baroh? Bad ka jingstad aïu kane, kaba la ai ha U, bad ki kam-bah kat kine kiba la leh da ki kti jong U? Ym dei Une u Khun jong u Josep mistri? Ym dei Une u mistri, u Khun ka Maria, shipara bad u Jakob bad u Josep, bad u Juda bad u Simon? bad ki hymmen-para kynthei jong U baroh ruh kim don ryngkat bad ngi hangne? Te nangno U la ioh ia kane baroh?"

Kumta ki la sngewthuh ia U, U pat U la ong ha ki :

"Khlem artatien phin ong ha Nga ia kane ka pharshi : ko nongpynkhiah to pynkoit ia lade; ia kaba ngi la iohsngew ba Me leh ha Kapharnaum, to leh hangne ruh ha la ka ri la jong".

Te u Jisu U la ong :

"Shisha Nga ong ha phi, ba ym don u nongia-thuhlypa ia uba la pdiang sngewbha ha la ka ri, bad ha la ka ing-ka-sem bad hapteng ki kur-ki-jait jong u. Ia ka jingshisha Nga ong ha phi, bun ki 'riewkynthei ki la don ha Israel ha ki sngi jong u Elias, mynba la khang ia ka bneng laisnem hynriew bnai, haba la don ka 'nemsniew ka bakhraw ha ka ri baroh kawei. Te sha kano-kano ruh ym shym la phah ia u Elias, hynrei tang sha Sarepta ha Sidon, sha ka briew, ka 'riewkynthei. La don

ruh bun kiba pang ñianglyngkut ha Israel ha ka por u Eliseus nongiatuhlypa, bad ia uwei ruh na ki ym shym la pynkhuid, lait tang ia u Naaman, u nongsyria”.

Bad kita baroh ha ka Sinagog, haba iöhsngew ia kine kiei kiei, ki la ingkhong. Te ki la ieng joit bad ki la shop ia U shabar ka 'nong-bah : bad ki la pynpoi ia u haduh ka tmier jong u lum, ha uba la tei ia ka 'nong-bah jong ki, ba kin dup pynnoh khongpong ia U. Hynrei ma-U pat, da kaba iaid napdeng jong ki, U la leit noh.

Bad Um shym la leh bun ki kam-bah hangta, namar ka jingbymngeit jong ki. U la shu buh ia la ki kti halor katto-katne ngut ki nongpang bad U la pynkoit ia ki. Bad U la lyngngoh namar ka jingbymngeit jong ki. Bad U la leit kylleng saw-dong ki 'nongrit, U da hikai.

123. Ka jingialap jong u Krist bad ka jingphah ia ki Apostol. *Mt. 9:35; 10:1. Mk. 6:6-7. Lk. 9:1-2.*

Te U Jisu U la iaid kylleng ki 'nongbah bad ki 'nongrit U da hikai ha ki Sinagog jong ki, bad U da ialap ia ka Gospel jong ka hima bad U da pynkoit ia ka jingpang baroh bad ia ka jingkhrew baroh. Hynrei haba iöhi ia ki paidbah, U la sngew synei ia ki, naba ki la long ki bajynjar bad ki basakma kum ki 'langbrot kibym don nongsharai. Kumta U la ong ha la ki synran :

“Ka jing-ot shisha ka bun, ki nongtrei pat ki khyndiat. To kyrpad, namarkata, ia U Trai jong ka jing-ot ba U phah nongtrei ha la ka jingot.”

Te ynda U la khot lang ia ki khat-ar ngut ki

synran jong U, U la ai ha ki ka bor bad ka iktiar halor ki mynsiem bymkhuid, ban beh noh ia ki, bad ban pynkoit ia ka jingpang baroh bad ia ka jingkhrew baroh. Bad U la phah ia ki ar-arngut ban ialap ia ka hima U Blëi bad ban pynkoit ia ki bapang.

124. Ki jingbthah ia ki Apostol.

Mt. 10:2-15. Mk. 6:8-11. Lk. 9:3-5.

Te ki kirteng jong kita ki khat-ar ngut ki Apostol ki long kine : u banyngkong u Simon, ia uba la khot Petrus bad u Andrias shipara bad u; u Jakob u khun u Sebedeus bad u Yoannis u para jong u, u Philip bad u Bartholomeus, u Thomas bad u Mattheus u nongapklrong, u Jakob u khun jong u Alpheus bad u Thaddeus, u Simon bashitrhem bad u Judas Iskariot, uba la die ruh ia U.

Ia kine ki khatar ngut U Jisu U la phah, U da hukum ia ki da kaba ong :

“Wat leit ha ki lynti jong ki Jentil, bad ha ki nongbah jong ki nongsamaria wat rung. Hynrei to leit keiñ sha ki langbrot ba la jah jong ka ing Israel. Bad katba phi nang leit, to ialap, da ong : ‘ka hima bneng ka la jan.’ To pynkoit ia ki bapang, pynim ia ki baiap, pynkhuid ia kiba sañianglyngkut, to beh noh ia ki ksuid : phi la shu ioh-ei, to shu ai-ei ruh. Wat thep ksiar, ne rupa, ne peisa-tyngka ha ki saipan jong phi : lymne ka iarong ha ka jingleit, lymne artylli ki jymphong lymne ki juti, lymne u diengduh; naba ka shonghok ia u negtrei ban ioh ia la ka bam.”

Te U la ong ha ki :

"Bad ha kano kano ka 'nongbah ne 'nongrit ba phin rung, to kylli mano uba bit ha ka : bad to sah hangta haduh ba phin da leit noh. Te haba phi rung hapoh ing; to khublei ia ka da kaba ong : "Ka jingsuk ha kane ka ing." Bad lada kata ka ing ka long shisha ka 'ba-bit, ka jingsuk jong phi kan wan ha ka; hynrei lada kam long ka babit, ka jingsuk jong phi kan wan phai noh sha phi. Bad lada uno-uno um pdiang ia phi, lymne sngap ia ki ktien jong phi, katba phi mih noh na kata ka ing ne 'nongbah, to kynthar noh wat ia u pum-pum na ki kjat jong phi kum ka sakhi pyrshah ia ki. Shisha nga ong ha phi, kan long kham jem ia ka ri Sodom bad Gomorra ha ka sngi bishar, 'ban ia kata ka nongbah."

125. Ki jingbthah na ka bynta ka kam ialap.

Mt. 10:16-23.

"Hakhmih Nga phah ia phi kum ki 'langbrot ha-pdeng ki suri. To long, namarkata, ki ba-shalak kum ki bseñ bad ki balui-lui kum ki paro. Hynrei to sumar na ki briew. Naba kin aiti ia phi ha ki dorbar bad kin sympat ia phi ha la ki Sinagog. Bad yn leit lam ia phi ha khmat ki lyngskor bad ki syiem, na ka bynta jong Nga, ban long ka sakhi ha ki bad ha ki jentil. Hynrei haba kin aiti ia phi, wat khuslai kumno, ne aia ban kren, namar yn ai ha phi ha kata ka por ia kaei ba phin kren. Namar ym dei maphi kiba kren, hynrei u Mynsiem jong u Kpa jong phi Uba kren ha phi. U hymmen ruh un aiti noh sha ka jingiap ia la para, bad u kpa ia la u khun; bad ki khun kin ieng pyrshah ia

la ki kmie-ki kpa, bad kin pyniäp äa ki. Bad yn isih äa phi da ki briew baroh namar ka kyrteng jong Nga : hynrei uta uban iaineh haduh ka bakut, uta keifn un lait-im. Hynrei haba kin pynshitom äa phi ha kane ka 'nongbah, to phet shawei pat. Shisha Nga ong ha phi ba phin ym pyndep äa ki 'nongbah Israel, tat haduh ban da wan u Khun u briew."

126. Ki jingbthah kiba donkam man ka por.

Mt. 10:24-42.

"U synran um long halor u nonghikai, lymne u shakri halor u kynrad jong u. Ka biang äa u synran ban un long kum u nonghikai jong u, bad äa u shakri kum u kynrad jong u. Lada äa u Kpa jong ka ing ki la khot Belsebub, katno lei-lei äa kiba ha ing-ha-sem jong U! Namarkata, wat sheptieng äa ki, naba ym don kaba la tap, kaba yn ym pynpaw, bad kaba la buhrieh, kaba yn ym tip. Äa kaba Nga la iäthuh äa phi ha ka badum, to kren ha ka bashai bad äa kaba phi iöhsngew da ka shkor, to iälap nalar ing. Bad wat sheptieng äa kita kiba pyniäp äa ka met, pynban kibym lah ban pyniäp äa ka mynsiem: hynrei to kham sheptieng äa Uta Uba lah ban pynjot met bad mynsiem ha dujok. Hato ym die shipeisa artylli ki sim-ing; bad kawei na ki kan ym hap halor khyndew khlem u Kpa jong phi? Wat äa ki shfiuih baroh ha ka khlieh jong phi la fiiew. Wat khaweit, namarkata, phi kham kor ban äa shibun ki sim-ing. Namarkata, uno-uno uban phla äa Nga ha khmat ki briew, Nga ruh Ngan phla äa u ha khmat u Kpa jong Nga Uba ha bneng. Hynrei uta uban len äa Nga ha

khmat ki briew, Nga ruh Ngan len ia u ha khmat u Kpa jong Nga Uba ha bneng. Wat mut ba Nga la wan ban phah ia ka jingsuk ha ka pyrthei: Ngam shym wan ban phah ia ka jingsuk, hynrei ia ka waitlam. Namar Nga la wan ban pynkhlad ia u briew marpyrshah ia la u kpa, bad ia ka khun marpyrshah ia la ka kmie, bad ia ka pyrsa kurim marpyrshah ia la ka kiaw-kurim. Bad ki nongshun jong u briew, kiba ha ing ha sem jong u hi. Uta uba ieid ia u kpa ne ia ka kmie palat ban ia Nga, um long u babit ia Nga; bad uta uba ieid ia u khun ne ka khun palat ban ia Nga, um long u babit ia Nga. Bad uta ubym shim ia la ka diengphna, bad ubym bud ia Nga, um long u babit ia Nga. Uta uba shem ia la ka jingim un duh noh ia ka: bad uta uban duh ia la ka jingim na ka bynta jong Nga, un shem ia ka. Uta uba pdiang ia phi, u pdiang ia Nga: bad uta uba pdiang ia Nga, u pdiang ia Uta Uba la phah ia Nga. Uta uba pdiang ia u nongiathuhlypa ha ka kyrteng jong u nongiathuhlypa, un ioh ia ka bainong jong u nongiathuhlypa; bad uta uba pdiang ia u 'riewhok ha ka kyrteng jong u 'riewhok, un ioh ia ka bainong jong u 'riewhok. Bad uno-uno uban ai-dih tang shikhuri ka um khriat ha uwei na kine ki barit, ha ka kyrteng jong u synran, shisha Nga ong ha phi, un ym duh ia la ka bainong".

127. U Krist U iaid ban ialap bad la ki Apostol.
Mt. 11:1. Mk. 6:12-13. Lk. 9:6.

Te ka la jia, haba U Jisu U la kut kaba hukum ia la ki khat-ar ngut ki Synran, U la leit noh nang

ta, ban hikai bad ban ialap ha ki 'nongbah jong ki. Te ki la leit noh, ki da iaaid kylleng ki 'nongrit, ki ialap ia ka Gospel bad kyntu ia ka jingkylla jingmut. Bad ha kylleng ki la beh noh shibun ki ksuid, bad bun ki bapang ki la pynsleh da ka umphniang bad ki la pynkoit ia ki.

128. Ka nam jong u Krist ka poi sha u Herod.
Mt. 14:1-2. Mk. 6:14-16. Lk. 9:7-9.

Te u Herod Tetrark¹ u la iöhsngew shaphang kiei kiei baroh ba U la leh (namar ka nam jong U ka la phriang). Bad u la ong ha la ki shakri :

Une U long u Ioannis Nongpynbaptis ia uba nga la khrai-khlieh. U la mihpat na ki baiap, bad namarkata keiñ ki kam-bah ki trei ha U."

Te u la dum-buit tiw, namar don katto-katne kiba la ong ba u Ioannis u la mihpat na ki baiap, bad katto-katne pat ba u Elias u la paw, bad kiwei pat, ba uwei na ki nongiathuhlypa barim u la mih pat. Bad u Herod u la ong :

"Ia u Ioannis nga la khrai-khlieh, hynrei Uei U-ne pat, shaphang Uba nga la iöhsngew kat kine kiei-kiei?"

Te u la kwah ban ioh-i ia U.

129. Ka jingiap Martir jong u Ioannis.
Mt. 14:3-12. Mk. 6:17-29.

Naba U Herod hi u la phah bad kem ia u Ioannis, bad u la teh la khum ia u ha byndi, na ka bynta ka Herodia, ka tnga jong u Philip, u para jong

(r) Nongsynshar ia shibynta na ka sawbynta jong ka ri.

u, namar u la shongkurim ia ka. Naba u Ioannis u la ong ha u Herod : "Ym bit ba men ioh ia ka tnga u para jong me." Hynrei ka Herodia pat ka la thap ia u : bad ka la kwah ban pyniap ia u, pynban kam shym lah. Namar u Herod u sheptieng ia u Ioannis, ba u tip ia u ba u long u briew u bahok bad u bakhuid. Bad haba u kwah ban pyniap ia u, u la khaweit ia u paidbah, naba ki niew ia u kum u nongiatuhlypa. Bad u la da la sumar ia u; te haba u la iohsngew ba u la leh bun kiei-kiei, u la shah-shkor sngewbha ia u. Hynrei haba ka ia ka babit-babiang, ka sngi kha u Herod ka la poi, u Herod ha ka sngi kha jong u, u la khawai ia ki rangbah bad ia ki rangbahshipai, bad ia ki 'riewpawkhmat jong ka Galileia. Te haba ka khun jong kata ka Herodia, ka la rung, bad ka la shad, bad ka la pynsngewbha ia u Herod bad ia kita baroh kiba la iabam sngewbha, u syiem u la ong ha kata ka khynnah :

"Pan na nga katba pha kwah bad ngan ai ia pha."

U la smai ruh ha ka :

"Namar katba pha pan ngan ai ha pha, wat la ka long shiteng ka hima jong nga."

Ka pat haba ka la mih noh, ka la ong ha la ka kmie :

"Aiu ngan pan?"

Ma-ka pat ka la ong :

"Ka khlieh jong u Ioannis Nongpynbaptis".

Te haba ka la wan rung kloil-an da kaba kyrkieh sha u syiem, ka la pan da kaba ong :

"Nga kwah ba men ai ha nga kumne-kumne ha ka pliang, ia ka khlieh jong u Ioannis Nongpynbaptis."

Te u syiem u la sngewsih. Pynban namar ka jingsmai bad na ka bynta kita kiba iabam-khawai lem bad u, um kwah ban pynsngewsih ia ka. Hynrei da kaba phah ia u nongkhrai-khlieh, u la hukum ban wan rah ia ka khlieh jong u ha ka pliang. Te u la khrai-khlieh ia u ha byndi, bad u la walam ia ka khlieh jong u ha ka pliang; bad u la ai ia ka ha kata ka khynnah; bad kata ka khynnah ka la ai ia ka ha la ka kmie. Te haba ki synran jong u ki la iöhsngew shaphang kata, ki la wan bad ki la rah noh ia ka met jong u, bad ki la tep ia ka ha jyntep. Bad ki synran jong u ki la leit iathuh ha u Jisu.

5. Ha ka jingjar-jar jong ka Bethsaida.

130. Haba ki synran ki la wan phai biang, u Jisu U leit bad ki sha Bethsaida.

Mt. 14:13. Mk. 6:30-32. Lk. 9:10. Io. 6:1.

Te haba u Jisu U la iöhsngew ia kata, U la leit noh nangta. Bad ki Apostol ki iawan ha u Jisu, ki la iathuh ha U ia kiei-kiei baroh ba ki la leh bad la hikai. Ma-U pat U la ong ha ki :

“To iawan kyrpang sha ka jaka kynjah, bad iashongthait khyndiat.”

Namar la don shibun kiba iawan ialeit, haduh ba kim iöh shuh ban bam ban dih. Te da kaba kiew ha ka lieng, ki la leit kyrpang sha ka jaka kynjah kaba dei ha Bethsaida, ha shiliang jong ka duriaw Galileia, kaba long ka jong ka Tiberia.

131. Ka Jingbsa phylla banyngkong.

Mt. 14:13-23. Mk. 6:33-46. Lk. 9:11-17. Ioan. 6:2-15.

Te haba u paidbah u la iöhsngew shaphang kata, ki la iamareh lang shata na ki 'nongbah baroh, naba ki la iöhi ia ki dak kiba U la leh ha kita kiba la pang. Bad u Jisu haba U la mih U la iöhi ia u paidbah byllien. U Jisu, namarkata, U la kiew halor u lum, bad U la shong hangta bad la ki synran. Te ka Paskha, ka jingkhawai jong ki Ju ka la jan. U Jisu namarkata, U la khmied la ki khmat, bad haba iöhi ba u paidbah byllien u iawan sha U, U la isynei ia ki, namar ki la long kum ki 'langbrot kibym don nongsharai. Te U la pdiang ia ki, bad U la sdang ban hikai ia ki shibun kiei kiei, bad U la kren ha ki shaphang ka hima jong u Blei, bad U la pynkoit pynkhiah ia kito kiba donkam ia ka jingpynkoit. Te ka sngi ka la sdang ban noh. Bad haba ka sngi ka la noh ngop-ngop, ki khat-ar ngut ki synran jong U ki la wan ha U bad ki la ong :

"Kane ka long ka jaka kynjah, bad mynta ka por ruh ka la palat. To phah noh ia ki, ba da kaba leit ha ki sor bad ha ki 'nongrit kiba markhap, kin iöh ban sah-miet bad ban thied jynbam ia lade."

Hynrei U la jubab bad U la ong ha ki :

"Kim donkam ban leit. To ai maphi ba kin bam."

Te ki la ong ha U :

"Kata ngin leit thied kpu shispah suka¹ ban ai bam ia ki?"

U la ong ha u Philip :

"Nangno ngin thied. kpu ba kine kin. dup ioh bam?"

(Bad ia kane U la ong ban tynjuh, namar ma-U hi U la tip aü ba Un leh). U Philip u la jubah ia U :

"Shispah suka u kpu un ym biang ia ki, ba man u briew un ioh mar-mar khyndiat."

Te U la ong ha ki :

"Katno tylli ki kpu phi don? khie leit khmih."

Bad haba ki la tip, uwei na ki synran jong U, u Andrias, uba shi-para bad u Simon Petrus, u la ong ha U :

"Don. hangne uwei u khynnah uba don san tylli ki kpu-barli bad artylli ki dohkha, hynrei kine kin long aü hapdeng katne-katne? Lymda lehse ngi leit thied jynbam ia une u paidbah baroh."

Bad U la ong :

"To wanlam ia ki hangne ha Nga."

Bad U la hukum ia ki ba kin pynshong ia ki baroh :

"To pynshong ia ki sanphew-sanphew ngut shikynhun."

Bad ki la leh kumta. Te la don bun u phlang ha kata ka jaka. Bad ki la iashong ter-ter shispah-shispah bad sanphew-sanphew, ha ka jingkheñ kumba sanhajar ngut ki rangbah.

Te haba u Jisu U la shim ia kita ki santylli ki kpu bad ki artylli ki dohkha, bad haba U la duai da kaba khmied sha bneng, U la kyrkhu bad U la kdiah ia ki kpu bad U la ai ha la ki synran ban sam ha ki. Kumjuh ruh U la sam ha ki baroh kat-ba ki kwah, ia kita ki artylli ki dohkha. Bad baroh ki la iabam bad ki la kdang.

Te ynda ki la kdang, U la ong ha la ki synran :



“ U Jisu U la shim ia kita ki santyli ki kpu
bad ki artylli ki dohkha.. U la kyrkhu, bad U
la ai ha la ki Synran ban sam ha ki.. Bad
baroh ki la bam bad ki la kdang.”

“To lum ia ki lyngkhot-lyngkhai ba tam, ba kin ym lehnohei.”

Ki la ialum namarkata, bad ki la pyndap khat-ar shang da ki lygkhot-lyngkhai jong kita ki santylli ki kpu barli bad ki dohkha de, kiba tam na kaba ki la bam. Bad kita kiba la bam ia kita ki kpu, ki la long sanhajar ngut ki rangbah, nador ki kynthei bad ki khynnah. Te kita ki briew haba ki la iohi ia kata ka kambah kaba u Jisu U la leh, ki la ong :

“Da shisha Une U long u Nongiathuhlypa Uban wan ha ka pyrthei.”

Namarkata, u Jisu haba U iohi ba kin wan ban ring ia U da ka bor ban thung syiem ia U, U la phah shisyndon ia la ki synran ban kiew ha ka lieng bad ban leit noh ha shuwa jong U sha shiliang duriaw sha Bethsaida, katba ma-U pat, U la phah noh ia u paidbah. Te ynda U la lah phah noh ia ki, U la phet biang sha u lum, ban duai marwei hi. Te haba la prem-miet, U la don hangta tang weibriew hi.

6. Ka jingleit phai sha Galileia.

132. U Krist U iaïd halor duriaw bad U pynjai-jai ha ka kynti ba-ar ka 'eriong.

Mt. 14:24-33. Mk. 6:47-52. Ioan. 6:16-21.

Te haba la prem-miet, ki synran jong U ki la leit sha duriaw. Bad haba ki la kiew ha ka lieng, ki la wan sha shiliang duriaw sha Kapharnaum.

Bad ka la dum, u Jisu pat Um pat shym wan sha ki. Ka duriaw ruh, na ka jingbeh jong ka lyer bajur, ka khie-dew. Ia ka lieng hapteng duriaw la kynting da ki jingatphyllung, namar ka lyer ka la beh marpyrshah ia ki. Te ha ka¹ jingpeitngor basaw jong ka miet, haba ki la king kumba lai ne saw mer, haba U iohi ia ki ba ki shitom ha kaba pyniaid, U la wan sha ki da kaba iaaid halor ka duriaw, bad U la leh kumban iaaid-lait na ki. Maki pat, haba iohi ia U ba U iaaid halor ka duriaw, bad U wan shajan ka lieng, ki la kyüh bad la sheptieng, ki ia-ong :

“Ka dei ka rngai.”

Te ki la ialynñiar da ka jingsheptieng. Naba baroh ki la iohi ia U bad ki la kyüh. U Jisu pat, shisyndon U la kren ha ki, U ong :

“To long ki bashlur. Dei ma-Nga ; wat sheptieng.”

Te u Petrus u jubab, u la ong :

“Ko Trai, lada dei ma-Me, te hukum ia nga ban wan sha Me halor um.”

Bad U la ong :

“Ale.”

Te u Petrus da kaba mih na ka lieng, u la iaaid halor ka um ban leit sha u Jisu. Hynrei haba u la iohi ia ka lyer, u la khaweit. Te haba u la sdang ban ngam, u la pyrta :

“Ko Trai, to pynim ia ngal!”

Te u Jisu, markumta haba U la kner ia la ka kti, U la bat ia u, bad U la ong ha u :

(1) Kumba 3 ne 4 bajé mynstep. Ia ka miet la bynta ha ki saw jingpeit ngor :

“Me uba rit ka jingngeit, balei me la arta-tien?”

Ki la kwah, namarkata, ban pdiang ia U ha ka lieng. Bad haba ki la kiew ha ka lieng, ka lyer ka la sa-ngeh. Te kita kiba la don ha ka lieng ki la wan bad ki la mane ia U ki da ong :

“Shisha Me long u Khun jong u Blei.”

Te ki la sngewlyngngoh shibun eh ha lade, naba kim shym la sngewthuh shaphang ki kpu, namar ka dohnud jong ki la matlah. Te markumta kata ka lieng ka la poi ha kata ka jaka kaba ki mut ban leit.

133. Ha ri Jenasaret, u Krist U leh bun ki Kambah.
Mt. 14:34-36. Mk. 6:53-56.

Te ynda la poi sha shiliang, ki la wan ha ka ri Jenasaret, bad ki la kiew sha ryngkew. Bad haba ki la mih noh na ka lieng, ki briew jong kata ka jaka ki la ithuh ia U shisyndon. Bad ki la phah kylleng kata ka ri baroh. Bad haba ki la leit kyrkieh kylleng sawdong kata ka ri baroh, ki la sdang ban iabah na kylleng, ha ki jynthiah, ia kita kiba la pang, sha ba ki la iohsngew ba U don. Te kat sha ba U leit, ha ki 'nongrit ne ki 'nongbah. ne ka shnong, ki la pynthiah ia ki nongpang ha ki jaka iew, bad ki la kyrpad ia U ba kin ioh ktah tang ia ka rymiang jong ka jaiñ jong U. Bad kat kiba la ktah ia U ki la koit khran.

**134. U Paidbah ha wad ia u Krist. U phai sha
Kapharnaum. Ioan. 6:22-24.**

Ha kawei pat ka sngi, uta u paidbah uba la ieng ha shiliang-duriaw, u la iohi ba ym don kawei pat ka lieng hangta lait tang kawei, bad ba U Jisu Um shym la kiew ha ka lieng lem bad la ki synran, hynrei tang ki synran jong U hi ki la leit noh. Hynrei kiwei pat ki lieng ruh ki la wan poi na Tiberias, markhap ka jaka kaba ki la iabam ia u kpu, ynda u Trai U la duai. Te namarkata, haba uta u paidbah u la iohi ba U Jisu Um don hangta, lymne ki synran jong U, ki la kiew ha ka lieng, bad ki la wan wad ia U Jisu ha Kapharnaum.

135. U Kpu jong u Blei. Ioan. 6:25-33.

Te haba ki la shem ia U ha shiliang jong ka duriaw, ki la ong ha U :

“Ko Nonghikai, mymo Me la wan shane?”

U Jisu U la jubab ia ki bad U la ong :

“Shisha, shisha, nga ong ha phi, phi iawad ia Nga, ym namarba phi la iohi ia ki kam-bah, hynrei namarba phi la bam ia kito ki kpu, bad phi la kdang. Wat trei na ka bynta ka bam kaba duh noh, hynrei na ka bynta kata kaba sah sha ka jing-im bymjukut, ia kaba u Khun jong u briew Un ai ha phi. Namar ia Une, u Kpa, u Blei U la shonshap.”

Namarkata ki la iaong ha U :

“Aiu ngin leh, ba ngin dup trei ia ki kam jong u Blei?”

U Jisu U la jubab bad U la ong ha ki :

"Kane ka long ka kam jong u Blei, ba phin ngeit ia Uta ia Uba U la phah."

Namarkata ki la ia-ong ha U :

"Te kumta ka dak aïu Me leh ba ngin dup iöhi bad dup ngeit ha Me? Kaei Me leh? Ki kpa jong ngi ki la bam ia ka manna ha ri kynjah, kumba la thoh (Ps. 77 : 24) : U la ai ia ki ban bam u kpu na bneng."

Te u Jisu U la ong ha ki :

"Shisha, shisha Nga ong ha phi : u Moses um shym la ai ha phi ia u kpu bneng, hynrei u Kpa jong Nga U ai ha phi ia u kpu bashisha na bneng. Naba u kpu jong u Blei U long Uta Uba wan hiar na bneng, bad Uba ai jingim ha ka pyrthei."

136. "Nga long u Kpu jong ka Jingim".

Ioan. 6:34-47.

Namarkata ki la ia-ong ha U :

"Ko Trai, to ai ha ngi borabor ia une u kpu."

Te u Jisu U la ong ha ki :

"Ma-Nga Nga long u kpu jong ka jingim, uta uba wan ha Nga un ym thngan; bad jar uba ngeit ha Nga un ym sliang lano-lano ruh. Hynrei Nga la ong ha phi, ba la phi iöhi ia Nga, pynban phim ngeit. Baroh kat kaba u Kpa U ai ha Nga, ka wan sha Nga; bad ia uta uba wan ha Nga, Ngan ym kyntait noh. Naba Nga la hiar na bneng, ym ba Ngan dup leh ia ka mon la jong, hynrei ia ka mon jong Uta Uba la phah ia Nga. Te kane ka long ka mon jong uta u Kpa Uba la phah ia Nga, ba baroh kaba U la ai ha Nga, Ngan ym pynjot eiei ruh na ka, hynrei ba Ngan pynmih-pat ia ka ha ka sngi khatduh. Te kane ka long ka mon jong u Kpa

jong Nga, Uba la phah ia Nga : ba baroh uba iohi ia u Khun, bad uba ngeit ia U, un ioi ka jingim bymjukut, bad Nga Ngan pynmih pat ia u ha ka sngi khatduh."

Namarkata, ki Ju ki la iakhnium ia U naba U la ong :

"Ma-Nga Nga long u Kpu ba-im, Uba la hiar na bneng."

Te ki la ia-ong :

"Ym dei Une u Jisu U khun jong u Josep, ia u kpa bad ia ka kmie jong U ngi ithuh? Te kumno U ong : 'Nga la hiar na bneng?'"

Namarkata u Jisu U la jubab bad U la ong ha ki :

"Wat iakhnium para-phi hi. Ym don uba lah ban wan sha Nga, lymda u Kpa, Uba la phah ia Nga, U khring ia u; bad Nga Ngan pynmih pat ia u ha ka sngi khatduh. La thoh ha ki nongiathuh-lypa (Is. 54 : 13, Jer. 31 : 33-34) : 'Baroh kin long kiba la ioi jinghikai shaphang u Blei.' Baroh uba la iohsngew na u Kpa, bad u la nang, u wan sha Nga. Ym namarba uno-uno ruh u la ioi ia u Kpa: lait tang Uta Uba long na u Blei, Uta kei U la ioi ia u Kpa. Shisha, shisha, Nga ong ha phi : Jar uba ngeit ha Nga, u don ka jingim bymjukut."

137. "Ka Doh jong Nga ka long shisha ka jynbam"
Ioan. 6:48-59.

"Nga long u Kpu jong ka jingim. Ki kpa jong phi ki la iabam ia ka manna ha ka ri khlaw, bad ki la iap noh. Une U long u Kpu Uba wan-hiar na bneng, ba lada uno-uno un bam ia U, un ym iap

noh. Nga long U Kpu U ba-im, Uba la wan hiar na bneng. Lada uno uno u bam ia Une u Kpu, un im junom la junom : bad uta u Kpu ba Ngan ai ma-Nga, U long ka Doh jong Nga na ka bynta ka jingim jong ka pyrthei."

Namarkata ki Ju ki la iasaid paraki hi, ki ia-ong :

"Kumno Une U lah ban ai ha ngi ia la ka Doh ba ngin bam?"

Hynrei u Jisu U la ong ha ki :

"Shisha, shisha nga ong ha phi : Lynda phi bam ia ka Doh jong U Khun u briew bad phi dih ia ka Snam jong U, phin ym ioh ha lade ia ka jingim. Uta uba bam ia ka Doh jong Nga. bad uba dih ia ka Snam jong Nga, u ioh ka jingim bymjukut : bad Ngan sa pynmih pat ia u ha ka sngi khatduh. Naba ka Doh jong Nga ka long shisha ka jynbam, bad ka Snam jong Nga ka long shisha ka jyndih. Jar uba bam ia ka Doh jong Nga, bad uba dih ia ka Snam jong Nga, u sah ha Nga bad Nga pat ha u. Kumba u Kpa u baim U la phah ia Nga, bad Nga ruh Nga im da u Kpa, kumta uta uba bam ia Nga ruh, un im da Nga. Une u long u Kpu Uba la wan-hiar na bneng. Ym kumba ki kpa jong phi ki la bam ia ka manna, bad ki la iap. Jar uba bam ia une u Kpu, u im junom la junom."

138. Ka jingkhlad katto-katne ki Synran. Ka jing-ngeit jong u Petrus. *Ioan. 6:60-72.*

Ia kine kiei kiei U la kren haba U hikai ha ka sinagog, ha Kapharnaum. Namarkata bun na ki synran jong U haba ki la iohsngew ki la ong:

"Kane ka jingren ka eh than, mano ba lah ban sngap ia ka?"

Hynrei u Jisu Uba tip ha lade hi ba ki synran la jong ki iakren-khñium shaphang kane. U la ong ha ki :

"Hato kane ka pynthut ia phi? Te lada phin iohi ia u Khun jong u briew Uba kiew shaba U la don mynshuwa pat? Dei ka mynsiem kaba pyn-khie-im : ka doh kam myntoi eiei. Ki ktien ba Nga la kren ha phi, ki long ka mynsiem bad ka jingim. Pynban don na phi kibym ngeit."

Namar u Jisu U la tip naduh basdang kino ki bymngait bad mano uban shetkylla ia U. Te U la ong :

"Na kane ka daw, Nga la ong ha phi, ba ym don uba lah ban wan sha Nga, lymda ka long ba la ai ia u da u Kpa jong Nga."

Naduh kata, bun na ki synran jong U ki la kylla-dien noh, bad kim leit ryngkat shuh bad U. Te u Jisu U la ong ha ki khat-ar ngut :

"Phi ruh phi kwah ban leit uoh?"

Kumta u Simon Petrus u la jubab ia U :

"Ko Trai, shano ngin ialeit? Me don ki ktien jong ka jingim bymjukut. Ngi la ngeit bad ngi la tip ruh ba Me long u Krist, u Khun jong u Blei."

U Jisu U la phai-ktien ia ki :

"Hato Ngam shym la jied ia phi khat-ar ngut; bad uwei na phi u long u ksuid?"

Hynrei U la kren shaphang u Judas Iskariot (u khun) jong u Simon : naba une u la long uban shet-kylla ia U, la u la long uwei na kita ki khat-ar ngut.

KA LYNNONG IV
KA SNEM BA-LAI

1. U leit lyngba ka Phenisia, Dekapolis
bad Sesaria.

139. U Krist U iasaid bad ki Nongthoh bad ki
Pharisi. *Mt. 15:1-9. Mk. 7:1-13. Ioan. 7:1.*

Te hadien kine kiei kiei u Jisu U la leit sha Galileia, namar Um shym kwah ban leit sha Judia, naba ki Ju ki iawad ban pyniap ia U. Ynda kumta ki Pharisi bad katto-katne ngut ki Nongthoh, kiba iawan na Jerusalem, ki la ialum sawdong ia U. Bad haba ki la iohi katto-katne ngut na ki synran jong U ba ki bamja da ki kti jakhlia, kata, khlem thet, ki la woh-daw. Naba ki Pharisi bad ki Ju baroh kim bam lynda ki thet bunsien ia la ki kti, ba ki bat ia ka dustur jong ki tymmen-ki-san. Haba ki wan na iew ruh, lynda ki ioh ban sum, kim bam : don ruh bun kiei-kiei, kiba la hiar pateng ha ki ban sumar ; kaba sait ia ki khuri bad ki luta, bad ki pliang bad ki jynthiah. Te ki Pharisi bad ki nongthoh ki la kylli ia U :

“Balei ki Synran jong Me kim iaid katkum ka dustur ki tymmen-ki-san, hynrei ki bamja da ki kti jakhlia?”

Ma-U pat U phai-ktien, U la ong ha ki :

“Ko ar-sap, u Isaias u la iathuhlypa kaba dei

shaphang jong phi, kumba la thoh (39 : 13) : Une u bynriew u burom ia nga tang da ka rymiang-shyntur, hynrei ka dohnud jong ki ka jngai na Nga. Namar ki mane thala ia Nga, ki hikai ia ki jinghi-kai bad ki hukum jong ki briew. Da kaba iehnoh ia ka hukum u Blei, phi bat ia ka dustur jong ki briew, kaba khlieng ia ki khiew bad ia ki khuri : bad bun kiei-kiei kiba kum kine phi leh."

Te U la ong ha ki :

"Phi kyntait la biang ia ka hukum jong u Blei, ba phin dup sumar ia ka dustur jong phi. Naba u Moses u la ong : (Ek. 20 : 12. Deut. 5 : 16) :

'Burom ia la kpa bad ia la ka kmie.' Bad (Ek. 21 : 17) : 'Jar uban tim ia u kpa ne ia ka kmie, un iap jynduh.' Phi pat phi ong 'Lada u briew un ong ia u kpa ne ia ka kmie : Korban (kaba mut ka jingai) kano kano na nga, kan pynmyntoi ia me' : bad palat kata phim shah shuh ia u ban leh eiei na ka bynta u kpa jong u ne ka kmie, da kaba pynpulom ia ka Ktien jong u Blei na ka bynta ka dustur jong phi, kaba phi ai pateng pakit : bad bun kiei-kiei kiba kum kine phi leh."

140. U batai ha la ki Synran ia ka pharshi.

Mt. 15:10-20. Mk. 7:14-23.

Te haba U la khot biang ia uta u paidbah, U la ong ha ki :

"To sngap ia Nga phi baroh, bad to sngew-thuh; ym don kaei-kaei na bar u briew kaba rung hapoh jong u, kaba lah ban pyntagit ia u, hynrei kita kiba mih noh na u briew, kita keifi kiba pyn-

tngit ia u briew. Lada uno-uno u don ki shkor: ban sngap, to un shah-shkor."

Te haba U la rung noh hapoh ing, na uta u paid-bah, ki synran jong U ki la wan, bad ki la ong ha U :

"Me tip ba ki Pharisi, haba ki la iöhsngew ia kane ka ktien, ki la thut?"

Hynrei U pat U phai-ktien, U la ong :

"Man u jynthung ba u Kpa bneng jong Nga, Um shym thung, yn jynrat noh. Yehnoh ia ki : ki long ki bamatlah, bad ki nongialam ia ki bamatlah.

Te lada u bamatlah u ialam ia u bamatlah, baroh arngut ki hap ha ka thliew."

Te u Petrus u phai-ktien u ong ha U :

"To batai ha ngi ia kane ka pharshi."

Hynrei U la ong :

"Phi ruh phi dang long khlem jingshemphang? Phim sngewthuh ba baroh kat kaba rung hapoh ka shyntur, kam lah ban pyntngit ia u, namar kam rung ha ka dohnud jong u, hynrei ka leit sha ka kpoh, bad ka mih noh ha ka leit-rud. Hynrei kita kiba mih na ka shyntur, ki mih na ka dohnud, kita te ki pyntngit ia u briew. Naba na ka dohnud ki mih ki jingpyrkhat basniew, ka jingpyniap briew, ka jingklm, ki jingawria, ka jingtuh, ki jingsakhi-lamler, ki jingkren-beiñ-blei, ki jingkhwan-lalot, ki jingsniew, ka jingshukor, ka jingnuti, ka jingkhmih sniew, ka jingsarong, ka jingbiej. Kine ki long kita kiba pyntngit ia u briew. Hynrei kaba bam da ki kti ba khlem thet, kam pyntngit ia u briew."

**141. Ha Phenisia. La pynkhiah ia ka khun jong
ka briew kaba na Kanaan.**

Mt. 15:21-29. Mk. 7:24-30.

Te ynda u Jisu U la mih noh nangta, U la leit sha ki thaiñ ka Tyrus bad Sidon. Bad hakhmih, ka kynthei Kanaan, ka jentil, ka nong-Sirophe-nisia kaba don ka khun kaba shong u mynsiem hymkhuid, ka tang shu iohsngew shaphang jong U, ka wan na lita ki thaiñ, ka la pyrta da kaba ong :

“To isyncei ia nga, ko Trai, ko khun jong u Da-bid : ia ka khun jong nga la pynshitom sat da u ksuid.”

U pat Um shym jubab ia ka wat shikyntien ruh. Te ki synran jong U haba ki la iawan hajan, ki la kyrpad ia U, da kaba ong :

“To phah noh ia ka, naba ka kyang nadien jong ngi.”

Hynrei da kaba phai-ktien, U la ong :

“Yin shym phah ia nga lait tang ha ki langbrot ba la wir na ka ing Isra-el.”

Te U la rung hapoh ing, bad Um shym la kwah ban tip mano-mano ruh. Hynrei Um lah ban rieh. Maka pat, ka la wan, ka la rung, bad ka la dem ngon ha ki kjat jong U bad ka la mane ia U. Te ka la kyrpad ia U ba Un beh noh ia uta u ksuid na ka khun jong ka, ka ong :

“Ko Trai, to iarap ia nga.”

Ma-U pat U la jubab bad U la ong :

“Shuh ynda pynkdang shuwa ia ki khun, namar kam long kaba dei ban knieh noh ia ka jynbam jong ki khun bad ban bret ha ki ksew.”

Maka pat ka phai-ktien, ka la ong ha U :

"Shisha ko Trai, naba ki khun-ksew ruh ki bam ïa ki lyngkhot-lyngkhai kiba hap na ka miej jong ki kynrad la jong."

Te u Jisu U jubab, U la ong ha ka :

'Ko kynthei, ka jingngeit jong pha ka long ka bakhraw. Na ka bynta kane ka ktien, to kan long ha pha kumba pha kwah. To khie leit noh : u ksuid u la phet na ka khun jong pha."

Bad ka khun jong ka, ka la koit naduh kata ka por. Te haba ka la leit noh sha la ïng, ka la lap ïa ka khynnah ba la pynthiah ha jynthiah, bad u ksuid u la phet noh.

142. Ha Dekapolis.—U Krist U pynkoit ïa u bakyl-lut bad bymnangkren. *Mk. 7:31-37.*

Te ynda U la leit noh pat na ki thaiñ jong ka Tyrus, U la wan na Sidon sha ka duriaw Galileïa na pdeng ki thaiñ Dekapolis. Te ki la wanlam ha U ïa u bakyllut bad bymnangkren : bad ki la kyrpad ïa U, ba Un dup buh ha u ïa la ka kti. Bad haba U la shim kyrpang ïa u na u paidbah, u la bsuh ïa la ki shympriahti ha ki shkor jong u, bad haba U la biah, U la pyndei ïa u thylliej jong u; bad da kaba khmied sha bneng, U la ud bad U la ong ha u :

"Ephpheta," kaba mut, "To long uba la plie." Te mar-kumta la plie ïa ki shkor jong u, bad la pyllait ïa ka jingteh jong u thylliej jong u, bad u la kren beit.

Te U la adong ïa ki ban ym ïathuh hano-hano ruh. Hynrei katba U nang adong ïa ki, katta ruh ki la nang pynbna bad katta ki la nang sngew-phylla, ki ïa-ong :

“U la leh bha nadong-shadong : u la pynñoh-sngew ïa ki bakyllut, bad pynkren ïa ki bymnangkren.”

143. U pynkoit bun kiwei pat. *Mt. 15:29-31.*

Te haba u Jisu U la leit noh nangta, U la wan shajan ka duriaw Galileïa : bad haba U la kiew ha u lum, U la shong hangta. Te ki la wan ha U ki paidbah byllien kiba don la ki bymnangkren, ki bamatlah, ki badkoh, ki bakynriang bad bun kiwei-kiwei : bad ki la buh ïa ki ha ki kjat jong U, bad U la pynkoit ïa ki: haduh ba kita ki paidbah ki la lyngngoh haba ïohi ïa ki bymnangkren ba ki kren, ïa ki badkoh ba ki ïaid, bad ki bamatlah ba ki ïohi, bad ki la pyndonburom ïa u Blei Isra-el.

144. Ka jingkhawai phylla ba-ar ïa u paidbah.
Mt. 15:32-38. Mk. 8:1-9.

Te ha kito ki sngi, mynba la don u paidbah byllien, bad ba kim shym la don eiei ruh ban bam, U la khot lang ïa la ki synran, U la ong ha ki :

“Nga isynei ïa u paidbah, naba hakhmih, ki la sah bad Nga mynta la lai sngi, bad kim don eiei ruh ban bam. Bad lada Ngan phah jingit ïa ki sha la ïng, kin ïap-tyrsaw ha lynti, naba don napdeng jong ki kiba la wan naduh jngai.”

Te ki synran jong U ki la phai ktien ïa U: “Nangno u briew u lah ban pynkdang ïa ki da ki kpu, hangne ha ka jaka kynjah?”

Te U la kylli ïa ki :

“Katno tylli ki kpu phi don?”

Ki la ong :

"Hynñiew tylli."

Te haba U la shim ïa kita ki hynñiew tylli ki kpu, ynda U la duai, U la kdiah, bad U la ai ha la ki synran ban buh ha khmat jong ki, bad maki ruh ki la buh ha khmat jong uta u paidbah. Ki la don ruh khyndiat ki 'kharit; U la kyrkhu ïa ki, bad U la phah buh ïa ki ruh. Te baroh ki la bam bad ki la kdang: bad ki la khar hynñiew shang, kiba sah tam lyngkot-lyngkhai. Bad kita kiba la ïabam ki la long kumba saw hajar ngut, nador ki khyn-nah bad ki kynthei. Bad U la phah noh ïa ki.

145. Ha Dalmanutha. Ka dak-ka-shin na Bneng.
Mt. 15:39; 16:1-4. Mk. 8:10-13.

Te ynda U la lah phah noh ïa uta u paidbah, U la kiew markumta hi ha ka lieng, bad U la wan sha ki thain Dalmanutha, sha ki rud ka Majedan¹. Kumta ki Pharisi bad ki Sadusi ki la wan sha U, bad haba ki la tynjuh ïa U ki la pan na U ka dak-ka-shin na bneng. Hynrei U la phai-ktien bad U la ong ha ki:


"Haba la prem-miet, phi ong: Kan rang, naba ka suiñ-bneng ka saw. Mynstep pat, kan khie 'eriong mynta ka sngi, naba ka suiñ-bneng ka saw-jngut. Kumta phi tip ban bishar ïa ka khmat jong ka suiñ-bneng, hynrei ïa ki dak-ki-shin jong ka por pat phim lah ban tip?"

Te haba U la ud jylliew ha la ka mynsiem U la ong:

"Balei kane ka pateng ka wad ïa ka dak-ka-

(1) Magdala.

The Holy Land



shin? Shisha Nga ong ha phi, ha kane ka pateng yn ym ai ia ka dak-ka-shin. Ka pateng bymnan bad baklim ka wad ia ka dak-ka-shin: bad ia ka dak-ka-shin yn ym ai ha ka, lait tang ka dak-ka-shin jong u Jonas, u nongiathuhlypa.

Te U iehnoh ia ki, U la kiew biang ha ka lieng, bad U la leit noh sha shiliang.

146. U thiat jong ki Pharisi.

Mt. 16:5-12. Mk. 8:14:21

Te ki synran jong U ki la klet ban rah kpu: bad ryngkat bad ki ha kata ka lieng ki la don tang uwei u ruti. Bad U la kyntu ia ki, U ong:

"To peit-thuh bad to sumar na u thiat jong ki Pharisi bad ki Sadusi, bad na u thiat jong u Herod."

Ki pat ki la iapyrkhat paraki hi, ki ong:

"Namarba ngim don kpu."

Haba u Jisu U la tip ia kata, U la ong ha ki:

"Aiü phi iapyrkhat para-phi hi, phi ki barit jinggeit, namarba phim don kpu? Phim pat tip, lymne sngewthuh? Phi dang don ka dohnud ka bamatlah? Haba phi don ki khmat phim iohi? Bad haba phi don ki shkor phim iohsngew? Phim kynmaw ruh, haba Nga la kdiah ia ki santylli ki kpu ha ki sawhajar ngut: katno shang kiba dap da ki lyngkhot-lyngkhai phi la ia-khar?"

Ki ong ha U:

"Khat-ar."

Mynba ia ki hynniw tylli ruh, ha ki sawhajar ngut; katno shang ki lyngkhot-lyngkhai phi la ia-khar?"

Bad ki la ɔng ha U:

"Hynñiew."

Bad U la ɔng ha ki:

Kumno phim pat sngewthuh? Balei phim sngewthuh ba ym dei shaphang u kpu ba Nga la ong ha phi: To sumar na u thiat jong ki Pharisi bad ki Sadusi?"

Kumta ki la sngewthuh, ba Um shym ong ban sumar na u thiat jong u kpu, hynrei na ka jinghikai jong ki bad jong ki Sadusi.

147. Hajan Bethsaida, u Krist U pynpeit ia ki khmat u hamatlah. Mk. 8: 22-26.

Te ki la wan sha Bethsaida. Bad ki la wanlam ha U ia u matlah, bad ki la kyrpad ia U ba Un ktah ia u. Te U la htin ia ka kti jong u matlah, bad U la ialam ia u shabar shnong; bad haba U la bynthiew ha ki khmat jong u bad buh ia la ki kti ha u, U la kylli ia u:

"Me iohi eiei?"

Te hapa u la khmied, u la ong:

"Nga iohi ia ki briew ba ki iaid kum ki dieng."

Te U la buh biang ia la ki kti ha ki khmat jong u, bad U la sdang ban iohi; kumta la pyn-imat biang haduh ba u la iohi shai kdar ia kiei-kiei baroh. Te U la phah noh ia u sha la ing, U ong:

"Khie leit sha la ing: bad lada me leit hapoh shnong, hano-hano ruh wat iathuh eiei."

148. Hajan Sesaria Philipi. Ka sakhi jong u Petrus bad ka jingkular ia ka jinglongrangbah jong u.

Mt. 16:13-20. Mk. 8:27-30. Lk. 9:18-21

Te u Jisu U la wan sha ki thain Sesaria Philipi. Bad ha lynti, haba U la dang duai wei-briew, U la kylli ia la ki synran, U ong:

“Ki briew ki ong ba u Khun u briew U dei U-ei?”

Hvurei ki la ong :

“Kiwei, u Ioannis Nongpynbaptis, kiwei pat. u Elias, bad sa kiwei pat, u Jeremias, ne uwei na ki nongiathuhlypa.”

Te u Jisu U la ong ha ki :

‘Phi pat pli ong ba Nga long Uci?’

U Simon Petrus u jubab bad u la ong :

“Me long u Krist, u Khun jong u Blei Uba im.”

Te u Jisu U phai-ktien, U la ong ha u :

“Suk mane, ko Simon khun u Jona : naba ka doh bad ka snam kam shym la pynpaw ha me. hynrei u Kpa jong Nga Uba ha bneng. Nga ruh Nga ong ha me: ba me long u Petrus,¹ bad halor une u mawsiang Ngan tei ia ka Balang jong Nga, bad ki khyrdop ka dujok kin ym lah ia ka. Bad Ngan ai ha me ia ki shabi jong ka hima bneng Bad kat ia kaba men teh halor ka khyndew, yn teh ha bneng ruh; bad kat ia kaba men pyllait halor ka khyndew, yn pyllait ha bneng ruh.”

Kumta U la bidong ia la ki synran ba kin ym

(1) Ka ktien Petrus, ne Kephas ha ka ktien Aramaik kaba u Jisu U kren, ka mut u mawsiang (Ioan. 1:42). Kumta ka jingmut jong kine ki ktien ka long : “Nga ruh Nga ong ha me : ba me long u Mawsiang, bad halor une u Mawsiang ngan tei ia ka balang jong Nga...”

iathuh hano-hano ruh. ba ma-U U long u Jisu u Krist.

149. U Krist U iathuhlypa ia la ka jingshah-shi-tom bad ia la ka jingmihpat.

Mt. 16:21-23. Mk. 8:31-33. Lk. 9:22.

Naduh kata, u Jisu U la sdang ban hikai ia la ki synran, da kaba ong :

"U Khun u briew U dei ban leit sha Jerusalem, ban shah bun kiei-kiei, bad ba yn kyntait da ki tymmen-ki-san bad da ki rangbah lyngdoh, bad ki Nongthoh, bad ba yn pyniap, bad hadien laisngi ban mih pat."

Bad U la kren shai ia kata ka ktien. Bad u Petrus, da kaba ialam noh ia U, u la sdang ban sneng ia U :

"Kan her-iap her-im na Me, ko Trai : kane kan ym long ha Me."

U pat, haba U la phai, da kaba peit ia la ki synran, u la kynteit ia u Petrus, U ong :

"Leit shadien jong Nga, ko soitan, me long ka jingpynthut ia Nga, naba mem bam shngiam ia kiei-kiei kiba long ki jong u Blei, hynrei ia kiei kiei kiba long ki jong ki briew."

150. Ka jingdonkam ban len ia lade.

Mt. 16:24-28. Mk. 8:34-39. Lk. 9:23-27.

Te haba U la khot ia ki paidbah bad ia la ki Synran, U la ong ha ki :

"Lada uno-uno u kwah ban bud ia Nga, to un len ia lade, bad un shim ia la ka diengphna man

ka sngi bad un bud ia Nga. Naba jar uba kwah ban pynim ia la ka mynsiem, un duh noh ia ka; hynrei jar uban duh ia la ka mynsiem na ka bynta jong Nga bad ka Gospel, un pynim ia ka. Naba kan myntoi aia ia u briew, lada un ioh ia ka pyrthei baroh kawei bad u duh noh ia la ka mynsiem? Ne da-ei u briew un iapein na ka bynta ia ka mynsiem? Namar jar uban lehrai ia Nga, bad ia ki ktien jong Nga ha hane ka pateng baklim bad bapop, u Khun u briew ruh Un lehrai ia u, haba Un wan ha la ka burom-syiem, ha ka burom jong u Kpa jong U lem bad la ki Angel bakhuid. Naba u Khun u briew Un wan ha ka burom jong u Kpa jong U, lem bad la ki Angel: bad kumta Un ai ha uwei-pa-uwei katkum ki jingleh jong u."

Bad U la ong ha ki:

"Shisha Nga ong ha phi, don na kine kiba ia-ieng hangne, kiban ym mad ia ka jingiap, tat haduh kin da iohi ia ka hima jong u Blei ba ka wan ha ka bor."

151. Ka Jingkylla-dur. *Mt. 17:1-9. Mk. 8:1-8. Lk. 9:28-36.*

Te hadien hynriew sngi, u Jisu U la shim'ia' u Petrus bad u Jakop bad u Ioannis, u para jong' u, bad U la ialam ia ki kyrpang halor u lum bajrong, bad U la kiew ban leit duai, bad U la kylla-dur ha khmat jong ki.

Te katba U dang duai, ka dur jong ka khmat ka-khmat jong U ka la kylla, bad ka khmat jong U ka la tyngshain kum ka sngi, bad ki jain jong U ki la phymai, ki la lieh phalang kum ka for: haduh

ba ym don nongpynkhuid jaiñ ha ka pyrthei, uba lah ban pynlièh kumta. Te hakhmih la paw ha ki, u Moses bad u Elias ha ka burom, bad ki la dang iakren bad u Jisu. Bad ki la iakren shaphang ka jingiap jong U kaba Un pyndep ha Jerusalem. Hynrei u Petrus bad kita kiba iadon ryngkat bad U, ki dang shoh-samthiah eh lyngngai, hynrei haba ki la peitmat bha, ki la iohi ia ka burom-syiem jong U, bad ia kita ki arngut ki rangbah kiba la ieng bad U. Te ka la jia haba kita ki dang khlad noh na U, u Petrus u la ong ha u Jisu :

“Ko Trai, ka bha ba ngin iasah hangne; lada Me kwah, ngin thaw hangne lai tylli ki ing-trep, kawei ia Me, bad kawei ia u Moses, bad kawei ia u Elias.”

Naba um tip aüu u la ong, namar ki la khawcit than. Te katba u dang kren, hakhmih u lvoh baphyrnai u la kah ia ki, bad ki la khaweit haba la tap ia ki da uta u lyoh. Te hakhmih, ka sur ka la mih na uta u lyoh, ka ong :

“Une U long u Khun baieid jong Nga, ia Uba Nga sngewbha eh : to sngap ia U”.

Bad haba la kut kata ka ktien, la shem ia u Jisu wei-briew. Haba ki synran ki la iohsngew ia kane, ki la dem ngon, bad ki la sheptieng her. Te u Jisu U la wan bad U la ktah ia ki, bad U la ong ha ki :

“To ieng, bad wat sheptieng.”

Bad markumta haba ki la khmied ia la ki khmat bad peit sawdong, kim shym iohi briew eiei shuh, lait tang ia u Jisu hi lem bad ki. Bad katba ki dang iahiar na uta u lum; u Jisu U la adong ia ki, U ong :

“Wat iathuh hano-hano ruh ia kane ka jingloh-

ipaw, tat haduh ynda u Khuñ' u briew U mih pat na ki baiap".

Ki te ki la sngap la ka sngap, bad kim shym ia-thuh briew hano-hano ruh, ha kito ki sngi. ia ka-wei ruh na kita kiba la ibhi:

152. Ka Jingwan jong u Elias.

Mt. 17:10-13. Mk. 9:9-12.

Bad kata ka' ktien ka la iai sah bad ki, ki da ia-kylli ba ka mut' aiu : "Haba Un mih pat na ki baiap." Te ki synran jong U ki la kylli ia U, ki ong :

"Balei kata, ki Nongthoh bad ki Pharisi ki ong ba u Elias u dei ban wan shuwa?"

Hynrei U jubah, U la ong ha ki:

"Shisha keiñ, un wan shuwa u Elias, bad un pynbha biang ia kiei kiei baroh. Hynrei Nga ong ha phi, ba u Elias u la wan lypa, bad kim shym ithuh ia u, hynrei ki la leh ia u katba ki mon, kumba la thoh shaphang jong u. Kumjuh u Khun u briew ruh Un shah shitom ha ki, kumba la thoh shaphang u Khun u briew, ba Un shah shibun kiei kiei bad shah ibeiñ".

Kumta ki synran ki la sngewthuh ba U la kren ha ki shaphang u Ioannis Nongpynbaptis.

153. U Krist U pynkoit ia u khynnah uba pangbhur. *Mt. 17:14-17. Mk. 9:13-26. Lk. 9:37-43.*

Te ha ka sngi kaba bud, haba U wan sha la ki synran, U la iohi ia u paidbah byllien sawdong ia ki, bad ia ki Nongthoh ba ki iasaid bad ki. Te shisyndon u paidbah baroh haba iohi ia u Jisu, u

la kyndit¹ thret, bad haba ki la iaphet sha U, ki la ia khublei ia U. Bad U la kylli ia ki:

"Phi iasaid aïu bad ki?"

Te hakhmih, uwei na kita ki paidbah, u la dem khrup hakhmat jong U, u la ong :

"Ko nonghikai, nga la wanlam ha Me ia u khun jong nga uba don u mynsiem ba teh thylliej. Uba kat sha ba u ialam ia u, u lynñiar kynsan bad u lympat ia u, bad u sei-tyrtho, bad u kyryiat-bniat, bad u swai, bad haba u la shoh pynjngem ia u, da kaba eh u leit noh na u. Nga la ialam ia u ha ki synran jong Me, bad nga la ong ha ki synran jong Me ban beh noh ia u bad kim lah satia. Ko Nonghikai, nga kyrpad ia Me, to khmih ia u khun jong nga, naba u long u khun bamarwei jong nga. Ko Trai, to isynei ia u khun jong nga, ba u pangbhur."

Te U la phai-ktien ia ki bad U ong :

"Ko pateng-bynriew bymngait bad bamutlop, haduh katno ngan sah ryngkat bad phi? To wanlam ia u hangne ha Nga."

Te ki la wanlam ia u. Bad haba U la peit ia u, uta u mynsiem shisyndon u la pynlyngwit ia u bad u la ring kyrthat ia u, bad ynda u la lympat ia u ha madan, u la ksaid sei-tyrtho.

Bad U la kylli ia u kpa jong u :

"La slem katno ba kane ka la jia ha u?"

Hynrei u la ong :

"Naduh ba u dang khunlung. Bad bunsien u ju pynnoh ia u hapoh ding bad hapoh um, ban pynjot ia u. Hynrei lada Me lah ban leh eiei, to iarap ia ngi, to isynei ia ngi."

(1) Ki paidbah ki la kyndit naha ka jing-phyrnai ka dang sah katto-katne hadien ka jingkylla-dur.

Bad u Jisu U ong ha u :

“Lada me lah ban ngeit, kiei kiei baroh ki long kiba lah ha uto uba ngeit.”

Bad shisyndon u kpa jong uta u khynnah u pyrtajam, u jaw ummat artat, u la ong :

“Nga ngeit, ko Trai, to iarap ia ka jingbymngeit jong nga.”

Bad haba u Jisu U la iohi ia u paidbah ba u iamareh lang, U la dumok ia uta u mynsiem hymkhuid, U ong ha u :

“Ko mynsiem bakyllut bad ba-teh-thylliej, Nga hukum ia me, to mih noh na u, bad wat rung shuh hapoh jong u.”

Te haba u la lynñiar bad ring kyrthat ia u katlah--katiai, u la mih noh na u, bad u la long kum u ba-iaap, haduh ba hun ki la ong :

“U la iaap.”

Hynrei U Jisu da kaba bat ia u na ka kti, u la khyllie ia u; u ruh u la ieng, bad u Jisu U la ai ia u ha u kpa jong u. Bad uta u khynnah u la koit naduh kata ka por.

154. Ka bor jong ka Jingduai bad ka Jingshah jingit.
Mt. 17:18-20. Mk. 9:27-28.

Te haba U la rung hapoh ing, ki synran ki la iawan jar-jar ha u Jisu, bad ki la ong :

“Balei mangi ngim shym la lah ban beh noh ia u?”

U Jisu U la ong ha ki :

“Namar ka jingbymngeit jong phi, naba shisha Nga ong ha phi, lada phi don ka jingngeit kat u phniang symbai tyrso, phin ong ha une u lum : To

kynriah nangne shatai, un kynriah ruh : bad ym ym don eiei kaba phin ym lah. Hynrei ia kane ka jait ym lah ban beh noh, lait tang da ka jingduai bad ka jingshah-jingit.

2. Ka jingleit sha ka jingkhawai ing-trep.

155. U Krist U leit sha Jerusalem.

Mt. 9:29. Ioan. 7:2-10.

Te ka jingkhawai jong ki Ju, ka jingkhawai ing-trep¹ ka la jan. Kumta ki hymmen-ki-para jong U ki la ong ha U :

“To mih nangne bad to leit sha Judia : ba ki synran jong Me, kin dup iohi ia ki kam jong Me kiba Me leh. Naba ym don uba leh ia kaei kaei ha ka barieh, bad u hi ruh u wad ban paw-khmat. Lada Me leh ia kine kiei-kiei, to pynpaw ia lade ha ka pyrthei.”

Namar wat ki hymmen-ki-para jong U kim shym ngeit ha U.

Kumta u Jisu U la ong ha ki :

“Ka por jong Nga kam pat poi; hynrei ka por jong phi ka long borabor ka babit babiang. Ka pyrthei kam lah ban isih ia phi; hynrei ia Nga ka isih; namar Nga ieng-sakhi ia ka; ba ki kam jong

(1) Ka jingkhawai ingtrep ka long ban kynmaw ia ka jing-iaid-wir ki Israel, sawphew snem ha ri khlaw, mynba ki shong hapoh ki dara. Ha kane, ka jingkhawai, kaba neh kumba shita-iew, ki Ju baroh ki shna ing-trep bad ki shong hangta.

ka ki long ki basniew. To leit maphi sha kane ka sngi jingkhawai, hynrei Nga te Ngam leit sha kane ka sngi khawai, naba ka por jong Nga kam pat pura."

Ynda U la ong ia kinc kiei-kiei, U hi U la sah ha Galileia. Hynrei haba ki hymmen-ki-para jong U ki la leit, te ma U ruh U la leit sha kata ka sngi khawai, khlem pynpaw, hynrei kum ha ka barieh. Bad haba ki la mih noh nangta, ki la iaidlait ia ka Galileia, bad Um shym la kwah ban tip mano-mano ruh.

156. U Krist U leit ha ka ing-niam bad U hikai.

Ioan.. 7:11-29.

Ki Ju, namarkata, ki la iawad ia U ha kata ka sngi jingkhawai, bad ki la ong :

"Hangno U don?"

Te la don ka jingsiaw-siaw ka bakhraw hapdeng u paidbah, shaphang jong U. Namar don kiba la ong :

"Ba U long U babha."

Don ruh kiba la ong :

"Em, hynrei U shukor ia u paidbah."

Pynban ym don ba la kren ha kaba paw shaphang jong U, na ka jingtieng ia ki Ju. Te hapdeng jong kata ka khawai, u Jisu U la leit kiew ha ka tempel, bad U la hikai. Te ki Ju ki la lyngngoh, ki ong :

"Kumno une u la nang pule, khlem ioh hikai?"

U Jisu U la jubab ia ki bad U la ong :

"Ka jinghikai jong, Nga kam long ka jong Nga.

hynrei ka jong Uta Uba la phah ia Nga. Lada uno-uno u kwah ban leh ia ka mon jong U, un tip sha phang ka jinghikai, la ka long na u Blei, ne la Nga kren na lade hi. Jar uba kren na lade, u wad ia la ka burom la jong : hynrei jar uba wad ia ka burom jong Uta Uba la phah ia Nga, une u long u bashisha, bad ka jingbymhok kam don ha u. Hato u Moses um shym la ai ha phi ia ka aifñ? Pynban ym don na phi uba leh ia ka aifñ? Balei phi iawad ban pyniap ia Nga?

Uta u paidbah u la jubab bad u la ong :

“Me don u ksuid; mano ba wad ban pyniap ia Me?”

U Jisu U la phai-ktien bad U la ong ha ki :

“Kawei ka kam Nga la leh bad baroh phi ia-lyngngoh. Naba u Moses u la ai ha phi ia ka jingot-sher (ym namar ba ka la long na u Moses, hynrei na ki kpa); phi ot sher ia u briew ha ka sabbat ruh; lada u briew u pdiang ia ka jingot-sher ha ka sabbat, khnang ba yn ym pynkheifñ ia ka aifñ jong u Moses, phi iabitar ia Nga ba Nga la pynkoit ia u briew ha ka sabbat? Wat bishar tang na sla, hynrei bishar da ka jingbishar hok.”

Te katto katne na ki nong-Jerusalem ki la ong :

“Ym dei Une Uba ki iawad ban pyniap? Bad hakhmih, U kren shai kdar bad kim ong eiei ia U. Hato ki rangbah-rangsan ki la tip shisha ba Une u long u Krist? Hynrei ngi tip Une Uba nangno : hynrei ynda u Krist U wan, ym don ba tip ba U long nangno.”

Namarkata, u Jisu U la pyrta ha ka tempel, U hikai bad U ong :

“Phi i-thuh ia Nga, bad phi tip ruh Nga Uba nangno, bad Ngam shym wan na lade hi : hynrei

Uta Uba la phah ïa Nga U long u bashisha, ïa Uba phim ithuh. Nga ithuh ïa U, namar ba Nga long na U, bad ma-U hi U la phah ïa Nga."

157. Ki Ju ki pyrshang ban kem ïa u Krist.

Ioan. 7:30-36.

Namarkata ki la wad ban kem ïa U: ym don ba ktah-kti ïa U, naba ka por jong U kam pat poi. Hynrei bun na uta u paidbah ki la ngeit ha U bad ki la ong :

"Haba Uta u Krist Un wan, hato Un leh kham bun ki kam phylla ban ïa kine kiba Une u briew U leh?"

Ki Pharisi ki la iöhsngew ïa uta u paidbah ba u iasiaw-siaw ïa kine kiei kiei shaphang jong U; te ki rangbah-rangsan bad ki Pharisi ki la phah ïa ki nongkit-kam ban kem ïa U. Namarkata, u Jisu U la ong ha ki :

"Sa khyndiat por Nga don bad phi: nangta Nga leit sha Uta Uba la phah ïa Nga. Phin iawad ïa Nga bad phin ym shem ïa Nga : bad sha kaba Nga don phim lah ban wan."

Kumta ki Ju ki la ong paraki hi :

"Shano Une Un leit, ba ngin ym shem ïa U? Hato Un leit ha ka jingwir jong ki jentil¹, bad ban hikai ïa ki jentil? ka mut aü kane ka ktien kaba U la ong : Phin iawad ïa Nga, bad phin ym shem ïa Nga ; bad sha kaba Nga don, phim lah ban wan?"

(1) Ki ju kiba shong ha ki ri jong ki reiwpyrthei ryngkat bad ki.

158. Ka sngi khatduh jong ka jingkhawai : ka jing-kular ia u Mynsiem Bakhuid. Ioan. 7:37-39.

Hynrei ha ka sngi khatduh, ka sngi bakhraw jong ka jingkhawai, u Jisu U la ieng bad U la pyrta U ong :

“Lada uno-uno u sliang, te um wan ha Nga bad um dih. Jar uba ngeit ha Nga, kumba ong ka jynthoh (Is. 44 : 3; 55 : 1; 58 : 11; Eks. 47 : 1) : Ki wai um ba-im kin tuid na ka kpoh jong u.”

Hynrei ia kane U la ong shaphang u Mynsiem Uba kita kiba ngeit ha U kin pdiang : namar ym pat shym ai ia u Mynsiem, naba ia u Jisu ym pat shym pyndonburom.

159. Ka jingiapher jingmut jong ki paidbah shaphang u Krist. Ioan. 7:40-44.

Namarkata, haba ki la iohsngew ia kine ki ktien jong U, don na u paidbah kiba la ong :

“Da shisha Une U long u nongiathuhlypa.”

Kiwei pat ki la ong :

“Une U long u Krist.”

Hynrei kiwei pat ki la ong :

“Hato u Krist Un wan na Galileia¹⁾ Ki jynthoh kim ong (2 Syiem 7 : 12; Ps. 88 : 3; Mik. 5 : 2) : Ba u Krist U wan na u symbai jong u Dabid, bad na Bethlehem ka 'nongrit, ha kaba u Dabid u la don?”

Kumta la mih ka jingiakajia hapdeng u paidbah na ka daw jong U. Te don na ki kiba la mut han kem ia U : hynrei ym shym la don ba ktah-kti ia U.

(1) Ki Ju ki tharai ba ia u Krist la kha ha Nasareth.

**160. Ka jingiaprat ha ka dorbar-bah shaphang u
Krist.** *Ioan. 7:45-53.*

Kumta kita ki nongkit-kam ki la wan sha ki
han pynim ia la ka mynsiem na ka bynta tPcmf
ong ha ki :

“Balei phim shym wanlam ia U?”

Ki nongkit-kam ki la jubab :

“Ym pat ju don u briew uba kren kum Une u
Briew.”

Kumta kita ki Pharisi ki la phai-ktien ia ki :

“Maphi ruh phi la shah-shukor? Don mano-
mano na ki Rangbah ne na ki Pharisi uba la ngeit
ha U? Hynrei une u paidbah ubym tip ia ka aiñ,
u long uba la tim.”

U Nikodemus u la ong ha ki, uta uba la wan
sha U mynmiet, uba la long uwci na ki :

“Hato ka aiñ jong ngi ka bishar ia u briew,
lymda ka la ioh-sngew shuwa na u hi, bad la tip
aiu ha u leh?”

Ki la jubab bad ki la ong ha U :

“Me ruh me long u nong-Galileia? To it ia ki
jynthoh, bad to khmih ba u nongiathuhlypa um
mih na Galileia.”

Te man la u briew u la phai noh sha la ing.

**161. Hadien ka jingkhawai ing-trep : ka briew kaba
klim.** *Ioan. 8:1-11.*

Te u Jisu U leit noh sha u Lum Olip. Bad dang
step phyrngap U la wan biang ha ka tempel, bad
ki briew baroh ki la wan sha U; bad haba U la
shong, U la hikai ia ki. Te ki Nongthoh bad ki

Pharisi ki wanlam ha U ia ka briew kaba la lap ha kaba klim; bad ki la pynieng ia ka hapdeng, bad ki la ong ha U:

"Ko Nonghikai, ia kane ka briew la lap hamar ka jinglim. U Moses te ha ka aiñ u hukum ia ngi ban lynthem-maw, ia kaba kum kane; Me pat Me ong kumno?"¹

Hynrei ki ong ia kane, da kaba tynjuh ia U, ba kin dup ioh tei-pop ia U. U Jisu pat, da kaba dem sha thian, U la thoh ha ka khyndew da la ka shym-priah kti. Te haba ki la dem-kylli ia U, U la khmied bad U la ong ha ki:

"Uto uba khlem pop napdeng jong phi, to un kawang maw nyngkong ia ka."

Bad haba U la dem biang, U la thoh ha khyndew. Ki pat haba iohsngew ia kane, ki la leit noh uwei hadien uwei, ki sdang naduh ki rangbah-rungsan. Bad u Jisu U la sah marwei bad kata ka briew kaba ieng hapdeng. Te u Jisu haba U la mied ia lade, U la ong ha ka:

"Ko briew, hangno kito kiba mudui ia pha? Ym don ba la pynrem ia pha?"

Ka la ong:

"Ko Trai, ym don."

Te u Jisu U la ong:

"Nga ruh Ngan ym pynrem ia pha: to khie, bad mynta wat leh pop shuh."

(1) Hangne ki Ju ki la mut ban ioh kem daw ia u Jisu; namar lada Un pyllait ia ka, kin khot ia U Uba ryngkang palat ia ka Aiñ, bad lada Un pynrem ia ka; kin pyabaa ba U long u 'ba-eh dohnud.

bad Um shym la ìehnoh ìa Nga marwei; naba Nga leh borabor ìa kita kiei-kiei kiba pynsngewbha ìa U."

Katba U dang kren ìa kine kiei kiei, bun ki la ngeit ha U.

164. Ki Ju kim long ki khun jong u Blei, hynrei ki khun jong u ksuid. *Ioan. 8:31-47.*

Kumta u Jisu U la ong ha kita ki Ju kiba la ngeit ha U :

"Lada phi ìaisah ha ka ktien jong Nga, phin long shisha ki synran jong Nga, bad phin ithuh ìa ka jingshisha, bad kata ka jingshisha kan pynlait-luid ìa phi."

Ki la phai-ktien ìa U :

"Ngi long u symbai jong u Abraham, bad mynno-mynno ruh ngim pat ju shong-mraw hano-hano ruh : kumno Me ong: Phin long ki balaitluid?"

U Jisu U la jubab ìa ki :

"Shisha, shisha Nga ong ha phi, ba baroh uba leh pop, u long u shakri jong ka pop. Te u shakri um sah junom ha ìng : hynrei u khun u sah junom. Namarkata, lada u Khun U pyllait-luid ìa phi, phin long shisha ki balait-luid. Nga tip ba phi long ki khun jong u Abraham : hynrei phi ìawad ban pyn-ìap ìa Nga, naba ka ktien jong Nga kam don jaka ha phi. Nga kren ìa kaba Nga la ìohi bad u Kpa jong Nga : maphi pat phi leh ìa kaba phi la ìohi bad u kpa jong phi."

Ki la phai-ktien bad ki la ong ha U :

"U Abraham u long u kpa jong ngi."

U Jisu U ong ha ki :

"Lada phi dei ki khun jong u Abraham, to leh ìa ki kam jong u Abraham. Hynrei mynta phi ìa-

wad ban pyniäp iä Nga, u briew Uba la kren ha phi iä ka jingshisha, iä kaba Nga la iöhsngew na u Blei; u Abraham um shym leh iä kane. Phi leh iä ki kam jong u kpa jong phi."

Namarkata, ki la ong ha U :

"Ym shym kha iä ngi na kaba klim; ngi don Uwei u kpa, u Blei."

Kumta u Jisu U la ong ha ki :

"Ban da u kpa jong phi U dei u Blei, phin jin da iëid iä Nga. Naba Nga la mih bad Nga la wan na u Blei ; namar Ngam shym la wan na lade hi, hynrei ma-U U la phah iä Nga. Balei phim shem phang iä ka jingkren jong Nga? Naba phim lah ban shah-shkor iä ka ktien jong Nga. Phi long na la u kpa, u ksuid, bad phi kwah ban leh iä ki jingkwah jong u kpa la jong. Ma-u u la long u nongpyniäp-briew naduh ba sdang, bad um ieng ha ka jingshisha, naba ka jingshisha kam don ha u. Habu u kren lamler, u kren shaphang la ka jong, namar u long ka jinglamler bad u kpa jong ka. Hynrei lada ma-Nga pat Nga kren iä ka jingshisha, phim ngeit iä Nga. Mano na phi uban pynrem iä Nga shaphang ka pop? Lada Nga ong ha phi iä ka bashisha, balei phim ngeit iä Nga? Jar uba long na u Blei, u shah-shkor iä ki ktien jong u Blei. Namarkata phim shah-shkor, naba phim long na u Blei."

165. "Nga don shuwa ban thaw iä u Abraham.

Ioan. 8:48-59.

Kumta kita ki Ju ki la phai-ktien, bad ki la ong ha U :

"Hato ngim ong kaba dei ba Me long u nong-

162. U Krist U pynksan ïa la ka jinghikai.

Ioan. 8:12-20.

Te u Jisu U la kren biang ha ki, U ong :

"Nga long ka jingshai jong ka pyrthei : jar uba bud ïa Nga, um ïaid ha ka jingdum, hynrei un ïoh ïa ka jingshai jong ka jingim."

Kumta ki Pharisi ki la ong ha U :

"Mame, Me ïeng sakhi ïa lade hi: ka sakhi jong Me kam long ka bashisha."

U Jisu U la phai-ktien bad U la ong ha ki :

"Wat la Nga ïeng-sakhi ïa lade hi, ka sakhi jong Nga ka long ka bashisha, naba Nga tip nangno Nga la wan, bad shano Nga leit; hynrei phi pat phim tip nangno Nga wan, ne shano Nga leit. Maphi phi bishar katkum ka doh : Nga Ngam bishar ïano-ïano ruh. Bad lada Nga bishar, ka jing-bishar jong Nga ka long ka bashisha : namar Ngam long marwei : hynrei ma-Nga, bad Uta u Kpa Uba la phah ïa Ngfia. La thoh ruh ha ka aiñ jong phi ba ka sakhi jong ki arngut ki brieve ka long ka bashisha. Nga long Uba ïeng-sakhi ïa lade hi : bad u Kpa Uba la phah ïa Nga, U ïeng-sakhi ïa Nga."

Kumta ki la ïa-ong ha U :

"Hangno Uta u Kpa jong Me?"

U Jisu U la jubab.

"Ïa Nga ruh phim ithuh, ïa u Kpa jong Nga ruh phim ithuh; ba phin da la ithuh ïa Nga lehse ïa u Kpa jong Nga ruh phin da la ithuh."

Ïa kine ki ktien u Jisu U la kren ha ka kamra jingkynshew, haba hikai ha ka tempel : bad ym don ba la kem ïa U, naba ka por jong U kam pat poi.

163. "Sha ba Nga leit, phim lah ban wan."

Ioan. 8:20-30.

Kumta u Jisu U la ong pat ha ki :

"Nga leit noh, bad phin iawad ia Nga, bad phin iap ha ka pop la jong. Shaba Nga leit, phim lah ban wan."

Kumta ki Ju ki la ong :

"Hato Un pyniap noh ia lade, namar U la ong : Shaba Nga leit, phim lah ban wan?"

Bad U la ong ha ki :

"Phi long na tbian, Nga Nga long na jrong. Phi long na kane ka pyrthei, Nga Ngam long na kane ka pyrthei. Namarkata, Nga la ong ha phi ba phin iap ha ki pop la jong." Namar lada phin ym ngeit ba dei ma Nga, phin iap ha ka pop la jong."

Kumta ki la ia-ong ha U :

"Me dei Uei?"

U Jisu U la ong ha ki :

"U Basdang, Uba kren ruh ha phi. Nga don shibun kiei-kiei ban kren ha phi, bad ban bishar. Hynrei Uta Uba la phah ia Nga, U long u bashi-sha: bad kiei-kiei kiba Nga Nga la iohsngew na U, ia kine keiñ Nga kren ha ka pyrthei."

Bad kim shym la sngewthuh ba U la khot u Kpa jong U ia u Blei. Kumta u Jisu U la ong ha ki :

"Ynda phi la lah kyntiew¹ sha jrong ia u Khun u briew, te phin sa ithuh ba dei ma-Nga, bad ba Ngam leh eiei ruh na lade hi, hynrei kumba u Kpa U la hikai ia Nga, ia kita kiei-kiei Nga kren : bad Uta Uba la phah ia Nga, U don lem bad Nga,

(1) Ynda la sah naphna.

Hynrei kiwei pat ki la ong :

"Em, hynrei u syriem ia u."

U pat u la ong :

"Dei ma-nga!"

Kumta ki la ia-ong ha u :

"Kumno la pynpeit ia ki khmat jong me?"

U la jubab :

"Uto u briew ba la khot u Jisu, U la shna 'dew-byrtha, bad U la kyllan ia ki khmat jong nga, bad U la ong ha nga : To khie leit sha ka pung Siloe, bad to sait. Te nga la leit, nga la sait bad nga iohi."

Bad ki la ong ha u :

"Hangno U don?"

U la ong :

"Ngam tip."

Ki la ialam sha ki Pharisi ia uta uba la matlah. Te la dei ka Sabbat mynba u Jisu u la shna ia kata ka 'dew-byrtha bad U la pynpeit ia ki khmat jong u. Namarkata, ki Pharisi ki la kylli biang ia u, kumno ba u la iohi. Hynrei u la ong ha ki :

"U la tah 'dew-byrtha ha ki khmat jong nga, bad nga la sait, bad nga iohi."

Namarkata, katto-katne na ki Pharisi ki la ong :

"Une u briew Ubym sumar ia ka Sabbat, um long na u Blei."

Hynrei kiwei pat ki la ong :

"Kumno u briew, u nongpop U lah ban leh ki kam-phylla kum kine?"

Bad la don ka jingiapait hapteng jong ki. Kumta ki la ong biang ha uta u matlah :

"Me pat me ong, kumno shaphang Uto Uba la pynpeit ia ki khmat jong me?"

U pat u la ong :

"U dei u nongiathuhlypa."

Kumta ki Ju kim shym la ngeit shaphang jong u, ba u la long uba matlah bad u la iöhi, haduh ba ki la khot ia ki kmie-ki-kpa jong uta uba la iöhi. Bad ki la kylli ia ki, ki ong :

"Une u khun jong phi, uba phi ong ba la kha matlah? Te kumno mynta u iöhi?"

Ki kmie-ki-kpa jong u ki la jubab bad ki la ong :

"Ngi tip ba une u long u khun jong ngi, bad ba la kha matlah ia u; hynrei kumno ba mynta u iöhi, ngim tip. Ne mano ba la pynpeit ia ki khmat jong u, ngim tip. Kylli ha u; u la biang ka ryta, ieh un kren hi shaphang ia lade."

Ki kmie-ki-kpa jong u ki la ong ia kine kiei-kiei, namar ki la sheptieng ia ki Ju : naba ki Ju ki la lah iamynjur lypa ba lada uno-uno un phla ia U ba U long u Krist, yn kyntait noh na ka Sinagog. Na kata ki kmie-ki-kpa jong u ki la ong : "Ba u la biang ka ryta, kylli ha u."

Kumta ki la khot biang ia uta u briew uba la matlah, bad ki la ong ha u :

"Ai burom ia u Blei. Ngi tip ba Une u briew U long u nongpop."

Namarkata u la ong ha ki :

"La U long u nongpop, ngam tip ; kawei nga tip ba nga la ju long u bamatlah, mynta pat nga iöhi."

Te ki la ong ha u :

"U la leh aiü ia me? Kumno U la pynpeit ia ki khmat jong me?"

U la jubab ia ki :

"Nga la lah iathuh ha phi, bad phi la iöhsngew: te balei phi kwah ban iöhsngew biang? Hato phi ruh phi kwah ban long ki synran jong U?"

Namarkata ki la tim ia u bad ki la ong :

Samaria, bad Me don ksuid?"

U Jisu U la phai-ktien :

"Ngam don ksuid; hynrei Nga burom ia la u Kpa, bad phi pat phi pynjah burom ia Nga. Hynrei Ngam wad ia ka burom la jong : don Uwei Uba wad, bad Uba bishar. Shisha, shisha Nga ong ha phi : lada uno-uno un ri ia ka ktien jong Nga, un ym iohi ia ka jingiap lano-lano ruh."

Kumta ki Ju ki la ong :

"Mynta ngi tip ba Me don ksuid. U Abraham u la iap, bad ki nongiathuhlypa ruh; Me pat Me ong : Lada uno-uno un ri ia ka ktien jong Nga, un ym mad ia ka jingiap lano-lano ruh. Me kham khraw ma-Me du ban ia u Abraham, u kpa jong ngi uba la iap? bad ia ki nongiathuhlypa kiba la iap? Uei Me pynlong ia lade?"

U Jisu U la jubab :

"Lada Nga pyndonburom ia lade, ka burom jong Nga kam long eiei. Dei u Kpa jong Nga Uba pyndonburom ia Nga, ia Uba phi ong ba U long u Blei jong phi, bad phim ithuh ia U. Hynrei Nga Nga ithuh ia U; bad lada Ngan ong ba Ngam ithuh ia U, Ngan syriem ia phi, Uba lamler. Hynrei Nga ithuh ia U, bad Nga ri ia ka ktien jong U. U Abraham u kpa jong phi u la shad kmen ban dup iohi ia ka sngi jong Nga; u la iohi bad u la kmen."

Kumta ki Ju ki la ong ha U :

"Mem pat dap sanphew snem ruh, te Me la iohi ia u Abraham?"

U Jisu U la ong ha ki :

"Shisha, shisha, Nga ong ha phi, shuwa ban thaw ia u Abraham, Nga don."

Ynda kumta ki la iashim maw ban kawang ia

U. Hynrei u Jisu U la buhrieh ïa lade, bad U la leit noh na ka tempel.

166. U Krist U pynkoit ïa u briew ba la kha matlah.
Ioan. 9:1-41.

Te haba u Jisu U dang ïaid, U la ïohi ïa uwei u briew u bamatlah naduh dang kha. Te ki Syn-ran jong U ki la kylli ïa U :

“Ko Nonghikai, mano ba la leh pop, une ne ki kmie-ki-kpa jong u, ba la kha matlah ïa u?”

U Jisu U la jubab :

“Une um shym la leh pop, lymne ki kmie-ki-kpa jong u; hynrei ba yn pynpaw ha u ïa ki kam jong u Blei. Nga dei ban leh ïa ki kam jong Uta Uba la phah ïa Nga, katba ka dang sngi; ka miet ka wan, ynda kumta ym don uba lah ban trei. Katba Nga dang don ha ka pyrthei, Nga long ka Jingshai jong ka pyrthei.”

Ynda U la kren ïa kine kiei-kiei, U la biah ha ka khyndew, bad U la shna 'dew-byrtha da kata ka umbiah, bad U la kyllan ïa ki khmat jong u da kata ka 'dew-byrtha; bad U la ong ha u :

“To khie leit sait ha ka pung Siloe” (kaba mut la phah).

Kumta u la leit bad u la bta, bad u la wan, u ïohi. Namarkata ki marjan-marpa, bad kito kiba la ju ïohi ïa u mynshuwa ba u la long u nong-khrong, ki la ong :

“Ym dei une uto uba la shong bad uba la khrong?”

Don kiba la ong :

“Dei une keiñ.”

lait tang ban ioh tuh bad ioh pyniäp, bad ioh pyn-jot. Nga la wan ba kin dup ioh ia ka jingim, bad ba kin dup ioh kyrhai. Nga long u Nongsharai babha. U Nongsharai babha U ai ia la ka jingim na ka bynta ki 'langbrot la jong. Hynrei u nongbylla, bad uto ubym long u nongsharai, uba kita ki 'langbrot kim dei ki jong u, u iohi ia u suri ba u wan, te u iehnoh ia ki bad u phet-äp phet-im; bad u suri u kem bad u pynsakma ia ki 'langbrot. Uta u nongbylla pat u phet-äp-phet-im, naba u long u nongbylla bad um pyrwa ia kita ki 'langbrot. Nga long u Nongsharai babha. Nga ithuh ia la ki jong bad ki jong Nga ruh ki ithuh ia Nga. Kumba u Kpa U ithuh ia Nga, bad Nga Nga ithuh ia u Kpa; bad Nga aiti ia la ka jingim na ka bynta ki 'langbrot la jong. Nga don sa kiwei pat ki 'langbrot, kibym long na kane ka sem, ia kita ruh Nga dei ban wanlam, bad kin sngap ia ka ktien jong Nga, te yn long kawei ka sem bad Uwei u Nongsharai.

“Namarkata u Kpa U ieid ia Nga : naba Nga Nga aiti ia la ka jingim, ba Ngan dup shim biang ia ka. Ym don ba shim noh ia ka na Nga : hynrei Nga hi Nga aiti ia ka : Nga don bor ban aiti noh ia ka, bad Nga don bor ruh ban shim biang ia ka. Ia kane ka hukum Nga la pdiang na la u Kpa.”

Te la mih biang ka jingiakajia hapteng ki Ju na ka bynta kine ki ktien. Bun na ki ki la ong :

“U don ksuid bad U lamwir : balei phi iasngap ia U?”

Kiwei pat ki la ong :

“Kine kim long ki ktien jong uba don ksuid; hatu u ksuid u lah ban pynpeit ia ki khmat jong ki matlah?”

3. Ha Galileïa.

168. Ka jingïathuhlypa ka ba-ar shaphang ka jingshah-shitom bad ka jingmih-pat.

Mt. 17:21-22. Mk. 9:30-31. Lk. 9:44-45.

Katba ki dang ïa-ïaid ha Galileïa bad baroh ki la lyngngoh ïa ka bor-bah jong u Blei, u Jisu U la hikai ïa la ki synran bad U la ong ha ki :

“To buh ïa kine ki ktien ha ki dohnud jong phi :
Ïa u Khun u briew yn sa aiti noh ha ki kti jong ki briew, bad kin pynïap ia U, bad ha ka sngi balai Un mih pat.”

Hynrei kim shym pei-phang ïa kane ka ktien, bad la buhrieh ïa ka na ki ba kin ym shemphang ïa ka. Te ki la khaweit ban kylli ïa U shaphang kane ka ktien. Bad ki la khuslai ym don pyrthei.

169. Ka stater hapoh shyntur jong ka dohkha.

Mt. 17:23-26.

Te haba ki la poi ha Kapharnaum, kito kiba lum ïa ki ar-drakhma ki la wan ha u Petrus bad ki la ong ha u :

“U Nonghikai jong phi Um ju siew ïa ki ar-drakhma¹ ?”

U la jubab :

“U siew.”

Te haba u la rung hapoh ïng, u Jisu U la kem-ktien ïa u, U ong :

(1) Kumba shityngka; ba uwei-pa-uwei u Ju uba la dap arphew snem ka ryta, u dei ban siew na ka bynta ka ïng-niam.

“To long synran mame ia U; ngi te ngi long ki synran jong u Moses. Ngi tip ba u Blei U la kren ha u Moses; hynrei Une nangno U long U man, ngim tip.”

Uta u brieve u la phai-ktien bad u la ong ha ki :

“Hangne keiñ ka long ka baphylla, ba phim tip nangno U long, bad U la pynpeit ia ki khmat jong nga. Ngi tip ba u Blei Um shah-shkor ia ki nongpop : hynrei lada uno-uno u long uba mane ia u Blei, bad u leh ia ka mon jong U, ia une U shah-shkor. Naduh myndang long ka pyrthei ym pat ju iohsngew, ba uno-uno u la pynpeit ia ki khmat jong uba la kha matlah. Lynda Une U long na u Blei, Un ym lah ban leh eiei ruh em.”

Ki la phai-ktien bad ki la ong ha u :

“La kha ia me shiryñieng ha ka pop, te da mame me hikai ia ngi?”

Bad ki la shop ia u shabar. U Jisu U la iohsngew ba ki la shop ia u shabar : bad haba u la iakynduh ia u, U la ong ha u :

“Me ngeit ha u Khun jong u Blei?”

U la jubab bad u la ong :

“Dei U-ei, ko Trai, ba ngan dup ngeit ha U?”

Te u Jisu U la ong ha u :

“Me la iohi ia U, bad Uta Uba kren bad me, dei ma-U hi.”

Bad u la ong :

“Nga ngeit, ko Trai.”

Bad haba u la dem ngon, u la mane ia U. Te u Jisu U la ong :

“Na ka bynta ka jingbishar Nga la wan ha ka-ne ka pyrthei, ba kito kibym iohi, kin dup iohi; bad kito kiba iohi kin dup matlah.”

Te katto katne ngut na ki Pharisi kiba la don bad U, ki la iohsngew, bad ki la ong :

“Te mangi ruh ngi matlah?”

U Jisu U la ong ha ki :

“Ban da phi matlah, phin ym don pop; hynrei mynta phi ong : Ba ngi iohi. Ka pop jong phi ka sah.”

167. “Nga long ka jynkhang.” “Nga long u Nong-sharai babha.” *Ioan. 10:1-21.*

“Shisha, shisha, Nga ong ha phi : uto ubym rung na jynkhang hapoh sem 'langbrot, hynrei u kiew nawei pat, uto u long u nongtuh bad u nong-lute. Hynrei uto uba rung na jynkhang, u long u nongsharai jong ki 'langbrot. U nongap-jynkhang u plie ia une, bad ki langbrot, ki sngap ia ka ktien jong u : bad u khot da ka kyrteng ia la ki langbrot la jong, bad u ialam ia ki. Bad haba u la lah pyllait ia ki langbrot la jong, u iaaid ha phang jong ki : bad kita ki 'langbrot ki bud ia u, naba ki tip ia ka sur-ktien jong u. Ia u mynder pat kim bud, hynrei ki phet-iaap-phet-im na u, namar kim tip ia ki sur-ktien jong ki mynder.”

Ia kane ka phawer u Jisu U la kren ha ki. Ma-ki pat kim shym la shemphang ia kaba U la kren ha ki. Kumta u Jisu U la ong biang ha ki :

“Shisha, shisha, Nga ong ha phi, ba ma-Nga Nga long ka jynkhang jong ki 'langbrot. Baroh kat kiba la wan, ki long ki nongthuh bad ki nong-lute : bad ki 'langbrot kim pynsngew ia ki. Nga Nga long ka jynkhang. Lada uno-uno u rung na Nga, un lait-im; te un wan, un leit ruh, bad un shem ki jaka bam-phlang. U nongthuh um wan,

yn pynnoh hapoh duriaw. Kordit ia ka pyrthei namar ki jingpynthut. Naba ka dei ba ki jingpynthut kin wan; hynrei kordit ia uta u briew na uba ka jingpynthut ka wan. Te lada ka kti jong me ka pynthut ia me, to ot noh ia ka : ka kham bha ia me ban rung dkoh ha ka jingim, ban ia kaba don artylli ki kti ban leit ha dujok, ha ka ding bymjulip, ha kaba u ksaiñ jong ki um iap, bad ka ding kam lip. Bad lada ka kjat jong me ka pynthut ia me, to ot noh ia ka bad to bret noh na me : ka kham bha ia me ban rung dkoh ha ka jingim bymjukut, ban ia kaba don artylli ki kjat, ban shah bret ha dujok jong ka ding bymjulip, ha kaba u ksaiñ jong ki um iap bad ka ding kam lip.

“Bad lada ka khmat jong me ka pynthut ia me, to khlaw noh ia ka bad bret noh na me : ka kham bha ia me ban rung ha ka hima u Blei tang shiliang ka khmat, ban ia kaba don artylli ki khmat ban shah bret hapoh dujok ding, ha kaba u ksaiñ jong ki um iap, bad ka ding kam lip.”

173. Ka Pharshi shaphang ka Mluh. Mk. 9:48-49.

Naba ia uwei-pa-uwei yn pynbang-mluh da ka ding; bad baroh u jynkñia yn pynbang-mluh da ka mluh. Ka mluh ka bha. Hynrei lada ka mluh ka kylla blad daei yn pynbang-mluh pat ia ka? To don mluh ha lade-lade, bad to iasuk para-phi hi.”

174. Ka Pharshi shaphang ka 'langbrot ba la jah noh. Mt. 18:10-14.

“Peit ba phin ym ibeiñ ia iwei na kine ki barit : naba Nga ong ha phi, ba ki Angel jong ki ha

bneng ki iöhi borabor ia ka khmat jong u Kpa jong Nga, Uba ha bneng. Namar u Khun u briew U la wan ban pynim ia kata kaba la duh. Kumno phi pyrkhat? Lada uwei u don shispah tylli ki 'lang-brot, bad kawei na ki ka sakma, hato un ym ieh-noh ha lum ia ki khyndai-phew khyndai, bad leit wad ia kata kaba sakma? Bad lada ka jia ba un shem ia ka, shisha Nga ong ha phi, ba u kham kmen ia ka ban ia kita ki khyndai-phew khyndai kibym shym la sakma. Kumjuh ruh, kam long ka mon jong u Kpa jong phi Uba ha bneng, ba iwei na kine ki barit in duh noh."

175. Ka jingsneng. Ka bor Apostol. Ka bor jong ka jingduai. *Mt. 18:15-20.*

"Hynrei lada u para-u-hymmen jong me un leh ka lait-ka-let ia me, to leit bad to sneng ia u hapdeng jong me bad jong u hi marwei. Lada un sngap ia me, me la pynbha ia la u hymmen-u-para. Hynrei lada um sngap ia me, to ialam bad me sa uwei ne arngut : ba ha ka shyntur ki arngut ne laingut ki sakhi, ka ktien baroh kan skhem. Bad lada un ym sngap ia ki, to iathuh ha ka balang; hynrei lada um sngap ia ka balang, un mat long ha me kum u 'riewpyrthei bad u nongap-khrong. Shisha Nga ong ha phi, kat kaba phin teh ha ka khyndew, yn teh ha bneng ruh; bad kat kaba phin pyllait ha ka khyndew, yn pyllait ha bneng ruh. Nga ong biang ha phi, ba lada arngut na phi kin iamynjur ha ka pyrthei, shaphang kano kano ruh kaba kin pan, yn pyndep ha ki da u Kpa jong Nga Uba ha

"Me pyrkhat kumno, Simon? Ki syiem jong ka pyrthci, nano ki shim musur ne khajua? Na la ki khun ne na kiwei pat?"

Bad u la ong :

"Na kiwei pat."

U Jisu U la ong ha u :

"Kumta ki khun ki lait siew. Pynban ban ym pynthut ia ki, to leit sha duriaw, bad to bret ia u khwai : bad to shim ia ka dohkha kaban ngat nyngkong-nyngshap. Bad ynda me la pied ia ka shyntur jong ka, men shem kawei ka *stater* ;' to shim ia kata, bad to ai ha ki na ka bynta jong Nga bad jong me."

170. Mano uba kham khraw ha ka hima bneng?
Mt. 18:1-5. Mk. 9:32-36. Lk. 9:46-48.

Ha kata ka por, haba ki la don ha ing, ki synran ki la wan ha u Jisu, ki ong :

"Mano, Me tharai, uba kham khraw ha ka hima bneng?"

Hynrei u Jisu ba U iohi ia ki jingpyrkhat ha ki dohnud jong ki, U la kylli ia ki:

"Phi iakren aiu ha lynti?"

Hynrei ki la shu sngap; naba ha lynti ki la ia-said paraki hi, uno na ki uba kham khraw. Te haba U la shong, U la khot ia kita ki khat-ar ngut bad U la ong ha ki :

"Lada uno-uno u kwah ban long u khmat, un long u khatduh na baroh bad u shakri ia baroh. Namar uto uba kham rit hapdeng jong phi baroh. uto keiñ u long uba kham khraw."

(1) Ka pcisa-tyngka rupa kaba long kumba ar-tyngka.

Te u Jisu haba U la khot ia uwei u khynnah, U la shim ia u bad U la pynieng ia u hapdeng jong ki, bad haba U la kdup ia u, U la ong ha ki :

"Shisha Nga ong ha phi, lymda phi kylla bad long kum ki khynnah, phin ym rung ha ka hima bneng. Jar uban pdiang ia uwei na ki khynnah kiba kum kine, ha ka kyrteng jong Nga, u pdiang ia Nga, bad uno-uno uban pdiang ia Nga, um pdiang ia Nga, hynrei ia Uta keiñ Uba la phah ia Nga."

171. U nongbeh-ksuid bym-ithuh.

Mk. 9:37-40. Lk. 9:49-50.

U Yoannis u la phai-ktien ia U, u ong :

"Ko Nonghikai, ngi la iohi ia uwei ubym bud ia ngi, uba beh noh ia ki ksuid ha ka kyrteng jong Me, te ngi la mana ia u."

Hynrei u Jisu U la ong :

"Wat mana ia u. Naba ym don u briew uba leh ia ka kam phylla ha ka kyrteng jong Nga bad uba lah shen ban kren sniew ia Nga. Namar jar ubym long pyrshah ia phi, u long bad phi. Naba uno-uno uban ai dih ia phi shikhuri ka um ha ka kyrteng jong Nga, namarba phi long ki jong u Krist, shisha Nga ong ha phi, un ym duh ia la ka bainong."

172. "Kordit ia ka pyrthei namar ki jingpynthut".

Mt. 18:6-9. Mk. 9:41-47.

"Bad uno-uno uban pynthut ia uwei na kine ki barit kiba ngeit ha Nga, la kham bha ban yn teh da u maw-tylliat ha ka ryndang jong u bad ba

bneng. Naba kat haba don ar ne laingut kiba ïa-lang lang ha ka kyrteng jong Nga, Nga don hangta hapdeng jong ki."

176. To map ïa la ki hymmen-ki-para. Ka pharshi shaphang u shakri bym-isynei. Mt. 18:21-35.

Ynda kumta u Petrus u wan sha U bad u la ong :

"Ko Trai, haduh katno sien, lada u hymmen-u-para jong nga u leh ka lait-ka-let ïa nga, ngan map ïa u? Haduh hynñiew sien?"

U Jisu U la ong ha u :

"Ngam ong ha me haduh hynñiew sien, hynrei haduh hynñiewphew sien hynñiew sien. Namarkata ïa ka hima ki bneng la pynsyriem bad u syiem, uba la kwah ban shim jingkheĩñ na la ki shakri. Te haba u la sdang ban shim jingkheĩñ, la wanlam ha u ïa uwei uba la kit-ram na u shiphew hajar talen.¹ Hynrei namarba um don eiei ban siew, uta u kynrad jong u, u la hukum ba yn die noh ïa u, bad ïa ka tnga jong u bad ïa ki khun bad baroh katba u la don, bad ban siew-ram. Uta u shakri pat, u la dem khrup bad u la kyrpad ïa u, u ong :

"To ïashah ïa nga bad ngan siew lut baroh ha me."

Bad u kynrad jong uta u shakri u la sngew-synei, u la pyllait ïa u bad u la map noh ïa u ïa ka ram. Hynrei haba uta u shakri u la mih

noh, u la iäkynduh iä uwei u para-shakri la jong uba la kitram na u shispah denar¹; bad haba u la bat u la shkiah iä u, u ong :

“Siew noh iä ka ram.”

Te uta u para-shakri jong u, u dem khrup, u la kyrpad iä u, u ong :

“To iäi-shah iä nga bad ngan siew lut baroh ha me.”

Ma-u pat um treh, hynrei u la leit, bad u la thep iä u ha phatok, haduh ba un da siew iä ka ram. Te haba ki para-shakri jong u ki iöhi iä kata baroh, ki la sngewsih shibun eh; bad ki la wan bad ki la iäthuh ha u kynrad jong u iä kata baroh kaba la jia. Kumta u kynrad jong u u la khot iä u bad u la ong ha u :

“Me u shakri bymman, nga la map noh na me iä ka ram baroh namarba me la kyrpad iä nga; te ym dei namarkata, ba me ruh men isynei iä la u para-shakri, kumba nga ruh nga la isynei iä me?”

“Te u kynrad jong u, u la shla, u la aiti iä u ha ki nongpynshitom haduh ba un da siew dep iä ka ram baroh. Kumjuh hi u Kpa jong Nga, Uba ha bneng, Un leh iä phi, lada naduh la ki dohnud phim iämap uwei-pa-uwei iä la u hymmen-u-para.”

(1) Kumba 40 tyngka.

4. Ka jingleit sha ka Jingkhawai jong ka Jingkyntang ia ka Tempel.

177. Ha Samaria : Ym shym la pdiang ia u Krist
Lk. 9:51-56.

Te ka la jia, myuba ki sngi jong ka jingshim-noh¹ ia U ki la jan, ba U la thew beit thik ia la ka khmat ban dup leit sha Jerusalem. Bad U la phah ia ki nonglamktien ha khmat jong U; te ynda ki la leit, ki la rung ha ka 'nongbah jong ki nong-Samaria, ban pynkhreh ia U. Hynrei kim shym la pdiang ia U, naba ka khmat jong U ka la long kum Uba leit sha Jerusalem. Te haba ki Synran jong U, u Jakop bad u Ioannis,² ki la iohi ia kane, ki la ong :

“Ko Trai, Me kwah ba ngin hukum ia ka ding ba kan hiar na bneng bad ba kan thang ia ki?”

Bad haba U phai, U la mai ia ki, U ong :

“Phim tip na ka mynsiem aiu phi long. U Khun jong u briew Um shym la wan ban pynjot ia ki mynsiem, hynrei ban pynim.”

Bad ki la ialeit noh sha kawei pat ka 'nongrit.

178. Ka jingkhoh ia ki laingut. Kumno ban bud ia u Krist. *Mt. 8:18-22. Lk. 9:57-62.*

Te ka la jia katba U la dang iaid ha lynti, ba uwei u Nongthoh u wan bad u la ong ha U :

(1) Ka jingkiew jong U sha bneng ha ka bor bad ka burom Blei.

(2) U Krist u la ai kyrteng ia kine shipara, ki khun jong u pyrthat :-Boanerges.

"Ko Nonghikai, ngan bud ia Me kat shaba me leit."

Bad u Jisu U la ong ha u :

"Ki myrsiang ki don ki krem, bad ki sim jong ka suiñ-bneng, ki skum; hynrei u Khun jong u briew Um don jaka ban buh ia la ka khlieh."

Hynrei ha uwei pat U la ong :

"To bud ia Nga."

Te u la ong :

"Ko Trai, to shah ia nga ba ngan leit tep shuwa ia u kpa jong nga."

Hynrei u Jisu U la ong ha u :

"To ieh ia ki baiap ba kin tep ia la ki baiap ; hynrei mame to leit bad to ialap ia ka hima jong u Blei."

Sa uwei pat u la ong :

"Ngan bud ia Me, ko Trai, hynrei shuh ngan da leit iathuh shuwa ha kiba ha ing ha sem."

U Jisu U la ong ha u :

"Ym don u briew uba buh ia la ka kti ha ka lyngkor, bad uba kyrtiang dien, uba bit ia ka hima jong u Blei."

**179. Ha Peria : U phah ia ki hynñiewphew-ar ngut
ki Synran.**

Lk. 10:1-12.

Te hadien kine kiei-kiei, u Trai U la thung sa hynñiewphew-ar ngut; bad U la phah ia ki ar-ar-ngut ha shuwa ka khmat jong U, sha ki shnong bad ki jaka baroh kiba U hi Un sa leit. Bad U la ong ha ki :

"Ka jingot ka bun shisha, hynrei ki nongtrei ki khyndiat. To kyrpad, namarkata, ia u Trai jong ka jing-ot, ba un dup phah nongtrei ha la ka jing-

ot. To khie ialeit. Hakhmih Nga phah ia phi kum ki khun 'langbrot hapdeng ki suri. Wat rah 'saipan, lymne iarong, lymne juti, bad iano-iano ruh wat khublei ha lynti. Ha kano-kano ka ing ba phin rung, ong shuwa: Ka jingsuk ha kane ka ing. Te lada u khun ka jingsuk u don hangta, ka jingsuk jong phi kan shongthait ha u; lymda kumta, kan phai biang sha phi. Bad to shong to sah ha kata ka ing, bam bad dih kat kumba ki don; naba ka shong-hok ia u nongtrei ban ioh ia la ka bainong. Wat iakynriah na kawei ka ing sha kawei ka ing. Bad ha kano-kano ka shnong ba phin rung, bad ki pdiang ia phi, to bam ia kito kiba ki buh ha khmat jong phi; bad to pynkoit ia ki bapang kiba don hangta, bad to ong ha ki :

"Ka hima jong u Blei ka la wan hajan jong phi."

"Hynrei ha kano-kano ka shnong ba phin rung, bad kim pdiang ia phi, da kaba mih noh sha ki surok-bah jong ka, to ong :

"Wat ia ka 'dewmet kaba snoh ha ngi, na ka shnong jong phi, ngi niad ha phi; pynban to tip ia kane, ba ka hima jong u Blei ka la wan hajan."

"Nga ong ha phi, ba ha kata ka sngi kan long kham jem ia ka Sodom ban ia kata ka shnong."

180. Kordit ia pha Korosain. Bethsaida. Kapharnaum. *Mt. 11:20-24. Lk. 10:13-15.*

Ynda kumta U la sdang ban mai ia kita ki shnong ha kiba la leh kham bun ia ki kam-bah jong U, ba kim shym la pynshitom kylla-jingmut.

"Kordit ia pha Korosain, kordit ia pha Bethsaida : naba lada la leh ha Tirus bad Sidon ia ki kambah kiba la leh ha phi, la slem bah kin jin

da la pynshitom kylla-jingmut da ki jaiñ-byrni bad u dpei. Shisha keiñ, Nga ong ha phi, ba ha ka sngi bishar, kan kham jem ia ka Tirus bad Sidon ban ia phi. Bad mapha Kapharnaum, hato yn kyntiew ia pha haduh bneng? Phan hiar arsut haduh dujok, naba lada la leh ha Sodom ia ki kam-bah ba la leh ha pha, lehse kan da la sah haduh kane ka sngi. Shisha keiñ, Nga ong ha phi, ba ha ka sngi bishar kan kham jem ia ka ri Sodom ban ia pha."

181. Jar uba sngap ia phi u sngap ia Nga.

Lk. 10:16.

"Jar uba sngap ia phi, u sngap ia Nga; bad jar uba i-beiñ ia phi, u i-beiñ ia Nga. Bad jar uba i-beiñ ia Nga, u i-beiñ ia Uta Uba la phah ia Nga."

182. Ki synran ki wan phai.

Lk. 10:17-20.

Te kita ki hynñiewphew-ar ngut ki la wan-phai pat da kaba kmen, ki ong :

"Ko Trai, ia ki ksuid ruh la pyndem hapoh jong ngi, ha ka kyrteng jong Me."

Bad U la ong ha ki :

"Nga iöhi ia u soitan ba u hap kum ka leilieh na bneng. Hakhmih, nga la ai ha phi ka bor ban iuh-roit ia ki bseiñ bad ki ñiang-lartham bad ia ka bor baroh jong u nongshun, bad ym don eiei kaban pynsniew ia phi. Hynrei wat kmen ia kane, ba ia ki mynsiem la pyndem hapoh jong phi, hynrei to kmen, ba ia ki kyrteng jong phi la thoh ha bneng."

183. Ka jingkmén jong ka Dohnud u Jisu.

Mt. 11:25-30; 13:16-17. Lk. 10:21-24.

Ha kata ka por u Jisu U la kmen ha u Mynsiem Bakhuid bad U la ong :

“Nga phla ha Me, ko Kpa, ko Trai ka bneng bad ka khyndew, naba Me la buhrieh ia kine kiei-kiei na ki bastad bad ki basian, bad Me la pynpaw ia ki ha ki barit. Hooïd, ko Pa, naba kumta ka la ibit hakhmat jong Me. Ia kiei-kiei baroh la ai ha Nga da u Kpa jong Nga; bad ym don ba ithuh ia u Khun lait tang u Kpa: lymne ym don ba ithuh ia u Kpa lait tang u Khun bad uta ba u Khun U kwah ban pynpaw. To wan ha Nga phi baroh kiba shitom bad kiba khia jingkit, bad Ngan pynjah-thait ia phi. To kit ha phi ia ka lyngkor jong Nga, bad to hikai na Nga, naba Nga long u bajemnud bad u basngewrit ka dohnud : te phin shem jing-jahthait ha la ki mynsiem. Naba ka lyngkor jong Nga ka long ka ba-sngewtynnad bad ka jingkit jong Nga ka basting.”

Bad ynda U la phai sha la ki synran, U la ong :

“Hynrei suk ki khmat jong phi ba ki iöhi, bad ki shkor jong phi ba ki iöhsngew. Naba shisha Nga ong ha phi, ba bun ki nongiathuhlypa bad ki 'riewhok, bad ki syiem, ki la kwah ban iöhi ia kiei-kiei ba phi iöhi, te kim shym iöhi; bad ban iöhsngew ia kici-kiei ba phi iöhsngew, te kim shym iöhsngew.”

184. Ka Pharshi shaphang u nong-Samaria babha.
Lk. 10:25-37.

Te hakhmih, uwei u 'riewsaid u la ieng joit,
u tynjuh ia U bad u ong :

"Ko Nonghikai, aiü nga dei ban leh ban dup
ioh ia ka jingim bymjukut?"

Hynrei U la ong ha u :

"Aiü la thoh ha ka aiñ? Kumno me pule?"

Haba u jubab u ong :

"Men ieid ia u Trai u Blei jong me da ka doh-
nud jong me baroh, bad da ka mynsiem jong me
baroh, bad da ka bor jong me baroh, bad da ka
ka jingmut jong me baroh; bad ia la u paramar-
jan kumba ia lade hi (*Deut. 6:5; Leb. 19:18*).

Bad U la ong ha u :


"Me la jubab kaba dei. To leh ia kane, bad
men im." (*Leb. 18:5*).

U pat ba u kwah ban pynksan ia lade u la ong
ha u Jisu :

"Te u-ei u paramarjan jong nga?"

Hynrei U Jisu U jubab, U la ong :

"Uwei u briew u la hiar na Jerusalem sha Jeri-
kho, bad u la hap ha ki nonglute, kiba la lute ruh
ia u, bad ynda ki la pynmynsaw ia u, ki la phet
noh ki ieh ia u kum u baiap. Te ka la jia ryng-
khat ba uwei u lyngdoh u la hiar na kata kajuh ka
lynti ; bad haba u iohi ia u, u la iaid-lait. Kumjuh
ruh uwei u Lebi, haba u la poi hajan kata ka jaka
bad la iohi ia u, u la iaid la ka iaid. Hynrei uwei
u nong-Samaria uba dang leit la ka jingleit, u la
wan-poi hajan jong u; bad haba iohi ia u, u la
sngewsynei. Te haba u la shur hajan, u la spaiñ
ia ki jingjngem-snam jong u, u da theh um-



*"Ka Maria ka la jied ia ka bynta kaba kham
bha, ia kaba yn ym shim noh na ka."*

phniang bad waiñ; bad haba u la kyntiew ïa u ha la u kada, u la ïalam ïa u sha ka ïng-basa bad u la sumar-sukher ïa u. Te ha ka sngi kaba bud, u la sei ar denar, bad u la ai ha u trai-ïngbasa, u la ong artat:

"To sumar ïa u; bad kat kaba me pynlut tam, ngan siew ïa me ynda nga wan phai biang."

"Uno na kine ki lai-ngut, me tharai, u la long u paramarjan jong uta uba la hap ha ki nonglute?"

Hynrei u la ong :

"Uta uba la leh isynei ïa u keiñ".

Bad u Jisu U la ong ha u :

"To leit, bad to leh mame ruh kumjuh."

185. Ha Bethania. Ka Martha bad ka Maria.

Lk. 10:38-42.

Te ka la jia, katha ki nang leit, ba u la rung ha kawei ka shnong. Bad kawei ka briew kaba kyr-teng ka Martha, ka la pdiang ia U ha la ïng. Bad ka la don kawei ka para kaba kyr-teng ka Maria, kaba da kaba shong ruh hajan ki kjat jong u Trai, ka la shahshkor ïa U. Hynrei ka Martha ka la bun-kam eh ha kaba pynkhreh-pynkhrum ; ka la ieng bad ka la ong :

"Ko Trai, Mem suitñiew satia ba ka para jong nga ka ïehnoh ïa nga marwei ban pynkhreh-pynkhrum? Kumta, to ong ïa ka ba kan ïarap lem ïa nga."

Te u Trai, U la phai-ktien U la ong ha ka:

"Martha, Martha, pha khuslai bad pha shitom shaphang bun kiei-kiei. Hynrei kawei ka long ka badonkam. Ka Maria ka la jied ïa ka bynta kaba kham bha, ïa kaba yn ym shim noh na ka."

186. Ha lum Olib : Ka rukom bad ka bor jong ka jingduai. *Lk. 11:1-13.*

Te la jia haba U la don ha kawei ka jaka U dang duai, haba U la sangeh, uwei na ki synran jong U, u la ong ha U:

“Ko Trai, to hikai ia ngi ban duai kumba u Ioannis ruh u la hikai ia la ki synran.”

Bad U la ong ha ki :

“Haba phi duai, to ong : Ko Kpa, kan long ba-khuid ka kyrteng jong Me. Kan wan ka hima jong Me. To ai ia ngi mynta ka sngi ia ka jynbam jong ngi kaba ha la ka sngi. Bad to map ia ki pop jong ngi naba ngi hi ruh ngi map ia kiba lehsniew ia ngi baroh. Bad wat ialam ia ngi sha ka jingpynshoi.”

U la ong ruh ha ki :

“Uno na phi uban don u lok bad uban leit sha u shiteng synnia bad uban ong ha u :

“Ko lok, ia-ai kylliang ia nga lai tylli ki ruti, naba u paralok jong nga u wan jingwan sha nga bad ngam don eiei ruh ban buh ha khmat jong u.”

Bad ma-u pat napoh u phai ktien, un ong :

“Wat pynsalia ia nga, mynta ka jynkhang ka la khang, bad ki khun jong nga ki don bad nga ha jynthiah. Ngam lah ban khie bad ban ai ia me.”

Pynban lada un iai-tied, Nga ong ha phi, wat la un ym khie ban ai namarba u long u lok jong u, pynban na ka bynta ka jingthlia jong u, un khie bad un ai ia u katba u donkam. Bad Nga ong ha phi :

Pan, te yn sa ai ha phi : wad, te phin sa shem : tied, te yn sa plie ia phi. Naba jar uba pan, u iohpdian, bad uta uba wad, u shem : bad ia uta uba

tied yn plie. Te uno na phi uban pan kpu na la u kpa, un ai pynban ia u da u maw? Ne ka dohkha, ha ka jaka jong ka dohkha un ai pynban da u bseiñ? Lane lada un pan pylleng, u pynioh ia u da ka 'ñianglartham? Namarkata lada phi ki bymman phi tip ban ai ki jyn-ai babha ha la ki khun, katno leilei u Kpa jong phi na bneng Un ai ia u mynsiem babha ha kito kiba pan na U?

187. Ha Jerusalem. "Manga bad u Kpa Ngi long shitylli."
Ioan. 10:22-42.

Te ka la long ka Jingkhawai¹ jong ka Jingkyntang ha Jerusalem; bad ka la dei myntlang. Te u Jisu U la iaaid ha ka tempel, ha tyngkong jong u Salomon. Kumta ki Ju ki la ialum sawdong ia U bad ki la ong ha U :

"Haduh lano Men pynbuhkhoh ia ka mynsiem jong ngi? Lada Me dei u Krist, to ong shai ia ngi."

U Jisu U la jubab ia ki :

"Nga kren ha phi, te phim ngeit. Ki kam ba Nga leh ha ka kyr teng jong u Kpa jong Nga, kine ki ieng-sakhi ia Nga. Hynrei phi phim iangeit, naba phim long na ki 'langbrot jong Nga. Ki 'langbrot jong Nga ki sngap ia ka ktien jong Nga; bad Nga Nga ithuh ia ki, bad ki bud ia Nga. Bad Nga ai ha ki ia ka jingim bymjukut; bad kin ym jot junom la junom, bad ym don uba lah ban knieh ia ki na ka kti jong Nga. Kata kaba u Kpa jong Nga U la ai ha Nga, ka kham khraw ban ia baroh; bad ym don uba lah ban knieh na ka kti

(1) Ka Jingkhawai ban kynmaw ia ka Jingkhie-im pat jong ki jingmane Blei ba la pynkhih da u Judas Makabeus (164 S.K.)

jong u Kpa jong Nga. Ma-Nga bad u Kpa Ngi ia-long shitylli."

Kumta ki Ju ki la iakhar maw ban lynthem ia U. U Jisu U la phai-ktien ia ki :

"Bun ki kam babha Nga la pyni ia phi na u Kpa jong Nga ; na ka bynta kano na kito ki kam phi lynthem-maw ia Nga ?"

Ki Ju ki la jubab ia U :

"Ngim lynthem ia Me na ka bynta ka kam babha, hynrei namar ka jinghren bein-blei, bad namarba Me, haba Me long u brieve, Me pynlong Blei ia lade."

U Jisu U la phai-ktien ia ki :

"Ym shym la thoh ha ka ain jong phi : Ba Nga hi Nga la ong : phi long ki blei? Lada u khot blei ia kito ha kiba la kren ia ka ktien jong u Blei, bad ym lah ban pyndam noh ia ka Jynthoh : ia Uta ba u Kpa U la kyntang, bad la phah sha ka pyrthe, phi ia-ong : Ba U bein-blei, namar Nga la ong. Nga long u Khun jong u Blei? Lada Ngam leh ia ki kam jong u Kpa jong Nga, wat ngeit ia Nga. Hynrei lada Nga leh, wat lada phim kwah ban ngeit ia Nga, to ngeit ia ki kam: ba phin dup tip bad dup ngeit ba u Kpa U long ha Nga, bad ma-Nga ha u Kpa."

Namarkata, ki la thap-kem ia U; hynrei U la lait noh na ki kti jong ki. Bad U la leit biang sha shiliang ka Jordan sha kato ka jaka ha kaba u Ioannis u la ju pynbaptis mynshuwa : bad U la sah hangta. Te hun ki la iawan sha U, bad ki la ong :

"Shisha u Ioannis um shym la leh kam-bah eiei ruh em : hynrei baroh kat kaba u Ioannis u la ong shaphang Une, ka long ka bashisha."

Te bun ki la ngeit ha U.

5. U Jisu u phai biang sha Peria.

188. U Krist U beh ia u ksuid. Ki jingtuitsniew jong ki nongshun jong U.

Lk. 11:14-15; 17-23.

Te U dang beh noh ia u ksuid, bad uta u la long u bymnangkren. Bad haba U la pynmih noh ia uta u ksuid, uta u bymnangkren u la kren : bad ki paidbah ki la lyngngoh. Hynrei don na ki kiba la ong :

“U beh noh ia ki ksuid da u Belsebub, u rangbah jong ki ksuid.”

Ma-U pat ba U iohi ia ki jingpyrkhat jong ki, U la ong ha ki :

“Man ka hima kaba ialeh-makynti kan jot thiaw, bad ka ing kan hap halor ka ing. Te lada u soitan ruh u ieng-pyrshah ia lade hi, kumno ka hima jong u kan neh; naba phi ong ba Nga beh noh ia ki ksuid da u Belsebub? Te lada ma-Nga da u Belsebub Nga beh noh ia ki ksuid, dano ki khun jong phi pat ki beh? Kumta ki hi kin long ki nongbishar jong phi. Hynrei lada Nga, da ka shynriahti u Blei, Nga beh noh ia ki ksuid, khlem pep ka hima jong u Blei ka la wan ha phi. Haba u palwan kieng-atiar u phira ia la ing, kiei kiei baroh kiba u don, ki suk-ki-saifi. Hynrei lada wan uba kham khlaifi bad u jop ia u, un shim noh ia ki atiar jong u baroh, ha kiba u la shaniah, bad un iabynta ia ki jynlute.

Jar ubym long bad Nga, u long pyrkhat ia Nga : bad jar ubym ialum bad Nga, u pynsaphret.”

189. Ka jinglong bakhatduh jong uta u briew ka kham sniew ban ia kaba mynshuwa.

Mt. 12:43-45. Lk. 11:24-26.

“Haba u mynsiem bymkhuid u la mih noh na u briew, u iaïd lyngba ia ki jaka tyrkhong, u wad jingjahthait; bad haba um shem u ong: Ngan phai biang sha la ing na kaba nga la mih noh. Bad haba u la wan, u la shem ba la sar ia ka bad la pyn-deng-pynsien. Te u leit noh, bad u wanlam ryngkat bad u sa hynñiew ngut ki mynsiem kiba kham bymman ban ia u hi, bad ki rung bad ki shong duh hangta. Te ka jinglong bakhatduh jong uta u briew ka kylla kham sniew ban ia kaba mynshuwa. Kumta ruh kan long ia kane ka pateng bymman.”

190. Suk ka kpoh kaba la pun ia Me. Lk. 11:27-28.

Te ka la jia, katba U la dang kren ia kine kieikici, kawei ka briew napdeng uta u paidbah, ka pyrta jam ka la ong ha U :

“Suk ka kpoh kaba la pun ia Me, bad ki jymbuiñ kiba Me la buiñ.”

Hynrei U la ong :

“Kham suk kito keiñ kiba sngap ia ka ktien jong u Blei, bad kiba ri ia ka.”

191. Ka dak-ka-shin jong u Jonas, u nongïathuhlypa. Mt. 12:38-42. Lk. 11:16, 29-32.

Ynda kumta katto katne na ki Nongthoh bad ki Pharisi ki la phai-ktien ia U, ki ong :

“Ko Nonghikai, ngi kwah ban iohi na Me kawei ka dak.”

Ma-U haba U jubab, U la ong :

“Ka pateng bymman bad baklim ka wad ia ka dak : hynrei yn ym ai dak ha ka, lait tang ka dak jong u Jonas Nongïathuhlypa. Naba kumba u Jonas u la long ka dak-ka-shin ia ki Ninibe, kumta u Khun u briew ruh Un long ia kane ka pateng. Naba kumba u Jonas u la sah lai-sngi bad lai-miet ha ka kpoh jong u dohkha, kumta ruh u Khun u briew Un sah lai-sngi bad lai-miet ha ka dohnud jong ka khyndew. Ki nong-Ninibe kin ia-ïeng bishar ia kane ka pateng, bad kin pynrem ia ka, naba ki la leh pynshitom-kylla jingmut da ka jingïalap jong u Jonas. Bad hakhmih hangne uba kham khraw ban ia u Jonas. Ka syiem na shathie kan ieng bishar ia kane ka pateng, bad kan pynrem ia ka, naba ka la wan na ba kut ka pyrthei ban sngap ia ka jingstad jong u Salomon, bad hakhmih hangne uba kham khraw ban ia u Salomon.”

192. Ka khmat ka sharak jong ka met.

Lk. 11:33-36.

“Ym don u briew uba thang ia ka sharak bad uba buh ia ka ha ka jaka barieh, lymne hapoh ka pyrha : hynrei halor ka diengpynieng sharak, ba kito kiban rung hapoh, kin imat. Ka khmat ka long ka sharak jong ka met jong me. Lada ka khmat jong me ka sngur, ka met jong me baroh kan shai; hynrei lada ka jngut, ka met jong me ruh kan dum. To peit, namarkata, ba ka jingshai kaba don ha me kan ym dum. Kumta lada ka met jong me baroh ka shai bha, khlem don jingdum eiei, baroh

kan shai bha, bad kum ka sharak baphyrnai kan pynshai ia me."

193. U Krist U pynrem ia ki Pharisi bad Sadusi ha ing jong uwei u Pharisi. Lk. 11:37-4.

Te ynda U la lah kren, uwei u Pharisi u la kyrpad ia U ba Un leit bam bad u. Te haba U la rung U la shong bam. Hynrei uta u Pharisi u la sdang ban ong, da kaba pyrkhat ha lade hi, balei um shym sait shuwa ban bamja. Bad u Trai U la ong ha u :

"Phi ki Pharisi phi pynkhuid ia kaba shabar jong ka khuri bad jong ka pliang; hynrei ka hapoh jong phi ka dap da ka thombor-leh-bor bad ka popka-sang. Ko biej, hato Uta Uba la thaw ia kaba habar, Um shym la thaw ia kaba hapoh ruh de? Shisha keiñ ia ka batam, to ai isynei; bad hakhmih, baroh ki long ha phi ki bakhuid. Hynrei kordit ia phi, ko Pharisi, kiba ai shiphew¹ na u pudina, bad na u sudab bad na u jhur baroh. bad phi ryngkang ia ka jingbishar bad ia ka jingieid jong u Blei. Hynrei ia kine kiei-kiei la dei ban leh bad ia kito kiwei pat ym dei ban iehnoh. Kordit ia phi, ko Pharisi, naba phi ieid ia ki jaka-shong ba hakhmat ha ki Sinagog bad ia ki jingkhublei ha ki jaka-iew. Kordit ia phi, naba phi long kum

(1) Katkum ka aiñ, don ki khajna ba dei ban siew na ka bynta ki lyngdoh, ki Lebi bad ki baduk. Kine ki khajna ki long shi bynta na ka ro bynta jong ka jingmih jong u kew, ka waifi bad ka umphniang bad ka jingroi jong ki jingri-jingdup. Hynrei ki Pharisi ki kwah ban siew ia kane ka shiphew wat na ki jhur ruh.

ki jyntep kibym paw, bad ki briew kiba ïaid nalor, kim tip eiei."

Te uwei na ki 'riewsaid u jubab, u la ong ha U :

"Ko Nonghikai, da kaba ong ïa kane, Me bein ïa ngi ruh de."

Hynrei U pat U la ong :

"Kordit ïa phi ruh, ko 'riewsaid, naba phi pynkit ha ki briew ïa ki jynkit-jynbah kiba kim lah ban kit ban bah, bad phi hi pat phim pyndei ïa kita ki jynkit tang da la ka shynriah'ti ruh. Kordit ïa phi kiba tei ïa ki mot jyntep jong ki nongiathuhlypa : bad ki kpa jong phi ki la pyniap ïa ki. Da shisha, phi sakhi ba phi mynjur ïa ki jingleh jong ki kpa jong phi : naba maki ki la pyniap ia ki, phi pat phi tei ïa ki jyntep jong ki. Na kane ka daw ka jingstad jong u Blei ruh ka la ong : Ngan phah sha ki ïa 'ki nongiathuhlypa bad ki Apostol, bad don na kita ïa kiba kin pyniap, bad ban bein; ba ïa ka snam jong ki nongiathuhlypa baroh, kaba la pynmih naduh ba seng ïa ka pyrthei, yn dawa na kane ka pateng, naduh ka snam jong u Abel haduh ka snam jong u Sakharias ïa uba la pyniap hapdeng ka duwan bad ka tempel. Hooïd kein, Nga ong ha phi, yn dawa na kane ka pateng. Kordit ïa phi, ko 'riewsaid, naba phi la shim noh ïa u shabi jong ka jingnang-jingtip: phi hi phim shym pat rung hapoh, bad ïa kito kiba la iarung, phi mana."

Te haba U la lah kren ha ki ïa kine kiei-kiei, ki Pharisi bad ki 'riewsaid ki la sdang ban ïai-ban tyng-eh bad ban pynkren ïa U shaphang bun kiei-kiei, da kaba ap-thap ïa U, bad da kaba thap kemdaw eiei na ka shyntur jong U, ban dup ioh mudui ïa U.

194. U thiat jong ki Pharisi, ne ka jingarsap jong ki.

Lk. 12:1-12.

Te haba bun bah ki paidbah-paidsan ki la ialum haduh ba ki la kum ia-iuh paraki hi, U la sdang ban ong ha la ki Synran :

“To sumar na u thiat jong ki Pharisi, uba long ka jingarsap. Namar ym don eiei kaba la tap, kaba yn ym pynpaw; lymne kaba la buhrieh, kaba yn ym tip. Naba kat ia kaba phi la kren ha ka badum yn ong ha ka bashai, bad ia kaba phi kren ha ki shkor hapoh ki kamra, yn ialap na tnum-ing. Bad Nga ong ha phi ki lok jong Nga: Wat khaweit ia kito kiba pyniap ia ka met, bad hadien kata kim don eiei shuh kaba ki lah ban leh. Hynrei Ngan pyni ia phi iano ba phi dei ban tieng: to sheptieng ia uta uba ynda u la lah pyniap, u don bor ban bret sha dujok. Hooid keif, Nga ong ha phi, to sheptieng ia u. Hato ym die arpeisa san tylli ki sim-ing, bad ia kawei ruh na ki ym shym klet ha khmat u Blei? Hynrei wat ia u 'niuh-khlieh jong phi baroh la fiiew. Namarkata, wat tieng; phi long kham kor ban ia shibun ki sim-ing. Te Nga ong ha phi: baroh kat uba phla ia Nga hakhmat ki briew, u Khun jong u briew ruh Un phla ia u hakhmat ki Angel jong u Blei; hynrei ia uta uban len ia Nga ha khmat ki briew, yn len hakhmat ki Angel jong u Blei. Bad baroh kat uba kren ka ktien pyrshah ia u Khun jong u briew, yn map ia u; hynrei ia uta uban beif-blei pyrshah ia u Mynsiem Bakhuid, yn ym map. Te haba kin ialam ia phi sha ki Sinagog, bad sha ki

nongbishar bad ki nongsynshar, wat khuslai kumno ne aïu ba phin jubab ne aïu phin ong. Namar u Mynsiem Bakhuid Un hikai ia phi ha kata ka por, aïu ba phi dei ban ong."

195. Sumar na ka jingkhwan-lalot. Ka Pharshi shaphang u 'riewspah babiej. *Lk. 12:13-21.*

Te uwei na kita ki paidbah u la ong ha U :

"Ko Nonghikai, to ong ia u para jong nga ba un iasam noh bad nga ia ka jingiohpateng."

Hynrei U la ong ia u :

"Ko briew, mano ba la thung nongbishar ne nongpynsam ia Nga halor jong phi?"

U la ong ruh ha ki :

"To peit bad to sumar na ka jingkhwan-lalot baroh; naba ka jingim u briew kam shong satia ha ka jingbun hai-hai jong kiei-kiei kiba u don."

Te U la kren ha ki kawei ka pharshi; U ong :

"Ka bri jong uwei u briew bariewspah ka la sei-soh kyrhai; bad u la pyrkhat ha lade, u ong : "Kumno ngan leh, naba ngam don jaka ban lum ia u soh jong nga?" Bad u la ong : 'Ngan leh kumne : ngan pra noh ia ki thiar jong nga bad ngan tei da kiba kham khraw : te hangta ngan lum baroh ia ki jingioh-jingmih bad ia kiei-kiei jong nga. Te ngan ong ha ka mynsiem la jong : Ko mynsiem, pha don kyrhai kiei-kiei ba la buh lypa na ka bynta bun-bun snem ; to shongsuk, to bam, to dih, to leh sngewbha.' Hynrei u Blei U la ong ia u : 'Ko biej, mynta ka miet yn pan noh na me ia ka mynsiem jong me; te kito kiei kiei kiba me la

khreh kin long ki jongno? Kumta u long jar uba kynshew spah ia lade, bad ubym riewspah ha u Blei."

196. Wat diaw na ka bynta la ka jingim.

Lk. 12:22-34.

Bad U la ong ha la ki synran :

"Namarkata, Nga ong ha phi, wat diaw na ka bynta la ka jingim, da-ei ba phin bam : lymne na ka bynta la ka met, daei ba phin kup phin sem. Ka jingim ka kham kor ban ia ka jynbam, bad ka met ban ia ka kup-ka-sem. To peit-thuh ia ki tyng-ab, naba kim iabet, lymne ia-ot, kim don ing-kynshew lymne thiar, bad u Blei U bsa ia ki. Jin katno phi kham kor maphi ban ia ki! Uno ruh na phi da kaba pyrkhat, u lah ban pyntam shipruh ia la ka rynieng? To peit-thuh ia ki 'tiew-lili, kumno ki san : kim trei lymne kim thir; hynrei Nga ong ha phi, wat u Salomon ha ka burom iong u baroh, um shym la kup kum uwei n lada ia u phlang uba mynta ka sngi lyngkha bad lashai la bret noh ha ka l u Blei U pynkup kumta, jin katno lei-le barit jingngeit? Bad maphi wat iawad bam ne da-ei ban dih, bad wat kiew-'lang-tylli : naba ia kine baroh, ki jentil ki wad. Hynrei u Kpa jong phi U tip ba phi donkam ia kine. Hooïd keiñ, to wad shuwa ia ka hima jong u Blei, bad ia ka hok jong U ; te ia kine baroh yn sa aitam lang ha phi. Wat khaweit, ko kynhun barit, naba u Kpa jong phi U sngewbha ban ai ha phi ia ka hima. To die ia kaba phi don, bad to ai

isynei. To shna ia lade ki muna kiban ym rim, ka khuiñ ha bneng kaban ym duna, sha kaba u nongtuh um wan hajan, lymne ka khñiang kam pynjot. Naba ha kaba ka spah jong phi ka don, hangta ka dohnud jong phi ruh kan don."

197. Ka pharshi shaphang ki shakri basharai.

Lk. 12:35-40.

"Ai ba ki syngkai jong phi kin long kiba la panpoh, bad ki sharak kiba meh bha ha ki kti jong phi. Maphi pat, kum ki briew kiba khmih-lynti ia la u kynrad, haba un wan-phai na ka jingkyntiewkurim; ba haba u wan bad u tied, kin plie ia u shisyndon. Suk kito ki shakri kiba haba u kynrad u wan, un shem ba ki dang sharai. Shisha Nga ong ha phi ba un panpoh ia lade, bad un pynshongbam ia ki, bad haba un iaïd, un shakri ia ki. Bad lada un wan ha ka jingpeitngor ka ba-ar, ne lada un wan ha ka jingpeitngor ka balai, bad un lap ia ki kumta, suk kito ki shakri. Hynrei to tip ia kane ba lada u trai-ing u tip thikna ia ka por ba u nongtuh un wan, khlem pep un jin da la phira bad un ym da shah ba yn prat ia ka ing jong u. Phi ruh to long kiba la khreh : naba ha ka por kaba phim pyrkhat, u Khun u briew U wan."

198. Ka Pharshi shaphang u Sordar ba lah ban shaniah bad u shakri bym lah ban shaniah.

Luk. 12:41-48,

Te u Petrus u la ong ha U :

"Ko Trai, Me kren ha ngi ia kane ka pharsht ne ha ki de baroh?"

Bad u Trai U la ong :

"Uno, me tharai, u long u Sordar ba lah ban shaniah bad ba-usiar, ia uba u kynrad jong u, u buh halor ka ing-ka-sem la jong ba un dup ai ha ki ha ka por babiang ia ka bynta jong u kew? Suk uto u shakri uba, haba u kynrad jong u un wan, un shem ba u leh kumta. Hynrei lada u shakri un ong ha la ka dohnud : 'U kynrad jong nga u tud ban wan' bad un sdang ban shoh ia ki shakri, shynrang bad kynthei, ban bam, ban dih bad ban buaid ruh; u kynrad jong uta u shakri un wan ha ka sngi ha um khmih-lynti, bad ha ka por ba um tip, un pynkynriah ia u bad un buh ia ka bynta jong u bad ki bymngait. Bad ia uta u shakri uba la tip ia ka jingkwah jong u kynrad la jong, bad um shym lah pynkhreh-pynkhrum, bad un shym leh katkum ka jingkwah jong u, yn sympat bun thri; hynrei ia uta ubym shym tip, bad uba la leh ia kaba shonghok ban shah sympat, yn sympat khyn-diat thri. Bad ha uno uno ha uba la ai shibun, na u yn dawa shibun; bad ha uba ki la aiti shibun, na u kin pan shibun."

199. Ki jingkren bapher. Ki dak-ki-shin jong ka por. *Lk. 12:49-59.*

"Nga la wan ban wiang-ding ia ka pyrthei : bad aiu Ngan kwah lait-tang ba kan klang? Nga don ka baptisma da kaba yn pynbaptis ia Nga : bad katno Nga sngewjyrwit-jyrwat katba ym pat lah pyndep ia ka? Phi tharai ba Nga la wan ban ai ia ka jingsuk ha ka pyrthei? Nga iathuh ha phi : em, hynrei ia ka jingiapait. Naba naduh mynta kin don

sanngut kiba iapait ha kawei ka ing; laingut pyrshah ia ki arngut, bad arngut pyrshah ia ki laingut: u kpa pyrshah ia u khun, bad u khun pyrshah ia la u kpa, ka kmie pyrshah ia ka khun, bad ka khun pyrshah ia ka kmie, ka kiaw-kurim pyrshah ia la ka pyrsa-kurim, bad ka pyrsa-kurim pyrshah ia la ka kiaw-kurim."

Te ha ki paidbah ruh U la ong :

"Haba phi iohi ia u lyoh ba u mih na sepngi, phi ong shisyndon : 'U 'lappraw u wan'; ka jia ruh kumta. Bad haba beh ka lyer na shaphang shathie, phi ong : 'Kan shit kyr-ang'; bad ka jia ruh. Arsap, phi tip ban peit-thuh ia ka khmat jong ka bneng bad jong ka ram-ew, hynrei kumno phim peit-thuh ia kane ka por pat? Bad balei maphi hi da lade phim bishar ia kata ka bahok? Te katba me dang leit bad la u nongshun sha u nongsynshar, to pyrshang katba me dang don ha lynti ban lait noh na u, ioh u ring ia me sha u nongbishar, bad uta u nongbishar, u aiti ia me ha u nongapbyndi, bad u nongapbyndi u thep ia me hapoh phatok. Nga ong ha me, men ym mih noh nangta, tat haduh ba men da siew ia ka shiteng-peisa bakhatduh eh."

200. Ha Peria : Ka jingdonkam jong ka jingkylla jingmut ; Ka Pharshi shaphang u Diengdumbur balyngki. *Lk. 13:1-9.*

Te hamar kata hi ka por, la don na kito kiba la iadon hangta kiba iathuh ha U shaphang ki Galileia, kiba u Pilatus u la khleh lang ia ka snam

jong ki bad ki jingkn̄ia jong ki. Te U phai-ktien. U la ong ha ki :

"Phi tharai ba kine ki Galileïa ki kham pop ban ïa ki Galileïa baroh, namarba ki la shah ïa kine ki-ei-kiei? Nga ong ha phi, em; hynrei lymda phi leh shitom-kylla-jingmut, maphi baroh phin jot kumjuh. Ne kito ki khatphra ngut, ha kiba la khyllern ka kut ha Siloam, bad kaba la pyniap ïa ki; phi tharai ba kito ruh ki la kit-pop kham palat ban ïa ki briew baroh kiba shong ha Jerusalem? Nga ong ha phi, em; hynrei lymda phi leh shitom kylla-jingmut, maphi baroh phin jot kumjuh."

Te U la kren ïa kane ka pharshi :

"Uwei u briew u la phah thung ha la ka bri-soh ïa uwei u diengsoh-dumbur, bad u la wan wad soh ha u, hynrei um shem eiei. Te u la ong ha u nongsumar brisoh: 'Hakhmih, lai snem nga wan wad soh na une u dieng-dumbur, bad ngam shem satia. To khet noh ïa u, namarkata; balei un shu pynwit-ei ïa ka khyndew?' U pat u jubab, u la ong ha u ; 'Ko Trai, to ïeh ïa u sa ha kane ka snem ruh, tat haduh ngan da tih sawdong ïa u bad ngan da ai-sboh. Te lada un sei-soh, ñiuma; lymda kumta, hadien men sa khet noh ïa u."

201. Ka nongpang.

Lk. 13:10-17.

Te ka la jia haba u dang hikai ha ki Sinagog jong ki ha ka Sngi Sabbath. Bad hakhmih kawei ka briew, kaba la don u mynsiem jingkhrew jin khatphrah snem, bad kaba la dor ryngkdung, khlem lah satia ban khmied shaneng. Haba u Jisu U la ïohi ïa ka, U la khot ïa ka sha lade, bad U la ong ha ka:

“Ko kynthei, la pyllait ia pha na ka jingkhrew jong pha.”

Te U la buh ia la ki kti halor jong ka, bad shi-syndon ka la beit, bad ka la pyndon burom ia u Blei. U rangbah sinagog pat (ba u sngewbitar ba u Jisu U la pynkoit ha ka sabbat,) u phai-ktien, u la ong ha uta u paidbah :

“Don hynriew sngi, ha kiba dei ban trei ban ktah. Namarkata, to wan ha kito ba yn pynkoit-pynkhiah, ym ha ka sngi Sabbat.”

Hynrei u Trai U la phaiktien ia u, U la ong :

“Arsap, uno na phi ha ka Sabbat ubym pyllait na sem ia la u masi, ne ka kada bad ubym ialam dih-um? Te ia kane ka khun jong u Abraham, ia kaba u soitan u la teh la khum, hakhmih jin khat-phra snem, hato ym dei ban pyllait noh na kane ka teh-ka-khum ha ka sngi Sabbat?”

Te haba U la kren ia kine kiei kiei, baroh ki nongshun jong U ki la sngewlehraiñ : bad u paidbah baroh u la iakmen na ka bynta kiei kiei baroh kiba U la leh pyndon-burom.

202. Ka Pharshi shaphang u symbai Tyrso bad u Thiat.
Lk. 13:18-21.

Kumta U la ong :

“Ia-ei ka hima u Blei ka syriem, bad kaei Ngan pynsyriem ia ka? ka syriem ia u phniang symbai tyrso, ia uba u briew haba u la shim, u la bet ha kper la jong; te u la mih, bad u kylla-long u diengbah; bad ki sim-bneng ki la shong-tngen ha ki tnat jong u.”

Te U la ong biang :

“Bad ei ngan pynsyriem ia ka hima jong u Blei? Ka syriem ia u thiat, uba ka briew ka la shim bad ka la btep hapoh lai pyrha u 'purew, haduh ban da sieb lut baroh khoit.”

6. Ka jingleit sha Judia.

203. Ha ka lynti sha Jerusalem. Kiba la jied.

Luk. 13:23-30.

Te U la iaid lyngba ia ki 'nongbah bad ki 'nongheh, U hikai, bad U leit sha Jerusalem. Bad uwei u la ong ha U :

“Ko Trai, hato ki khyndiat kito kiba laht-*im*?”

Ma-U pat U la ong ha ki :

“To ialeh ban rung lyngba ia ka khyrdop bahim; naba bun, Nga ong ha phi, ki iawad ban rung bad kim lah. Hynrei haba u trai-*ing* u la rung, bad u la khang ia ka jynkhang, phin sdang ban ieng shabar, bad ban tied ia ka jynkhang da kaba ong : ‘Ko Trai, to *plie* ia ngi’; un pat u phai-*ktien*, un ong ha phi : ‘Phi nangno? Ngam ithuh ia phi.’ Te phin iasdang ban ong : ‘Ngi la iabam bad iadih ha khmat jong me, bad me la hikai ha ki surok-bah jong ngi.’ Bad un ong ha phi : ‘Phi nangno? ngam ithuh ia phi; to leit noh na nga, phi kiba leh bymman.’

“Hangta kan don ka jinglynⁿiar bad ka jingkyryiat-bniat haba phin iohi ia u Abraham bad u Isaak bad u Jakob, bad ia ki nongiathuhlypa baroh

ha ka hima jong u Blei, ia phi pat yn beh noh shabar. Kin iawan ruh na mihngi bad sepngi, bad shatei bad shathie, bad kin iashong kynjai ha ka hima jong u Blei. Bad hakhmih, ki khatduh kito kiban long shuwa, bad ki shuwa kito kiban long khatduh."

204. Hajan Jerusalem. Ki jingbyrngem jong u Herod. "Jerusalem, Jerusalem!"

Lk. 13:31-35.

Ha kata hi ka sngi, katto katne na ki Phari-si, ki la wan, ki iaong ha U :

"To mih bad to leit noh nangne; naba u Herod u thmu ban pyniap ia Me."

Bad U la ong ha ki :

"Khie leit iathuh ha uta u myrsiang : Hakhmih Nga beh noh ia ki ksuid, bad Nga pynkoit mynta bad lashai, bad ha ka sngi ka balai yn pynjanai ia Nga. La jar katta ruh, Nga dei ban iaid mynta bad lashai bad ha ka sngi kaba bud; naba kam lah ban long ba u nongiathuhlypa un iap shabar Jerusalem. A Jerusalem! Jerusalem! Kaba pyniap ia ki nongiathuhlypa, bad kaba lynthem-maw ia kito kiba la phah ha pha; katno sien Nga la kwah ban kdup ia ki khun jong pha kum ka sim ia la ki khun hapoh thapniang, bad pham treh! Hakhmih, ia ka ing jong phi yn ieh-noh kynjah ha phi. Bad Nga ong ha phi ba phin ym iohi ia Nga tat haduh ban poi ba phin ong : Suk Uta Uba wan ha ka kyrteng jong u Trai."

- 205. Ha Jerikho : u Krist U pynkoit ia u nongpang
ha ing jong u Pharisi. *Luk. 14:1-6.***

Bad ka la jia, haba u Jisu U la rung ha ing jong uwei na ki rangbah Pharisi, ha ka Sngi Sabbat, ban bam jynbam, bad ki la iathap ia U. Hakhmih ruh la don hakhmat jong U uwei u briew uba pang at-top. Bad u Jisu U kem-ktien, U la kren ha ki 'riewsaid bad ki Pharisi, U ong :

“Ka bit ban pynkoit ha ka Sngi Sabbat?”

Hynrei ki la sngap la ka sngap. Ma-U pat haba U la shim ia u, U la pynkoit ia u, bad U la phah noh ia u. Bad U phai-ktien ia ki, U la ong :

“Uno na phi uba don u kada ne u masi ba la liat hapoh thliew, bad un ym sei ia u shisyndon ha ka sngi Sabbat?”

Bad kim shym la lah jubab ha U ia kine kiei-kiei.

- 206. Ka jingkyntu sha ka jingsngewrit bad ka jing-
ieid. *Luk. 14:7-14.***

Te U la kren kawei ka pharshi ha kita ia kiba la khot-sngewbha, U da kynthoh kumno ba ki ia-jied ia ki jaka-shong-bam ba hakhmat, U ong ha ki :

“Haba khot-sngewbha ia me sha ka jingkhawai shongkurim, wat shong ha ka jaka shong ba ha khmat, ba ioh don kumno-kumno uba kham don burom ban ia me, ia uba u la khot-sngewbha, bad uta uba la khot-sngewbha ia me bad ia u, u wan bad u ong ha me : ‘Ai jaka ia une’; ynda kumta men sdang da kaba sngewlehraifi ban shim ia ka

jaka bakhatduh tam. Hynrei haba la khotsngewbha ïa me, to leit, to shong ha ka jaka bakhatduh tam; ba haba uta uba la wer-sngewbha ïa me un wan, un dup ong ha me: 'Ko lok, to kiew kham shaneng.' Kumta men don-burom hakhmat kita baroh kiba ïashong-bam ryngkat: naba jar uba pynkhraw ïa lade, yn pynrit; bad jar uba pynrit ïa lade yn pynkhraw."

Bad U la kren ruh ha uta uba la khot sngewbha ïa U hi :

"Haba me khreh ïa ka bam-khawai sngi ne miet, wat wer ïa la ki lok, ne ïa la ki hymmen-para, ne ïa la ki kur-ki-jait, ne ïa la ki para-marjan-marpa bariewspah, ïoh ba ki ruh kin ïawer kylliang ïa me, bad kan long ka jingsiew-kylliang ïa me. Hynrei haba me pynlong ka jingkhawai, khot ïa ki baduk-bakyrduh, ki dkut-kti-dkut-kjat, ki dkoh-ki-dkia, bad ki 'matlah'-matpei. Te men long u basuk, namar kim don eiei ruh da kaba kin siew-kylliang ïa me : naba yn siew-kylliang ïa me ha ka jingmihpat jong ki bahok."

207. Ka pharshi shaphang ka jingkhawai-miet.

Luk. 14:15-24.

Haba ïohsngew ïa kine kiei-kiei, uwei na kita kiha ïashongbam ryngkat, u la ong ha U :

"Suk uta uban bam jynbam ha ka hima jong u Blei."

U pat U la ong ha u :

"Uwei u briew u la pynlong ka bam-khawai-miet ka bakhraw, bad u la wer bun ngut. Bad u la phah ïa la u shakri ha ka por jong kata ka bam-

khawai-miet ban ong ia kita kiba u la khot sngew-bha ba kin wan, naba la khreh ia kiei kiei baroh Bad baroh ki la sdang shisyndon ban kren-da. U banyngkong u la ong ha u: 'Nga la thied ka lyngkha, bad nga dei ban leit jngoh ia ka; nga kyrpad ia me, wat sngewsih ia nga.' Bad uwei pat u la ong: 'Nga la thied san jur ki masi bad nga leit pyrshang ia ki; nga kyrpad ia me, wat sngewsih ia nga.' Bad uwei pat u la ong: "Nga iapoikha-poiman bad ka briew, te namarkata, ngam lah ban wan.' Te uta u shakri haba u la leit phai noh, u la iathuh ia kine kiei-kiei ha la u kynrad. Te uta u trai-ing da kaba bitar u la ong ha la u shakri: 'Khie bran-bran sha ki lynti-bah bad ki lynti-rit jong ka nongbah, bad to wanlam hangne ia ki baduk-batoi bad ki dkut-kti dkut-kjat, bad ki 'matlah-matpei.' Bad uta u shakri u la ong: "Ko kynrad, la leh kumba me la hukum, hynrei dang don jaka.' Te uta u kynrad u la ong ha u shakri: 'Khie leit sha ki lynti bad ki jynker; bad to pynbor ia ki ban wan rung, ba ka ing jong nga kan dap mam. Hynrei nga ong ha phi, ba ym don uwei ruh na kito ki briew kiba nga la khot, uban ioh mad ia ka khawai-miet jong nga.' '

- 208. Ban bud ia u Krist dei ban kyntait lut baroh.**
Ka pharshi shaphang ka kut bad shaphang
u syiem. *Lk. 14:25-33.*

Te bun ki paidbah ki la leit ryngkat bad U : bad haba U la phai U la ong ha ki:

"Lada uno-uno u wan ha Nga, bad um isih ia la u kpa, bad ka kmie, bad ka tnga, bad ki khun, bad ki hymmen-para shynrang bad kynthai, wat ia

la ka jingim ruh, um lah ban long u synran jong Nga. Bad jar ubym bah ia ka diengphna la jong, bad bud nadien jong Nga, um lah ban long u synran jong Nga. Naba uno na phi uba mut ban tei ia ka kut, ubym shong shuwa ban kheifn ban diah ia ka lut-ka-sep ka badonkam, la u don haduh ba kan da dep? Ioh-ba, ynda u la seng ia ka nongrim bad um lah ban pyndep, baroh kito kiba iohi kin sdang ban rkhe-beifn ia u, kin ia-ong : 'Ba une u briew u la sdang ban tei, bad um lah ban pyndep.' Ne uno u syiem haba un sa leit ialeh-thma pyrshah ia uwei pat u syiem, ubym shong pyrkhath shuwa, la u lah da ki shiphew hajar ban ia-aireng ia uta uba wan sha u da ki arphew hajar? Lymne, katba uta uwei u dang ha jngai, u phah ia ki nonglamktien, u pan ia ki dah-ki-dong iasuk. Kumta ruh, uno-uno na phi ubym kyntait noh ia kaba u don baroh, um lah ban long u synran jong Nga."

209. Ka pharshi shaphang ka mluh. Lk. 14:34-35.

"Ka mluh ka bha. Hynrei lada ka mluh ka blad noh, daei yn pynbang pat ia ka? Kam myntoi shuh ia ka khyndew, lymne ia ka thliew-sboh, tang ban shu bret noh. Uba don ki shkor ban sngap, to un shahshkor.

210. Ka pharshi shaphang ka 'langbrot ba la jah bad ka drakhma ba la jah. Lk. 15:1-10.

Te ki nongap-khrong bad ki nongpop ki la tur hajan jong U ban sngap ia U. Bad ki Pharisi bad ki Nongthoh ki la iakhfiium, ki ong :



*"To iakmen bad Nga, naba Nga la shem ia
ka 'langbrot jong Nga kaba la jah."*

"Une u briew U pdiang ia ki nongpop, bad U iabam lang bad ki."

Te U la kren ha ki ia kane ka pharshi, U ong :

"Uno na phi uba don shispah tylli ki 'langbrot, bad lada un jah noh kawei na ki, un ym iehnoh ha lum ia ki khyndai-phew khyndai, bad leit wad ia kata kaba la jah, haduh ba un da shem ia ka? Bad ynda u la shem ia ka, u bah halor ki tyrpeng la jong, u da kmen ; bad haba u la poi ha ing, u khot ia ki lok-ki-jor bad ki marjan-marpa, u ong ha ki : 'To iakmen bad nga, naba nga la shem ia ka 'langbrot jong nga kaba la jah.' Nga ong ha phi, kumjuh ruh kan don ka jingkmén ha bneng na ka bynta uwei u nongpop uba leh pynshitom-kylla-jingmut, ban ia na ka bynta ki khyndaiphew khyndai ki bahok, kibym donkam ia ka jinglehpynshitom kylla-jingmut. Ne kano ka briew kaba don shiphew drakhma, lada ka jah noh shi-drakhma, ¹ kaban ym thang ia ka sharak bad sar ia ka ing bad wad bniah haduh ba kan da shem? Bad haba ka la shem, ka khot lang ia ki lok-ki-jor bad ki marjan-marpa, ka ong : 'To iakmen bad nga, naba nga la shem ia ka drakhma kaba nga la jah?' Kumta Nga ong ha phi, kan don ka jingkmén hakhmat ki Angel jong u Blei na ka bynta uwei u nongpop uba leh pynshitom-kylla-jingmut."

211. Ka pharshi shaphang u khun pynsyrrwa.

Lk. 15:11-32.

U la ong ruh :

"Uwei u briew u la don arngut ki khun-shynrang; bad uba kham rit na ki u la ong ha u kpa :

(1) Kumba shi-anna.

'Ko pa, ai noh ha nga ïa ka bynta jong ka spah-ka-phew, kaba nga dei ban ïoh.' Te u la bynta ha ki ïa ka spah. Khyndiat sngi hadien kata, uta u khun uba kham rit u la lum la lang baroh, u la mih-bak u la leit sha ka ri bajngai, bad hangta u la pynsyrwa ïa la ka spah da kaba im lut-phut. Bad ynda u la pynlut khoit baroh, la jia ka 'nem-sniew ka bajur ha kata ka ri, bad u hi ruh u la uwei na ki trai-shnong jong kata ka ri. Bad uta la sdang ban kyrduh. Te u la leit, bad u la snoh ha phah ïa u sha la ka lyngkha ba un ap sniang. Bad u la kwah ban pynkdang ïa la ka kpoh da u skop Hynrei haba u la kie-tip-briew pat, u la ong : ba bam kita ki sniang, te ym don ba ai ïa u. 'Katno ki nongbylla ha ïng u kpa jong nga ki pahuh-pahai ka bam-ka-sa. bad nga pat hangne nga ïap-thngan! Ngan ïeng joit bad ngan leit sha la u kpa, bad ngan ong ha u: 'Ko pa, nga la leh pop pyrshah ïa ka bneng bad hakhmat jong me : ngam dawa shuh ba yn khot u khun jong me : to pynlong ïa nga kum uwei na ki nongbylla jong me.' Te haba u la ïeng joit u la wan sha la u kpa. Katha u dang jngai eh, u kpa u la ïohi ïa u, bad u la sngewsynei, bad haba u la mareh, u la dem ha ka ryndang jong u. bad u la doh ïa u. Bad uta u khun u la ong ha u : 'Ko pa, nga la leh pop ïa ka bneng bad hakhmat jong me; ngam dawa shuh ba yn khot u khun jong me.' U kpa pat u la ong ha la ki shakri : Kloi, wanlam ïa ka jaiñkup bakordor tam, bad to pynkup ïa u, bad to pyndeng ïa ka sahti ha ka kti jong u, bad to pynphong ïa ki juti ha ki kjat jong u, bad to wanlam ïa u khun-masi ba la pynsgaid, bad to pynïap ïa u, bad to ngin ïabam bad ngin ïaleh-kmen, naba une u khun jong

nga, u la iap, bad u la im pat; u la jah, bad la shem biang. Kumta ki la sdang ban ialehkmen. Hynrei u khun nyngkong jong u, u la don ha lyngkha; te ynda u la wan bad la poi hajan ing, u la iöhsngew ia ka put-ka-tem bad ka shad-ka-kmen: bad u la khot ia uwei na ki shakri bad u la kylli, ki mut aüu kine kiei-kiei. Bad uta u la ong ha u: 'U para jong me u la wan, bad u kpa jong me u la pyniap ia u khun masi ba la pynsngaid, naba u la iöhpdiang pat ia u, u bakoit-bakhiah.' Te u la bitar bad um treh rung. Kumta u kpa jong u u la mih, bad u la sdang ban khroh ia u. U pat u la phai-ktien bad u la ong ha la u kpa: 'Khmihi, la katta snem nga la shakri ia me, bad ngam ju iaid palat ia ka hukum jong me, bad mem ju ai ia nga wat i khunblang ba ngan iöh ialehkmen bad la ki lok. Hynrei tang shu wan une u khun jong me, uba la bam-duh ia la ka spah bad ki nuti, me pyniap na ka bynta jong u ia u khunmasi ba la pynsngaid.' U pat u la ong ha u: 'Ko khun, borabor me don ryngkat bad nga, bad baroh kaba nga don ka long ka jong me. Kumta ka dei ba ngin lehkmén bad lehsngewbha, naba une u para jong me u la iap, bad u la im pat; u la jah, bad la shem biang."

212. Ka pharshi shaphang u sordar bvmhok.

Lk. 16:1-13.

Te U la ong ruh ha la ki synran :

"La don uwei u briew u bariewspah, uba la don uwei u sordar uba la shah-mudui ha u, ba u la pynsyrwa ia kiei-kiei ki jong u. Te u la khot ia u bad

u la ong ha u : 'Kaei kane ba nga iöhsngew sha-phang jong me? To ai jingkheĩn ia ka kam-sordar jong me; namar mynta mem lah shuh ban trei sordar.' Kumta uta u sordar u la ong ha lade : 'Kumno ngan leh, ba u kynrad jong nga u knieh noh na nga ia ka kam sordar? Ban puh khyndew, ngam lah : ban khrong, nga lehraiñ. Nga tip kumno ngan leh, ba haba yn bidai noh ia nga na ka kam-sordar, kin dup khot ia nga ha ki ing jong ki.' Kumta ynda u la khot ia uwei-pa-uwei u nongkitram jong u kynrad jong u, u la ong ha u banyngkong : 'Katno me kitram na u kynrad jong nga?' Bad u la ong ha u : Shispah mon ka umphniang.' Te u la ong ha u : 'To shim ia la ka kot-jymma, to shong kloĩ, bad to thoh sanphew.' Nangta u la ong sa ha uwei pat : 'Me pat, katno me kitram?' U la jubab : 'Shispah mon u kew.' U la ong ha u : 'To shim ia ka kot-jymma jong me, bad to thoh phraphew.' Te u kynrad u la iaroh ia uta u sordar bymhok, namar u la leh usiar : naba ki khun jong kane ka pyrthei ki kham usiar ban ia ki khun jong ka jingshai, ha ka pateng la jong. Nga ruh Nga ong ha phi : 'To pynithuh lok ia lade da ka spah bymhok : ba, haba phin poi ha ka duh-ka-tan, kin khot ia phi ha ki dara bamjukut. Uta ha uba lah ban shaniah ia kaba khyndiat, u long uba lah ban shaniah ia kaba bun ruh : bad uta uba long bymhok ha kaba khyndiat, u long bymhok ha kaba bun ruh. Te kumta, lada phim shym la long kiba lah ban shaniah ha ka spah bymhok, mano ban shaniah ia phi ha ka spah bashisha? Bad lada phim shym la long uba lah ban shaniah ha ka jong uwei pat, mano ban ai ha phi ia kaba long ka jong phi? Ym don shakri uba lah ban shakri ar-

ngut ki kynrad: naba un isih ia uwei, bad un ieid ia uwei pat; lane un snoh ha uwei bad un ibeiñ ia uwei pat. Phim lah ban shakri ia u Blei bad ia ka spah."

213. U kynteit ia ki Pharisi bakhwan. Lk. 16:14-18.

Hynrei ki Pharisi kiba khwan ki la iöhsngew ia kine kiei-kiei, bad ki la rkhe beñ ia U. Bad U la ong ha ki :

"Phi dei kito kiba pynksan lade hakhmat ki briew, hynrei u Blei U ithuh ia ki dohnud jong phi; naba kata kaba ñiewkor ha ki briew, ka long ka jingijli hakhmat u Blei. Ka aiñ bad ki nong-iathuhlypa, haduh u Ioannis : naduh kata ka por ia ka hima jong u Blei la ialap, bad man u briew u leh jubor-justi ia ka. Hynrei ka kham jem ia ka bneng bad ka khyndew ban duh noh, ban ia kaba hap noh shi-thoh tiak na ka aiñ. Jar uba pyllait noh ia la ka tnga, bad u leit da kawei pat, u klim, bad uto uba leit ia kata kaba la pyllait na u tnga, u klim."

214. Ka pharshi shaphang u riewspah bad u Lasarus. Lk. 16:19-31.

"La don uwei u briew bariewspah; uba la kup la sem da ki jaiñ-saw syngyiang bad ki jaiñ-ni balieh; bad la bam pahuh-pahai man la ka sngi. La don ruh uwei u nongkhrong uba kyrteng u Lasarus, uba thiah ha phalor jong u, uba dap da ka prum suda, u kwah ban kdang da ki lyngkhot-lyngkhai kiba hap na ka miej jong uta u riewspah,

bad ym don ba ai ia u ; naler-kata, ki ksew ruh ki wan bad ki jliah ia kita ki prum jong u. Te ka la jia ba uta u nongkhrong u la iap noh bad la bah da ki Angel sha ka shadem jong u Abraham. Uta u 'riewspah ruh u la iap, bad la tep ia u ha dujok. Bad da kaba khmied ia la ki khmat, haba u don ha ka jingkordit, u la iohi na jngai ia u Abraham, bad ia u Lasarus ha ka shadem jong u, te u la pyrta bad u la ong: 'Ko pa Abraham, to isynei ia nga, bad to phah ia u Lasarus ba un wieh ha ka um ia ka khmut shyhriah'ti jong u, ba un pynpjah ia u thylliej jong nga, naba nga kordit ha kane ka thylliej-ding.' Te u Abraham u la ong ha u : 'Ko khun, to kynmaw ba me la ioh kiei-kiei ki babha ha la ka jingim, katba u Lasarus pat ia ki basniew; te mynta ia u la pyn-tngen bad ia me pat la pynkordit. Putet, naler ki-ne baroh, hapdeng jong phi bad jong ngi la buh skhem kawei ka lyhuh, kumta ba kito kiba kwah ban jam sha shiliang nangne sha phi, kim lah, lymne kiba nangto ban wan shane sha shiliang.' Bad u la ong: 'Namarkata, ko pa, nga kyrpad ia me ba men phah ia u sha ing jong u kpa jong nga ; naba nga don san-ngut ki para, ba un dup maham ia ki, ba ioh ki ruh kin poi ha kane ka jaka jingkordit.' Te u Abraham u la ong ha u : 'Ki don u Moses bad ki nongiathuhlypa; te kin sngap ia ki.' Hynrei u la ong : 'Em, ko pa Abraham; hynrei lada uwei na ki baiap un leit sha ki, kin leh pynshitom-kylla-jingmut.' Hynrei u la ong ha u : 'Lada kim sngap ia u Moses bad ia ki nongiathuhlypa, kin ym ngeit, wat lada uwei u mihpat na ki baiap."

215. U Lasarus u iohpang bad u iap. Ioan. 11:1-16.

Te la don uwei uba pang, u Lasarus na Bethania, na ka shnong jong ka Maria bad ka Martha, ka para jong ka. (Te kata ka Maria ka la long kata kaba la pynsleh ia u Trai da ka jynsleh, bad la ñiad ia ki kjat jong U da la u shñiuh ; kaba u para jong ka u Lasarus u la pang). Namarkata, kita ki para-kynthei ki la phah sha U, ki ong :

“Ko Trai, hakhmih uta uba Me ñeid u pang.”

Te u Jisu haba U la iohsngew, U la ong ha ki :

“Kane ka jingpang kam long sha ka jingiap, hynrei na ka bynta ka burom jong u Blei, ba yn pyndonburom da ka ia u Khun jong u Blei.”

Te U Jisu U la ñeid ia ka Martha, bad ia ka para jong ka, ka Maria, bad ia u Lasarus. Kumta haba U la iohsngew ba u pang, U la nang-sah sa arsngi ha kata kajuh ka jaka. Hadien kata U la ong ha la ki synran :

“Ia ngin ñaleit biang sha Judia.”

Ki Synran ki la ia-ong ha U :

“Ko Nonghikai, dang shen ki Ju ki la iawad ban lynthem-maw ia Me, te Men leit biang shata?”

U Jisu U la phai-ktien :

“Hato ym don khat-ar kynta shi-sngi? Lada u briew u ñaid mynsngi, um jynthut, naba u iohi ia ka jingshai jong kane ka pyrthei, hynrei lada u ñaid mynmiet, u jynthut naba ym don jingshai ha u.”

U la kren ia kine kiei kiei : bad hadien kata U la ong ha ki :

“U Lasarus u lok jong ngi, u iohthiah; hynrei Nga leit ban kyrsiew-thiah ia u.”

Kumta ki Synran jong U ki la ong :

"Ko Trai, lada u iöhtiah, un koit bha."

Hynrei u Jisu U la kren shaphang ka jingiap jong u. Ki pat ki la pyrkhat ba U kren shaphang ka jingthiah jahthait. Te kumta u Jisu U la kren shai ha ki :

"U Lasarus u la iäp ; bad Nga sngewbha na ka bynta jong phi, ba Ngam shym la don hangta, ba phin dup ngeit : hynrei iä, ngin iäleit sha u."

Namarkata, u Thomas, iä uba la khot Didimus, u la ong ha la ki para-synran :

"Iä, ngi ruh ngin iäleit, ba ngin dup iäp lang bad U."

216. Ka jingsngewsih jong ka Martha bad ka Maria.
Ioan. 11:17-31.

Kumta u Jisu U la wan bad U la shem iä u ba u la don la jin sawsngi hapoh jyntep. (Te ka Bethania ka la long hajan Jerusalem, kumba ar-mer ne). Bad bun ki Ju ki la wan sha ka Martha bad ka Maria, ban pyntngen iä ki shaphang u hymmen jong ki. Kumta ka Martha ka tang shu la iöhsngew ba u Jisu U la wan, ka la leit-tan iä U; hynrei ka Maria ka la shong ha ing. Kumta ka Martha ka la ong ha u Jisu :

"Ko Trai, ba Men da la don hangne, u hymmen jong nga un ym da la iäp. Hynrei mynta ruh Nga tip ba kat kaba Men pan na u Blei, u Blei Un ai ha Me."

U Jisu U ong ha ka :

"U hymmen jong pha un sa mih-pat."

Ka Martha ka ong ha U :

"Nga tip ba un mih-pat ha kata ka jingmihpat ha ka sngi khatduh."

U Jisu U la ong ha ka:

"Nga long ka jingmihpat bad ka jingim: jar uba ngeit ha Nga, wat la u la iap, un im: bad baroh uba im bad uba ngeit ha Nga, un ym iap junom. Pha ngeit ia kane?"

Ka la ong ha U:

"Hooïd, ko Trai, nga la ngeit ba Me long u Krist u khun jong u Blei u baim, Uba la wan ha kane ka pyrthei."

Bad ynda ka la lah ong ia kine kiei-kiei, ka la leit, bad ka la khot jar-jar ia la ka para ka Maria, ka ong:

"U Nonghikai U la wan bad U khot ia pha."

Ka tang shu iohsngew ia kane, ka la ieng joit bad ka la leit sha U. Naba u Jisu Um pat shym poi hapoh shnong; hynrei U dang don ha kata ka jaka ha kaba ka Martha ka la leit-tan ia U. Namarkata ki Ju kiba la iadon bad ka ha ing bad ban pyntngen ia ka, haba ki iohi ia ka Maria ba ka ieng kyrkieh bad ka mih bak, ki iabud ia ka, ki ong:

"Ka leit sha jyntep ban iam hangta."

Te ka Maria, ynda ka la poi hangta haba don u Jisu, haba iohi ia U, ka la dem ngon ha ki kjat jong U, bad ka ong ha U:

"Ko Trai, ba Men da la don hangne, u hymmen jong nga un ym da la iap."

"Kumta u Jisu, haba u la iohi ba ka iam, bad kita ki Ju ruh kiba iawan ryngkat bad ka ba ki iam, U la ud ha la ka mynsiem bad U la sngew-shitom, bad U la ong:

"Hangno phi la buh ia u?"

Ki la ong ha U:

"Ko Trai, ale, to peit."

Bad u Jisu U la iam. Namarkata ki Ju ki la ong :
“Hakhmih, katno U la ieid ia u.”

Hynrei katto katne na ki, ki la ong:

“Une Uba la pynbeit ia ki khmat jong uto uba
la kha-matlah, hato Um lah han leh ba une un
ym iap?”

217. U Lasarus u mihpat.

Ioan.11:38-46.

Kumta U Jisu U la ud biang ha lade, U la wan
sha jyntep. Te ka la long da ka krem, bad la buh
da u maw halor jong ka. U Jisu U la ong:

“To weng noh ia u maw.”

Ka Martha, ka para jong uta uba la iap, ka ong
ha U:

“Ko Trai, katta u la iwtung, namar u la saw-
sngi.”

U Jisu U ong ha ka:

“Ngam shym la ong ha pha, ba lada pha ngeit,
phan iohi ia ka burom jong u Blei?”

Namarkata ki la weng noh ia u maw.

Bad u Jisu U la khmied la ki khmat, U la ong :

“Ko Pa, Nga ainguh ia Me ba Me la shahshkor
ia Nga. Bad Nga tip ba Me sngap ia Nga bora-
bor, hynrei na ka bynta u paidbah uba ieng saw-
dong, Nga la ong, ba un dup ngeit ba Me la phah
ia Nga.”

Ynda U la kren ia kine kiei-kiei, U la pyrta da
ka sur ka bajam:

“Ko Lasarus, to mih noh!”

Bad kumta kumta uta uba la iap, u la mih, ha
la spaiñ bad kti bad kjat da ki jaiñ-sop bad ia ka
khmut-ka-khmat jong u la sop da ka rumar. U

Jisu U la ong ha ki:

"To loit noh ia u bad to pyllait ba un leit."

Namarkata bun na ki Ju, kiba la wan sha ka Maria bad ka Martha, bad haba ki la iohi ia kita kiei-kiei ba u Jisu U la leh, ki la ngeit ha U. Hynrei katto-katne na ki, ki la leit sha ki Pharisi, bad ki la iathuh ha ki ia kiei-kiei kiba u Jisu U la leh.

218. Ki rangbah ki iakut-jingmut ban pyniap
noh ia u Jisu. *Ioan. 11:47-53.*

Namarkata ki rangbah lyngdoh bad ki Pharisi ki la ialum dorbar bad ki la ong:

"Kumno ngin leh, naba Une u brieve U leh bun ki kam-bah? Lada ngi iehnoh ia U kumto marwei, baroh kin ngeit ha U, bad ki Roman kin wan, bad kin shim noh ia ka jaka jong ngi bad ia ka jait-ka-kynja."

Hynrei uwei na ki uba kyrteng u Kaiphas, uba long u lyngdoh rangbah ha kata ka snem, u la ong ha ki:

"Phim tip eiei ruh em: lymne phim pyrkhat ba ka myntoi ia phi ba uwei u brieve un iap na ka bynta u paidbah, bad ka jait-byndrieve baroh kan ym jot."

Hynrei um shym kren na lade hi ia kane: hynrei ba u long u lyngdoh rangbah jong kata ka snem, u la iathuh-lypa ba u Jisu un iap na ka bynta ka jait-byndrieve bad ym tang na ka bynta ka jait-byndrieve, hynrei ba un dup lum lang ia ki khun jong u Blei kiba la sakma. Namarkata, naduh kata ka sngi, ki la iasylla ban ioh pyniap ia U.

219. U Krist u phet sha Ephrem. Ioan. 11:54-56.

Kumta u Jisu um iaid shuh ha kaba paw hapdeng ki Ju, hynrei U la leit noh sha ka ri hajan ri kynjah, sha ka nongbah ba la khot Ephrem, bad U la sah hangta bad la ki synran. Te ka Paskha jong ki Ju ka la jan: bad bun na ka ri ki la kiew sha Jerusalem shuwa ka Paskha, ban pynkhuid ia lade. Namarkata ki la iawad ia u Jisu; bad ki la iakren para-ki hi, katba ki dang iaieng ha ka tempel:

‘Kumno phi pyrkhat, ba Un wan ha ka sngi jingkhawai?’

Te ki rangbah lyngdoh bad ki Pharisi ki la ai hukum, ba lada uno-uno u tip hangno ba U don, u dei ban iathuh, ba kin ioh kem ia U.

220. Sumar ban ym pynthut. Ka jingmap.

Lk. 17: 1-4.

Bad U la ong ha ki synran la jong:

“Kabym lah long ba ki jingpynthut ki ym wan; hynrei kordit ia uta na uba ki wan. La kham bha ia u, lada la teh da u maw-tylliat ha ka ryndang jong u, bad la pynnoh shapoh duriaw, ban ia kaba un pynthut ia uwei na kine ki barit. To sumar ia lade. Lada u para jong me u leh pop pyrshah ia me, to sneng ia u: bad lada u leh pynshitom-kylla-jingmut, to map ia u. Bad lada u leh pop pyrshah ia me hynñiew sien shisngi, bad hynñiew sien shisngi u kylla-jingmut sha me, u ong: ‘Nga kylla-jingmut,’ to map ia u.”

221. Ka jingngeit. "Ngi long ki shakri bymlarkam."

Lk. 17: 5-10.

Te ki Apostol ki la ong ha u Trai:

"To pynroi ia ka jingngeit jong ngi."

Bad u Trai U la ong:

"Lada phi don ka jingngeit kat u phniang sym-bai tyrso, phi lah ban ong ha une u diengsoh-lyng-dkhur : To jynrat bad to thung ha duriaw; bad un kohnguh ia phi. Hynrei uno na phi uba don u shakri uba lur ne ap jynri, uban ong ha u haba u wan-phai na lum : ' Khie kloi-kloi, leit bam noh : ' bad uban ym ong pynban ha u : ' Pynkhreh ka jamiet jong nga, bad to panpoh ia lade, bad to shakri ia nga katba nga bam nga dih, bad hadien men bam men dih sa me? ' Hato u sngewnguh ia uto u shakri ba u la leh ia kiei-kiei baroh kiba u la hukum ia u? Ngam tharai. Kumjuh maphi ruh, ynda phi la lah leh ia kiei-kiei baroh ba la hukum ia phi, to ong : ' Ngi long ki shakri bymlarkam; ngi la leh ia kaba ngi la dei ban leh."

**7. Sha Jerusalem ha ka Niam ka Jinglait
bakhatduh.**

**222. Ha lynti sha Jerusalem. Shiphewngut kiba
sañianglyngkut.**

Lk. 17:11-19.

Te ka la jia katba U dang leit sha Jerusalem, U la iaïd lyngba ka Samaria bad Galileia. Bad haba U la rung ha kawei ka shnong, shiphew ngut

ki rangbah kiba sa-ñianglyngkut, ki la leit sha U,
ki la ieng na jngai; bad ki la pyrta jam, ki ong :

“Ko, Jisu Kynrad, to isynei ña ngi.”

Haba U la ñohi ña ki U la ong :

“Khie, to pyni ña lade ha ki lyngdoh.”

Te ka la ña, katba ki dang leit, la pynkhuid ña
ki. Hynrei uwei na ki, haba u ñohi ba la khuid, u
la phai-dien u da pyndon-burom ña u Blei da ka
sur ka bajam. Bad u la dem ha ki kjat jong U, u
ainguh-aidem; bad uta u la long u Samaria.

Te u Jisu U phai-ktien, U la ong :

“Hato ym shym la pynkhuid shiphew ngut?
Hangno ki khyndai ngut pat? Ym shem uban wan-
phai bad ban ai burom ña u Blei, lait-tang une u
mynder.”

Bad U la ong ha u :

“To ieng joit, khie leit; naba ka jingngeit jong
me ka la pynkoit ña me.”

223. Lano kan wan ka Hima jong u Blei?

Lk. 17:20-37.

Bad haba ki Pharisi ki la kylli lano kan wan
ka hima jong u Blei, U jubab ña ki, U la ong :

“Ka hima jong u Blei kam wan da kaba peit-
thuh; lymne kin ong: ‘Hakhmih hangne, ne, ha-
khmih hangtai.’ Naba hakhmih, ka hima jong u Blei
ka don hapoh jong phi.”¹

Bad U la ong ha la ki synran:

“Ki ña kin poi haba phin kwah ban ñohi ña ka-

(1) Ka hima jong u Blei ka la sdang da ka jingwan jong u
Krist. Kito kiba pdiang ña U ki ñoh bynta ha ka hima jong U.

wei ka sngi jong u Khun u briew: bad phin ym iohi satia. Bad kin ong ha phi: 'Khmih hangne, bad hangtai.' Wat leit, lymne bud: naba kumba ka leilieh ka thaba napoh ka bneng sha kiwei pat ki bynta kiba don hapoh ka bneng, kumta u Khun u briew ruh Un long ha ka sngi jong U. Hynrei U dei shuwa ban shah bun kiei kiei, bad ba yn kyn-tait da kane ka pateng. Bad kumba ka la jia ha ki sngi jong u Noa, kumta ruh kan long ha ki sngi jong u Khun u briew. Ki la iabam bad iadih, ki la kyntiew-kurim bad pynkyntiew-kurim, haduh kata ka sngi ba u Noa u la rung hapoh ka ing-lieng, bad ka jingshlei-um ka la wan bad ka la pynjot ia baroh. Kumjuh kumba ka la jia ha ki sngi jong u Lot, ki la bam bad la dih, ki la thied bad la die, ki la thung bad la tei. Bad ha kata ka sngi ba u Lot u la mih noh na Sodom, ka la slap da ka ding bad u kyndok na bneng, bad ka la pynjot baroh khoit. Kumjuh hi kan long ha kata ka sngi haba yn pynpaw ia u Khun u briew. Ha kata ka por, uto uba don halor ing, bad ki mar-ki-mata jong u hapoh ing, to un ym hiar ban leit shim ia ki; bad uto uba ha lyngkha kumjuh, to un ym leit phai. To kynmaw ia ka tnga jong u Lot. Jar uban wad ban pynim ia la ka mynsiem, un duh ia ka; bad jar uban duh ia ka, un pynim ia ka. Nga ong ha phi, ha kata ka miet kin don arngut ha kawei ka jyn-thiah; ia uwei yn shim noh bad ia uwei pat yn iehnoh. Arngut ki kynthai kin iatylliat lang; ia kawei yn shim noh bad ia kawei pat yn iehnoh. Arngut ha lyngkha; ia uwei yn shim noh bad ia uwei pat yn iehnoh."

Haba ki phai-ktien, ki ong ha U :

"Ko Trai, shano?"

U la ong ha ki:

"Kat haba don ka met¹, hangta ki pukni ruh kin ialang."

224. Ka pharshi shaphang u nongbishar bymhok bad ka 'riewkynthei. Lk. 18: 1-8.

Te U la kren ruh kawei ka pharshi ha ki, ba dei ban duai borabor bad ban ym thait, U ong:

"Ha kawei ka nongbah, la don uwei u nongbishar ubym sheptieng Blei bad ubym suitñiew briew. Ha kata ka nongbah, la don ruh kawei ka 'riewkynthei; bad ka la wan ha u, ka ong: 'To bishar hok ia nga na u nongshun jong nga'. Hynrei slem-slem um shym la treh. Te hadien u la ong ha lade hi: 'La ngam tieng Blei, lymne suitñiew briew, pynban namarba kane ka 'riewkynthei ka thlia ia nga, ngan bishar hok ia ka, ioh da kaba ka iai-wan jynde ka pynsgewkyllut ia nga."

Bad u Trai U la ong :

"Sngap kumno u nongbishar bymhok u ong. Te u Blei, hato Un ym bishar hok ia kiba la jied la jong, kiba pyrta ia U bad sngi bad miet, bad Un tud na ka bynta jong ki? Nga ong ha phi Un bishar hok ia ki shisyndon. Hynrei haba u Khun u briew U wan, phi tharai Un shem ia ka jingngeit ha ka pyrthei?"

(1) Ka met-ïap.

225. Ka Pharshi shaphang u Pharisi bad u Nong-khrong.
Lk. 18: 9-14.

Te ha kito kiba la shaniah ha lade kum ki bahok, bad kiba ibeiñ ia kiwei pat, U la kren ruh ia kane ka pharshi :

“Arngut ki briew ki la kiew ha ka tempel ban duai : uwei u Pharisi bad uwei pat u nongap-khrong.¹ Uta u Pharisi da kaba ieng u la duai ha lade kumne: ‘Ko Blei, nga ainguh ia Me ba ngam long kum kiwei pat ki briew, ki nongleh-jubor, ki hymhok, ki baklim, kumba long une u nongap-khrong. Nga shah-jingit arsien shitaiew. Nga ai ka bashiphew na kiei kiei baroh ba nga don.’ Bad uta u nongap-khrong pat da kaba ieng sha jngai, khlem khmied wat ia la ki khmat sha bneng: hynrei u la tied ia la ka shadem, u ong: ‘A Blei, to isynei ia nga u nongpop.’ Nga ong ha phi, une u la leit sha la ing uba ksan ban ia uta uwei; naba baroh uba pynkhrav ia lade yn pynrit, bad uba pynrit ia lade, yn pynkhrav.”

226. Ha Peria. - Ka Jingteh-shongkurim bymlait shuh.
Mk. 19: 1-12. Mk. 10:1-12.

Te ka la jia ba haba u Jisu U la kut kine ki jingken, U la leit noh na Galileia, bad U la wan sha ki thain ka Judia, sha shiliang ka Jordan; bad

(1) Kine ki long hi ki Ju, kiba lum ia ka khajna, ia ka baimusur bad ia ka khrong-ka-dan baroh, kiba trei hapoh ki Patsha Roman. Te khnang ban dup kham ioh myntoi shibun, ki ban-bor ia ki briew baroh; bad dei na kane ka daw ba ki para-Ju hi ki isih ia ki bad ki kheiñ ia ki kum ki nongpop.

ki paidbah ki la ialum biang sha U, bad bun ki paidbah-paidsan ki la bud ia U. Bad kumba U la ju leh, U la hikai biang ia ki, bad U la pynkoit ia ki hangta.

Te ki Pharisi ki la wan ha U ban tynjuh ia U, ki ong:

"Ka bit ia u briew ban pyllait noh ia la ka tnga na kano kano ka daw?"

Bad U la jubab bad U la ong:

"U Moses u hukum aiu ia phi?"

Bad ki la ong:

"U Moses u la shah ban thoh ka kot iaphet-tnga, bad ban pyllait."

Hynrei u Jisu U la ong ha ki:

"Phim shym la pule ba Uta Uba la thaw ia u briew naduh ba sdang, U la thaw ia ki, shynrang bad kynthei? Bad U la ong: 'Na ka bynta kane, u briew un iehnoh ia u kpa bad ka kmie bad un sah bad la ka tnga, bad baroh arngut kin long kawei ka doh.' (Gen. 2 : 24). Namarkata, mynta kim long ar, hynrei tang kawei ka doh. Namarkata, ia kaba u Blei U la pyniasoh, u briew un ym pynkhlad."

Ki la ong ha U:

"Te balei u Moses pat u la hukum ban ai ia ka kot iaphet-tnga, bad ban pyllait?"

U ong ha ki:

"Namar ka jingeh dohnud jong phi u Moses u la shah ia phi ban pyllait noh ia ki tnga jong phi: hynrei naduh ka basdang kam shym long kumta. Bad Nga ong ha phi, ba uno uno uban pyllait noh ia la ka tnga, lait na ka daw ka jingklm, bad un leit da kawei pat, u klim; bad uta uban leit ia kata kaba la pyllait, u klim."

Ynda ha ing, ki synran jong U ki la kylli biang

ha U ia kata kajuh. Bad U la ong ha ki :

“Uno uno uban pyllait noh ia la ka tnga bad uban leit da kawei pat, u klim halor jong ka. Bad lada ka tnga ka pyllait ia la u tnga, bad ka iapoi bad uwei pat, ka klim.”

Te ki synran jong U ki la ong ha U :

“Lada ka jinglong jong u briew bad la ka tnga ka long kumta, kam donkam ban poikha-poiman.”

U la ong ha ki :

“Ym baroh khoit ki shemphang ia kane ka ktien, lait-tang kito ha kiba la ai. Namar don ki iunok ia kiba la kha kumta naduh kpoh ka kmie; bad don ki iunok ia kiba la pynlong da ki briew; bad don ki iunok kiba la pynlong iunok ia lade na ka bynta ka hima ki bneng.¹ Jar uba lah ban shim, u mat shim ia ka.”

227. U Krist U kyrkhu ia ki khynnah.

Mt. 19:13-15. Mk. 10:13-18. Lk. 18:15-17.

Te ki la wanlam ha U ia ki khynnah-rit, ba Un dup ktah ia ki, ba Un dup buh ia la ki kti halor jong ki, bad dup duai. Hynrei ki synran ki la mai ia kita ki nongwanlam. Haba u Jisu U la iohi ia kata, U la sngewsih shibun, bad haba U la khot lang ia ki, U ong ha ki :

“To shah ia ki khynnah-rit ban wan sha Nga, bad wat khang ia ki. Namar ka hima jong u Blei ka long kum ia kita. Shisha Nga ong ha phi, jar ubym pdiang ia ka hima jong u Blei kum u khyn-

(1) Ki iunok na ka bynta ki hima ka bneng dei kito ki briew kiba kiar ia lade na ka jingthrew ka doh bad kiba pvn-kyntang ia lade ha u Blei, kum ki riewniam bad ki lyngdoh.

nah-rit, un ym rung ha ka."

Te da kaba kdup ia ki, bad da kaba buh ia la ki kti halor jong ki, U la kyrkhu ia ki. Bad U la leit noh nangta.

228. U Samla bariewspah.

Mt. 19:16-22. Mk. 10:17-22. Lk. 18:18-23.

Bad haba U dang mih sha lynti, hakhmih uwei u samla, u nongsynshar, u la mareh sha U, bad u la dem-khohsiew ha khmat jong U, bad u la kylli ia U :

"Ko Nonghikai babha, kaei ka babha ngan leh ba ngan dup ioh ia ka jingim bymjukut?"

Bad u Jisu U la ong ha u :

"Balei me kylli ha Nga shaphang ka babha? Balei me khot ia Nga u babha? Ym don u babha lait-tang u Blei marwei. Hynrei lada me kwah ban rung ha ka jingim, to sumar ia ki hukum."

U ong ha U :

"Kino?"

U Jisu pat U la ong:

"Me tip ia ki hukum : Wat klim, wat pyniap, wat tuh, wat sakhi lamler, wat leh klop, burom ia la u kpa bad ka kmie, bad to ieid ia la u paramar-jan kumba ia lade hi."

Hynrei u phai-ktien, u la ong ha U :

"Ko Nonghikai, ia kine baroh nga la sumar naduh nga dang khynnah, te sa aïu pat nga dang duna?"

Haba u Jisu u la peit ia u, U la i-ieið ia u, bad U la ong ha u :

"Kawei me dang duna. Lada me kwah ban

long u bajanai, khie, die kat kaba me don, bad to ai ha ki baduk, bad men don ka jingkynshew ha bneng; bad to wan, to bud ia Nga."

Uta u samla u la sngewkhuslai ia kata ka ktien bad u la leit noh da kaba sngewsih, namar u la long u bariewspah shibun."

229. Ka Jingmysaw jong ka spah. Ka bainong jong ka Jingkyrduh.

Mt. 19:23-30. Mk. 10:23-31. Lk. 18:24-30.

Te haba u Jisu U iohi ia u ba u sngewsih, bad haba U peit sawdong, U ong ha la ki synran :

"Shisha Nga ong ha phi, katno ka long ka ba-eh ia kito kiba don spah, ban rung ha ka hima jong u Bleil"

Bad ki synran ki la sngewkyndit ia kita ki ktien jong U. Hynrei u Jisu U la phai-ktien biang U la ong ha ki :

"Ko khun, Nga ong biang ha phi, katno ka long ka ba-eh ia kito kiba shaniah ha ki spah, ban rung ha ka hima jong u Bleil Naba ka kham jem ia ka ut ban bsut lyngba ia i thliew thyrnia ban ia u 'riewspah ban rung hapoh ka hima jong u Blei."

Ma-ki ki la nang sngewphylla, ki ia-ong paraki hi :

"Te mano ba lah ban lait-im?"

Bad u Jisu haba U peit ia ki, U ong :

"Ha ki briew kam lah long : hynrei ym ha u Blei. Namar ha u Blei kiei kiei baroh, kiba lah suda."

Kumta u Petrus u phai-ktien, u la ong ha U :

"Khmi, ngi la iehnoh ia kiei-kiei baroh, bad ngi la bud ia Me : namarkata, ngin ioh aiu?"

U Jisu pat U la ong ha ki :

"Shisha Nga ong ha phi, ba maphi, kiba la ia-bud ia Nga, ha ka jingkha thymmai¹ haba u Khun u briew Un shong ha ka khet jong ka burom syiem la jong, maphi ruh phin iashong ha ki khat-ar khet, phi iabishar ia ki khat-ar jait Israel. Bad baroh uba iehnoh ia la ka ing-ka-sem, ne ki hymmen-ki-para, shynrang ne kynthei, ne ia u kpa ne ia ka kmie, ne ia ka tnga, ne ia ki khun, ne ia ka bri-ka-khyndew na ka bynta ka kyrteng jong Nga bad na ka bynta ka Gospel, bad na ka bynta ka hima jong u Blei, un ioh mynta ha kane ka pyrthei shispah shah: ki ing-ki-sem, ki hymmen-para, shynrang bad kynthei, bad ki kmie, bad ki khun, bad ki bri-ki-khyndew, lem bad ki jingban-beifi: bad ha ka pyrthei kaban wan, ka jingim bymjukut. Hynrei bun ki banyngkong kin khat-duh: bad ki bakhatduh kin nyngkong."

230. Ka pharshi shaphang ki nongtrei ha ka bri-soh.
Mt. 20 : 1-16.

"Ka hima bneng ka syriem ia u trai-ing, uba mih la dang step phyrngap ban wer nongtrei ha la ka brisohwaiñ. Te ynda u la iakut bad ki nongbylla shi-denar shisngi, u la phah ia ki sha la ka brisoh. Haba u la leit biang kum ha ka kynta balai² u la iohi ia kiwei pat kiba ieng jaipdeh ha ka jaka iew, bad u la ong ha ki : "To khie maphi

(1) Ha ka jingwai ka pyrthei, haba u Blei un pynthymmai nadong-shadong.

(2) Kumba 9 baje mynstep. Ki Ju ki kheifi 12 kynta shisngi naduh ba mih haduh ban da sep ka sngi.

ruh sha ka brisoh jong nga, bad ngan ai ha phi katba dei hok.' Ki ruh ki la leit. Te u la mih biang kum ha ka kynta ba-hynriew¹ bad ba-khyndai² bad u la leh kumjuh. Kum ha ka kynta ba-khatwei³ u la mih biang, bad u la iakynduh ia kiwei pat kiba iaieng, bad u ong ha ki : 'Balei phi ieng jaipdeh hangne baroh shisngi?' Ki ong ha u : 'Namar ym don ba wer ia ngi.' U ong ha ki : 'To khie maphi ruh sha ka brisoh jong nga.' Te ynda la janmiet u trai brisoh u ong ha la u sordar : 'To khot ia ki nongtrei bad to sam bainong ia ki, da kaba sdang na kiba khatduh sha ki banyngkong.' Kumta haba la wan kita kiba la poi kumba khatwei baje, ki la ioh uwei-uwei mar shi-denar. Te ki wan ki banyngkong ruh, kiba la pyrkhat ban ioh tam, hynrei ki ruh ki la ioh uwei-uwei mar shi-denar. Bad haba ki la shim, ki la khñium ia u trai-ing, ki ong : 'Kine ki bakhatduh ki la trei tang shi-kynta, bad me la pynryngkat ia ki bad ngi, kiba la shah ia ka khia-ka-shon jong ka sngi bad ka shit-ka-syang?' U pat u phai-ktien ha uwei na ki, u la ong : 'Ko lok, ngam leh bymhok ia me : mem shym la iakut bad nga shi-denar? To shim ia la ka jong bad to leit noh: hynrei nga kwah ban ai ia une u bakhatduh ruh kumba ai ia me. Ne, kam bit ba ngan leh kumba nga kwah? Hato ka khmat jong me ka suh 'matdong, namar nga long u ba-bha?' Kumta ki bakhatduh kin nyngkong, bad ki banyngkong kin khatduh. Naba shibun la khot, hynrei khyndiat la jied."

(1) Kumba shiteng sngi.

(2) Kumba lai baje janmiet.

(3) Kumba 5 baje janmiet shuwa ban sep ka sngi.

231. Hajan Jerusalem. Ka jingĩathuhlypa ka balai shaphang ka jingshah-shitom.

Mt. 20:17-19. Mk. 10:32-34. Lk. 18:31-34.

Te ki la don ha lynti, ki dang iakiew sha Jerusalem; bad u Jisu U la iaid hakhmat jong ki, bad ki la sngewkyndit: bad ki iabud, ki la sheptieng. Bad haba U la shim kyrpang biang ia ki khatar ngut, U la sdang ban iathuh ha ki ia kiei-kiei kiban jia ha U, U ong:

“Naba hakhmih, ngi iakiew sha Jerusalem, bad yn pyndep ia kiei-kiei baroh kiba la thoh da ki nongĩathuhlypa shaphang u Khun jong u briew, bad ia u Khun u briew yn aiti ha ki rangbah lyngdoh bad ki nongthoh bad ki tymmen-ki-san, bad kin pynrem ia U ban iap, bad kin aiti ia U ha ki jentil. Bad kin rkhe-beiñ ia U, bad bynthiew ia U, bad sympat ia U. Bad ynda ki la lah sympat ia U, kin pyniap ia U; bad ha ka sngi balai Un mih-pat.”

232. Ka jingkwah pawkhmat jong ki khun u Sebedi.

Mt. 20:20-28. Mk. 10:35-45.

Te u Jakob bad u Ioannis, ki khun jong u Sebedi, ki la wan ha U, ki ong:

“Ko Nonghikai, ngi kwah ba Men leh ha ngi. kat ia kaba ngin pan.”

Hynrei U la ong ha ki:

“Aiu phi kwah ba Ngan leh na ka bynta jong phi?”

Ynda kumta ka kmie jong ki khun u Sebedi ka la wan ha U, ka dem ngon bad ka pan eiei na

U. U la ong ha ka :

"Pha kwah aïu?"

Ka la ong ha U.

"Ong ba kine ki khun jong nga arngut kin shong ha ka hima jong Me, uwei ha kamon jong Me bad uwei pat ha kadiang."

Te u Jakob bad u Ioannis ki la ong :

"To ai ha ngi ba ngin dup ioh shong uwei ha kamon jong Me bad uwei pat ha kadiang jong Me, ha ka burom jong Me."

U Jisu pat U la ong ha ki :

"Phim tip aïu phi pan. Phi lah ban dih ia ka khuri na kaba Ngan dih ma-Nga? Ne ba yn pynbaptis da ka baptisma kaba yn pynbaptis ia Nga?"

Hynrei ki la ong ha U :

"Ngi lah."

Bad u Jisu U la ong ha ki :

"Shisha phin dih ia ka khuri kaba Nga hi Ngan dih; bad da ka baptisma kaba yn pynbaptis ia Nga, yn pynpabtis ia phi; hynrei ban shong ha kamon jong Nga ne ha kadiang jong Nga, kam shong ha Nga ban ai ia phi, hynrei ia kita ia kiba la pynkhreh da u Kpa jong Nga."

Haba ki shiphew ngut ki la iohsngew ki la sdang ban bitar ia kita arngut shipara, u Jakob bad u Ioannis. Hynrei U Jisu haba u la khot ia ki, U ong ha ki:

"Phi tip ba kito kiba imat ba ki synshar ia ki jentil, ki leh trai-khlieh ia ki; bad ki bakhraw-batri jong ki, ki don bor halor jong ki. Hynrei kam long kumta hapteng jong phi: hynrei uno-uno uba kwah ban long kham khraw hapteng jong phi, un long u shakri jong phi. Bad uno-uno uban kwah long nyngkong hapteng jong phi, un long u sha-

kri jong ki baroh khoit. Naba u Khun u briew ruh
Um shym wan ba yn dup shakri ia U, hynrei ba
Un dup shakri, bad dup ai ia la ka jingim-ka jing-
siewspah na ka bynta kiba bun."

**233. U Krist U wan ha Jerikho bad u Sakheus u
pdiang sngewbha ia U.**

Mk. 10:46. Lk. 18:35-37; 19:1-10.

Te ka la jia, haba U la poi hajan Jerikho, ba u-
wei u matlah, u khun jong u Timeus, u Bartimeus,
u la shong ap-khrong harud lynti. Te haba u ioh-
sngew ia u paidbah ba u ia-iaid, u la kylli : ba leh
aü. Te ki la iathuh ha u ba u Jisu Nasaret U
dang iaaid. Bad ki la poi ha Jerikho. Bad haba U
la rung, U iaaid lyngba ia ka Jerikho. Te hakhmih
uwei u briew uba kyrteng u Sakheus, uba la long
ruh u rangbah jong ki nongap-khrong bad u ba-
riewspah; bad u la kwah ban iohi ia u Jisu, ba dei
uno : bad um shym lah na ka bynta uta u paid-
bah, namar u la long u balyngkot rnyieng. Te da
kaba mareh sha khmat, u la kiew halor u dieng
dumbur, ba un dup iohi ia U : namar Un sa iaaid
nangta. Te haba u Jisu U la poi ha kata ka jaka,
U la khmied, U la iohi ia u bad U la ong ha u :

"Ko Sakheus, to hiar kloi-kloi : namar mynta
ka sngi ka dei ba Ngan sah ha ing jong me."

Te u la hiar pynkloi bad u la pdiang ia U da
kaba kmen. Bad haba baroh ki la iohi, ki la ia-
khñium, ki ong ba U la leit ban sah sngewbha
bad u 'riew-pop. Hynrei u Sakheus, u ieng, u la
ong ha u Trai :

"Hakhmih, shiteng na kiei-kiei jong nga, nga

ai ha ki baduk, ko Trai; bad lada nga la leh klop eiei ia uno-uno, nga siew pat sawshah."

U Jisu U la ong ha u :

"Mynta ka sngi ka jingpynim ha kane ka ing ka la wan, namar ma-u ruh u long u khun jong u Abraham. Naba u Khun u briew U wan ban wad bad ban pynim ia kaba la jot."

234. Ka pharshi shaphang ki Sbai-rupa¹

Lk. 19:11-28.

Katba ki dang iasngap ia kine kiei kiei, U la hteng ktien bad U la kren kawei ka pharshi, naba U la poi hajan Jerusalem, bad namarba ki la pyrkhat ba shen yn sa pynpaw ia ka hima jong U Blei, kumta U la ong :

"Uwei u bakhraw-batri u la leit sha ka ri ba-jngai, ban shimti ha lade ia ka hima bad ban wan phai-biang. Te haba u la khot ia la ki shiphew ngut ki shakri, u la ai ha ki shiphew tylli ki sbairupa bad u la ong ha ki: 'To kha-i haduh ba ngan da wan.' Hynrei ki para-shnong jong u ki la isih ia u: bad ki la phah ia ki nonglamktien nadien jong u, ki ong : 'Ngim kwah ia une ba un synshar halor jong ngi.' Te ka la jia ba u la wan-phai biang, ynda u la shim ia ka hima; bad u la hukum ban khot ia kito ki shakri, ha kiba u la ai ia ka tyngka; ba un dup tip katno uwei-uwei u la ioh-nong da kaba khai. Te u banyngkong u la wan, u ong: 'Ko Trai, ka sbai-rupa jong me ka la kamai shi-

(1) Ka *Mna*, ka tyngka Grik kaba long kumba 50 Tyngka.

phew tylli ki sbai-rupa.' Bad u la ong ha u : 'Shabas, shakri babha! Naba me la long uba lah ban shaniah ha iba khyndiat, men ioh bor halor shiphew tylli ki shnong.' Bad u ba-ar u la wan, u ong : 'Ko Trai, ka sbai-rupa jong me ka la pynman san tylli ki sbai-rupa.' Bad u la ong ha u : 'Me ruh, to ioh halor san tylli ki shnong.' Bad uwei pat u la wan, u ong : 'Ko Trai, khmih kane ka sbai-rupa jong me, kaba nga la song khop ha ka jaiñrumar: namar nga la khaweit ia me, naba me long u briew u bapyrkhing: me shim ia kaba mem shym la buh, bad me ot ia kaba mem shym la bet.' U ong ha u : 'Na ka shyntur jong me hi nga bishar ia me, ko shakri bymman. Me tip ba nga long u briew u bapyrkhing, uba shim ia kaba ngam shym la buh, bad uba ot ia kaba ngam shym la bet; te balei mem shym la ai ia ka tyngka jong nga ha ka ing-buh-tyngka, ba haba nga wan ngan ioh ia kata lem bad ka sut de? Te u la ong ha kita kiba ia-ïeng hajan: 'Knieh noh na u ia ka sbai-rupa, bad to ai ha uto uba don shiphew sbai-rupa.' Te ki la ong ha u : 'Ko Trai, u don shiphew sbai-rupa.' Hynrei nga ong ha phi, ba ha u briew baroh uba don, yn nang ai shuh bad un nang pahuh-pahai; hynrei na uta ubym don, wat ia kaba u don yn knieh noh na u. Bad ia kito ki nongshun jong nga pat kibym shym la kwah ba ngan synshar halor jong ki, to wanlam hangne; bad to pyniäp hakhmat jong nga."

Te ynda U la kren ia kine kiei-kiei, u la iaid ha phang, u kiew sha Jerusalem.

235. La pynkoit arngut ki matlah.

Mt. 20:29-34. Mk. 10:46-52. Lk. 18:38-43.

Te haba u dang mih noh na Jerikho bad la ki synran bad u paidbah babun, hakhmih u khun jong u Timeus, u Bartimeus bad uwei pat u matlah, ki la shong pan khrong harud lynti. Bad haba ki la iöhsngew ba dei u Jisu Nasaret Uba iaid nangta, ki la sdang ban pyrta, ki ong :

“Ko Jisu, ko khun u Dabid, to isynei ia ngi.”

Te bun ki la kynhied ia ki ba kin dup sngap jar. Hynrei ki la nang kham pyrta jam pynban, ki ong :

“Ko Trai, ko khun u Dabid, to isynei ia ngi.”

Te U Jisu U la ieng bad U la ong :

“To khot ia ki.”

Bad ki la khot ia kita ki matlah, ki ong ha ki :

“To kmen : ieng joit, U khot ia phi.”

Te u Bartimeus, u bret bak la ka jaiñkup, u ieng joit, (bad uta uwei pat u matlah u la bud ia u) bad ki la wan ha u Jisu. Bad u Jisu U kren ha ki, U la ong :

“Phi kwah ba Ngan leh aïu ia phi?”

Kita ki matlah ki la ong ha U :

“Rabboni¹, ban dup imat.”

Bad u Jisu U la isynei ia ki, U la ktah ia ki khmat jong ki bad U la ong ha ki :

“To leit, ka jingngeit jong phi ka la pynkoit ia phi.”

Te markumta hi ki la imat bad ki la iabud ia U ha kata ka lynti, ki pyndonburom ia u Blei. Bad uta u paid baroh haba u la iöhi, u la iäroh ia u Blei.

(1) Kaba mut: Ko Nonghikai jong nga.

236. Ha Bethania. Ka Maria ka pynsleh ia u Trai.
Mt. 26:6-13 Mk. 14:3-9. Ioan. 12:1-11.

Namarkata, hynriew sngi shuwa ka Paskha, U Jisu U la wan sha Bethnia, ha kaba u Lasarus u la lah iap, ia uba U Jisu U la pynmih pat. Te ki la pynlong hangta ka jingkhawai-miet na ka bynta jong U, ha ing jong u Simon uba pang nianglyngkut, bad ka Martha ka la pynkhreh-pyn-khrum; u Lasarus pat u la long uwei na kita kiba shong-bam lem bad U. Kumta ka Maria ka la shim shi-teng ser ka jynsleh 'batshreng-iwbih banylla, bakordor, bad ka la pynsleh ia ki kjat jong u Jisu, bad ka la niad ia ki kjat jong U da la u shniuh, bad haba ka la pynpait ia i kum-mawpleit, ka la theh halor ka khlieh jong U katba U dang shongbam. Bad la pyndap ia kata ka ing da ka jingiwbih jong kata ka jynsleh. Te uwei na ki synran jong U, u Judas Iskariot, uta uban sa shetkylia ia U, u la ong :

"Balei ba ym shym la die ia kane ka jingsleh laispah denar bad ym shym la ai ia ki baduk?"

Hynrei u la ong ia kane, ym namarba u kitkhia ia ki baduk, hynrei naba u la long u myntuh, bad ba u don u 'saipan, u kieng ia kito kiei-kiei kiba la thep hapoh. Bad katto katne na ki synran haba iohi ia kata, ki la sngewbitar ha lade, bad ki la ong :

"Balei ba pynlehnoh-ei ia kane ka jynsleh? Naba ia kane ka jynsleh yn jin da la lah die palat laispah denar bad jin da la ai ha ki baduk."

Bad ki la iakhniium ia ka. Hynrei u Jisu U la ong :

"Iehnoh ia ka, balei phi thlia ia ka? Ka la leh

ia Nga ka kam babha. Naba man ka sngi phi don bad phi ia ki baduk : bad haba phi kwah phi lah ban leh bha ia ki; hynrei ia Nga phim don man ka sngi. Kane ka la leh katba kot la ka bor : ka la wan lypa ban pynsleh ia ka met jong Nga na ka bynta ban tep. Namar da kaba theh ia kane ka jynsleh ha ka met jong Nga, ka leh na ka bynta ban tep ia Nga. Shisha Nga ong ha phi, kat shaba yn ialap ia kane ka Gospel ha satlak ka pyrthei, yn iathuh ruh ia kaba kane ka la leh ban sah-kynmaw ia ka."

Namarkata u paidbah Ju babun u la tip ba U don hangta. Bad ki la wan, ym tang na ka bynta u Jisu hi, hynrei ba kin dup iohi ia u Lasarus, ia uba U la pynmihpat na ki baiap. Te ki rangbah lyngdoh ki la iapyrkhat ban dup pyniap noh ia u Lasarus ruh : naba bun, na ka daw jong u, ki la khlad noh na ki Ju, bad ki la ngeit ha u Jisu.

KA BYNTA KA BALAI

KA JINGUṚLONG

KA LYNNONG I

KA JINGSDANG

JONG KI JINGSHAHSHITOM

1. Ka sngi nyngkong jong ka taiew, 10 tarik
u bnai Nisan¹.

237. U Jisu U rung ha Jerusalem.

Mt. 21:1-9. Mk. 11:1-10. Lk 19:29-40. Ioan. 12:12-19

Ha ka sngi kaba bud,¹ haba ki la poi hajan Jerusalem, bad ki la wan ha Betphaje, ha u Lum Olib, u Jisu U la phah arngut ki synran, U ong ha ki:

"To leit sha ka shnong kaba hamar pyrshah jong phi, bad shisyndon haba phi rung, phin lap kawei ka kada ba la teh, ryngkat bad u khun jong ka, ha uba ym pat ju shong briew. To loit ia u bad to wanlam sha Nga. Bad lada uno-uno u briew u ong eiei ia phi: 'Phi leh aiu? Balei phi pyllait ia u?' To ong: 'U Trai u donkam ia ki'; bad shisyndon un phah ia ki."

Bad kita ia kiba la phah, ki la leit, bad ki la shem ia u khun kada uba ieng, ba la teh ha-khmat phalor shabar ha lynti-bah. Katba ki dang ialaw ia uta u khun kada, ki trai, na kita kiba la ieng

(1) U bnai jong ki Ju, uba long malu mala kum ha pdeng jong u 'Nai-iber bad Iaiong.

hangta, ki la ong ha ki:

"Balei phi iapyllait ia u khun-kada?"

Ki pat ki la ong:

"Namarba u Trai u donkam ia u".

Bad ki la shah ia ki. Bad ki la wanlam ha u Jisu ia kata ka kada bad ia u khun-kada. Bad ynda ki la siang ia la ki jaiñkup halor u khun-kada, ki la pynshong ia u Jisu. Bad U la shong halor jong u. Te ia kane baroh la leh ba yn pyn-urlong ia kaba la kren da u nongiathuhlypa, uba ong: (*Sak. 9.9.*)

"To iathuh ia ka khun¹ jong ka Sion: Wat sheptieng. Hakhmih u Syiem jong pha U wan ha pha, u bajemnud, bad U shong halor ka kada, bad u khun-kada, u khun jong kaba la ju mlien ha ka lyngkor."

Ia kine kiei-kiei ki synran jong U kim shym la shemphang mynshuwa; lynrei ynda la pyndon-burom ia u Jisu, ki sa iakynmaw ba ia kine kiei-kiei la thoh shaphang jong U, bad ki la leh ha U ia kine kiei-kiei. Te katba U nang-leit, ki paidbah byllien ki la siang ha lynti ia la ki jaiñkup. Bad kiwei pat ki la khyllad tnat-dieng na ki dieng bad ki la siang ha kata ka lynti. Te haba U la jan poi hajan pynnoh u Lum Olib, baroh ki paid synran ki la sdang da kaba kmen ban iaroh ia u Blei, da ka sur ka bajam, na ka bynta ki kam-bah baroh ba ki la iohi. Te kita kiba iaid haphang bad kita kiba iabud, ki la pyrta, ki ong:

"Hosanna¹ ia u Khun u David."

"Yn iaroh ia u Syiem Uba wan ha ka kyrteng

(1) Ka Jerusalem.

(1) Burom, Iaroh.



"Hosanna, suk Uta Uba wan ha ka kyrteng
jong u Trai, u Syiem ki Israel."

jong u Trai. Ka jingsuk ha bneng, bad ka burom sha jrong tam eh.

"Suk ka hima jong u kpa jong ngi u Dabid, kaba wan."

Te u paidbah byllien uba la wan sha kata ka sngi-burom, haba u la iöhsngew ba u Jisu U wan sha Jerusalem, ki la iashim ia ki tnat diengtlai, bad ki la mih ban leit-tan ia U, bad ki la pyrta :

"Hosanna, suk Uta Uba wan ha ka kyrteng jong u Trai, u Syiem ki Israel."

Namarkata uta u paidbah uba la iadon ryngkat bad U haba U la khot ia u Lasarus na jyntep, u la iasakhi. Na kata ruh u paidbah u la iawan-tan ia U : namar ki la iöhsngew ba U la leh ia kane ka kam-bah. Namarkata ki pharisi ki la ia-ong paraki hi.:

"Phi iöhi ba ngim lah leh eiei? Khmih, ka pyrthei ka bud ia U."

Te katto-katne ki Pharisi napdeng u paidbah, ki la ong ha U :

"Ko Nonghikai, to mai ia la ki synran."

U la ong ha ki :

"Nga ong ha phi, ba lada kine kin sngap, ki maw kin kyang shla."

238. U Trai U iam na ka bynta ka Jerusalem
Lk. 19 : 41-44.

Te haba U la poi hajan, haba iöhi ia ka nongbah, U la iam na ka bynta jong ka, U ong:

"A, lada pha ruh pha la tip, bad thik ha kane ka sngi jong pha, ia kiei-kiei kiba long ia ka jingsuk jong pha ! Hynrei mynta la buhrjeh ia ki

na ki khmat jong pha. Naba ki sngi kin wan ha pha, haba ki nongshun jong pha kin ker sawdong ia pha da ki kharai, bad kin tawiar ia pha, bad kin set-kut ia pha na baroh ki liang, bad kin pynkhyllem ia pha ha madan, bad ia ki khun jong pha kiba shong ha pha; bad kin ym iehnoh ha pha u maw halor u maw, naba pham shym la tip ia ka samoi jong ka jingwan-jngoh ia pha.”¹

**239. U Krist U rung ha ka nongbah bad hapoh
ka tempel. *Mt. 21:10-17. Mk. 11:11.***

Te haba U la rung ha Jerusalem, baroh kawei ka nongbah ka la khywin, ki ia-ong :

“Uei Une?”

Bad kita ki paidbah ki la ong :

“Une U long u Jisu, u Nongïathuhlypa na Nasaret ha Galileia.”

U Jisu U la rung ha ka tempel jong u Blei. Te ki matlah bad ki dkoh ki la iawan ha U ha ka tempel : bad U la pynkoit ia ki. Haba ki rangbah lyngdoh bad ki nongthoh ki la iöhi ia ki kam phylla ba U la leh, bad ia ki khynnah kiba iäpyrta ha ka tempel, bad ia-ong : “Hosanna ia u Khun u Dabid,” ki la iäbitar lep, bad ki la ong ha U :

“Me iöhsngew aïu kine ki ong?”

Bad u Jisu U la ong ha ki :

“Hooïd keiñ. Phim pat ju pule (Ps. 8:3): ‘Na ki shyntur jong ki khunlung bad kiba dang buiñ, me la pynjanai ia ka jingiaroh’ ?”

(1) Sawphew snem hadien, kane ka jingïathuhlypa basngew-shyrkhei ka la urlong ha ka kü jong ki Roman, ka kti jong u Bepasian bad u Titus, u khun jong u.

Bad u la iëhnoh ia ki; bad ynda U la peit saw-dong ia kiei-kiei baroh, sa ba ka la premmiet artat, U la mih noh na ka 'nongbah, U la leit sha Bethania ryngkat bad ki khat-ar-ngut, bad U la sah hangta.

2. Ka sngi ba-ar jong ka taiew, 11 tarik u bnai Nisan.

240. U tim ia u Dieng-dumbur.

Mt. 21:18-19. Mk. 11:12-14.

Kum lashai mynstep, haba ki la mih noh na Bethania, katba ki dang leit-phai sha ka 'nongbah, U la thngan. Bad haba U la iöhi na jngai ia uwei u diengdumbur uba don sla, harud lynti, U la wan, iöh tyndi-tynda Un shem eiei ha u. Bad haba U la poi ha u, Um shem eiei lait-tang ki sla: namar kam dei ka por soh-dumbur. Bad U la ong ha u:

“Junom yn ym don shuh uban bam-soh na me!”

Bad ki synran jong U ki la iöhsngew. Te uta u dieng-dumbur u la tram shisyndon.

241. U Krist U beh na tempel ia ki nongdie-nongthied.

Mt. 21:12-13. Mk. 11:15-19. Lk. 19:45-48

Bad ki la poi ha Jerusalem. Bad haba U la rung hapoh tempel, U la sdang ban beh noh ia kiba iädie iäthied ha ka tempel, bad U la pyn-

kyllon ia ki miej jong ki nongiapeiñ-sbai, bad ia ki jynshong jong kito kiba die paro. Bad Um shym la shah iano-iano ruh ban rah khiew lyngba ia ka tempel : bad U la hikai, U ong ha ki :

“Ym shym la thoh (Is. 56:7): Ba ia ka ing jong Nga yn khot ka ing jingduai ia ki jait bynriew baroh? Phi pat phi la pynlong ia ka ka krem ki nongtuh.” (Jer. 7 : 11).

Haba ki rangbah lyngdoh bad ki Nongthoh bad ki tymmen-ki-san jong u paidbah ki la iohsngew ia kata, ki la wad-lad kumno ban pyniap noh ia U; namar ki la sheptieng ia U bad kim shem satia aïu ba kin leh ia U, naba u paidbah baroh u sngewphylla ia ka jinghikai jong U. Bad U la hikai mau ka sngi ha ka tempel. Bad haba la premmiet, U mih noh na ka nongbah.

242. Ki jentil kiba kwah ban iohi ia u
Krist. *Ioan. 12:20-36.*

Te la don katto katne ki jentil napdeng kito kiba la wan ban mane ha ka sngi jingkhawai. Kine, namarkata, ki la wan ha u Philip, uba na Bethsaida jong ka Galileia, ki la kyrpad ia U ki ong :

“Ko kynrad, ngi kwah ban iohi ia u Jisu.”

U Philip u leit bad u iathuh ha u Andrias, u Andrias pat bad u Philip ki la iathuh ha U Jisu. Hynrei u Jisu U la phai-ktien ia ki, U ong :

“Ka por ka la poi ba yn pyndon-burom ia U Khun u briew. Shisha, shisha, Nga ong ha phi, lynda u phniang jong u kew uba hap ha ka khyn-dew u iap, u sah tang marwei hi. Hynrei lada u

ïap, u sei-soh shibun. Uta uba ïeid ïa la ka jingim, un duh ïa ka : bad uta uba ïsih ïa la ka jingim ha kane ka pyrthei, u ri ïa ka sha ka jingim bymjukut. Lada uno-uno u shakri ïa Nga, to un bud ïa Nga : bad hangta haba don ma-Nga, u shakri jong Nga ruh un don. Lada uno-uno u shakri ïa Nga, ïa u, U kpa jong Nga Un pyndonburomsurom. Mynta ka mynsiem jong Nga ka khuslai. Te Ngan ong aïu? 'Ko Pa, pyllait ïa Nga na kane ka por? Hynrei Nga la wan khnang na ka bynta kane ha kane ka por. Ko Pa, to pyndon-burom ïa ka kyrteng la jong."

Kumta ka sur ka la wan na bneng :

"Nga la pyndon-burom ïa Ka, bad Ngan pyn-don-burom biang."

Namarkata uta u paidbah uba la ïeng bad la ïohsngew, u la ïa-ong ba la kyrhuh u pyrthat.

Kiwei pat ki la ong :

"U' Angel u la kren ha U."

U Jisu U la phai-ktien bad U la ong."

"Kane ka sur ka wan, ym na ka bynta jong Nga, hynrei na ka bynta jong phi. Mynta ka long ka jingbishar ïa kane ka pyrthei : mynta ïa u syiem jong kane ka pyrthei yn shop noh shabar. Nga pat, lada kyntiew ïa Nga na ka khyndew, Ngan khring lut sha lade ïa kiei-kiei baroh."

(Te U la ong ïa kane, u saham ba Un ïap ka jingïap kaba kumno); u paidbah u la jubab ïa U :

"Ngi la ïohsngew na ka aïñ, (Ps. 109 : 4 ; Es. 37 : 25; Dan. 2 : 44; 7 : 14.) ba u Krist U ïai-sah junom; kumno Me pat Me ong : 'Dei ban kyntiew ïa U Khun u briew? U-ei Une u Khun u briew?"

Namarkata u Jisu U la ong ha ki :

"Sa khyndiat por ka jingshai ka don bad phi.

To ïaid katba phi dang don ka jingshai, ba ka jingdum kan ym lap ïa phi; bad uta uba ïaid ha ka jingdum, um tip shano u poi. Katba phi dang don ka jingshai, to ngeit ha ka jingshai, ba phin dup long ki khun ka jingshai."

U Jisu U la kren ïa kine kiei-kiei; bad U la leit noh, bad U la buhrieh ïa lade na ki.

3. Ka sngi balai jong ka taïew, 12 tarik u bnai Nisan.

243. U dieng-dumbur ba-tram. Ka bor jong ka jingngeit bad jong ka jingduai.

Mt. 21:20-22. Mk. 11:20-26.

Bad haba ki la ïaid lyngha mynstep, ki la ïohi ïa u dieng-dumbur ba u la tyrkhong naduh tynrai. Haba ki synran ki la ïohi ki la lyngngoh, ki ong :
"Kumno u la tram shisyndon?"

Te u Petrus haba u la kynmaw, u la ong ha U :
"Ko Nonghikai, khmih, u dieng-dumbur uba Me tim, u la tram."

Bad u Jisu U phai-ktien, U ong ha ki :

"To don ïa ka jingngeit jong u Blei. Shisha Nga ong ha phi, lada phin don ka jingngeit, bad phin ym artatien, phin ym leh tang ïa kaba la jia ha u dieng-dumbur, hynrei uno-uno uban ong ha une u lum : 'To kynriah bad to noh ha duriaw,' bad un ym artatien ha la ka dohnud, hynrei un ngeit ba kat kaba un ong kan long, kan long ha u. Namarkata, Nga ong ha phi, kiei-kiei baroh kat ki-

ba phi pan da kaba duai, to ngeit ba phin ioh, bad kin poi ha phi. Bad haba phin ieng ban duai, to map, lada phi don eiei pyrshah ia uno-uno, ba u Kpa jong phi ruh, Uba ha bneng. Un dup map ia ki pop jong phi."

244. "Da ka bor aïu,"

Mt. 21:23-27. Mk. 11:27-33. Lk. 20:1-8.

Bad ki la wan biang sha Jerusalem. Te haba U la rung hapoh ka tempel bad U la dang hikai ia u paidbah bad ialap ia ka Gospel, ki rangbah lyngdoh bad ki Nongthoh ryngkat bad ki tymmen-ki-san ki la iawan ha U, ki ong :

"To iathuh ia ngi, da ka bor aïu Me leh ia kine kiei-kiei? Bad mano ba la ai ha Me ia kane ka bor?"

U Jisu U phai-ktien, U la ong ha ki :

"Nga ruh Ngan kylli ia phi kawei ka jingkylli; ia kaba lada phin jubab ia Nga. Nga ruh ngan iathuh ia phi da ka bor aïu Nga leh ia kine kiei-kiei. Nangno ka baptisma jong u Ioannis ka la long? Na bneng, ne na ki brieve? Iathuh ia Nga."

Ki pat ki la iasaid para-ki hi, ki ong :

"Lada ngin ong, na bneng, Un ong ha ngi, "Te balei phim ngeit ia u?" Lada ngin ong, na ki brieve, ngi khaweit ia u paidbah : naba baroh ki kheiñ ia u Ioannis kum u nongiathuhlypa."

Bad haba ki la jubab ia u Jisu, ki la ong :

"Ngim tip, nangno."

U ruh U la ong ha ki :

"Nga ruh Ngam iathuh ia phi da ka bor aïu Nga leh ia kine kiei kiei."

245. Ka pharshi shaphang arngut ki khun ba la phah sha ka brisoh. *Mt. 21:28-32.*

“Te phi pyrkhat kumno? Uwei u briew u la don arngut ki khun; bad haba u leit ha u banyngkong, u la ong: ‘Ko khun, khie leit trei mynta ka sngi ha ka brisohwaiñ jong nga.’ U pat u jubab, u ong: ‘Ngam treh.’ Hynrei hadien, u kylla jingmut, u leit. U leit ha uwei pat, u la ong kumjuh; uta u jubab, u la ong: ‘Nga leit, kynrad’ bad um shym leit: uno na kita arngut u la leh ia ka mon jong u kpa?”

Ki la ong ha U:

“U banyngkong”

U Jisu U la ong ha ki :

“Shisha Nga ong ha phi, ba ki nongap-khrong bad ki nuti kin rung shuwa ia phi ha ka hima bneng. Naba u Ioannis u la wan sha phi ha ka lynti ka hok bad phim shym la ngeit ia u. Hynrei ki nongap-khrong bad ki nuti ki la ngeit ia u; phi pat haba phi iohi, hadien phim shym la kylla jingmut, ba phin dup ngeit ha U.”

246. Ka pharshi shaphang ka bri-soh.

Mt. 21:33-46. Mk. 12:1-12. Lk. 20:9-19.

“Sngap sa kawei pat ka pharshi: La don uwei u briew, u trai-ing uba la thung ia ka bri-soh-waiñ, bad u la ker sawdong ia ka da ka jynker, bad u la tih ha ka kawei ka kor-khemsoh bad u la tei ka kut, bad u la ai-wai ha ki nongrep: bad u la leit noh sha kawei ka ri. Hynrei haba ka por-soh ka la jan, u la phah ia la u shakri sha ki nongrep,

ba un leit shim ia ki soh jong ka na kita ki nongrep. Maki pat ki la shim ia u, ki la shoh bad ki la phah thylli. Te u la phah biang sha ki da uwei pat u shakri; bad ki la pynmynsaw ia u na ka khlieh, bad ki la leh ibeiñ bad ki la phah thylli. Te u la phah biang sa da uwei pat, bad ki la pyn-iaap ia u. Te u la phah biang sa da kiwei pat ki shakri, kham bun ban ia kiba mynshuwa : bad kita ki nongrep ki la ktah-kti ia ki shakri jong u, ki la shoh ia uwei, ki la pyniaap ia uwei bad ki la lynthem-maw ia uwei pat. Khatduh khatwai, uta u trai-brisoh, ba u don sa uwei u khun ba u ieid thepmynsiem, u la phah sha ki ia la u khun, u ong : 'Kumno ngan leh? Ngan phah ia u khun baieid jong nga. Lehse haba kin iohi ia u, kin burom ia u.' Hynrei kita ki nongrep haba iohi ia u khun ki la ong paraki hi: 'Une u long u nongioh-pateng, ia, ngin pyniaap ia u, ba ka jingioh-pateng kan dup long ka jong ngi.' Bad haba ki la kem ia u, ki la shop ia u shabar ka brisoh, bad ki la pyn-iaap ia u. Namarkata haba uta u trai brisoh un wan, un leh aïu ia kito ki nongrep? Un wan, bad un pynjot ia kine ki nongrep bad un ai ia ka brisoh ha kiwei pat, kiban ai ha u ia ki soh ha ka porsoh."

Haba iöhsngew ia kata, ki la ong ha U :

"U Blei Un ym ai kumta."¹

Ma-U pat haba U peit ia ki; U ong:

"Te ka jynthoh aïu kane? Phim pat ju pule ha ki jynthoh (Ps. 117:22-23): 'U maw ia uba ki

(1) Ki Ju ki la sngewthuh ba kane ka pharshi ka thew ia ki hi. Dei maki bad ki longshuwa jong ki kiba la pyniaap ia ki nong-iaathuhlypa, ki shakri jong u Blei.

nongtei ki la kyntait, ia une hi la pynlong u khlieh jong ka dong? U Trai U la leh ia kane; bad ka long ka baphylla ha ki khmat jong ngi.' Namar-kata Nga ong ha phi, ba yn shim noh na phi ia ka hima jong u Blei bad yn ai ha ka jait bynriew ba pynseisoh ia ka. Bad uno-uno uban hap ha une u maw, un pait: hynrei ha uba un hap, un pynlwet thiaw."

Bad haba ki rangbah lyngdoh bad ki Pharisi bad ki Nongthoh ki la iohsngew ia ki pharshi jong U, ki la tip ba U kren shaphang jong ki. Bad haba ki la wad-lad ban kem ia U, na kata hi ka por, ki la khaweit ia ki paidbah, naba ki kheifn ia U kum u Nongiathuhlypa.

247. Ka pharshi shaphang ka jingkhawai shong-kurim jong u khun syiem. *Mt. 22:1-14.*

U Jisu U phai-ktien, U la kren biang ha ki da ki pharshi, U ong:

"Ka hima bneng ka syriem ia uwei u syiem uba pynlong ka jingkyntiew-kurim ia la u khun. Bad u la phah ia la ki shakri ban khot sha ka jingkyntiew-kurim ia kito kiba la wer, bad kim treh wan. U la phah biang sa kiwei pat ki shakri, u ong: 'To ong ha kito kiba la wer: Hakhmih, nga la khreh ia ka jingkhawai jong nga, la pyniap ia ki masi jong nga bad ia ki mrad ba la pynsngaid, bad baroh la khreh: Ale sha ka jingkyntiew-kurim.' Ki pat kim shym suitfiew, ki la leit noh uwei sha la bri, uwei pat sha la ka khai-pateng. Kiwei pat ki la kem ia ki shakri jong u, ki la leh i-beifn bad ki la pyniap ia ki. Haba u syiem

u la iöhsngew, u la bitar bad da kaba phah ia la ki shipai, u la pynduh khoit ia kita ki nongpyniap-briew, bad u la thang ia ka shnong jong ki. Nangta u la ong ha ki shakri: 'Ia ka jingkyntiew-kurim, hooid la khreh, hynrei kita ia kiba la wer, kim long kiba dawa. Kumta to leit sha ki lad bad kat ia kiba phi shem, to khot sha ka jingkyntiew-kurim. Bad ki shakri jong u ki la leit sha ki lynti, bad ki la lum baroh kat ia kiba ki la iakynduh, ki basniew bad ki babha; bad ka jingkyntiew-kurim ka la khapngiah da kiba iashong-bam. Te u syiem u la rung ban peit ia kita kiba shong-bam, bad u la iöhi hangta ia u briew ubym shym kup ia ka jaiñkup kyntiew-kurim. Bad u la ong ha u: 'Ko lok, kumno me rung hangne khlem don jaiñ-kup kyntiew-kurim?' Hynrei u la sngap la ka sngap. Te u syiem u la ong ha ki shakri: 'To khum ia u bad kti bad kjat, to bret ia u ha ka jingdum ba habar; hangta kan long ka jingiam bad ka jingkyriyat bniat. Naba shibun la khot, hynrei khyndiat la jied."

248. Ka khajna ha u Kaiser.

Mt. 22:15-22. Mk. 12:13-17. Lk. 20:20-26.

Te ki Pharisi ki la leit noh, ki la iasylla ban dup iöh kem-daw ia U na ka jingkren jong U, ba kin iöh aiti ia U ha ka aiñ bad ka bor jong u lyngskor. Bad katba ki nang-iathap, ki la phah sha U ia ki synran la jong lem bad ki Herodian, ki nongsyntiat, kiban leh mynleh 'riewhok ia lade. Bad ki la kylli ia U, ki ong:

"Ko Nonghikai, ngi tip ba Me long u bashisha, bad Me kren bad Me hikai ia kaba dei, bad Me

hikai ia ka lynti jong u Blei ha ka jingshisha bad ba Mem ñiew-shilliang-khmat iano-iano ruh : namar Mem suidkhai ia ka khmat jong ki briew. Iathuh ia ngi, namarkata, kumno Me pyrkat, ka bit ne em ba ngin siew-khajna ha u Kaisar?"

Hynrei u Jisu U tip ia ka jingsniew jong ki, U la ong :

"Ko arsap, balei phi tynjuh ia Nga? Pyni ha Nga ia ka sbai khajna."

Te ki la wanlam ha U ia ka denar. Bad u Jisu U la ong ha ki:

"Kane ka dur bad ka jingthoh jong-no?"

Ki la ong ha U:

"Ka jong u Kaisar."

Te U la ong ha ki:

Namarkata, to ai ha u Kaisar ia kiei kiei kiba dei ki jong u Kaisar : bad ha u Blei, ia kiei-kiei kiba dei ki jong u Blei."

Te haba iohsngew ia kane, ki la sngewphylla ia ka jubab jong U, bad kim shym lah kem-daw ia ka ktien jong U hakhmat u paidbah, bad ki la sngap jar. Bad haba ki la iehnoh ia U, ki la leit noh.

249. Ka jingkylli ki Sadusi shaphang ka jingmih-pat. Mt. 22:23-33. Mk. 12:18-27. Lk. 20:27-40.

Ha kata ka sngi, katto-katne na ki Sadusi, kiba ong ba ym don jingmih-pat, ki la wan ha U bad ki la kylli ia U, ki ong :

"Ko Nonghikai, u Moses u la thoh ha ngi (Deut. 25 : 5-6) : 'Lada u hymmen jongno-jongno uba don ka tnga u iap noh bad une um don khun, u

para jong u un shim ia ka tnga, bad un pynmih symbai ia la u hymmen.' Te la don hynñiew ngut shipara hapteng jong ngi : bad u banyngkong u la shong-kurim bad u la iap khlem khun, bad u la iehnoh ia la ka tnga ha la u para. Bad uba bud u la shongkurim ia ka, bad u ruh u la iap khlem khun. Bad u ba-lai u la shim ia ka. Bad ha kajuh ka rukom baroh hynñiew ngut, bad kim shym iohkhun, bad ki la iap. Khatduh-khatwai kata ka briew ruh ka la iap. Namarkata, ha ka jingmihpat kan long ka tnga jongno na ki? Namar baroh hynñiew ngut ki la ioh ia ka."

Bad u Jisu U la ong ha ki :

"Te kumta hato phim bakla, naba phim tip ia ki jynthoh, lymne ia ka bor jong u Blei? Ki khun jong kane ka pyrthei ki kyntiew-kurim, bad ki pynkyntiew-kurim : hynrei kito ia kiba yn ñiew ba ki dawa ia kata ka pyrthei bad ia ka jingmihpat na ki baiap, kin ym pynkyntiew-kurim, lymne kyntiew-kurim. Namar kin ym lah shuh ban iap : naba ki iaryngkat ia ki angel ha bneng, bad ki long ki khun jong u Blei, ba ki long ki khun jong ka jingmihpat. Te ba ki baiap ki mihpat da shisha, u Moses u la pyni ha uta u ñiutshiah, mynba u khot ia u Trai : U Blei jong u Abraham, bad u Blei jong u Isaak, bad u Blei jong u Jakob (Eks. 3 : 6). Naba Um long u Blei jong ki baiap, hynrei jong ki ba-im ; namar baroh ki im ha U."

Te katto katne na ki nongthoh ki phai-ktien, ki la ong ha U :

"Ko Nonghikai, Me la kren ia kaba dei."

Naduh kata kim nud kylli eiei shuh ia U.

250. Ka hukum bakhraw.

Mt. 22: 34-40. Mk. 12: 28-34.

Hynrei ki Pharisi, haba ki iöhsngew ba U la pynduh-nia ia ki Sadusi, ki la ialum lang. Te uwei na ki Nongthoh, u 'riew-said uba la iöhsngew ia kiba ki iasaid, bad uba tip ba U la jubab bha ia ki, u la wan, u tynjuh ia U, u la kylli ia U ;

“Ko Nonghikai, kano ka hukum bakhraw tam ha ka aiñ bad ka banyngkong na baroh ?

U Jisu U la jubab ia u :

“Ka banyngkong na ki hukum baroh ka long ; ‘To sngap, ko Israel ; u Trai u Blei jong me U long Uwei u Blei, bad men iëid ia u Trai u Blei jong me naduh ka dohnud jong me baroh, bad naduh ka mynsiem jong me baroh, bad naduh ka jingmut jong me baroh, bad naduh ka bor jong me baroh.’ (Deut. 6 : 5). Kane ka long ka hukum bakhraw tam bad ka banyngkong. Ka ba-ar pat, ka syriem ia kane : ‘Men iëid ia la u paramarjan kumba ia lade hi.’ Ha kine ki hukum artylli, ka snoh ka aiñ baroh bad ki nongïathuhlypa.”

Bad uta u Nongthoh u la ong ha U :

“Ñiuma, ko Nonghikai, Me la ong ka bashish-a, ba don uwei u Blei, bad ym don uwei pat lait na U. Bad ba yn iëid naduh ka dohnud baroh, naduh ka bor-pyrkhat baroh, bad naduh ka mynsiem baroh, bad naduh ka bor baroh ; bad ban iëid ia u paramarjan kumba ia lade hi, ka long kham khraw ia ki jingainguh-thang bad ki jingknia baroh.”

Bad haba u Jisu U iöhi ba u la jubab beit bha U la ong ha u :

"Mem jngai na ka hima jong u Blei."

Bad naduh kata ym don ba nud kylli shuh ia U.

251. U Krist U long u Khun bad u Trai jong u Dabid. *Mt. 22:41-46. Mk. 12:35-37.*

Lk. 20:41-44.

Katba ki Pharisi ki dang ialang lang, u Jisu Uba dang hikai ha ka tempel U la kylli ia ki, U ong :

"Phi pyrkhat kumno shaphang u Krist : U dei u Khun jongno ?"

Ki la ong ha U :

"Jong u Dabid."

U la ong ha ki :

"Kumno pat u Dabid hi da u mynsiem, u khot Trai ia U, u ong ha ka kitab ki Salm : (*Ps. 109 : 1*) U Trai u la ong ha u Trai jong nga, to shong ha kamon jong nga, haduh ba ngan da buh ia ki nongshun jong me ka jingih-kjat jong Me. Te lada u Dabid hi u khot ia U 'u Trai', kumno U long u Khun jong u?"

Te ym shym don ba lah ban jubab ia U shi-kyntien ruh : bad naduh kata ka sngi hi ym shym don bashlan kylli shuh ia U. Bad u paidbah byllien u la sngap sngewbha ia U.

252. Sumar na ki Nongthoh bad ki Pharisi.

Mt. 23:1-36. Mk. 12:38-40. Lk. 20:45-47.

Nangta u Jisu U la kren ha ki paidbah bad ha la ki synran, U ong :

"Ki Nongthoh bad ki Pharisi ki la shong ha ka

khet jong u Moses. Namarkata ia kiei-kiei baroh ba kin ong ha phi, to sumar bad to leh; hynrei wat leh katkum ki kam jong ki: naba ki ong, bad kim leh. Naba ki teh-ki-khum ki jynkit ki bakhia, bad bym lah kit, bad ki pynkit-pynbah ha tyr-peng kiwei; hynrei kim treh ban pynkhih ia ki da ka shynriah'ti la jong. Hynrei ia ki jingleh-jing-kam la jong baroh ki leh ba yn dup iohi ki briew: namar ki pyniar ia la ki philakteria¹ bad ki pyn-heh ia ki rymiang jaiñ bad ki kwah ban iaid pyn-noh jaiñkup. Bad ki ieid ia ki jaka-shong banyng-kong ha ki jingkhawai, bad ia ki khet banyngkong ha ki Sinagog, bad ia ki jingai-khublei ha ki jaka iew, bad ba ki briew kin khot Rabbi ia ki. Hynrei maphi wat kwah ba yn khot rabbi: naba u Nong-liikai jong phi U long uwei, bad phi baroh khoit phi ialong shipara. Bad wat khot kpa iano iano ha ka pyrthei, naba u Kpa jong phi, Uba ha bneng U long Uwei. Lymne shah khot nonghikai:² naba u Nonghikai jong phi U long Uwei, u Krist. U bakhraw tam na phi un long u shakri jong phi. Hynrei ia uto uba pynkhraw ia lade yn pynrit, bad ia uto uba pynrit ia lade, yn pynkhraw. Hynrei kordit ia phi ki Nongthoh bad ki Pharisi ba-arsap, naba phi khang ia ka hima bneng ha ki briew! namar phi ia lade phim treh rung, bad ia kito kiban rung phim shah rung. Kordit ia phi ki Nongthoh bad ki Pharisi ba-arsap, naba phi bam-duh ia ki

(1) Kine ki long ki kynja kot-snieh ha kiba la thoh ia ki dkhot na ka Jynthoh Bakhuid. Ki Pharisi ki deng ia kine ha shyl-langmat bad ha ka ksangti kadiang ban pyni ba ki long kiha shongshit ha ka aiñ.

(2) Uban hikai ne ialam.

ing jong ki 'riewkynthei, da kaba duai ki jingduai bajrong! Na ka bynta kane phin pdiang ka jingbishar ba kham jur. Kordit ia phi ki Nongthoh bad ki Pharisi ba-arsap, naba phi leit kylleng sawdong ka duriaw bad ka ryngkew ban pynkylla-niam ia uwei, bad ynda u la kylla, phi pynlong ia u, u khun ka dujok arshah palat ia phi! Kordit ia phi ki nongialam bamatlah, kiba ong: 'Uno-uno uban smai da ka tempel, kam long eiei; hynrei uta uban smai da ka ksiar jong ka tempel, u dei ban pyndep. Ko biej bad ko matlah; hato kano kaba kham khraw, ka ksiar ne ka tempel kaba pynkyntang ia ka ksiar? 'Bad uno-uno uban smai da ka duwan, kam long eiei; hynrei uno-uno uban smai da ka jynai, kaba don halor jong ka, u dei ban pyndep.' Ko matlah, hato kano kaba kham khraw, ka jynai ne ka duwan kaba pynkyntang ia ka jynai. Namarkata, jar uba smai da ka duwan, u smai da ka bad da kiei-kiei baroh kiba don halor jong ka. Bad uno-uno uban smai da ka tempel u smai da ka, bad da unto uba shong ha ka. Bad jar uba smai da ka bneng, u smai da ka khet jong u Blei, bad da Uto Uba shong halor jong ka. Kordit ia phi ki Nongthoh bad ki Pharisi ba-arsap, kiba siew ia kaba shiphew jong u pudina, bad u sob bad u jira, bad phi ieh-noh ia kiei-kiei ba kham kongsan jong ka aifn, ka jingbishar, ka jingisynei bad ka jingngeit! Ia kine kiei-kiei la dei ban leh, bad ia kito ym dei ban pep. Ko nongialam bamatlah, kiba jiar ia u mait, hynrei kiba nguid ia ka ut. Kordit ia phi ki Nongthoh bad ki Pharisi ba-arsap, naba phi pynkhuid ia kaba shalor jong ka khuri bad ka pliang, hynrei hapoh phi dap da ka jinglute bad ka jingbym-khuid! Ko Pharisi bamatlah, to pynkhuid shuwa ia

kaba shapoh jong ka khuri bad jong ka pliang, ba kaba shalor kan dup khuid. Kordit ia phi ki Nongthoh bad ki Pharisi ba-arsap, naba phi syriem ia ki jyntep ba la pynlieh, kiba shabar ki itynnat ha ki briew, hapoh pat ki dap da ki shyieng jong ki baiap, bad ka jingjakhlia baroh! Kumjuh phi ruh phi paw ha ki briew, kum ki bahok: hapoh pat phi dap da ka jingarsap bad ka pop. Kordit ia phi ki Nongthoh bad ki Pharisi ba-arsap, kiba tei ia ki jyntep jong ki nongiathuhlypa, bad ohshrong-ohshrup ia ki mot-jyntep jong ki bahok, bad phi ong: 'Ba ngin da la don ha ka por jong ki kpa jong ngi, ngin ym da la long ki nongioh-bynta jong ki ha ka snam jong ki nongiathuhlypa! Kumta phi long ki sakhi ia lade hi, ba phi long ki khun jong kito kiba la pyniap ia ki nongiathuhlypa. Maphi pat, to pyndap ia ka jingthew jong ki kpa jong phi. Ko bseiñ, ko khun ko ksiew ki 'seiñpuh, kumno phin phet-ïap na ka jingbishar ka dujok? Namarkata, khmih, Nga phah ha phi ki nongiathuhlypa, bad ki 'riewstad bad ki Nongthoh; bad don na ki kiba phin pyniap bad sahnarphna, don na ki kiba phin sympat ha ki Sinagog jong phi, bad phin behbeiñ na kawei ka shnong sha kawei ka shnong; ba ka snam bahok baroh, kaba la pynphlei halor ka khyndew, naduh ka snam jong u Abel bahok haduh ka snam jong u Sakharias, u khun jong u Barakhias, ia uba phi la pyniap hapdeng ka tempel bad ka duwan, kan theh l-alor jong phi. Shisha Nga ong ha phi, kine kiei-kiei baroh kin wan ha kane ka pateng."

**253. Ka jingiathuhlypa shaphang ka jingjot jong
ka Jerusalem. *Mt. 23: 37-39.***

"A Jerusalem, Jerusalem, mapha kaba pyniäp
ia ki nongiathuhlypa, bad kaba lynthem-maw ia
kito kiba la phah ha pha, katno sien Nga la kwah
ban kdup ia ki khun jong pha, kumba ka syiar ka
kdup ia la ki khun hapoh thapniang bad pham
treh? Hakhmih, ia ka ing jong phi yn iehnoh
kynjah ha phi. Naba nga ong ha phi, ba naduh
mynta phin ym iohi shuh ia Nga, tat-ynda phi
ong: 'Suk Uta 'Uba wan ha ka kyrteng jong u
Trai."

**254. Ka shiteng-peisa jong ka 'riewkynthei.
*Mk. 12:41-44. Lk. 21:1-4.***

Te katba u Jisu U dang shong pyrshah ia ka
synduk-kynshew, U la iohi kumno u paidbah u
noh-sbai ha kata ka synduk-jingkynshew, bad
bun ki bariewspah ki la noh shibun. Hynrei haba
kawei ka 'riewkynthei baduk ka la wan, ka la thep
artylli ki shiteng-peisa kiba long shipeisa. Bad ha-
ba U la khot lang ia la ki Synran, U la ong ha ki:

"Shisha Nga ong ha phi, ba kane ka 'riewkyn-
thei baduk ka la thep kham bun ia kito baroh
kiba la thep ha ka synduk-jingkynshew. Naba ba-
roh na ki, ki la thep na ka jingpahuh-pahai la
jong, kane pat na ka jingkyrduh la jong, ka la
noh baroh katba ka la don la ka jingim baroh."

255. Ka jingbymngeit jong ki Ju. Ioan. 12:37-50.

Pynban la U la leh katta ki kam-phylla ha khmat jong ki, kim shym la ngeit ia U: ba yn pynurlong ia ka ktien jong u Isaias Nongiathuh-lypa, kaba u la ong: (53-1)

“Ko Trai, mano ba la ngeit ia ka jingpynbna jong ngi? Bad hano la pynpaw ia ka ksangti jong u Trai?”

Namarkata kim lah ban ngeit, naba u Isaias u ong biang: (Is. 6:9-10).

“U la pynmatlah ia ki khmat jong ki, bad U la pyneh ia ka dohnud jong ki, ba kin ym iohi da la ki khmat, bad shemphang da la ka dohnud, bad ba kin dup kylla, bad Ngan ioh pynkoit ia ki.”

U Isaias u la ong ia kine kiei-kiei mynba u la iohi ia ka burom jong U bad la kren shaphang jong U.

La katta ruh, bun na ki rangbah ki la ngeit ha U; hynrei na ka daw jong ki Pharisi kim shym la pynpaw, khnang ba yn ym beh noh ia ki na ka Sinagog. Naba ki la ieid ia ka burom-briew palat ban ia ka burom-Blei. Hynrei u Jisu U la pyrta bad U la ong:

“Uta uba ngeit ia Nga, um ngeit ia Nga, hynrei ia Uta Uba la phah ia Nga. Bad jar uba iohi ia Nga, u iohi ia Uta Uba la phah ia Nga. Ma-Nga ka Jingshai, Nga la wan ha ka pyrthei, ba baroh uba ngeit ha Nga, un ym sah ha ka jingdum. Bad lada uno-uno u iohsngew ia ka ktien jong Nga, bad um pyrwa, Nga Ngam bishar ia u; naba Ngam shym la wan ban dup bishar ia ka pyrthei, hynrei ban dup pynim ia ka pyrthei. Jar uba kyntait-beifi ia Nga, bad ubym pdiang ia ki ktien jong

tait beifi ia Nga, bad ubym pdiang ia ki ktien jong Nga, U don Uwei Uba bishar ia u ; ka ktien kaba Nga la kren, kata keifi kan bishar ia u ha ka sngi khatduh. Naba Nga Ngam shym kren na lade hi, hynrei u Kpa Uba la phah ia Nga, ma-U hi U la ai hukum ia Nga, aiu ban ong bad aiu ban kren. Bad Nga tip ba ka hukum jong U ka long ka jingim bamjukut. Namarkata, kiei-kiei kiba Nga kren, Nga kren thik kumba u Kpa U la ong ha Nga."

4. Ka jingpynshitom bad ka jingiap.

4. Ka jingiathuhlypa shaphang ka jingjot jong ka Jerusalem bad ka jingwai jong ka pyrthei

256. Ka jingjot jong ka tempel. Ha lum Olib.
Mt. 24:1-3. Mk. 13:1-4. Lk. 21:5-7.

Te katba U dang mih noh na ka tempel, don kiba dang iakren shaphang kata ka tempel ba la pynitynnat ia ka da ki maw ki babha bad da ki jyn-ai sngewbha, uwei na ki synran jong U, u ong ha U :

"Ko Nonghikai, hakhmih, ish ki maw aiu bad ki jyntei aiu !"

Bad u Jisu U phai-ktien, U la ong ha u :

"Me iohi ia kine ki jyntei bakhraw baroh ? Shisha Nga ong ha phi, ki sngi kin poi ha kiba yn ym iehnoh hangne ia u maw halor u maw, ia uba yn ym pyntwa."

Bad katba U dang shong halor u lum ki Olib

marpyrshah ia ka tempel, u Petrus, bad u Jakob
bad u Ioannis bad u Andrias ki la kylli jar-jar ia
U :

“Ko Nonghikai, iathuh ha ngi, lano kine kiei-
kiei baroh kin jia? Bad ka dak-ka-shin aïu kan
don, haba yn sdang ban pynurlong ia kine kiei-
kiei baroh? Bad kaba kumno kan long ka dak
jong ka jingwan jong Me bad ka jingwai-noh
jong ka pyrthei?

**257. Ki dak-ki-shin kiban paw shuwa ka jingjot
jong ka tempel bad jong ka nongbah.**

Mt. 24:4-14. Mk. 13:5-13. Lk. 21:8-19.

Te u Jisu U jubab, U la sdang ban ong ha ki:

“To sumar ba yn ym don ba shukor ia phi : na-
ba bun kin wan ha ka kyrteng jong Nga, kin ong:
'Nga dei u Krist bad ka por ka la jan': bad kin
shukor bun ngut. Namarkata, wat leit bud ia ki.
Bad haba phin iöhsngew shaphang ki thma, bad
ki hamsaïa jong ki thma, bad ki jingkhihwin, wat
sngewtriem. Naba kine kiei-kiei ki dei ban jia,
hynrei ka bakut kam pat poi.”

Te U la ong ha ki :

“Naba ka jait-bynriew kan ieng-pyrshah ia ka
jait-bynriew, bad ka hima pyrshah ia ka hima, bad
ki jumai bajur kin khynñiuh ha bun jaka, bad ki
'nemsniew bad ki jingiäp-them, bad ki jingtriem
bashyrkhei na bneng, bad yn don ki dak ki ba-
khrav. Te kine kiei-kiei baroh ki long ki jing-
sdang jong ki jingkluslai. Hynrei to sumar ia
lade. Hynrei shuwa ia kine kiei-kiei baroh, kin

ktah-kti ia phi, bad kin leh-beiñ-leh-khoh, da kaba aiti ha ki Sinagog, bad ki phatok, da kaba patom sha ki syiem bad ki lat na ka bynta ka kyrteng jong Nga. Te kan wan jia ban long ka sakhi ia phi. Namarkata, to buh-hot ha la ki dohnud, ban ym puson lypa kumno ban ai jubab haba kin ialam ia phi sha ka jingbishar bad aiti ia phi, hynrei kat kaba yn ai ha phi ha kato ka por, ia kata phin kren. Naba Ngan ai ha phi ka shyntur bad ka jingstad, kaba ki nongshun jong phi baroh kin ym lah ban ia-aireng bad iasaid-kylliang, naba ym dei maphi kiba kren, hynrei u Mynsiem Bakhuid. Bad yn aiti ia phi da ki kmie-ki-kpa, bad ki hymmen-para, bad ki kur-ki-jait bad ki lok: bad don na phi kiban shah-pyniäp. Bad baroh ki bynriew kin isih ia phi na ka bynta ka kyrteng jong Nga. Hynrei iwei i shñiuh na ka khlieh jong phi in ym duh-ei. Te kumta bun kin thut, bad kin shet-kylla markylliang, bad u hymmen un aiti ia la u para sha ka jingiäp, bad u kpa ia u khun, bad ki khun kin ieng-pyrshah ia la ki kmie-ki-kpa, bad kin pyniäp ia ki. Te bun ki nongiathuhlypa balamler kin mih, bad kin shukor bun ngut. Bad namarba ka pop ka la jyllei, ka jingieid jong ki babun kan pjah. Hynrei uto uban iai-neh haduh ka bakut, uto keiñ un lait-im. Ha ka jingiaishah jong phi, phin ioh ia la ki mynsiem. Bad ia kane ka Gospel jong ka hima, yn ialap ha satlak ka pyrthei, kum ka sakhi ha ki jait-bynriew baroh, bad kumta kan wan ka jingkut."

258. Ka Jingjot jong ka tempel bad ka nongbah. *Mt. 24:15-22. Mk. 13:14-20. Lk. 21:20-24.*

“Te haba phin iöhi ba la ker-kut ia ka Jerusalem da ki kynhun-shipai, to tip keiñ ba ka jing-kynjah jong ka ka la jan. Namarkata, haba phin iöhi ia ka jingijli jong ka jingkynjah, kaba la kren u Daniel Nongiathuhlypa, ba ka ieng ha ka jaka kyntang, ha kaba kam dei ban ieng,—jar uba pule to un sngewthuh— te kito kiba ha Judia kin mat phet-ïap sha ki lum, bad uto uba halor ing, un ym hiar ban shim eiei ruh na la ing; bad uto uba ha lyngkha to un ym kylla-dien ban shim ia la ka jaiñkup. Naba kine ki long ki sngi jong ka jing-pynhiar-kput, ba kiei-kiei baroh kiba la thoh kin urlong. Hynrei kordit ia kiba punkhun, bad kiba ai-buiñ ha kito ki sngi. Hynrei to iaduai, ba kine kiei-kiei kin ym long myntlang ne ha ka sabbat. Naba ha kito ki sngi kin long ki lanot-bah kibym pat ju don naduh ba sdang ka pyrthei, kaba u Blei u la thaw, haduh mynta, lymne kin ym long shuh. Kan long ka jingshipa bakhraw ha ka khyndew bad ka jingbitar-shla ia une u paidbah. Bad kin kyllon da ka syrti waitlam, bad yn ring-mraw ia ki sha ki bynriew baroh. Bad lynda u Trai u la pynlyngkot ia kita ki sngi, yn ym don ka doh kaban lait-im, hynrei na ka bynta kiba la jied ia kiba U la jied, U la pynlyngkot ia kita ki sngi. Bad ki jentil kin iuh-roit ia ka Jerusalem, haduh ban da la pyndep-pynbiang ia ki sngi-ki-ia jong ki bynriew.”

259. Ki dak kiban paw shuwa ka jingwan ba-ar jong u Krist.

Mt. 24:23-29 Mk. 13:21-25. Lk. 21:25-26.

“Kumta lada uno-uno un ong ha phi: ‘Peit, u Krist u don hangne, ne hangtai’: wat ngeit satia. Naba kin mih ki krist lamler bad ki nongïathuhlypa balamler, bad kin pyni ki kam-bah bakhraw bad baphylla, haduh ban shukor (lada lah), wat ïa kiba la jied. Hakhmih Nga la ïathuhlypa ïa phi. Namarkata, lada ki ong ha phi: ‘Hakhmih, u don ha ri kynjah,’ wat ngeit satia: ‘Hakhmih shapoh jlang,’ wat ngeit satia. Naba kumba ka leilieh ka mih na mihngi, bad ka thaba shaduh sepngi, kumta ruh kan long ka jingwan jong u Khun u briew. Kat sha-ban don ka met, shata ki pukni ruh kin ïalang. Te shen hadien ki jingla-not jong kito ki sngi, kin don ki dak-ki-shin ha ka sngi bad ha u bnai bad ha ki khlur, ka sngi kan dum thlip, bad u bnai un ym shat la ka jingshai bad ki khlur kin hap na bneng. Bad ha ka khyn-dew, ka jingjynjar jong ki bynriew, na ka jingkul-mar jong ka jingkyrhuh jong ka duriaw, bad ki jingat-phyllung; ki briew kin ïap-ler na ka jing-khaweit bad na ka jingkhmih-lynti ïa kito kiei-kiei kiban tyллеp ïa ka pyrthei baroh. Bad yn pyn-khih ïa ki bor jong ki bneng.”

260. Ka Jingwan jong u Khun u briew.

Mt. 24:30-31. Mk. 13:26-27. Lk. 21:27.

“Te nangta kan paw ha bneng, ka dak jong u Khun u briew: bad hangta baroh ki jait-bynriew jong ka pyrthei kin ïam; bad kin ïohi ïa u Khun

u briew ba U wan ha ki lyoh jong ka bneng, da ka bor bakhraw bad ka burom. Bad Un phah ia la ki Angel bad ka turoi bad ka sur bajam: bad kin lum lang na ki saw lyer,¹ ia kiba la jied jong U, na bakut sha bakut jong ki bneng."

261. Ka por jingjot jong ka Jerusalem.

Mt. 24:32-35. Mk. 13:28-31. Lk. 21:28-33.

"Te haba kine kiei-kiei ki sdang ban jia, to khmied bad to mied la ki khlieh: naba ka jingsiew-spah ia phi ka la jan."

Bad U la kren ha ki kawei ka pharshi:

"Te to hikai ia ka pharshi na u diengdumbur. Haba ka tnat jong u mynta ka khie-lung, bad u seisla, phi tip ba ka lyür ka la jan. To khmih ia ki dieng baroh. Haba mynta ki thylleng, phi tip ba ka lyür ka la jan. Kumta phi ruh haba phin iohi ia kine kiei-kiei ba ki jia, to tip ba ka hima jong u Blei ka la jan. Shisha Nga ong ha phi, ba kane ka pateng kan ym leit noh, tat-ynda la pyndep ia kine kiei-kiei baroh. Ka bneng bad ka khyndew kin duh-noh, hynrei ki ktien jong Nga kin ym duh-noh."

262. Ka por jong ka jingwan ba-ar jong u Krist.

Mt. 24:36-41. Mk. 13:32.

"Hynrei shaphang kata ka sngi bad ka por ym don ba tip, wat ki Angel bneng ruh, lait-tang u Kpa hi. Bad kumba la long ha ki sngi jong u Noa. kumta ruh kan long ka jingwan jong u Khun u

(1) Sawdong ka pyrthei.

briew. Namar kumba la long ha kito ki sngi shu-wa ka jingshlei ba ki iabam bad iadih, ba ki ia-kyntiew-kurim bad pynkyntiew-kurim, haduh kato ka sngi ba u Noa u la rung ha ka ing-lieng, bad kim shym la tip tat haduh ynda la wan ka jing-shlei, bad ka la rong noh ia ki baroh: kumta ruh kan long ka jingwan jong u Khun u briew. Te kin don arngut ha ka lyngkha: ia uwei yn shim noh bad ia uwei pat yn iehnoh. Arngut ki kynthei kiba dang tylliat ha u maw-tylliat: ia kawei yn shim noh bad ia kawei pat yn iehnoh."

263. To sharai! Ka pharshi shaphang ka Jynriam bad shaphang u Nongtuh.

Mt. 24:42-44. Mk. 13:33. Lk. 21:34-36.

"Bad to sumar ia lade, ba ioh ki dohnud jong phi ki khia da kaba bam lalot bad da ka jingdih-buaid bad da ki jingkhuslai jong kane ka jingim: bad kata ka sngi ka lap kyndit ia phi. Namar kan wan tyллеp kum ka jynriam ha kito baroh kiba shong ha snieh ka pyrthei baroh. Namarkata, to sharai, naba phim tip ha kano ka por u Trai jong phi Un wan. Hynrei to tip ia kane, ba lada u trai-ing u tip ha kano ka por u nongtuh un wan, un jin da la ap, bad un ym shah ban prong ia la ka ing. Kumta to long maphi ruh kiba la kloi, naba u Khun u briew Un wan ha ka por kaba phim tip. Namarkata, to sharai, da kaba duai man la ka por, ba yn dup fiiew ia phi kiba shonghok ban phet-iap na kine kiei-kiei baroh kiban sa jia bad ban ieng hakhmat jong u Khun u briew."

264. U Shakri ba-iaineh bad u Shakri bymīaine.
Mt. 24:45-51. Mk. 13:34-37.

“Kum u briew uba leit-jingleit u iehnoh ia la ka ing-ka-sem, bad u aiti ha la ki shakri ia ki kam-ki-jam baroh bad u hukum ia u nongap-khyrdop ban sharai. Namarkata, to sharai (naba phim tip lano u trai-ing u wan, janmiet ne shiteng-synñia, ne haba kynih u syiar, ne mynstep;) ioh haba u wan kyndit, u lap ba phi dang thiah. Te ia kaba Nga ong ha phi, Nga ong ha baroh: To sharai. U-ei phi tharai, u dei u shakri uba lah ban shaniah, bad u bastad, ia uba u kynrad jong u u thung halor ka ing-ka-sem la jong, ba un dup ia ha ki ka bam-ka-sa ha ka por? Suk uta u shakri, uba haba u kynrad jong u un wan, un lap ba u leh kumta. Shisha Nga ong ha phi, ba un thung ia u halor kiei-kiei baroh jong u. Hynrei lada uta u shakri basniew un ong ha la ka dohnud: ‘U kynrad jong nga u slem han wan; bad un sdang ban shoh ia la ki parashakri, bad ban iabam iadih ryngkat bad ki babuaid’, u kynrad jong uta u shakri un wan ha ka sngi ba um khmih-lynti bad ha ka por ba um tip, bad un pynkynriah noh ia u, bad un buh ia ka bynta jong u ryngkat bad ki arsap. Hangta kan don ka jingiam bad ka jingkyryiat-bniat.”

265. Ka Pharshi shaphang ki 'theisotti.

Mt. 25:1-13.

“Te ia ka hima bneng yn pynsyriem bad shiphew ngut ki 'theisotti; kiba shim ia la ki sharak, ki leit-tan ia u nongleit-kurim bad ka nongleit-

kurim. Te san ngut na ki ki la long ki babiej, bad san ngut kiba stad. Hynrei kita ki san ngut ki babiej, ki shim ia ki sharak khlem da shim umphniang de; ki bastad pat ki la rah umphniang ha la ki jyndiang lem bad ki sharak. Te haba u nongleitkurim u dier, baroh ki la thiah bad ki la ioh-thiah. Hynrei ynda shiteng-synfia la don ka jingpyrta: 'Khmih, u nongleit-kurim u wan, to leit ia-tan ia u.' Te kumta kita ki 'theisotti baroh ki la khie bad ki la pynkhreh ia la ki sharak. Hynrei kita ki babiej ki la ong ha ki bastad: 'Ia-ai umphniang lem, namar ki sharak jong ngi ki lip noh.' Kita ki bastad ki la jubab, ki ong: 'Lehse ioh ym dap ia ngi bad ia phi, to khie leit sha ki nongdie, bad to thied na ka bynta ia lade.' Hynrei katba ki dang leit-thied, u nongleit-kurim u la wan bad ki-to kiba la khreh ki la rung bad u sha ka jingkyn-tiew-kurim bad la khang noh ia ka jynkhang. Ha kaba khatduh ki la wan kita kiwei pat ki 'theisotti ruh, ki ong; 'Ko trai, ko trai, to plie ia ngi.' Hynrei u jubab, u la ong: 'Shisha nga ong ha phi, ngam ithuh ia phi.' To sharai, namarkata, naba phim tip ia ka sngi lymne ia ka por."

266. Ka Pharshi shaphang ki Talen. Mt. 25:14-30.

"Namar kum u briew uba mih ban leit-jingleit, u khot ia la ki shakri, bad u aiti ha ki ia la ki marki-mata. Bad ha uwei u la ai san talen, ha uwei pat ar, ha uwei pat kawei, ha uwei-pa-uwei katkum ka jingtbith kyrpang jong u; bad u la leit noh bak. Te uta uba ioh san talen u la leit-khai da kita, bad u la iohnong san tylli kiwei pat. Kumjuh ruh uta uba la ioh ar, u la iohnong artylli ki-

wei pat. Hynrei uta uba la ïoh kawei, u leit tih-thliew hapoh khyndew, bad u la buhrieh ïa u sbai jong u kynrad. jong u. Ynda la bun ki sngi-ki-ïa, u kynrad jong kito ki shakri u la wan bad u la pan jingkheifi na ki. Bad uta uba la ïoh san talen u wan, u la wan-rah san tylli kiwei pat, u ong: 'Ko trai, me la ai ha nga san talen, peit nga la ïoh-nong santylli kiwei pat.' U kynrad jong u u la ong ha u : 'Shabas! Ko shakri babha bad ba lah ban shaniah, namarba me la long uba lah ban shaniah ha kiei kiei ki bakhyndiat, ngan buh ïa me halor ki babun, to rung ha ka jingkmén jong u kynrad jong me.' Te uta ruh uba la ïoh ar talen u la wan, bad u la ong: 'Ko kynrad, me la ai ha nga ar talen, khmih, nga la ïohnong artylli kiwei pat.' U kynrad jong u u la ong ha u: 'Shabas! ko shakri babha bad ba-lah ban shaniah, namarba me la long uba lah ban shaniah ha kiei-kiei ki bakhyndiat, ngan buh ïa me halor ki babun; to rung ha ka jingkmén jong u kynrad jong me.' Te uta ruh uba la ïoh shitalen, haba u wan, u la ong: 'Ko kynrad, nga tip ba me long u briew u bapyrkhing; me ot na kaba mem shym la bet, bad me lum na kaba mem shym la phriang; bad, na kaba sheptieng, nga la leit, bad nga la buhrieh ïa ka talen jong me hapoh khyndew: peit, me ïoh la ka jong hi.' Te u kynrad jong u u phai-ktien, u la ong: 'Me u shakri bymman bad jaipdeh, me la tip ba nga ot na kaba ngam shym la bet, bad ba nga lum na kaba ngam shym la phriang; me la dei, namarkata, ban buh ïa u sbai jong nga ha ki nongaisut, kumta haba nga wan ngan dup ïoh ïa la ka jong hi lem bad ka sut. Namarkata, to knieh noh na u ïa ka talen, bad to ai ha uto uba don shiphew talen.' Naba ha baroh

uba don, yn ai bad un pahuh-pahai: hynrei ha uto ubym don, wat ia kaba imat ba u don ruh, yn shim noh na u. Bad ia uto u shakri bymlarkam to bret noh sha ka jingdum habar: hangta kan don ka jingiam bad ka jingkyryiat-bniat."

267. Ka jingbishar bakhatduh. *Mt. 25:31-46.*

"Te haba u Khun u briew Un wan ha ka burom baishongkun jong U, bad ki angel baroh lem bad U, hangta Un shong halor ka khet jong ka burom baishongkun jong U. Bad ki bynriew baroh kin ialum hakhmat jong U, bad Un khlad ia ki uwei na uwei pat, kumba u nongap 'langbrot u pynkhlad ia ki 'langbrot na ki blang: bad Un buh ia ki 'langbrot ha kamon la jong, hynrei ia ki blang ha kadiang la jong. Te u Syiem Un ong ha kito kiba don ha kamon jong U: 'Ale, phi kiba la kyrkhu jong u Kpa jong Nga, to shimti ia ka hima ba la khreh lypa ia phi naduh ba seng ia ka pyrthei: Naba Nga la thngan, te phi la ai ia Nga ban bam; Nga la sliang, te phi la ai ia Nga ban di: Nga la long u mynder, te phi la khot-ing ia Nga; u lyngkhuit, te phi la pynkup-pynsem ia Nga: u bapang, te phi la wan jngoh ia Nga: Nga la don ha phatok, te phi la wan sha Nga.' Ynda kumta kito ki bahok kin jubab ia U da kaba ong: 'Ko Trai, mynno ngi la iohi ia Me ba Me thngan, bad ngi la ai-bam ai-sa ia Me: ba Me sliang, bad ngi la ai-dih ia Me? Hato mynno ngi la iohi ba Me long mynder, bad ngi la khot-ing ia Me: ne lyngkhuit, bad ngi la pynkup-pynsem? Ne mynno ngi la iohi ba Me pang, ne ha phatok, bad ngi la wan sha Me?' Te u Syiem Un jubab, Un ong

ha ki: 'Shisha, Nga ong ha phi, katta sien ba phi leh ha iwei na kine ki para barit eh jong Nga, phi leh ha Nga.' Nangta Un ong ruh ha kito kiba ha kadiang jong U: 'Phi kiba la tim, khie leit noh na Nga sha ka ding bymjulip, kaba la khreh na ka bynta u ksuid bad ki angel jong u: Naba Nga la thngan, te phim shym la ai ia Nga ban bam: Nga la sliang, te phim shym la ai ia Nga ban dih. Nga la long u mynder, te phim shym la khot-ïng ia Nga: u lyngkhuit, te phim shym la pynkup-pynsem ia Nga: u bapang, bad ha phatok, te phim shym wan-jngoh ia Nga. Kumta ki ruh kin phai-ktien ia U, kin ong: 'Ko Trai, mynno ngi la iöhi ia Me ba Me thngan, ne Me sliang, ne Me long mynder, ne lyngkhuit, ne u bapang, ne ha phatok, bad ngim shym la shakri ia Me?' Te Un jubab ia ki, da kaba ong: 'Shisha Nga ong ha phi: katta sien ba phim shym la leh ha iwei na kine ki barit, phim shym la leh ha Nga ruh.' Te kine kin leit sha ka jingshitom bymjukut: ki bahok pat sha ka jingim bymjukut."

268. Ka kam jong u Krjist ha kine ki sngi bakhat-duh.
Lk. 21: 37-38.

Bad mynsngi-mynsngi U hikai ha ka tempel; mynmiet-mynmiet pat, U mih noh, U sah ha u lum ba la khot Olib. Bad u paidbah baroh u wan sha U ha ka tempel, dang step phyrngap, ban sngap ia U.

5. Ka sngi ba-saw jong ka taiew, 13 tarik
u bnai Nisan.

269. Ka jingiasylla jong ki Ju bad ka jingshetkyl-
la jong u Judas.

Mt. 26:1-5; 14-16. Mk. 14:1-2;

10-11. Lk. 22:1-6.

Te ka jingkhawai-kpu ba khlem thiat ia kaba, la
khot ka Paskha,¹ ka la long hadien arsngi. Bad
ka la jia, haba u Jisu U la pynkut ia kine ki jing-
kren baroh, U la ong ha la ki synran:

“Phi tip ba sa arsngi kan long ka Paskha, bad
ia u Khun u briew yn aiti noh ba yn sahnarphna.”

Hangta ki rangbah lyngdoh bad ki Nongthoh
bad ki tymmen-ki-san jong u paidbah, ki la ialum
lang ha ing jong u lyngdoh rangbah, uba kyrteng
u Kaiphas. Bad ki la iasylla ban dup ioh pharep
ia u Jisu, bad ban pyniap noh ia U. Hynrei ki la
ong :

“Ym ha ka sngi jingkhawai, ioh kumno-kumno
u paidbah un khihwin.”

Namar ki la sheptieng ia u paidbah. Bad u
soitan u la rung ha u Judas, ia uba la sin u Iskha-
riot, uwei na ki khat-ar ngut. Bad u la leit bad u
la iakren bad ki rangbah lyngdoh bad ki nongphi-
ra, kumno ba un ioh aiti ia U ha ki. Bad u la ong
ha ki :

(1) Kane ka ktien ka mut ka jingiaid-lait. Ka long ka jing-
khawai kaba pynkynmaw ia ka jingiaid jong u Angel uba la pyn-
iap ia ki khun nyngkong jong ki Ejipt, hynrei u la pyllait ia ki
ing jong ki Israel.

"Phin ai aiü ia nga, bad ngan aiti ia U ha phi?"

Haba iöhsngew ia kane, ki la sngewbha bad ki la kular ban ai tyngka ia u. Ki la tyrwa ia u laip Hew sbai rupa. Bad u la mynjur. Bad naduh kata, u la wad-lad ban dup iöh aiti ia U haba ym don u paidbah.

6. Ka sngi basan jong ka taiew, 14 tarik u bnai Nisan.

270. Ka jingpynkhreh ia ka jingkhawai-miet bakhathduh. *Mt. 26:17-19. Mk. 14:12-16.*

Lk. 22:7-13.

Te ha ka sngi banyngkong jong u kpu khlemthiat, haba ki knia ia ka Paskha,¹ ki synran ki ong ha U :

"Hangno Me kwah ba ngin leit pynkhreh ia Me ban bam Paskha?"

Te U la phah arngut na ki synran jong U, u Petrus bad u Ioannis, bad U ong ha ki :

"To leit sha ka 'nongbah; bad hakhmih, haba phi iarung hapoh shnong, uwei u briew uba rah shikum ka um un iakynduh ia phi; to bud ia u sha ka ing kaba u rung. Bad phin ong ha u trai-ing, u kynrad jong kata ka ing: 'U Nonghikai U ong: Ka por jong Nga ka la jan. Hangno kata ka kamra, ha kaba Ngan iöh bam Paskha ryngkat bad la ki

(1) Ia u khun 'langbrot Paskha.

synran?" Te un pyni ha phi kawei ka kamra-bah ba-haneng ba la pynriam-pynbeit: bad to pynkhreh ha kata."

Te ki synran jong U ki la leit, bad ki la poi ha 'nongbah, bad ki la lap kumba U la ong ha ki; ki la leh kumba u Jisu U la bthah ia ki, bad ki la pynkhreh ia ka Paskha.

7. Ka Jingkhawai Paskha bad ka Eukharis Bakhuid.

271. Ka jingsdang jong ka jingkhawai-miet.

Mt. 26:20. Mk. 14:17. Lk. 22:14-18

Te haba la kem-ïongreiñ, U la wan ryngkat bad ki khat-ar ngut. Bad haba ka por ka la poi, U la shong-bam bad ki khat-ar ngut ki Apostol lem bad U. Bad U la ong ha ki:

"Nga la thrang hir hir ban bam ryngkat bad phi ia kane ka Paskha shuwa ba Ngan shah-shitom. Naba Nga ong ha phi, ba naduh mynta Ngan ym bam ia ka haduh ynda la pyndep ia ka ha ka hima jong u Blei."

Bad haba U shim ia ka khuri, U la duai bad U la ong:

"To shim bad to iasam hapteng jong phi. Naba Nga ong ha phi, ba Ngan ym dih na u soh jong u diengwaiñ, haduh ba ka hima jong u Blei kan wan."

272. Ka jingiasaid jong ki Apostol. Lk. 22:24-30.

Te la don ruh ka jingiasaid hapteng jong ki, uno na ki uba i ba u kham khraw. Bad U la ong ha ki :

“Ki syiem jong ki jentil ki leh traikhlieh ia ki; bad ia kita kiba don halor jong ki, la khot ki nonglehbha. Maphi pat ym dei kumta ; hynrei uto uba kham khraw hapteng jong phi, un long kum uba kham rit; bad uto uba long nongia-lam, kum u shakri.¹ Namar uno uba kham khraw, uto uba shong-bam ne uto uba shakri? Ym dei uto u bashong-bam? Hynrei Nga Nga long hapteng jong phi kum uto uba shakri: Phi pat phi long kito kiba la ia-sah bad Nga ha ki jingtynjuh jong Nga. Nga ai ha phi, kumba u Kpa jong Nga U la ai ha Nga, ia ka hima, ba phin dup bam bad dih halor ka miej jong Nga ha ka hima jong Nga: bad dup shong-bishar ha ki khet, ia ki khat-ar jait-Israel.”

273. U Trai U sait-kjat ia la ki synran.

Ioan. 13 : 1-17.

Shuwa ka sngi-khawai Paskha, u Jisu U tip ba ka por jong U ka la poi, ba Un leit noh na kane ka pyrthei sha u Kpa; ynda U la ieid ia la ki jong kiba la don ha ka pyrthei, U la ieid ia ki haduh ka bakut. Bad ynda la dep ka ja-miet, (haba u ksuid u la bsuh ha ka dohnud jong u Judas Iskhariot, u khun jong u Simon, ba un dup die noh ia U) ba U

(1) Na kane ka daw ba u Kpa Bakhuid u khot ia lade, u shakri jong ki shakri u Krist.

tip ba u Kpa U la ai ha U ha ki kti jong U ia ki-ei-kiei baroh, bad ba U la wan na u Blei, bad U leit sha u Blei, U ieng joit na kata ka ja-miet, bad U buh noh ia la ki jaiñkup, bad ynda U la shim ia ka jaiñ-ñiad, U la shympiar ia lade. Hadien ka-ta U la theh-um ha ka dabor, bad U la sdang ban sait ia ki kjat jong ki synran, bad ban ñiad da kata ka jaiñ kaba U la shympiar. Kumta U wan ha u Simon Petrus. Bad u Petrus u ong ha U :

“Ko Trai, ma-Me Me sait ia ki kjat jong nga?”

U Jisu U la jubab, bad U la ong ha u :

“Mem tip mynta ia kaba Nga leh, hynrei men sa tip hadien-habud.”

U Petrus u ong ha U :

“Lano-lano ruh Men ym sait ia ki kjat jong nga.”

U Jisu U la phai-ktien ia u:

“Lada Ngam sait ia me, men ym ioh bynta lem bad Nga.”

U Simon Petrus u ong ha U :

“Ko Trai, ym tang ia ki kjat jong nga, hynrei ia ki kti bad ia ka khlieh ruh.”

U Jisu U ong ha u:

“Uto uba la sum, um donkam shuh lait-tang ba un sum-kjat, hynrei u la khuid baroh. Phi ruh phi long ki bakhuid, hynrei ym baroh.”

“Naba U la tip uei uban die noh ia U; namar-kata U la ong : “Phim long ki bakhuid baroh.”

Te ynda U la lah sait ia ki kjat jong ki, bad la shim ia la ki jaiñ, ynda U la shong biang, U la ong ha ki :

“Phi tip Nga la leh aũ ha phi? Phi phi iakhot ia Nga, Nonghikai bad Trai, bad phi ong kaba dei, namar Nga long shisha. Te lada ma-Nga, u

Trai bad u Nonghikai, Nga la sait ia ki kjat jong phi, phi ruh phi dei, uwei ia uwei pat, ban pyn-sait-kjat. Naba Nga la ai ha phi ka nuksa, ba kumba Nga la leh ia phi, phi ruh to leh kumjuh. Shisha, shisha, Nga ong ha phi: U shakri um long kham khraw ban ia u kynrad la jong: lymne u Apostol um long kham khraw ban ia Uto Uba phah ia u. Lada phi tip ia kine kiei-kiei, phin ioh jingkyrkhu lada phi leh ia ki."

274. U Krist U iathuh mano u nongshetkylla ia U.

Mt. 26:21-25. Mk. 14:18-21.

Lk. 22:21-23. Ioan. 13:18-30.

"Ngam kren shaphang jong phi baroh: Nga ithuh ia kiba Nga la jied: hynrei ba yn dup pyn-dep ia ka jynthoh (*Ps. 40:10*): 'Uto uba bam kpu¹ ryngkat bad Nga, un rah la ka khongdongjat pyrshah ia Nga.' Nga iathuh ia phi mynta, shuwa ba kan jia: ba haba kan wan-jia, phi dup tip ba dei ma-Nga. Shisha, shisha, Nga ong ha phi, uto uba pdiang ia uno-uno ba Nga phah, u pdiang ia Nga: bad uto uba pdiang ia Nga, u pdiang ia Uta Uba la phah ia Nga."

Ynda u Jisu U la lah kren ia kine kiei-kiei, U la dik ha la ka mynsiem; bad U la sakhi skhem, bad U la ong:

"Shisha, shisha, Nga ong ha phi, uwei na phi. uba bam ryngkat bad Nga, un die noh ia Nga. Shisha keiñ, khmih ka kti jong uto ban die noh

(1) Ki Ju ki bamja da u kpu.

ia Nga, ka don bad Nga ha ka miej."

Te ki la sngewsih haduh katta-katta bad ki la sdang, uwei-pa-uwei ban ong:

"Ko Trai, dei manga?"

Hynrei U la phai-ktien bad U la ong:

"Uwei na ki khat-ar ngut, uto uba buh bad Nga ia la ki kti ha ka pliang, uto keiñ un die noh ia Nga. Hooïd, u Khun u briew U leit kumba la thoh shaphang jong U, (*Ps. 40:10*) hynrei kordit ia uto u briew uban die noh ia u Khun u briew. Ka la bha ia uta u briew lada ym shym la kha ia u."

Namarkata, ki synran ki la iapeit uwei ia uwei, ki sngewlyngngoh shaphang jongno U kren. Bad ki la sdang ban kylli para-ki hi, ba dei mano na ki uban leh ia kane. Te la don uwei na ki synran jong U uba shaniah¹ ha ka shadem jong u Jisu, ia uba u Jisu U la ieid. Kumta u Simon Petrus u la kohnguh-khlieh ia uta, bad u la ong ha u:

"Mano? Shaphang jongno U kren?"

Ma-u pat haba u la shaniah ha ka shadem jong u Jisu, u ong ha U.

"Ko Trai, dei mano?"

U Jisu U la jubab :

"Dei uta ha uba Ngan ai shi-lyngkhot u kpu ba la wieh."

Bad ynda U la wieh ia u kpu, U la ai ha u Judas Iskhariot, u khun jong u Simon. Bad hadien kata ka lyngkhot, u soitan u la rung ha u. Bad u Judas, uta uba la die noh ia U, u la ong:

"Ko Nonghikai, dei manga?"

U ong ha u:

(1) Uba shaniah la ka khlieh, u Yoannis.



*"Kane ka long ka Met jong Nga.....Kane ka
long ka Snam jong Nga.To leh ia kane
han kynmau ia Nga."*

"Me la ong."¹

Bad u Jisu U la ong ha u:

"Ia kaba me leh, to leh pynkloi."

Hynrei ym don mano-mano ruh na kita kiba iashongbam uba tip balei U la ong ha u ia kane. Naba don kiba la tharai, namar u Judas u don ia u saipan-tyngka, ba u Jisu U la ong ha u: To thied ia kiei-kiei kiba ngi donkam na ka bynta ka sngi-burom: ne ba un ai eiei ha ki baduk. Kumta ynda u la shim ia kata ka lyngkhot,² ula mih noh shi-syndon. Te ka la long mynmiet.

275. Kaba buh ia ka Eukharis Bakhuid.

Mt. 26:26-29. Lk. 22:19-20. 1 Kor. 11:23-26.

Te katba ki dang iabam, ha kata ka miet ba la die noh ia U, u Trai Jisu U la shim ia u kpu, U la duai bad U la kyrkhu, bad U la kdiah, bad U la ai ha la ki synran, bad U la ong:

"To shim bad to bam. Kane ka long ka Met³ jong Nga, ia kaba la ai na ka bynta jong phi. To leh ia kane ban kynmaw ia Nga."

Kumjuh ruh, haba U shim ia ka khuri, ynda la lah bam, U la duai bad U la ai ha ki, U ong:

"To dih ia kane phi baroh. Naba kane ka long ka Snam jong Nga, jong ka jutang bathymmai ia kaban pynmih na ka bynta kiba bun, namar ka

(1) Imat ia kine ki ktien u Jisu U la shu pasiaw ha u, namar kiwei pat ki synran kim shym la tip.

(2) Ynda u la bam ia uta u lyngkhot kpu ba la ai u Jisu.

(3) Ka doh bashisha jong u Jisu, ym tang ka jingsyriem ba lapher jinglong.

jingmap ia ki pop. To leh ia kane, katta sien kat-ba phi dih, ban kynmaw ia Nga. Bad Nga ong ha phi, ba naduh mynta Ngan ym dih shuh na u soh jong u diengwaiñ, haduh kata ka sngi ba Ngan dih biang ia ka bad phi ha ka hima jong u Kpa jong Nga."

Bad baroh ki la iadih ia ka.

8. Ka ktien bakhatduh jong u Krist ha la ki synran.

276. Ka burom jong u Krist. Ka hukum bathym-mai. *Ioan. 13:31-35.*

Te haba u (Judas) u la leit noh, u Jisu U la ong:
"Mynta la pyndon-burom ia u Khun u briew, bad ia u Blei la pyndon-burom ha U. Lada ia u Blei la pyndon-burom ha U, u Blei ruh Un pyndon-burom ia U ha lade hi, bad Un pyndon-burom ia U shisyndon. Ko khun barit, sa shiphang Nga don bad phi. Phin iawad ia Nga, bad kumba Nga la ong ha ki Ju: 'Sha ba leit ma-Nga, phin ym lah ban wan,' Nga ong ha phi ruh mynta. Nga ai ha phi ka hukum bathymmai: ba phin ia-ïeid markylliang. Na kane ki briew baroh kin tip ba phi long ki synran jong Nga, lada phi ia-ïeid markylliang."

277. U Krist U iathuhlypa ia ka jinglen jong u Petrus.

Mt. 26:31-35. Mk. 14:27-31. Lk. 22:31-38.

Ioan. 13:36-38.

U Simon Petrus u ong ha U :

“Ko Trai, shano Men leit?”

U Jisu U la jubab :

“Shaba leit ma-Nga mem lah mynta ban bud ia Nga, hynrei men sa bud hadien.”

U Petrus u ong ha U :

“Balei ngam lah mynta ban bud ia Me? Na ka bynta jong Me, ngan aiti ia la ka jingim.”

U Jisu U la phai-ktien ia u :

“Men aiti la ka jingim na ka bynta jong Nga? Shisha, shisha, Nga ong ha me, phi baroh phin thut ia Nga mynta ka miet. Naba la thoh. (*Sakh. 1 : 37*): ‘Ngan tangon ia u nongsharai, te yn pynsakma ia ki ‘langbrot jong ka kynhun?’ Hynrei hadien Ngan sa mih-pat, Ngan leit sha Galileia ha shuwa jong phi.”

Te u Petrus u phai-ktien u la ong ha U :

“Wat lada baroh kin thut ia Me, ngan ym thut lano-lano ruh.”

U Jisu U la ong ha u :

“Shisha Nga ong ha me, ko Petrus, ba mynta ka miet, shuwa ban kynih u syiar arsien, men len ia Nga laisien.”

U Trai U la ong ruh:

“A Simon, Simon, khmih u soitan u la thlia iap¹

(1) U la kyrpad tynggeh ia u Blei ba un dup shah ia u ba un pynshoi ia u Petrus; ne: hakhmih u soitan u la kamtrai ia ka bor halor jong me ba un dup ioh tai.

ia phi ba un dup ioh tai kum ia u kew. Hynrei Nga la duaï na ka bynta jong me ba ka jingngeit jong me kan ym troiñ; me pat, ynda shisien me la kylla, to pynskhem ia la ki para."

Hynrei u la kren pyneh triang bad u la ong ha U:

"Ko Trai, nga la kloï ban leit ryngkat bad Me sha phatok bad sha ka jingiap ruh. Bad lada dei ia nga ban iap lem bad Me, ngan ym len satia ia Me."

Bad baroh ki la ia-ong kumjuh. U la ong ha u:

"Ko Petrus, Nga ong ha me ba u syiar un ym kynih mynta ka sngi, haduh ba men da len laisien ba me ithuh ia Nga."

U la ong ruh ha ki:

"Mynba Nga la phah ia phi, khlem saipan, bad iarong bad juti, hato phi la kyrduh eiei?"

Hynrei ki la ong :

"Em."

Kumta U la ong ha ki :

'Hynrei mynta, jar uba don saipan, ieh un rah, kumjuh ka iarong ruh; bad jar ubym don, ieh un die noh ia la ka jaiñkup, bad thied kawei ka waitlam. Naba Nga ong ha phi, ba ia kane kaba la thoh, (Is. 53:12.) dang dei ban pyndep ha Nga: 'Ban ryngkat bad ki bymman la ñiew ia U.' Naba kiei-kiei kiba thew shaphang jong Nga, ki don ka jingkut."

Hynrei ki la ong ha U :

"Ko Trai, khmih, shane don artylli ki waitlam."

Te U la ong ha ki:

"Ka la biang."

278. Ki ktien pyntngen : "Ngan wan biang."

Ioan. 14:1-4.

"Wat khuslai ha la ka dohnud. Phi ngeit ha u Blei, to ngeit ha Nga ruh. Ha ñng i Pa jong Nga don bun ki jaka-sah. Lynda kumta, Ngan jin da la iathuh ña phi; naba Nga leit ban pynkhreh jaka ña phi. Bad ynda Nga la leit bad la pynkhreh jaka ña phi, Ngan wan biang, bad Ngan shim ña phi ha lade hi, ba ha kaba Nga don phi ruh phin dup don. Te shano Nga leit, phi tip, ña ka lynti ruh phi tip."

279. Nga long ka Lynti."

Ioan. 14:5-11.

U Thomas u ong ha U:

"Ko Trai, ngim tip shano Me leit, te kumno ngin tip ña ka lynti?"

U Jisu U ong ha u :

"Nga long ka lynti, bad ka jingshisha bad ka jingim. Ym don uba wan sha u Kpa, lait-tang da Nga. Lada phi la ithuh ña Nga, khlem artatien phi la ithuh ña u Kpa jong Nga ruh; bad naduh mynta phi la ithuh ña U, bad phi la ñohi ña U."¹

U Philip u ong ha U :

"Ko Trai, to pyni ha ngi ña u Kpa, te la biang ña ngi."

U Jisu U ong ha u:

"La katta Nga la don bad phi, te mem ithuh ña Nga? Ko Philip, uto uba ñohi ña Nga, u ñohi ña u Kpa ruh. Kumno me óng: To pyni ha ngi ña u Kpa? Mem ngeit ba Nga don ha u Kpa, bad u

(1) U Jisu u ring jingmut shaphang ka Jinglongkawei bad u Kpa.

Kpa pat ha Nga ? Ki ktien ba Nga kren ha phi, Ngam kren na lade hi. Hynrei uta u Kpa Uba sah ha Nga, ma-U hi U leh ia ki jingleh-jingkam. Mem ngeit ba Nga don ha u Kpa, bad u Kpa pat ha Nga ?”

280. Ki soh jong ka Jingngeit. *Ioan. 14:12-14.*

“Lynda kumta, to ngeit na ka bynta kita ki jingleh. Shisha, shisha, Nga ong ha phi, jar uba ngeit ha Nga, ia kita ki jingleh-jingkam ba Nga leh, u ruh un leh, un leh ruh ia kiba kham khraw ban ia kine, naba Nga Nga leit sha u Kpa. Te ia kaei-kaei ruh kaba phin pan na u Kpa ha ka kyr-teng jong Nga, ia kata Ngan leh, ba yn dup pyn-don-burom ia u Kpa ha u Khun. Lada phin pan ciei na Nga ha ka kyr-teng jong Nga, ia kata Ngan leh.”

281. U Nongpyntngen. *Ioan. 14:15-17.*

“Lada phi ieid ia Nga, to sumar ia ki hukum jong Nga. Bad Ngan pan na u Kpa, bad Un ai ha phi ia Uwei pat u Nongpyntngen, ba Un dup sah bad phi junom: u Mynsiem¹ jong ka jingshisha, ia Uba ka pyrthei kam don bor ban pdiang, namar kam iohi ia U, lymne tip ia U; phi pat phin sa tip ia U, naba Un sah ryngkat bad phi, bad Un don ha phi.”

(1) Hangne ka paw ka Trinité : u Kpa, u Khun bad u Myn-siem Bakhuid.

282. "Ngam iehnoh khunswet ia phi."

Ioan. 14 : 18-24.

"Ngam iehnoh khunswet ia phi: Ngan wan sha phi. Sa tang shipor, te ka pyrthei kan ym iohi shuh ia Nga. Hynrei phi iohi ia Nga; naba Nga, Nga im, phi ruh phi im. Ha kata ka sngi phin tip ba Nga don ha u Kpa jong Nga, phi pat ha Nga, Nga pat ha phi. Jar uba don ia ki hukum jong Nga, bad uba sumar ia ki, uta keiñ, dei uba ieid ia Nga, Bad jar uba ieid ia Nga, u Kpa jong Nga Un ieid ia u, bad Nga ruh Ngan ieid ia u, bad Ngan pynpaw ia lade ha u."

U Judas u ong ha U, ym dei u Iskharriot :

"Ko Trai, kumno kumta ba Men pynpaw ia lade ha ngi, ym ha ka pyrthei?"

U Jisu U la phai-ktien bad U la ong ha u :

"Lada uno-uno u ieid ia Nga, un sumar ia ka ktien jong Nga, bad u Kpa jong Nga Un ieid ia u, te Ngin iawan ha U, bad Ngin iashna jakashong-jakasah ryngkat bad u. Jar ubym ieid ia Nga, um sumar ia ki ktien jong Nga. Te ka ktien kaba phi la iohsngew kam long ka jong Nga, hynrei ka jong u Kpa, Uba la phah ia Nga."

283. Ia ka jingsuk jong Nga, Nga ai ha phi.

Mt. 26:30. Mk. 14:26. Lk. 22:29. Ioan. 14:25-31.

"Nga la kren ha phi ia kine kiei-kiei, katba Nga dang sah bad phi. Hynrei u Nongpyntngen, u Mynsiem Bakhuid, ia Uba u Kpa Un phah ha ka kyrteng jong Nga, ma-U keiñ Un hikai ha phi ia kiei-kiei baroh, bad Un pynkynmaw ia phi ia

kiei-kiei baroh, kat kiba Nga la ong ha phi. Ha phi Nga iehnoh ia ka jingsuk, ha phi Nga ai ia ka jingsuk jong Nga; ym dei kumba ka pyrthei ka ai, Nga ai ha phi. Wat khuslai ha la ka dohnud, lymne khaweit. Phi la iöhsngew ba Nga la ong ha phi: Nga leit noh, bad Nga wan sha phi. Lada phi iëid ia Nga, phin kmen khlem pep, ba Nga leit sha u Kpa : naba u Kpa U kham khraw ban ia Nga.¹ Te mynta Nga la iathuh ia phi shuwa ba kan jia, ba, haba kan jia, phin dup ngeit.

“Ngan ym kren shuh shibun kiei-kiei bad phi: namar u syiem jong kane ka pyrthei u wan, hynrei um don eiei ruh bad Nga. Hynrei ba ka pyrthei kan dup tip ba Nga iëid ia u Kpa, bad kumba u Kpa U la ai hukum ia Nga, kumta Nga leh. To iëng, ia ngin ialeit noh nangne.”

Te ynda ki la rwai kawei, ki la leit sha u lum Olib.

284. U Diengwaiñ bad ki Tnat. Ioan. 15:1-11.

Nangta u Jisu U la ong ha ki:

“Nga long u diengwaiñ ba-shisha; bad u Kpa jong Nga U long u nongrep. Ia ka tnat baroh ha Nga kabym seisoh, Un ngor noh: bad ia baroh kaba seisoh, U pynkhuid ia ka, ba kan nang-seisoh shuh-shuh. Phi mynta, phi long ki bakhuid na ka bynta jong kata ka ktien kaba Nga la kren ha phi. To sah ha Nga, bad ma-Nga ha phi. Kumba ka tnat kam lah ban seisoh na lade hi, lynda ka sah ha

(1) U Kpa U kham khraw ia U haba ianujor bad ka jinglongbriew jong u Jisu. Hynrei ha ka jinglongblei U iaryngkat bad u Kpa nadong-shadong.

u diengwaiñ, kumjuh maphi ruh lynda phi sah ha Nga. Nga long u diengwaiñ, maphi ki tnat; jar uba sah ha Nga bad ma-Nga ha u, uta u seisoh shibun: namar khlem ma-Nga, phim lah ban leh eiei ruh em. Lada uno-uno um sah ha Nga, yn bret noh shabar kum ia ka tnat; te un iap-tyr-khong, bad kin lum ia u, bad kin bret hapoh ding, bad un ing. Lada phi sah ha Nga, bad ki ktien jong Nga ki sah ha phi, phin pan kat ia kaba phi kwah, bad kan long ha phi. Ha kane la pyndon-burom ia u Kpa, ba phin seisoh shibun, bad phin ialong ki synran jong Nga. Kumba u Kpa U la ieid ia Nga, Nga ruh Nga la ieid ia phi. To sah ha ka jingieid jong Nga. Lada phi sumar ia ki hukum jong Nga, phin sah ha ka jingieid jong Nga; kumba ma-Nga ruh Nga la sumar ia ki hukum jong u Kpa jong Nga, bad Nga sah ha ka jingieid jong U. Nga la kren ha phi ia kine kiei-kiei, ba ka jingkmen jong Nga kan dup long bad phi, bad ka jingkmen jong phi kan dup dap."

285. Ka hukum jong ka jingieid. *Ioan. 15:12-17.*

"Kane ka long ka hukum jong Nga, ba phin ia-iei markylliang, kumba Nga la ieid ia phi. Ym don mano-mano uba don ka jingieid kaba kham khraw ban ia kane, ba uwei un aiti ia la ka jingim na ka bynta la ki lok. Phi long ki lok jong Nga, lada phi leh ia kiba Nga Nga hukum ia phi. Ngam khot shuh ia phi ki shakri, naba u shakri um tip aüu u kynrad la jong u leh. Hynrei Nga la khot ia phi, ki lok; namar ia kiei-kiei baroh kat kiba Nga la iöhsngew na la u Kpa, Nga la pyntip

ha phi. Phim shym la jied ia Nga, hynrei Nga la jied ia phi; bad Nga la thung ia phi, ba phin dup leit bad dup seisoh bad u soh jong phi un dup sah: ba kat ia kaba phi pan na u Kpa ha ka kyr-teng jong Nga, Un dup ai. Nga hukum ha phi ia kine kiei-kiei, ba phin ia-ïeid markylliang."

286. Ka jingisih jong ka pyrthei,

Ioan, 15:18-27, 16:1-4.

"Lada ka pyrthei ka isih ia phi, to tip ba ka la isih shuwa ia Nga. Ba phin da la long na ka pyrthei, ka pyrthei kan jin da la ïeid ia kaba long ka jong ka; te namar phim long na ka pyrthei, hynrei Nga Nga la jied ia phi na ka pyrthei, namarkata keiñ, ka pyrthei ka isih ia phi. To kynmaw ia ka ktien jong Nga kaba Nga la ong ha phi: U shakri um long kham khraw ban ia u kynrad la jong. Lada ki la leh-beiñ ia Nga, kin leh-beiñ ia phi ruh; lada ki la sumar ia ka ktien jong Nga, kin sumar ia ka jong phi ruh. Hynrei kin leh ha phi ia kine kiei-kiei baroh na ka bynta ka kyr-teng jong Nga, naba kim ithuh ia Uta Uba la phah ia Nga. Ba Ngan da ym wan, bad da la kren ha ki, kin ym da la don pop; hynrei mynta kim don jingkrenda shuh shaphang la ki pop. Jar uba isih ia Nga, u isih ia u Kpa jong Nga ruh. Ba Ngan ym da la leh ha ki ia ki jingleh-jingkam, kiba ym don uwei pat uba la leh, kin ym da la don pop; hynrei mynta ki la iöhi, bad ki la isih ia Nga bad ia u Kpa jong Nga ruh. Hynrei ba yn dup pynurlong ia ka ktien ba la thoh ha ka aiñ jong ki: 'Ki la isih ia Nga khlem daw.' Hynrei haba u Nongpyntngen,

u Mynsiem jong ka Jingshisha, ia Uba Ngan phah ha phi na u Kpa, Uba mih na u Kpa, Un wan, Uta Un sakhi ia Nga. Phi ruh phin sakhi, namar phi don bad Nga naduh ka basdang. Nga la kren ha phi ia kine kiei-kiei ba phin ym thut. Kin kyntait ia phi na ki Sinagog; hynrei kan poi ka por, ba kat uba pyniap ia phi, un tharai ba u leh pyndon-burom ia u Blei. Bad kin leh ha phi ia kine kiei-kiei baroh, naba kim shym la ithuh ia u Kpa, lymne ia Nga. Hynrei Nga la iathuh ha phi ia kine kiei-kiei baroh, ba haba kata ka por jong ki kan poi, phin dup kynmaw ba Nga la iathuh ha phi."

287. Ka kam jong, u Mynsiem Bakhuid.

Ioan. 16:5-15.

"Ngam shym la iathuh ha phi ia kine kiei-kiei naduh mynnyngkong, naba Nga la don ryngkat bad phi. Bad mynta Nga leit sha Uta Uba la phah ia Nga; bad ym don na phi uba kylli ia Nga: 'Shano Me leit?' Hynrei namarba Nga la kren ha phi ia kine kiei-kiei, ka jingsngewsih ka la dap ha ka dohnud jong phi. Hynrei Nga iathuh ha phi ia ka jingshisha: Ka bha ia phi ba Ngan leit; namar lada Ngam leit, u Nongpyntngen Un ym wan ha phi, hynrei lada Nga leit, Ngan phah ia U ha phi. Bad haba Un wan ma-U, Un pynsgewkyn-duh ia ka pyrthei shaphang ka pop, bad shaphang ka hok, bad shaphang ka jingbishar: shaphang ka pop keiñ, naba kim shym la ngeit ha Nga; shaphang ka hok de, naba Nga leit sha la u Kpa, bad phin ym iohi shuh ia Nga; shaphang ka jingbishar

pat, naba ia u syiem jong kane ka pyrthei, la bi-shar lypa. Nga dang don shibun kiei-kiei ban ong ha phi, hynrei phim lah ban shah mynta. Hynrei haba Un wan Uta u Mynsiem jong ka jingshisha, Un hikai ia phi ia ka jingshisha baroh. Naba Un ym kren na lade hi; hynrei Un kren kat ia kaba Un iohsngew, bad Un pynbna ha phi ia kiei-kiei kiban dang wan. Un pyndon-burom ia Nga, naba Un pdiang na ka jong Nga, bad Un pynbna ha phi. Baroh kat kiba u Kpa jong Nga U don, ki long ki jong Nga. Namarkata keiñ, Nga la ong ba Un pdiang na ka jong Nga, bad Un pynbna ha phi."

288. "Phin iohi biang ia Nga" *Ioan, 16:16-24,*

"Sa shi-por te phin ym iohi shuh ia Nga: bad sa shi-por pat, te phin iohi ia Nga: naba Nga leit sha u Kpa."

Te katto-katne na ki synran jong U, ki la iaong paraki hi:

"Kaei kane ba U ong ha ngi: 'Sa shipor te phin ym iohi shuh ia Nga, bad sa shipor pat, te phin iohi ia Nga; bad: Naba Nga leit sha u Kpa?'

Kumta ki la ia-ong :

'Kaei kane ba U ong: Sa shipor? Ngim tip aïu U kren.'

Hynrei u Jisu U la tip ba ki la kwah ban kylli ia U, bad U la ong ha ki:

"Phi iakylli shaphang kane para-phi hi ba Nga la ong: Sa shipor te phin ym iohi shuh ia Nga; bad sa shipor pat, te phin iohi ia Nga? Shisha,

shisha, Nga ong ha phi, ba phin iam bad phin lynfiar, ka pyrthei pat kan kmen: maphi phin ia-sngewsih, hynrei ka jingsngewsih jong phi kan kylla jingkmén. Ka briew haba ka suhkhun, ka don jingsngewsih, namarba ka por jong ka ka poi: hynrei ynda ka la kha ia i khunlung kam kynmaw shuh ia ka jingshitom, na ka bynta ka jingkmén ba la kha ia u briew ha ka pyrthei. Phi ruh, namarkata, shisha mynta phi sngewsih: hynrei ngan wan peit biang ia phi, bad ka dohnud jong phi kam kmen; bad ia kata ka jingkmén jong phi yn ym don uban shim noh na phi. Te ha kata ka sngi phin ym pan eiei ruh em na Nga. Shisha, shisha Nga ong ha phi: lada phi pan eiei na u Kpa ha ka kyrteng jong Nga, Un ai ha phi. Haduh mynta phim pat shym pan eiei ha ka kyrteng jong Nga. Pan, te phin ioh, ba ka jingkmén jong phi kan dup long ka badap."

289. "Nga la jop ia ka pyrthei." *Ioan. 16:25-33.*

"Ia kine kiei-kiei Nga la kren ha phi da ki pharshi. Ka por ka poi, haba Ngan ym kren shuh ha phi da ki pharshi, hynrei Ngan iathuh shynna ha phi shaphang Uta u Kpa. Ha kata ka sngi phin pan ha ka kyrteng jong Nga; bad Ngam ong ha phi ba Nga Ngan pan na u Kpa na ka bynta jong phi; namar u Kpa U ieid ia phi, naba phi ieid ia Nga bad phi ngeit ba Nga la mih na u Blei. Nga la mih na u Kpa bad Nga la wan sha ka pyrthei: Nga iehnoh biang ia ka pyrthei bad Nga leit sha u Kpa."

Ki synran jong U ki ia-ong ha U:

"Peit, mynta Me kren shai bad Mem kren phar-shi eiei. Mynta ngi tip ba Me tip ia kiei-kiei baroh, bad Mem donkam ba uno-uno un kylli ia Me : na ka bynta kane ngi ngeit ba Me la mih na u Blei."

U Jisu U la phai-ktien ia ki:

"Phi iangeit mynta? Hakhmih ka por ka poi bad ka la poi mynta, ba yn pynsakma ia phi uwei-pa-uwei sha la ka jong-ka-jong, bad phin iehnoh ia Nga marwei; pynban Ngam long marwei, naba u Kpa U don lem bad Nga. Ia kine kiei-kiei Nga la kren ha phi ba phin dup ioh ia ka jingsuk ha Nga. Ha ka pyrthei phin ioh jynjar; hynrei to shaniah, Nga la jop ia ka pyrthei."

290. U Krist U duai na ka bynta ia lade.

Ioan. 17:1-5.

U Jisu U la kren ia kine kiei-kiei, bad, haba U la khmied ia la ki khmat sha bneng, U la ong :

"Ko Pa, ka por ka la poi, to pyndon-burom ia u Khun jong Me, ba u Khun jong Me Un ioh pyndon-burom ia Me. Kumba Me la ai ha U ia ka bor halor ka doh baroh, ba Un ioh ai ha kita baroh ia kiba Me la ai ha U ia ka jingim bymjukut. Kane keifn ka long ka jingim bymjukut: ba kin dup ithuh ia Me, u Blei bashisha marwei, bad ia u Jisu Krist, Uba Me la phah. Nga Nga la pyndonburom ia Me ha ka pyrthei; Nga la pyndep ia ka kam kaba Me la ai ha Nga ba Ngan leh. Te mynta, ko Pa, to pyndon-burom ia Nga lem bad Me hi, da kata ka burom kaba Nga la don bad Me, shuwa ban long ka pyrthei."

291. U Krist U duai na ka bynta la ki Synran.

Ioan. 17:6-19.

"Nga la pynpaw ia ka kyrteng jong Me ha ki brieve kiba Me la ai ha Nga na ka pyrthei. Ki la long ki jong Me, bad Me la ai ia ki ha Nga; bad ki la sumar ia ka ktien jong Me. Mynta ki la tip ba kiei-kiei baroh, kiba Me la ai ha Nga, ki long na Me: naba ia ki ktien, kiba Me la ai ha Nga, Nga la ai ha ki, bad ki la pdiang ia ki, bad ki la tip shisha ba Nga la wan na Me, bad ki la ngeit ba ma-Me Me la phah ia Nga. Nga Nga duai na ka bynta jong ki: Ngam duai na ka bynta ka pyrthei, hynrei na ka bynta kito kiba Me la ai ha Nga: naba ki long ki jong Me. Bad kiei-kiei jong Nga baroh ki long ki jong Me, bad ki jong Me ki long ki jong Nga, bad la pyndon-burom ia Nga ha ki. Te mynta Ngam long ha ka pyrthei, kine pat ki long ha ka pyrthei, bad Nga wan sha Me. Ko Pa Bakhuid, to sumar ia ki ha ka kyrteng jong Me, ia kiba Me la ai ha Nga, ba kin dup long kawei kum ma-Ngi. Mynba Nga la don bad ki, Nga la sumar ia ki ha ka kyrteng jong Me. Ia kito kiba Me la ai ha Nga, Nga la ri kyndong, bad ym don na ki uba la jot-noh, lait-tang u khun ka jingjot, ba yn ioh pyndep ia ka jynthoh. Te mynta Nga wan sha Me bad Nga kren ia kine kiei-kiei ha ka pyrthei, ba kin dup dap ha lade hi da ka jingkmien jong Nga. Nga la ai ha ki ia ka ktien jong Me, bad ka pyrthei ka isih ia ki, naba kim long na ka pyrthei, kumba Nga ruh Ngam long na ka pyrthei. Ngam pan ba Men shim noh ia ki na ka pyrthei, hynrei ba Men sumar ia ki na ka banieu. Kim long na ka pyrthei, kumba Nga ruh

Ngam long na ka pyrthei. To kyntang ia ki ha ka jingshisha. Ka ktien jong Me ka long ka jingshisha. Kumba Me la phah ia Nga sha ka pyrthei, Nga ruh Nga la phah ia ki sha ka pyrthei. Te na ka bynta jong ki Nga la kyntang ia lade, ba ma-ki ruh kin dup long ki bakyntang ha ka jingshisha."

292. U Krist U duai na ka bynta ka Balang.

Ioan. 17:20-26.

"Te Ngam duai tang na ka bynta jong ki, hynrei na ka bynta kito ruh kiban ngeit ha Nga da ka ktien jong ki, ba baroh kin dup long kawei, kumba ma-Me, ko Pa, ha Nga bad Nga ha Me, ba maki ruh kin dup long kawei ha Ngi, ba ka pyrthei kan dup ngeit ba ma-Me Me la phah ia Nga. Ia ka burom ruh kaba Me la ai ha Nga, Nga ai ha ki, ba kin dup long kawei kumba Ngi ruh Ngi long kawei. Ma-Nga ha ki, bad ma-Me ha Nga, ba kin ioh long janai kawei, ba ka pyrthei kan dup tip ba Me la phah ia Nga, bad Me la ieid ia ki, kumba Me la ieid ia Nga ruh. Ko Pa, Nga kwah ba kito kiba Me la ai ha Nga ki ruh kin don ryngkat bad Nga ha kaba don ma-Nga, ba kin dup iohi ia ka burom jong Nga kaba Me la ai ha Nga; naba Me la ieid ia Nga naduh shuwa kaba thaw ia ka pyrthei. Ko Pa Bahok, ka pyrthei kam shym ithuh ia Me, hymrei Nga Nga la ithuh ia Me, bad kine ki la tip ba Me la phah ia Nga. Bad Nga la pyntip ha ki ia ka kyrteng jong Me, bad Ngan nang-pyntip, ba kata ka jingieid da kaba Me la ieid ia Nga, kan dup long ha ki bad ma-Nga ha ki."

KA LYNNONG II

KA JINGSHAHSHITOM JONG U TRAI
JONG NGI

1. Ha ka kper.

293. U poi ha ka kper.

Mt. 26:36 Mk. 14:32 Lk.22:39-40. Ioan. 18:1.

Haba u Jisu U la lah kren ia kine ki ktien, U la leit noh bad la ki synran sha shiliang ka wahduid Kedron; bad kumba U ju leit, U la leit sha u lum Olib. Bad ki la wan sha ka jaka ba la khot Jethsemani, ha kaba la don ka kper, sha kaba U la leit rung ma-U bad la ki synran.

Bad U la ong ha la ki synran:

"To nang iashong hangne, katba Nga nang-leit duai hangtai. To iaduai ba phin ym hap ha ka jingpynshoi."

294. U Krist U duai bad U pisa.

Mt. 26:37-44. Mk. 14:33-40. Lk. 22:41-44.

Bad U la ialam ryngkat bad U ia u Petrus bad u Jakob bad u Ioannis (ki arngut ki khun jong u Sebedi); bad U la sdang ban sngewsih bad ban

khuslai, ban. sngewtieng bad ban kordit eh. Te U la ong ha ki :

"Ka mynsiem jong Nga ka kordit haduh kumban iap. To sah hangne bad to ia-ap bad Nga."

Bad U la khlad pajih na ki kumba shipda-maw. Bad haba U la dem-khohsiew, U la dem pyllup ha khyndew; bad U la duai ba lada lah, kata ka por kan iaid-lait noh na U. Bad U la ong:

"Abba,¹ ko Pa, kiei-kiei baroh ki long kiba lah ha Me. Ko Pa, lada Me mon, to weng noh ia kane ka khuri na Nga.

"Ko Pa jong Nga, lada lah, to ai ba kane ka khuri² kan lait noh na Nga. Pynban ym kumba Nga mon ma-Nga, hynrei kumba Me mon. Kan long ym ka mon jong Nga, hynrei ka jong Me."

Te U la wan sha la ki synran bad U la lap ba ki iohthiah, had u la ong ha u Petrus:

"Ko Simon, me iohthiah? Phim lah ban ia-ap shi-kynta? To sharai, bad to duai ba phin ym hap ha ka jingpynshoi. Ka mynsiem ka kloi shisha, ka doh pat ka tlot."

Bad U la leit biang, U la duai ia kajuh ka jing-duai, U ong:

"Ko Pa jong Nga, lada kane ka khuri kam lah ban lait noh na Nga, lynda Nga dih ia ka, kan long ka mon jong Me."

Te U la wan biang, bad U la lap ia ki ba ki iohthiah (naba ki khmat jong ki ki la khia). Bad kim tip aïu ban jubab ia U. Bad haba U la iehnoh ia ki, U la leit biang, bad U la duai ha kaba lai-sien, U ong ia kijuh ki ktien. Te u Angel na bneng u

(1) Ka ktien Aramaik kaba mut "Ko Pa."

(2) Ka khuri jong ki jingkordit bad ki jingshitom baroh.

la paw ha U, u pyntngen ia U; bad ba U don ha ka jingpisa, U la duai kham jlan. Bad ka syep jong U ka la long kum ki jingjaw-snam kiba tuid ha ka khyndew.

295. U Krist U iakynduh bad u Judas.

Mt. 26:45-46. Mk. 14:41-42. Lk. 22:45-46.

Te haba U la ieng na kaba duai, bad U la wan ha kaba laisien sha la ki synran, U la lap ia ki ba ki iohthiah, na ka jingsngewsih. Bad U la ong ha ki:

“To thiah mynta, bad to shongthait. Balei phi thiah? Yeng joit, to duai ba phin ym hap ha ka jingpynshoi. Keiñ noh, ka por ka la poi. Hakhmih, ia u Khun u briew yn sa aiti noh ha ki kti jong ki nongpop. To ieng, ia ngin leit noh. Hakhmih uta uban aiti ia Nga u la hajan.”

296. U Judas bad ki shipai.

Mt. 26:47-48. Mk. 14:43-44.

Lk. 22:47. Ioan. 18:2-3.

Te u Judas ruh, uba la die noh ia U, u la ithuh ia kata ka jaka: naba bunsien u Jisu U la ju leit shata ryngkat bad la ki synran. Kumta u Judas. ynda u la ioh shikynhun ki shipai bad ki shakri, na ki rangbah lyngdoh bad na ki Pharisi, u la wan shata bad ki sharak, bad ki musa bad ki atiar. Haba U dang kren, hakhmih, u Judas, uwei na ki khatar ngut, u la wan, bad ryngkat bad u, u paidbah babun lem bad ki waitlam bad ki diengtylli, ba la phah na ki rangbah lyngdoh bad ki tymmen-



*Ko Pa, lada Me mon, to weng noh ia kane
ka Khuri na Nga. (Page 303)*



“ Ko Judas, da kaba doh me die noh ia u
Khun u briew?

ki-san jong u paidbah. U Judas u la ïaid ha khmat jong ki. Bad uta uba la die noh ïa U, u la ai dak ïa ki, u ong :

“Uta Uba ngan doh, dei Uta keiñ : kem ïa U, bad ïalam thikna.”

297. Ka jingdoh jong u nongshetkylla.

Mt. 26:49-50. Mk 14:45 Lk. 22:47-48.

U Judas u la shur shajan u Jisu ban doh ïa U. Te haba u la poi, u la leit beit syndon sha U, u la ong :

“Khublei Nonghikai.”

Bad u la doh ïa U. Te u Jisu U la ong ha u :

“Ko lok, me wan lei? Ko Judas, da kaba doh me die noh ïa u Khun u briew?”

298. Ki shipai ki kyllon ha madan. Io. 18:4-9

Namarkata, u Jisu ba U tip ïa kiei-kiei baroh kiban sa jia ha U, U la tur haphang, bad U la ong ha ki :

“Phi ïawad ïano?”

Ki la jubab ïa U :

“Ya u Jisu Nasaret.”

U Jisu U la ong ha ki :

“Nga dei ma-Nga.”

Bad u Judas ruh, uba la die noh ïa U, u la ïeng ryngkat bad ki. Namarkata, U tang shu la ong ha ki : Nga dei ma-Nga, ki la kynran-dien, bad ki la kyllon ha madan. Namarkata, U la kylli biang ïa ki:

“Phi ïawad ïano?”

Ki pat ki la ong :

"Ia u Jisu Nasareth."

U Jisu U la phai ktien :

"Nga la ong ha phi, ba Nga dei ma-Nga. Namarkata, lada phi iawad ia Nga, pyllait ia kine ban leit noh."

Ba yn dup pynurlong ia ka ktien, kaba U la ong : "Na kita kiba Me la ai ha Nga, Ngam shym la pynjah noh uwei ruh."

299. U Petrus u pom ia u Malkhus.

Mt. 26:50-54. Mk. 14:46-47. Lk. 22:49-51.

Io. 18:10-11.

Kumta ki la iawan, ki la iakem ia U Jisu bad ki la bat ia U. Haba kita kiba la iadon bad U, ki iohi ia kaban jia, ki la ong ha U :

"Ko Trai, ngin pom da ka waitlam?"

Te hakhmih, uwei na kita kiba ia-ieng, uwei na kita kiba la iadon ryngkat bad u Jisu,-u Simon Petrus uba don ka waitlam,-haba u la kner ia la ka kti, u la sei ia la ka waitlam, u pom ia u shakri jong u lyngdoh rangbah, u la mait ia ka shkor kamon jong u. Te ka kyrteng jong uta u shakri ka la long u Malkhus. U Jisu pat U la jubab, U la ong :

"To shah haduh katne."

Bad ynda U la ktah ia ka shkor jong u, U la pynkoit ia u. Kumta u Jisu U la ong ha u Petrus :

"To thep ia la ka waitlam ha ka sop, namar kito kiba shim ia ka waitlam, kin iap da ka waitlam. Hato me tharai ba Ngam lah ban pan na u Kpa jong Nga, bad Un ai ia Nga kumne kumne palat khatar kynhun ki Angel? Hato ia ka khuri

kaba u Kpa U la ai ha Nga, Ngan ym dih ia ka?
Kumno heit yn pynurlong ia kita ki jynthoh, ba ka
dei ban long kumne?"

300. U Krist U pynrem ia la ki nongshun.

Mt. 26:55-56. Mk. 14:48-49. Lk. 22:52-53.

Ha kata ka por u Jisu U la ong ha u paidbah,
ha ki rangbah lyngdoh, bad ha ki rangbah jong ka
tempel, bad ha ki tymmen ki san kiba la wan
kem ia U :

"Phi iawan, kum ia u nongtuh bad la ki wait-
lam bad ki diengtylli? Man ka sngi Nga la shong
hikai bad phi ha ka tempel, bad phim shym kner
satia ia Nga, bad phim shym kem ia Nga : hynrei
kane ka dei ka por jong phi, bad ka bor jong ka
jingdum.¹ Hynrei kane baroh ka la urlong. ba yn
ioh pyndep ia ki jynthoh jong ki nongiathuhlypa."

301. La kem ia u Krist. Ki synran ki phet.

Mt. 26:56. Mk. 14:50-52. Io. 18:12.

Kumta kata ka kynhun bad u rangbah shipai,
bad kita ki shakri jong ki Ju, ki la kem ia u Jisu
bad ki la teh la khum ia U. Kumta ki synran
baroh, ynda ki la iehnoh ia U, ki la phet noh. Te
uwei u samla, uba kup jaiñ-linen halor ka met
lyngkhuit, u la bud ia U ; bad ki la kem ia u ruh,
u pat, u iehnoh ia kata ka jaiñ-linen, u phet-ïap
lyngkhuit na ki.

(1) Kane ka long ka por kaba u Blei U la jied naduh bym-
jukut. Bad mynta U sakhi ba U mon sngewbha ban iap khnang
ban siewspah ia ka pyrthei.

2. Ka Bishar Niam.

302. U Krist ha khmat u Annas.

Ioan. 18:13-14; 19-24

Bad ki la ialam nyngkong ia U ha u Annas, namar u la long u kthaw-kurim jong u Kaiphas, uba la long u lyngdoh rangbah ha kata ka snem. Te u dei uta u Kaiphas uba la ai-buit ha ki Ju, ba ka myntoi ba uwei u briew un iap na ka bynta u paidbah. Kumta u lyngdoh rangbah u la kylli ia u Jisu shaphang ki synran jong U, bad shaphang ka jinghikai jong U. U Jisu U la jubab ia u :

“Nga la kren shynna ha ka pyrthei : Nga la hikai borabor ha ka Sinagog, bad la ka tempel, ha kaba ki Ju baroh ki iakynduh lang: bad Ngam ju kren eiei ruh ha ka barieh. Balei me kylli ia Nga? Kylli ia kito kiba la iohsngew ia kaba Nga la kren ha ki, hakhmih ki tip aiu Nga la ong.”

Hynrei ynda u lah kren ia kine kiei kiei, uwei na kito ki shakri, uba ieng hajan u la thab ia u Jisu, u ong :

“Kumta du Me jubab ia u lyngdoh rangbah?”

U Jisu U la phai-ktien ia u :

“Lada Nga la kren bymdei, ai sakhi ia kata ka bymdei: hynrei lada dei, balei me thab ia Nga?

Bad u Annas u la phah ia U, da teh da khuu, sha u Kaiphas, u lyngdoh rangbah.

303. U Krist bad u Kaiphas.

Mt. 26:57-66. Mk. 14:53-64.

Hynrei kita kiba kem ia u Jisu, ki la ialam ia U sha u Kaiphas, u lyngdoh rangbah, shaba ki lyngdoh bad ki Nongthoh bad ki tymmen ki san ki la ialang. Ki rangbah lyngdoh pat, lem bad ka dorbar baroh, ki la wad sakhi lamler pyrshah ia u Jisu, ba kin dup ioh pyniap ia U. Pynban kim shym shem, la shibun ki sakhi lamler ki la wan. Naba hun ki la iengsakhi ia U, hynrei ki jingai-sabut jong ki kim iadei satia. Te khatduh-khatwai, arngut ki sakhi lamler ki la wan; ki ieng joit, ki la mih-sakhi pyrshah ia U bad ki la ong :

"Une U briew U la ong: 'NGA LAH BAN PYNJOT IA KA TEMPEL', BAD BAN TEI BIANG IA KA LAI SNGI.' Ngi la iohsngew ia U ba U ong: 'NGAN PYNJOT IA KANE KA TEMPEL BA LA THAW DA KI KTI, BAD NGAN TEI LAI SNGI DA KAWEI PAT KA-BYM SHYM LA THAW DA KI KTI.'"

Hynrei ki jingaisakhi jong ki kim iadei satia. Te uta u lyngdoh rangbah haba u la ieng hapdeng, u la ong ha U :

"Mem jubab eiei ia kita kiba kine ki iamih sakhi pyrshah ia Me?"

Hynrei u Jisu U la shu sngap la ka sngap, bad Um shym jubab eiei ruh. Uta u lyngdoh rangbah u la kylli biang ia U bad u la ong ha U :

"Dei ma-Me u Krist u Khun jong u Blei ba

la kyrkhu? Nga pynshai ia Me da u Blei u ba-im, ba Men iathuh ha ngi, lada Me long u Krist u Khun jong u Blei."

U Jisu U la ong ha u :

"Me la ong; Nga long. Pynban Nga ong ha phi, phin iohi lawei ia u Khun u briew ba U shong ha kamon ka bor jong u Blei, bad ba U wan ha ki lyoh ka bneng."¹

Hangta u lyngdoh rangbah u la tar ia la ki jaiñ, u ong:

"U la kren-beiñ-blei: ngi dang donkam sakhi aïu pat? Hakhmih mynta phi la iohsngew ia ka jingkren-beiñ-blei. Phi iapyrkhat kumno?"

Te ki jubab ki la ong :

"U dei ban iap."

304. U Krist U shah-rkhie-beiñ.

Mt. 26:67-68. Mk. 14:65. Lk. 22:63-65.

Kumta ki la bynthiew ia ka khmat jong U, bad ki la jyrwait ia U, kiwei pat ki la thab na ka khmat jong U; bad kita ki briew kiba iahat ia U, ki la rkhie-beiñ ia U, bad ki la shoh ia U. Bad ki la tap-matlah ia U, bad ki la thab ia ka khmat jong U; bad ki la kylli ia U, ki ong :

"Ko Krist, to iathuh ha ngi, mano ba thab ia Me?"

Bad bun kiwei pat kiei kiei ki la kren ia U, ban kren-beiñ.

(1) U Krist U maham lypa ia ka jingrai jong ki ; namar ha ka sngi bishar Un sa wan kum u nongbishar bakhraw bor ban bishar ia ki bynriew baroh. Ki ruh kin ym lait na ka jingbishar jong U.

305. Ka Jinglen banyngkong jong u Petrus.

Mt. 26:58, 69-70. Mk. 14:54, 65-68. Lk. 22:54-57.

Ioan. 18:15-17.

Bad u Simon Petrus u la bud-dien ia u Jisu na pajih, bad uta uwei pat u synran ruh. Hynrei uta u synran u la ia-ithuh bad u lyngdoh rangbah, bad u la rung ryngkat bad u Jisu sha ka phyllaw jong u lyngdoh rangbah. U Petrus pat u la ieng habar ha jynkhang. Namarkata, uta uwei pat u synran uba la ia-ithuh bad u lyngdoh rangbah, u la mih shabar, bad u la kren ia ka nongap-jynkhang, bad u la pynrung ia u Petrus. Kumta kata ka shakri kaba ap-jynkhang ka la ong ha u Petrus:

“Me ruh mem dei na ki synran jong une u briew?”

U ong :

“Ngam dei.”

Bad haba u la rung, u la shong ryngkat bad ki shakri, ba un dup iohi ia kaba kut. Te ynda ki la iasliew-ding hapteng ka phyllaw bad ki la dang iashong tawiar ia ka, u Petrus u la shong hapteng jong ki, u syaid-ding. Kawei ka shakri, haba ka la iohi ia u, ba u shong ha ka bashai, bad ynda ka peitshaiñ ia u, ka la ong :

“Me ruh me la don ryngkat bad u Jisu Nasareth. Une ruh u la don ryngkat bad U.”

Hynrei u la len ha-khmat jong ki baroh, u ong :

“Ko kynthei, ngam ithuh ia U. Tip ruh ngam tip, sngewthuh ruh ngam sngewthuh ia kaba pha ong.”

Te u la mih noh sha khmat jynkhang; bad u syiar u la kynih.

306. Ka jinglen ka ba-ar.

Mt. 26:71-72. Mk. 14:69-70. Lk. 22:58.

Io. 18:18-25.

Hadien katto katne por ynda u la mih noh sha jynkhang, sa kawei pat ka la iöhi ia u, bad ka la ong, ha kita kiba iadon hangta:

“Une ruh u la don bad u Jisu Nasareth.”

Haba kata ka shakri ka iöhi biang ia u, ka la sdang ban ong ha kiba ia-ieng hangta:

“Une u long na ki.”

Hynrei u la len biang.

Te kita ki shakri bad ki shakri rangbah ki la ia-ieng harud-ding; namarba ka khriat, ki la ia-syaid-ding: bad u Petrus ruh u la don ryngkat bad ki, u ieng syaid-ding. Kumta ki la iakylli ia u:

“Mem dei ma-me ruh na ki synran jong U?”

U pat u la len biang da kaba smai, bad u la ong:

“Ngam dei. Namar ngam ithuh ia uta u Briew.”

Katto katne por hadien, uwei pat haba iöhi ia u, u la ong:

“Me ruh me dei na ki.”

U Petrus pat u la ong:

“Em me, ngam dei.”

307. Ka jinglen balai.

Mt. 26: 73-75. Mk.14:70-72. Lk. 22:59-63.

Ioan 18:26-27

Hadien kumba shikynta pat, sa uwei u la kren skhem, u ong:

“Shisha keif, une ruh u la don ryngkat bad U; namar u ruh u long u nong-Galileia.”

Hynrei u Petrus u la ong :

"Ko briew, ngam tip me ong aïu."

Kita kiba ïa-ïeng hajan, ki la tur sha khmat, bad ki la ong ha u Petrus :

"Khlem pep, me ruh me long na ki; naba ka ktien jong me ruh, ka pynpaw ïa me."

Kumta u la sdang ban tim bad ban smai ba um ithuh ïa uta u Briew :

"Ngam ithuh ïa une u Briew Uba phi ïakren."

Uwei na ki shakri jong u lyngdoh rangbah (u kur jong uto ïa uba u Petrus u la mait ïa ka shkor) u la ong ha u :

"Ngam shym ïohi ïa me ha ka kper, ryngkat bad U?"

Te u Petrus u la len biang.

Kumta-kumta hi katba u dang kren, u syiar u la kynih biang. Bad u Trai U la phai, U la kyr-tiangdien ïa u Petrus. Bad u Petrus u la kynmaw ïa ka ktien jong u Jisu, kaba U la ong: "Shuwa ba u syiar un kynih arsien, men len ïa Nga lai-sien." Bad u la sdang ban ïam. Bad u la mih shabar, u ïam kthang.

308. La pynskhem ïa ka rai.

Mt. 27:1-2. Mk. 15:1. Lk. 22:66-71; 23:1.

Tang shu kyn-jat shai mynstep, ki rangbah lyngdoh ki la ïasuh-buit bad ki tymmen-ki-san jong u paidbah bad ki nongthoh, bad ka dorbar baroh kawei, pyrshah ïa u Jisu, ban ïoh pyniäp noh ïa U. Bad ki la ïalam ïa U sha ka dorbar jong ki, ki ïa-ong :

"Lada Me long u Krist, ïathuh ïa ngi."

Bad U la ong ha ki :

"Lada Ngan iathuh ia phi, phin ym ngeit ia Nga; bad lada Ngan kylli ruh phin ym jubab ia Nga, lymne pyllait noh. Hynrei, naduh mynta, u Khun u briew Un shong ha kamon jong ka bor u Blei."

Kumta baroh ki la ia-ong :

"Te kumta, Me long u Khun jong u Blei?"

U ong :

"Phi ia-ong ba Nga long."

"Ngin dang donkam sabut aïu pat? Naba ngi ngi la iohsngew na ka shyntur jong U hi."

Bad haba uta u paidbah jong ki baroh u ieng, ki la teh ia u Jisu, ki la ialam ia U bad ki la aiti ia U ha u Pontius Pilatus, u Lat.

309. U Judas U phasi ia lade.

Mt. 27:3-6. Kam. 1-18.

Te u Judas, uba la die noh ia U, haba iohi ba la pynrem ia U, u la kylla jingmut, u la leit pynphai biang ia kita ki laiphew shai-rupa, sha ki rangbah lyngdoh bad ki tymmen-ki-san, u ong :

"Nga la leh pop, da kaba die ia ka snam ba-lui-lui."

Ki pat ki la ong:

"Kan lei ia ngi? Peit hi mame keiñ."

Bad ynda u la bret ia kita ki rupa ha ka tempel, u la leit noh : bad u la leit sdien-phasi ia lade. Bad ynda u la sdien u la bthei pruk na pdeng; bad ki snier-ki-snap jong u baroh ki la mih. Hynrei ki rangbah lyngdoh, ynda ki la shim ia kita ki rupa, ki la ong:

"Ym bit ban buh ia ki ha ka jingkynshew, namar ki long ka dor jong ka snam."

310. Ka Lyngkha-Snam. Mt. 27: 7-10. Kam 1: 18-19.

Te ynda ki la iäpyrkhat lang, ki la thied da kita iä ka lum jong u nongthawkhiew, ban long ka jaka-tep iä ki nongwei-nongar. Bad baroh kiba shong ha Jerusalem ki la tip iä kane. Na kane ka daw iä kata ka lum, la khot ha ka ktien jong ki, Akeldama, kaba mut, ka lum-snam, haduh mynta mynne. Kumta la pynurlong iä kaba kren u Jeremias Nongäathuhlypa, uba ong :

“Bad ki la shim iä kita ki laiphew sbai-rupa, ka dor-ka-mur jong uba la buh-dor, iä uba kiba na ki khun Israel ki la buh-dor. Bad ki la ai iä ki na ka bynta ka lum jong u nongthawkhiew, kumba u Trai u la buh iä nga.” (Jer. 32:6-9. Sakh. 11:13).

3. Ka Bishar Shnong,

311. U Pilatus bad ki nongmudui. Io. 18:28-32.

Kumta ki la iälam noh iä u Jisu na u Kaiphas sha ing u lat. Te ka la long dang-step : ki pat kim shym leit rung hapoh ing, ba kin ym pyntngit¹ iä lade, hynrei ba kin dup iöh bam iä ka Paskha.² Namarkata, u Pilatus u mih shabar sha ki, bad u la ong:

(1) Ki leh myntharai tngit iä lade da kaba rung ha ingbishar. hynrei kim sheptieng ban pynäp-briew.

(2) Ka Niam ka jinglait. Kane ka long ka jinglehniam ban kyn-maw iä ka jinglehphylla u Blei ha ri Ejipt, ba ki khun nyng-kong jong ki Israel ki la lait na ka jingäp-khlam, bad ba ki Israel baroh ki la lait na ka jinglongmraw ha u Pharao. (Eks.12.)

"Phi wan mudui äiu pyrshah Une u Briew?"

"Ki la jubab bad la äa-ong ha u :

"Ba Un ym long u nonglehsniew, ngiu ym da la wan aiti äa U ha me."

Kumta u Pilatus u la ong ha ki:

"Shim hi maphi äa U, bad to bishar äa U kat-kum ka aifi jong phi."

Te ki Ju ki la ong ha u:

"Ym bit äa ngi ban pyniap¹ äano äano ruh "

"Ba yn ioh pyndep äa ka ktien jong u Jisu, kaba U la ong, ba U pyni ka jingiäp kaba kumno Un äap.

312. Ka Jingmudui jong ka dorbar Ju. *Lk. 23:2.*

Kumta ki la sdang ban mudui äa U, ki ong :

"Ngi la lap äa Une ba U pynbaji äa ka jait-ka-kynja jong ngi, bad ha U khang ban siew-khajna ha u Kaiser, bad U ong ba ma-U U long u Krist Syiem."

313. Ka jingtohkit jar-jar.

Mt. 27:11 Mk. 15:2. Io. 18:33-38.

Kumta u Pilatus u la rung biang shapoh ing bad u la khot äa u Jisu bad u Jisu U la ieng hakhamat u lat bad u lat u la kylli äa U, u ong :

"Me dei u syiem jong ki Ju?"

U Jisu U la jubab :

"Me ong hi ma-me äa kane, ne kiwei pat ki la

(1) Ki patsha Rom kim ai-bor äa ka dorbar jong ki Ju ban rai pyniap äano äano; bad ki Ju kim ju don kane ka rukom pyniap briew da kaba sah-narphna.

kren ha me shaphang jong Nga?"

U Pilatus u la phai-ktien:

"Hato nga dei u Ju? Ka jait-ka-kynja jong Me bad ki lyngdoh rangbah ki la aiti ia Me ha nga: Me la leh aiü?"

U Jisu U la jubab:

"Ka hima jong Nga kam long na kane ka pyrthei: ban da ka hima jong Nga ka la long na kane ka pyrthei, ki shakri jong Nga kin jin da la ieng-ialeh ba Ngan ym shah-aiti ha ki Ju, hynrei myn-ta ka hima jong Nga kam long nange."

Kumta u Pilatus u la ong ha U:

"Te Me u syiem?"

U Jisu U la phai ktien:

"Me keiñ me ong ba Nga dei u syiem. Na ka bynta kane la kha ia Nga, bad na ka bynta kane Nga la wan ha ka pyrthei, ba Ngan dup sakhi ia ka Jingshisha. Baroh uba dei na ka Jingshisha, u shahshkor ia ka ktien jong Nga."

U Pilatus u ong ia U:

"Kaci ka Jingshisha?"

314. Sa kiwei pat ki Jingmudui.

Mt. 27:12-14. Mk. 15:3-5. Lk. 23:4-7. Io. 18:38.

Te u tat shu lah ong ia kane, u Pilatus u la mih biang sha ki Ju, sha ki lyngdoh rangbah bad sha ki paidbah, bad u la ong ha ki:

"Ngam shem daw eiei ha U."

Bad haba la mudui ia U da ki rangbah lyngdoh bad ki tymmen-ki-san shaphang bun kiei-kiei, Um shym jubab eiei. Te u Pilatus u la kylli biang ia U. u ong:

"Mem jubab eiei? Hakhmih, shaphang katno kiei kiei ba ki iamudui ia Me. Mem ioh-sngew katno ki sabut ki ong pyrshah ia Me?"

Hynrei u Jisu Um shym jubab eiei shuh, wat shikyntien ruh, haduh ba u Pilatus u la lyngngoh ngaiñ. Hynrei ki pat ki nang iaban, ki ong :

"U pynkhihwin ia u paidbah, u hikai kylleng ka Judia, U sdang naduh Galileia haduh hangne."

U Pilatus pat, haba iohsngew shaphang ka Galileia, u la kylli la uta u briew U long u nong-Galileia. Bad haba u la tip ba U long hapoh ka jing-synshar u Herod, u la phah-pateng ia U sha u Herod, uba la don hi ruh ha Jerusalem ha kito ki sngi.

315. U Krist ha-khmat u Herod. *Lk. 23:8-12.*

Te u Herod haba iohi ia u Jisu, u la kmen shikatdei eh, namar la slem u la kwah ban iohi ia U, namar u la iohsngew shibun kiei kiei shaphang jong U, bad u la kyrmen ban iohi ka dak eiei ba Un leh. Te u la kylli ia U bun kyntien. U pat Um shym la jubab eiei ruh em. Kita pat ki rangbah lyngdoh bad ki Nongthoh ki la ia-ïeng. ki iamudui tynggeh ia U. Hynrei u Herod bad la ki shipai la jong, u la ibeiñ ia U, bad u la rkhi-beiñ da kaba pynphong ka sopti-jynsur lieh¹ bad u la phah biang ia U sha u Pilatus. Te naduh kata ka sngi, u Herod bad u Pilatus ki la kylla-lok:² namar mynshuwa ki la ialong nongshun uwei ia uwei pat.

(1) Ban rkhi beñ ia U, kum ia u babcj.

(2) Ki nongshun jong ka jingshisha, wat la kim iadei jingmut paraki hi, hynrei ki ialong kawei ha kaba ialch pyrshah ia ka jingshisha.

316. "Ngan sympat ia U"

Lk. 23:13-16.

Te u Pilatus u la khot lang ia ki rangbah lyngdoh, bad ia ki nongbishar, bad ia u paidbah, u la ong ha ki:

"Phi la wanlam ha nga ia une u Briew, kum u nongpynkhihwin ia u paidbah, bad hakhmih, haba nga la tohkit hakhmat jong phi, ngam shem daw eiei ha une u Briew shaphang kito kiei kiei ba phi iamudui ia U, lymne u Herod hi ruh. Namar nga la phah ia phi sha u, bad ha peit um shym la leh eiei ruh kaba U dei ban iap. Namarkata, ynda la sympat, ngan pyllait noh ia U."

317. "U Barabbas ne u Jisu."

Mt. 27:15-18. Mk. 15:6-10. Lk. 23:17. Io. 18:39-40.

Te ha kata ka sngi bakhrav¹ u lat u ju pyllait noh ha ki paidbah uwei u koidi, uba ki mon, kat uba ki pan. Te ha kata ka por u la don u koidi babudnam, ia uba la khot Barabbas. Bad u Barabbas u la long u nonglute, ia uba la teh la khum ryngkat bad ki nongpynkhihwin, uba ha ka jingpynkhihwin u la pyniap-briew. Kumta haba u paidbah u la iawan, u la sdang ban iapan kumba u la ju leh ia ki. Namarkata, haba ki la ialang lang, u Pilatus u la ong ha ki:

"Hynrei phi don ka rukom ba ngan pyllait ha phi uwei ha ka Paskha. Iano phi iamon ba ngan

(1) Ka sngi Paskha.

pyllait noh ha phi, ia u Barabbas, ne u Jisu, u syiem jong ki Ju, ia Uba la khot u Krist?"

Namar u la tip ba, na ka jingshun, ki lyngdoh rangbah ki la aiti noh ia U.

318. Ka tnga jong u Pilatus.

Mt. 27:19.

Te katba u dang shong ha ka jaka bishar, ka tnga jong u ka la phah sha u, ka ong :

"Wat leh eiei ia Uta u Bahok; namar mynta ka sngi, nga la shitom shibun ha ka jingpholisniew na ka bynta jong U."

319. "Pyllait ha ngi ia u Barabbas."

Mt. 27:20-21. Mk. 15:11. Lk. 23:18-19.

Io. 18:40.

Hynrei ki rangbah lyngdoh bad ki tymmen-ki-san ki la pynbor ia u paidbah ban pan ia u Barabbas, ia u Jisu pat ban pyniap. Hynrei u lat u jubab, u la ong ha ki:

"Iano phi mon ba ngan pyllait ha phi na kine arngut?"

Hynrei uta u paidbah byllien u la iäpyrta lang u ia-ong:

"To shim noh ia Une, bad to pyllait ha ngi ia u Barabbas."

Ia uba la set-koidi na kawei ka jingkhihwin ba la pynkhih ha ka 'nongbah, bad na ka jingpyn-iäp-briew.

320. "Ngan leh kumno ia u Jisu?"

Mt. 27:22-23. Mk. 15:12-14. Lk. 23:20-22.

Kumta u Pilatus u la kren biang ha ki, ba u kwah ban pyllait noh ia u Jisu:

"Kata ngan leh kumno ia u Jisu, ba la khot Krist."

Te baroh ki iapyrta biang, ki ong:

"Sahnarphna, sahnarphna ia U."

Te u ong ha ki ha kaba laisien:

"Balei, Une u Briew u la leh sniew aiü? Ngam shem daw satia ha U ba U dei ban iap; namarkata ngan sympat ia U, bad ngan pyllait noh."

Hynrei ki nang-iapyrta jam pynban, ki iadawa ba yn dup sahnarphna, ki ong:

"Sahnarphna ia U."

Bad ki jingpyrta jong ki, ki la jop.

321. La pyllait ia u Barabbas.

Mt. 27:26. Mk. 15:15. Lk. 23:24-25.

U Pilatus pat, ba u kwah ban pynsgewbha ia u paidbah, u la rai ban leh kumba ki pan. Kumta u la pyllait ha ki ia u Barabbas, ia uba la set-koidi na ka jingpyniäpbriew bad ka jingkhihwin, ia uba ki la pan: ia u Jisu pat, u la aiti ha ka mon jong ki.

322. U Krist U shah-sympat. Ka pansngiat-shiah.

Mt. 27:26-30. Mk. 15:16-19. Io. 19:1-3.

Kumta te, u Pilatus u la shim ia u Jisu, bad u la sympat. Nangta ki shipai jong u lat, ki shim

ia u Jisu, ki la ialam noh ia U sha phyllaw-ing-syiem, bad ki la khot lang sha U ia ka kynhun baroh kawei. Bad ynda ki la loit-lyngkhuid ia U, ki pynkup ia U da ka jaiñkup-saw. Bad ynda ki la thaifi-pansngiat da ki shiah, ki la pynphong ha ka khlieh jong U, bad u khah ha ka 'tikamon jong U. Bad haba ki la dem-khohsiew hakhmat jong U, ki la rkhe-beiñ ia U. Bad ki la sdang ban iakhublei ia U, ki ong:

"Khublei, ko Syiem jong ki Jul"

Bad ki la ktah-kti ia U. Bad ynda ki la bynthiew ia U, ki la shim ia uta u khah, bad ki la tied ia ka khlieh jong U.

323. "Ngam shem daw eiei ha U." *Io. 19:4-7.*

Namarkata, u Pilatus u la mih biang shabar, bad u la ong ha ki:

"Hakhmih, nga wanlam ia U shabar ha phi, ba phin dup tip ba ngam shem daw eiei ha U."

(Kumta u Jisu U la mih, U phong ka pansngiat shiah, bad ka jaiñkup sawjngem.) Bad u la ong ha ki:

"To khmih ia u Briew."

Te haba ki lyngdoh rangbah bad ki shakri ki la iohi ia U, ki la iapyrta, ki ong:

"Sahnarphna, to sahnarphna ia U."

U Pilatus u ong ha ki:

"To iashim hi ma-phi, ia U bad to sahnarphna; namar ngam shem daw eiei ha U."

Ki Ju ki la jubab ia U:

"Ngi don ka aifi, bad katkum ka aifi U dei

ban iap, namar u la pynlong ia lade u Khun jong u Blei."¹

324. Ka bor u Pilatus.

Io. 19:8-11.

Kumta haba u Pilatus u la iohsngew ia kane ka ktien, u la nang-khaweit shuh-shuh. Bad u la rung biang hapoh ing, bad u la ong ha u Jisu:

"Me dei nangno?"

Hynrei u Jisu Um shym jubab eiei. Kumta u Pilatus u la ong ha U:

"Mem kren ia nga? Memi tip ba nga don-bor ban sahnarphna ia Me, bad ba nga don-bor ban pyllait noh ia Me?"

U Jisu U la phai-ktien :

"Mem don-bor eiei ruh pyrshah ia Nga, lymda la ai ha me na jrong. Namarkata, uta uba la aiti ia Nga ha me, u don ka pop kaba kham khraw."

325. U Pilatus u wad buit ban pyllait ia u Jisu.

Io. 19:12-15.

Te naduh kata u Pilatus u la wad-lad ban pyllait noh ia U. Kita ki Ju pat ki la iapyrta, ki ong :

"Lada me pyllait noh ia Une, mem long u lok jong u Kaisar; namar baroh, kat uba thung-syiem ia lade, u kren pyrshah ia u Kaisar."

Te u Pilatus haba u la iohsngew ia kine ki ktien, u la ialam shabar ia u Jisu; bad u la shong ha ka khet-bishar, ha ka jaka ba la khot 'Lithostro-

(1) Kumta u Jisu U la iap, namarba U la pynsakhi da ki kam phylla ba U long u Khun jong u Blei.



*"Nga khuid na ka Snam jong Une U Bahok:
to ia-i hi maphi."*

tos,¹ ha ka ktien Hebru pat, 'Gabbatha.' Te ka la dei ka sngi jingpynkhreh² ia ka Paskha, kum ha ka por hynriew baje³ bad u la ong ha ki Ju :

"To khmih ia u Syiem jong phi."

Hynrei ki pat ki la iapyrta:

"To shim noh, to shim noh, to sahnarphna ia U."

U Pilatus u la ong ha ki:

"Ngan sahnarphna ia u Syiem jong phi?"

Ki lyngdoh rangbah ki la jubab:

"Ngim don syiem lai-tang u Kaisar."

326. Ka Jingrai ban sahnarphna.

Mt. 27:24-26. Mk. 15:15. Lk. 23:25 Io. 19:16.

U Pilatus, haba iohi ba um lah leh eiei, hynrei ba shu mih pynban ka jingkhiihwin, u shim ka um, u thet-kti hakhmat u paidbah, u ong :

"Nga khuid na ka snam jong Une u Bahok: to ia-i hi maphi."

Te uta u paidbah baroh u iajubab, u ong :

"Ka snam jong U kan long halor jong ngi. bad halor ki khun jong ngi."⁴

(1) Kaba mut: La siang da ki maw.

(2) Ka sngi shuwa ka Sabbat jong ka Paskha. Ia ka sngi shuwa jong man la ka Sabbat, la khot ka sngi jingpynkhreh. Hynrei kane ka la long ka sngi-peit-miet jong ka Sabbat bakhraw, kaba hap ha ka taiew Paskha.

(3) Kumba shiteng sngi ne.

(4) Sawphew snem hadien, kane ka jingpankwah ka la urlong ha ki Ju, ka jingpynshitom basngewtriem ia ki da ki Roman hapoh u Bepasian bad u Titus.

Kumta u la pyllait noh ha ki ia u Barabbas; ia u Jisu pat, ynda la lah sympat, u la aiti ha ki ban sahnarphna. Te ki la shim ia u Jisu bad ki la ialam noh ia U.

4. Ka Jingpynshitom bad ka Jingiap

327. U Jisu U kiew sha Kalbari.

Mt. 27:31-32. Mk. 15:20-21. Lk. 23:26.. Io. 19:17.

Bad ynda ki la lah rkhibeiñ ia U, ki la shim noh na U ia ka jaiñ kup, bad ki la pynkup pat ia U da ki jaiñ jong U hi, bad ki la ialam ia U ba yn dup sahnarphna. Bad da kaba bah hi ia ka diengphna, U la leit sha kata ka jaka ba la khot Kalbari,¹ ha ka ktien Hebru pat, 'Golgotha.' Te katba ki nang-ialeit, ki la iakynduh ia u nongKiri-ni, uba kyrteng u Simon, uba iaïd nangta. ba u wan-phai na lum, u kpa jong u Aleksander bad u Ruphus, ki la pynbor ia une ban bah ia ka diengphna jong U. Bad ki la tynrong ha u ia ka diengphna nadien u Jisu.

328. Ki kynthei Jerusalem.

Lk. 23:27-32

Te u paid-bynriew babun u la iaïbud ia U, bad ki kynthei kiba iam lynfiar bad iaïmbriew ia U. Hynrei u Jisu haba U phai sha ki, U la ong:

"Ko khun Jerusalem, wat iam na ka bynta jong Nga, hynrei to iam na ka bynta ia lade hi bad na ka bynta ki khun la jong. Namar, hakhmih, ki

(1) Kalbari ne Golgotha: ka jaka jong ka shynrongkhlich.

sngi kin poi ha kiba kin ong: 'Suk ki balyngki bad ki kpoh kibym shym kha, bad ki jymbuiñ kibym shym ai-buiñ,' Nangta kin iasdang ban iapyrta ia ki lum-bah: "To hap ha ngi": bad ha ki lum-rit: "To tap ia ngi." Namar lada ha u dieng-im ki leh ia kine kiei-kiei, aïu yn leh ha u dieng-tyrkhong?"

Te ryngkat bad U la ialam ruh sa arngut kiwei pat ki dakaid, ban dup pyniäp.

329. Ha Golgotha.

Mt. 27:33-34; 38. Mk. 15:22-23; 25; 27-28.

Lk. 23:33-34. Io. 19:18.

Bad ki la ialam ia U sha ka jaka ba la khot Golgotha, kaba mut haba la batai, ka jaka Kalbari; bad ki la ai dih ia U da ka waiñ ba la khleh bad ka umksang. Te ynda U la mad, Um shym treh dih. Te ka la long ha ka por lai baje, bad ki la sahnarphna ia U. Ryngkat bad U ki sahnarphna arngut ki nongtuh, uwei ha kamon bad uwei ha kadiang, bad u Jisu hapteng. Kumta la pyndep ia ka Jynthoh kaba ong: "La ñiew lang ia U bad ki bymman." (Is. 52: 12)

U Jisu pat U la ong:

"Ko Pa, to map ia ki, namar kim tip ia kaba ki leh."

330. Ka Jynthoh ha khlieh ka diengphna.

Mt. 27:37. Mk. 15:26. Lk. 23:38. Io. 19:19-22.

Te u Pilatus u la thoh ruh ka jynthoh byrta ia ka jingmudui ia U, bad u la buh halor ka diengphna. Bad la thoh U **JISU NASARETH, U SYIEM**

KI JU. Kumta bun ki Ju ki la pule ia kane ka jynthoh, namar kata ka jaka ha kaba la sahnar-phna ia u Jisu ka la long hajan ka 'nongbah; la thoh ruh ia ka ha ka ktien Hebru, Grik bad Latin. Namarkata, ki lyngdoh rangbah jong ki Ju ki la ong ia u Pilatus.

"Wat thoh: U Syiem jong ki Ju; hynrei ba U la ong: Nga long u Syiem jong ki Ju."

U Pilatus u la phaiktien:

"Ia kaba nga la thoh, nga la thoh."

331. Ki jaiñ jong u Jisu.

Mt. 27:35-36. Mk. 15:24. Lk. 23:34. Io. 19:23-24.

Kumta ynda ki la sahnarphna ia U, ki shipai ki la shim ia ki jaiñ jong U, (bad ki la bynta saw bynta, shi-bynta ia uwei-uwei u shipai) bad ia ka soptilor de. Hynrei kata ka soptilor ka la long khlem snur, ba la shu thaiñ baroh shirynieng naduh khlieh. Kumta ki la ia-ong paraki hi:

"Ngin ym iakad ia ka, hynrei ngin shu iakhalai nusib, kan long ka jongno."

Ba yn pyndep ia kata kaba la ong da u Nong-iathuhlypa (Ps. 21 19):

"Ki la iasam ia ki jaiñ jong Nga hapdeng jong ki, bad ia ka jingphong jong Nga ki la iakhalai nusib."

Bad kita ki shipai ki la leh ia kine kiei kiei; katba ki iashong ap ia U hangta.

332. Ki Jingkren-beiñ ia u Jisu.

Mt. 27:39-44. Mk. 15:29-32. Lk. 23:35-37.

Te ki paidbah ki la shu ia-ieng peitkai. Bad kito kiba iaïd nangta, ki la kren-beiñ ia U, ki kyrngah-khlieh ki ong:

“Ani, Me uba pynjot ia ka tempel u Blei bad Me tei pat laisngi, to pynim ia lade; lada Me dei u Khun jong u Blei, to hiar na ka diengphna.”

Kumjuh ruh kita ki rangbah lyngdoh, ryngkat bad ki Nongthoh bad ki tymmen-ki-san ki iarkhie-beiñ, ki la ong uwei ia uwei pat :

“U la pynim ia kiwei; ia lade pat Um lah pynim; lada dei u syiem ki Israel, to Un hiar mynta na ka diengphna, ba ngin dup iöhi, bad ngin ngeit ha U. To Un pynim ia lade, lada Une U long u Krist, Uba la jied jong u Blei. U la shaniah ha u Blei: to Un pyllait ia U mynta, lada U treh ia U, namar U la ong: ‘Nga long u Khun jong u Blei.’”

Kita ki shipai ruh ki la iarkhie-beiñ ia U, ki iatur shajan, ki tyrwa ha U ka sirka, bad ki ong:

“Lada Me dei u syiem jong ki Ju, to pynim ia lade.”

Ia kata kajuh hi kita ki nongtuh ruh, kiba la shah-sahnarphna ryngkat bad U, ki la beiñ ia U.

333. U Nongtuh uba kylla-jingmut. Lk. 23: 39-43

Te uwei na kita ki nongtuh-nonglute, kiba la sdien, u la tim ia U, u ong:

“Lada Me dei u Krist, pynim ia lade bad ia ngi de.”

Hynrei uta uwei pat u phai-ktien, u la kynhied
ia u, u ong:

"Hato mem sheptieng satia ia u Blei ruh, haba
me long ha kajuh ka jingpynrem? Ngi shisha
da ka bahok ruh, namar ngi ioh-poliang ia kaba
ngi la leh, hynrei Une pat Um shym la leh eiei ka
basniew."

Bad u la ong ha u Jisu:

"Ko Trai, to kynmaw ia nga, ynda Me poi ha
la ka hima la jong."

Te u Jisu U la ong ha u:

"Shisha Nga ong ha me: Mynta ka sngi men
long ryngkat bad Nga ha paradais."

**234. Ka Kmie jong u Krist bad ka Kmie jong ngi
ruh. *Ioan. 19: 25-27.***

Te hajan kata ka diengphna jong u Jisu, ki ieng
ka Kmie jong U, bad ka para jong ka kmie jong U,
ka Maria u Kleophas, bad ka Maria Makdalena.
Haba u Jisu U la iohi ia la ka Kmie bad u synran
uba U ieid, ba u ieng, U ong ia la ka Kmie:

"Ko briew, to khmih ia la u khun."

Nangta, U ong ia uta u synran:

"To khmih ia la ka Kmie."

Bad naduh kata ka por, uta u synran u la shim
ia Ka ha la ing.

335. Ki ktien bakhatduh.

Mt. 27:45-49. Mk. 15:33-36. Lk. 23:44-45.

Ioan. 19:28-29.

Te ka la long kumba hynriew baje; bad ka jingdum ka la kah ia ka pyrthei shi-tyllup haduh khyndai baje. Bad ka sngi ruh ka la dum. Te ha ka por khyndai baje, u Jisu U la pyrta da ka sur ka bajam, U ong:

"Eloi, Eloi, lamma sabakthani?"

Kaba mut, haba la batai: "Ko Blei jong nga, ko Blei jong nga, balei Me la iehnoh ia Nga?"

Bad don na kita kiba ia-ïeng hajan, haba ki la iohsngew, ki la ong:

"Ha sngap, U khot ia u Elias."

Nangta u Jisu ba U tip, ba ia kiei kiei baroh la pyndep pynbiang mynta, ba yn ioh pyndep ia ka jynthoh, U la ong :

"Nga sliang."

Te la don u khiew ba la buh hangta, uba dap da ka sirka. Bad uwei na ki shisyndon u mareh, u la shim ia u sponj, u la pyndap da ka sirka, u la spaifi ha u khah bad u la ai ha U ban dih, u ong:

"Ieh, to ngin iapeit lada u Elias u wan ban pynhiar ia U."

Hynrei kita kiwei pat ki la ong:

"Ieh, to ngin iapeit lada u Elias u wan ban pyllait ia U."

336. "Ka la dep."

Mt. 27:50. Mk. 15:37. Lk. 28:46. Ioan. 19:30.

Kumta u Jisu, ynda U la shim ia kata ka sirka, U la ong:



*"U nguh la ka khlich, U la aiti noh ia la ka
mysiem."*

"Ka la dep."

Te haba u Jisu da kaba pyrta da ka sur bajam.
U la ong :

"Ko Pa, ha ki kti jong Me Nga aiti ia la ka mynsiem."

Bad haba ong ia kane, U nguh la ka khlieh,
U la aiti noh ia la ka mynsiem.

337. Ka Pyrthei-Mariang ka iam-briew.

Mt. 27:51-53. Mk. 15:38. Lk. 23-45.

Hakhmih ruh, ka pyrda jong ka tempel ka la kad¹ arliang wak, naduh khlieh haduh trai, bad ka khyndew ka la khynfiuh ; bad ki mawsiang ki la pdang; bad ki jyntep ki la ang: bad bun ki met jong ki 'riewkhuid kiba la iohthiah, ki la mih pat. Ynda haba ki la mih noh na kita ki jyntep, hadien ka jingmihpat jong U, ki la iawan ha ka nongbah bakhuid, bad ki la paw ha bun ngut.

338. "Shisha Une U dei u Khun jong u Blei"

Mt. 27:54. Mk. 15:39. Lk. 23:47-48.

Hangta u rangbah-shispah² uba ieng ha pyrshah jong U, haba iohi ba da kaba pyrta kumne U la dkut mynsiem, u la iaroh ia u Blei da kaba ong:

"Da shisha Une u Briew U la long u bahok. Shisha keifi Une u Briew U long u Khun jong u Blei."

(1) Ka Jutang Barim ka la kut ban sdang sa ka Jutang Bathym-mai, da ka jingiap jong u Jisu.

(2) U rangbah-shipai uba don shispah-ngut ki shipai hapoh jong u.

Bad kita kiba la don ryngkat bad u kiba dang
ia-ap ia u Jisu, bad kita ki paidbah baroh napdeng
jong ki, kiba la iawan lang sha kane ka jingpeitkai,
haba iohi ia u jumai bad ia kita kiei kiei kiba la
jia, ki la sheptieng her, ki ong:

"Shisha keif, Une U la long u Khun jong u
Blei."

Da kaba tied ia la ka shadem, ki la leit-phai
noh.

339. Ki lok jong u Jisu.

Mt. 27:55-56. Mk. 15:40-41. Lk. 23:49.

Kito ki para ba ia-ithuh jong U pat, baroh ki
la ia-ieng na jngai, ki ap-khmih ia kine kiei kiei. La
don ruh de ki kynthei kiba ia-jngoh na sha jngai:
hapdeng jong ki la don ka Maria Magdalena bad
ka Maria ka Kmie u Jakob barit bad u Josep, bad
ka Salome ka kmie jong ki khun u Sebedi: kiba
mynba U la don ha Galileia, ki la bud ia U bad la
shakri ia U; bad bun kiwei pat ki kynthei, kiba la
kiew ryngkat bad U sha Jerusalem.

340. U Shipai u dung ia ka krung u Jisu.

Ioan. 19:31-34.

Kumta ki Ju (namar ka la long ka sngi pyn-
khreh¹) khnang ba kita ki met kin ym sah halor
ka diengphna ha ka sngi sabbat (namarba kata ka
Sabbat ka la long ka sngi bakhraw), ki la kyrpad

(1) Ka Sngi Thoh-dieng ha ka taiew Paskha; ha kata ka jan-
miet ki Ju ki la bam ia u khun 'langbrot Paskha.

ia u Pilatus ba yn dup kdiah ia ki kjat jong ki bad dup weng noh. Kumta ki shipai ki la wan, bad ki la kdiah ia ki kjat jong u banyngkong, bad jong uta uwei pat, ia uba la sahnarphna lem bad U. Hynrei haba ki la poi ha u Jisu, bad ki iohi ba U la lah iap, kim shym la kdiah ia ki kjat jong U. La katta ruh uwei na kita ki shipai¹ u la dung ia ka krung jong U da u sum, bad markumta la mih ka snam bad ka um.

Te uta uba la iohi u la sakhi: bad ka sakhi jong u ka long ka bashisha. Bad u hi u tip ba u kren hok, ba phi ruh phin dup ngeit. Namar ia kine kiei kiei la leh ba yn ioh pyndep ia ka jynthoh (*Eks. 12: 46. Jingkheif. 9: 12:*) "Kawei ka shyieng jong U ruh, phin ym kdiah." Bad sa kawei pat ka jynthoh ruh ka long "Kin iaingoh ia Uta Uba ki la dung." (*Sakh. 12: 10*).

341. Kaba pynhiar ia ka met jong u Jisu.

*Mt. 27:57-59. Mk. 15:42-46. Lk. 23:50-53.
Ioan. 19:38-40.*

Te mynta haba la premmiet, (namar ka la long ka sngi pynkhreh, kaba long ha shuwa ka sngi Sabbath, la wan ū Josep na Arimathaia, - kawei ka nongbah ha Judia-u rangbah shong-dorbar badon-burom, u 'riewspah u babha bad bahok, uba u hi ruh u dang khmih-lynti ia ka hima jong u Blei; une um shym la iamynjur ia ka jingsuhbuit bad ki jingleh-jingkam jong ki, namar u la long u synran jong u Jisu (hynrei ha ka barieh, namar ka

(1) Ki ong ba ka kyrteing jong une u shipai, ka la long u Lonjinus.



*Ko Pa ha ki kti jong Me
Nga aiti ia la ka mynsiem. (Page 334)*

jingtieng ia ki Ju). U la wan bad da kaba shlur u la rung shapoh sha u Pilatus, bad u la pan ia ka met jong u Jisu. U Pilatus pat u la kyndit ba U lah da iap. Ynda u la phah-khot ia uta u rangbah-shispah, u la kylli na u la U la lah iap. Bad haba u la tip na uta u rangbah-shispah, u la ai ia ka met ha u Josep. Kumta u Josep u la leit bad u la rah noh ia ka met jong u Jisu.

Te u Nikodemus ruh (uta uba la wan mynshuwa sha u Jisu, mynmiet) u la wan, u rah kumba sanphew ser ka jingkhleh ka mir bad ka aloes.¹ Kumta ki la shim ia ka met jong u Jisu, bad ynda ki la pynhiar ia ka, ki la spaiñ da ki jaiñ linen ryngkat bad kita ki jingiwbiñ, katkum ka rukom tepbriew jong ki Ju.

342. La tep ia ka met jong u Krist.

Mt. 27:60. Mk. 15:46. Lk. 23:53-54. Ioan. 91:41-42.

Te ha kata ka jaka ha kaba la sahnarphna ia U, la don ka kper; bad ha kata ka kper, ka jyntep thymmai, (ia kaba u Josep u la khlóng², ha u mawsiang) ha kaba ym pat shym buh iano iano ruh. Hangta keiñ, namar ka sngi pynkhreh jong ki Ju, ki la buh ia u Jisu, ba kata ka jyntep ka la don hajan. Bad u Josep u la tyllup ia ka jyn-

(1) Ka *Mir* bad ka *Aloes* ki long ki jingiwbiñ ba ioh na ki dieng, ban kyllan ia ka met-iap ba kan ym pyut. Jin katne ka jingiwbiñ u Nikodemus u la pynlut ban ioh tep don burom ia u Jisu.

(2) Ka jyntep jong ki Ju ki ba'riewspah ka long kum ka krem ba la khlóng ha u mawsiang: bad ka jyntap ruh ka long da u maw.

khang jyntep da u mawbah, bad u la leit noh. Bad ka sabbat ka la mih.

343. Ki kynthei ki pynkhreh ia ki jingkyllan bad jingsleh. *Mt. 27:61. Mk. 15:47. Lk. 23:55-56.*

Kita ki kynthei ruh kiba la iawan bud ia U na Galileia, ka Maria Magdalena bad ka Maria u Josep, ki la iohi ia ka jyntep, ba ki iashong pyrshah ka jyntep, ki la iohi hangno bad kumno la buh ia ka met jong U. Haba leit-phai noh, ki la pynkhreh ia ki jingiwbih bad ki jynsleh. Ha ka sngi sabbat pat ki la shong-sngi katkum ka hukum.

344. Ki nongphira jyntep. *Mt. 27:62-66:*

Hynrei ha kawei pat ka sngi, kaba hadien ka sngi-pynkhreh, ki rangbah lyngdoh bad ki pharisi ki la wan ha u Pilatus, ki ong:

“Ko kynrad, ngi kynmaw ba uto u nongshukor u la ong mynba u dang im: ‘Hadien laisngi Ngan mih pat.’ Kumta, to hukum ban ap-phira ia ka jyntep haduh ka sngi ka balai: ioh kumno kumno ki synran jong U ki wan-tuh noh ia U, bad kin ong ha u paidbah: U la mih-pat na baiap, bad ka jingshukor bakhatduh kan kham sniew ban ia ka banyngkong.”

U Pilatus u la ong ha ki:

“Phi don la ki nongap-phira: to leit to phira katba mon.”

Kumta ki ialeit, ki la pynskhem ia ka jyntep, ki shon-shap ia u maw bad ki buh nongap-phira.

KA LYNNONG III
KA JINGMIHPAT JONG U JISU

1. U paw ha Judia.

345. Ki kynthei bad arngut ki synran ki leit sha
jyntep. *Mt. 28:1-4. Mk. 16:1-4. Lk. 24:1-2; 12.*
Ioan. 20:1-3.

Ynda la lah¹ ka sabbat, ka Maria Magdalena.
bad ka Maria² jong u Jakob, bad ka Salome, ki la
thied jyniwbih ban dup ioh wan pynsleh ia u Jisu.

Te ha ka sngi nyngkong³ jong ka taiew, dang
step phyrngap, ki la iawan sha jyntep, ki wan-rah
ia ki jyniwbih ba ki la khreh; bad ki la poi hamar
ba mih-sngi. Te ki la ia-ong paraki hi:

“Mano ban pyntyllun ia ngi ia u maw na ka
jynkhang jyntep?”

Te kyndit la khie u jumai bajur; naba u Angel
jong u Trai u la hiar na bneng: bad u wan bad u
la pyntyllun noh ia u maw, bad u la shong halor
jong u. Ka khmut-ka-khmat jong u ka la long
kum ka lei-lieh, bad ka jaiñ jong u kum ka ior.

(1) Ha ka janmiet sngi Saitjain hi, haba la kut ka poi ban
rakhe ia ka sngi sabbat.

(2) Ka kmie jong u Jakob.

(3) Mynta ngi ong ka Sngi u Trai ban kynnaw ia ka jing-
mih-pat u Trai jong ngi u Jisu.

Hynrei na kaba tieng ia u, kita ki nongap-phira ki la kyüh, bad ki la long kum ki baiap.

Haba jngoh, kita ki kynthei ki la iöhi ba la pyntyllun noh ia uta u maw; namar u la long u baheh lydaiñ.

Ka Maria Magdalena ka la iöhi ba la weng noh na jyntep ia uta u maw; kumta ka la mareh bad ka la wan sha u Simon Petrus bad sha uta uwei pat u synran¹ uba u Jisu U iëid, bad ka ong ha ki:

"Ki la shim noh na jyntep ia u Trai, bad ngim tip hangno ki la buh ia U."

Kumta u Petrus bad uta uwei pat u synran ki la leit.

346. U Angel u kren ia kita ki kynthei.

Mt. 28:5-7. Mk. 16:5-6. Lk. 24:3-8.

Kita ki kynthei haba ki la iarung ha jyntep kim shym shem ia ka met jong u Trai Jisu. Te ka la jia, ba katba ki dang ialyngngoh kumta, kyn-dit arngut ki rangbah kiba kup da ki jaiñkup-lieh bathaba ki la ieng hajan jong ki. Hynrei ba ki ia-sheptieng bad ki iadem la ki khmat sha khyndew uta u samla uba shong ha kamon, u ong ha ki:

"Wat sheptieng. Nga tip ba phi iawad ia u Jisu na Nasareth ia Uba la sahnarphna. Balei phi iawad ia u baim hapdeng ki baiap? Um don hangne, namar U la mihpat kumba U la ong. Kynmaw kumno U la ong ha phi mynba U dang don ha Galileia; ba U ong: 'Namar ka dei ban aiti noh ia u Khun u briew ha ki kti jong ki 'riewpop bad ban

(1) U Ioannis Apostol, u Nongthoh Gospel.

shah-sahnarphna bad ban mihpat ha kaba lai sngi.' Ale, to peit ia ka jaka ha kaba la buh ia u Trai. Khie leit bran-bran, to iathuh ia ki synran jong U ba U la mihpat; hakhmih ruh U leit ha shuwa jong phi sha Galileia. Hangta phin iohi ia U kumba U la ong ha phi."

Kumta ki la iakynmaw ia ki ktien jong U.

347. Kita ki kynthei ki iaphet noh.

Mt. 28:8. Mk. 16:8.

Ki pat ki la iamih noh, ki la phet na jyntep namar ka jingkyüh bad ka jingsheptieng ka la kem ia ki; bad kim shym la iathuh eiei hano hano ruh namarba ki la khaweit.

348. U Petrus bad u Yoannis ki wan sha jyntep.

Lk. 24:12. Ioan. 20:3-10.

Kumta u Petrus bad uta uwei pat u synran ki la iawan sha jyntep.

Te haroh arngut ki la iamareh lang, hynrei uta uwei pat u synran u la mareh kham stet ban ia u Petrus, bad u la poi nyngkong ha jyntep. Te haba u la dem u la iohi ia ki jaiñ-linen ba la buh, hynrei um shym la rung shapoh. Kumta la wan sa u Simon Petrus, u bud ia u, bad u la rung hapoh jyntep, bad u la iohi ia kita di jaiñ-linen ba la buh, bad ia ka jaiñ-rumar kaba la don ha ka khlieh jong U ba ym shym buh lang bad kita ki jaiñ-linen, hynrei ba la khylliap kyrpang ha kawei ka jaka. Nangta uta uwei u synran ruh, uba la poi nyngkong ha jyntep u la rung: bad u la iohi bad u la ngeit. Namar kim pat shym shemphang ia ka jyn-

thohi ba U dei ban mih-pat na ki baiap.

Kumta kita ki synran ki la leit-phai noh sha la ing, da kaba sngewlyngngoh ia kata kaba la jia.

349. U Krist U paw ha ka Maria Magdalena.

Mk. 16:9-11. Ioan. 20:11-18.

Te haba U la mihpat dang step, ha ka sngi nyngkong¹ jong ka taiew, U la paw shuwa ha ka Maria Magdalena, na kaba U la beh noh hyn-niew ngut ki ksuid. Ka Maria pat ka la ieng habar kata ka jyntep, ka iam. Te katba ka dang iam, ka la dem, bad ka la jngoh shapoh jyntep. Bad ka la iohi arngut ki angel, kiba riam lieh, ki shong uwei ha khlieh bad uwei ha kjat, ha kaba la buh ia ka met jong u Jisu. Ki ong ha ka:

"Ko kynthei, balei pha iam?"

Ka ong ha ki:

"Namar ki la shim noh ia u Trai jong nga, bad ngam tip hangno ki la buh ia U."

Ka tang shu lah ong ia kane, ka la phaidien, bad ka la iohi ia u Jisu Uba ieng; hynrei kam shym tip ba dei u Jisu.

U Jisu U ong ha ka:

"Ko kynthei, balei pha iam? Iano pha wad?"

Maka ba la pyrkhat ba dei u nongsumar-kper, ka ong ha U:

"Ko kynrad, lada me la rah noh ia U, iathuh ia nga, hangno me la buh ia U: te ngan shim noh ia U."

U Jisu U ong ha ka:

"Maria!"

(1) Kaba ngi ong mynta ka Sngi u Trai. Na ka bynta ki Ju, ka taiew ka la sdang hadien ka sabbat.

Ka da phai ka ong ha U:

"Rabboni!" (kaba mut, ko Nonghikai)

U Jisu U ong ha ka:

"Wat ktah ia Nga, namar Ngam pat shym leit kiew sha u Kpa jong Nga: hynrei to khie leit sha ki para jong Nga, bad ong ha ki. Nga kiew sha u Kpa jong Nga, bad u Kpa jong phi, sha u Blei jong Nga, bad u Blei jong phi."

Ka Maria Magdalena ka la leit iathuh ha kita ki synran kiba la ju don bad U, kiba dang ia-iam sngewsih:

"Nga la iohi ia u Trai, bad U la ong ha nga ia kine kiei kiei."

Ki pat haba iohsngew ba U im bad ba ka la iohi, kim shym ngeit.

350. U Krist U paw ha ki kynthei, kiba leit iathuh ha ki Apostol ia kaba ki la iohi.

Mt. 28:8-10. Lk. 24:9-11.

Ka Maria Magdalena bad ka Yoanna, bad ka Maria u Jakob, bad kiwei pat ki kynthei kiba la iadon ryngkat bad ki, ki la leit-phai noh kloi kloi na jyntep, da ka jingsheptieng bad ka jingkmien ka bakhraw, ki iamareh ban iathuh ia ki synran jong U. Te bakhmih, u Jisu U la wan-tan ia ki, U ong:

"Khubleil"

Ki pat ki la iawan shajan, bad ki la iabat ia ki kiat jong U, bad ki la mane ia U. Nangta u Jisu U la ong ha ki:

"Wat sheptieng. To leit iathuh ia ki para jong Nga, ba kin leit sha Galileia; hangta kin iohi ia Nga."

Te ki la wan iathuh ia kine kiei kiei ha ki Apostol, bad ha kiwei pat ki synran jong U kiba ia-iam sngewsih, ki ong:

"Ngi la iohi ia u Trai bad ia ki Angel, bad ki la iathuh ha ngi ia kine kiei kiei."

Hynrei kine ki ktien ki la i ha ki kum ki 'tien biej, bad kim shym ngeit ia ki:

351. Ki shipai ki bam-tyngka. *Mt. 28:11-15.*

Haba ki la leit noh, hakhmih, katto katne ngut na kita ki nongap-phira ki la wan sha ka 'nongbah, bad ki la iathuh ha ki rangbah lyngdoh ia kita kiei kiei baroh kiba la jia. Ki pat, ynda ki la ialum lang bad ki tymmen-ki-san, ki iasuhbuit, ki la ai bun tyngka ia kita ki shipai, ki ong:

"To ong: Ba ki synran jong U ki la wan myn-miet, bad ki la tuh noh ia U haba ngi dang ioh-thiah. Bad lada u lat u iohsngew ia kane, ngin pynngeit ia u, bad ngin da ia phi."

Kumta haba ki la shim ia ka tyngka, ki la leh kumba la pynhikai: bad kane ka ktien ka la phriang kylleng hapdeng ki Ju, haduh mynta mynne.¹

352. U Krist U paw ha lynti sha Emmaus. *Mk. 16:12-13. Lk. 24:13-25.*

Hakhmih ruh, hadien kane, arngut na ki synran ki la leit ha kata hi ka sngi sha kawei ka shnong kaba kumba hynriewphew phurlong² na

(1) Haduh ka por ba u Matheus u thoh ia ka Gospel.

(2) Kumba hynfiew mer shiteng. Ka Emmaus ka don shaphang sepngi lam-shatej khyndiat na Jerusalem.

Jerusalem, kaba kyrteŋg ka Emmaus. Bad ki la iakren paraki hi shaphang kine kiei kiei kiba la jia. Te ka la jia ba katba ki dang iakren bad iakyl-li tohkit paraki, u Jisu hi ha kawei pat ka dur, U wan hajan, U la iaid ryngkat bad ki. Hynrei ia ki khmat jong ki la pynthame ba kin ym ithuh ia U. Te U la ong ha ki:

“Ki jingkren-jingkhana aüu kine kiba phi iakren ia-iaid para-phi hi bad phi sngewsih?”

Te uwei na ki, uba kyrteŋg u Kleophas, u jubab u la ong ha U:

“Hato ma-Me marwei u nongwei ha Jerusalem, bad Mem pat tip ia kiei kiei kiba la jia hangta ha kine ki sngi?”

“U la ong ha ki:

“Kiei?”

Te ki la ong:

“Shaphang u Jisu Nasareth, Uba la long U Nong-iathuhlypa, u bakhrawbor ha ka kam bad ka ktien hakhmat u Blei bad u paidlang baroh. Kumno ruh ba ki lyngdoh rangbah bad ki nongsynshar jong ngi, ki la aiti noh ia U sha ka jingpynrem jong ka jingiap, bad ki la sahnarphna ia U. Ngi pat, ngi la nang-iakyrmen ba dei ma-U keiñ uban siewspah ia u Israel: nador kine baroh ruh, putet, mynta ka dei ka sngi ka balai naduh ba kine kiei kiei ki la jia. Nador kata, don ki kynthei ruh kiba na ngi kiba la pynsmiej her ia ngi, kiba la don ha jyntep shuwa ban shai. Namarba kim shem ia ka met, ki la wan, ki ong ba ki la iohi ka jingithuh-paw ia ki Angel kiba ong ba U im. Te don na ngi kiba la leit sha jyntep: bad ki la lap kumta kumba la iathuh kita ki kynthei, hynrei ia U pat kim shym shem satia.”

U pat U la ong ha ki:

"Phi ki babiej bad ki basuki ka dohnud ban ngeit ia kiei kiei baroh kiba ki nongiathuhlypa ki la kren! Hato kam dei ia u Krist ban shah ia kine kiei kiei bad kumta ban rung ha la ka burom?"

Te haba U la sdang na u Moses, bad na ki nongiathuhlypa baroh, U la pynpaw ha ki na ki jynthoh baroh, ia kiei kiei kiba dei shaphang ia lade hi. Bad ki la poi hajan kata ka shnong kaba ki leit: ma-U pat U leh kumban leit kham jngai. Hynrei ki la pynbor ia U, ki ong:

"To sah ryngkat bad ngi, namar ka la kem-ïong-reiñ, bad ka sngi ka la noh."

Te U la leit rung ryngkat bad ki. Bad ka la jia, katba U dang shong-bam ryngkat bad ki, U la shim ia u kpu, bad U la kyrkhu, bad U la kdiah bad U la sam ha ki. Kumta la pynpeitmat ia ki khmat jong ki, bad ki la ithuh ia U, U pat U la jah noh na khmat jong ki. Te ki la iakren paraki hi:

"Hato ka dohnud jong ngi kam shym la rhem hapoh jong ngi katba U la kren ha lynti, bad la khyllied ha ngi ia ki jynthoh?"

Te ki ieng joit ha kata kajuh ka por, ki la leit phai biang sha Jerusalem, bad ki la lap ia ki khatwei ngut bad kito kiba la don ryngkat bad ki ba ki ialang lang, ki ong:

"U Trai U la mihpat da shisha, bad U la paw ha u Simon."

Bad ki la iathuh ia kiei kiei kiba la jia ha lynti: bad kumno ki la ithuh ia U ha kaba kdiah kpu. Pynban ia ki ruh kim ngeit.



*"Katba u dang shong bam ryngkat bad ki,
U la shim ia u kpu, bad u la kyrkhu, bad
u la kdiah.....bad ki la ithuh ia U."*

353. U Krist U paw ha ka jingialang jong ki Apostol. Mk. 16:14. Lk. 24:36-45. Ioan. 20:19-22.

Te katba ki dang iakren shaphang kine kiei kiei, haba la premmiet ha kata hi ka sngi, ka sngi nyngkong jong ka taiew, haba la khang ia ki jynkhang, hangta haba ki synran ki la ialum lang ba ki sheptieng ia ki Ju, katba ki dang iashongbam, u Jisu U la ieng hapteng jong ki, bad U ong ha ki: "Ka jingsuk ha phi. Dei ma-Nga, wat sheptieng."

Ba ki la kulmar bad sheptieng, ki la tharai ba ki iohi snaïap. Bad U la ong ha ki:

"Balei phi iakulmar, bad balei ki jingpyrkhat ki kiew ha ki dohnud jong phi? To peit ia ki kti jong Nga, bad ki kjat, ba dei ma-Nga hi keiñ; to twad bad to jngoh naba ka snaïap kam don doh bad shyieng, kumba phi iohi ia Nga ba Nga don."

Te ynda U la ong ia kane, U la pyni ha ki ia ki kti bad ki kjat bad ka krung. Hynrei katba kim pat ngeit, bad dang lyngngoh na ka jingkmén, U la ong:

"Phi don eiei hangne ban bam?"

Te ki la ai ia U shidkhot ka dohkha-syang bad ka rewngap. Bad ynda U la lah bam hakhmat jong ki, U shim ia ki Batam, U la ai ha ki. Kumta, kita ki synran ki la iakmen, haba ki la iohi ia u Trai. Bad U la ong ha ki:

"Kine keiñ ki ktien kiba Nga la kren ha phi, mynba Nga dang don ryngkat bad phi, namar la dei ban pyndep ia kiei kiei baroh kiba la thoh ha ka aif u Moses bad ki nongiathuhlypa bad ki Salm, shaphang jong Nga."

Ynda kumta, U la plie kdar ia ka jingmut-jing-pyrkhat jong ki ba kin dup sngewthuh ia ki jin-thoh. Kumta U la ong biang ha ki:

“Ka jingsuk ha phi. Kumba u Kpa U la phah ia Nga, Nga ruh Nga phah ia phi.”

Ynda U la ong ia kane, U la pyrsad: bad U la ong ha ki:

“To pdiang ia u Mynsiem Bakhuid: Ia ki pop jongno jongno ba phin map, yn map ia ki; bad ia ki pop jongno jongno ba phin pynsah yn pynsah.”

354. Ka Jingpaw ha u Thomas. Ioan. 20:24-29.

Hynrei u Thomas, uwei na ki khat-ar ngut, ia uba la khot Didimus, um shym don ryngkat bad ki mynba u Jisu U la wan. Kumta kita kiwei pat ki synran ki la ong ha u:

“Ngi la iohi ia u Trai.”

Hynrei u la ong ha ki:

“Lynda ngan iohi ia ka dien-prek ha ki kti jong U, bad bsuh ia la ka shynriah’ti ha ka jaka jong ki prek, bad bsuh ia la ka kti ha ka krung jong U, ngan ym ngeit.”

Te phra sngi hadien, ki synran jong U ki la iadon biang hapoh: u Thomas ruh ryngkat bad ki. U Jisu U rung, haba ki jynkhang ki khang, bad U la ieng hapdeng, bad U la ong:

“Ka jingsuk ha phi.”

Nangta U la ong ia u Thomas.

“To bsuh hangne ia ka shynriah’ti jong me, bad to khmih ia ki kti jong Nga ; diang ka kti jong

(1) Ki ktien bashai kdar ban sakhi ia ka Sakramen jong ka Jingphla.

me bad to bsuh ha ka krung jong Nga; te wat long u bymngait, hynrei u bangeit."

U Thomas u la phai-ktien, bad u la ong ha U:

"Ko Trai jong nga, bad ko Blei jong ngal"

U Jisu U la ong ha u:

"Ko Thomas, namarba Me la iöhi ia Nga, me la ngeit: suk kito kibym shym iöhi, bad ki la ngeit."

2. U paw ha Galileia.

355. U Jisu U paw ha duriaw Tiberia.

Ioan. 21:1-14.

Hadien kane, u Jisu U la pynpaw pat ia lade ha ki synran, ha ka duriaw Tiberia. Te U la pynpaw kumne. Ki la iadon lang u Simon Petrus bad u Thomas, ia uba la khot Didimus, bad u Nathanael uba na Kana, Galileia, bad ki khun jong u Sebedi,¹ bad arngut kiwei pat na ki synran jong U. U Simon Petrus u ong ha ki:

"Nga leit tong-dohkha."

Ki ong ha u:

"Ngi ruh ngi wan bad me."

Bad ki la ialeit, bad ki la kiew ha ka lieng: hynrei ha kata ka miet kim shym ngat eiei ruh Haba la shai, u Jisu U la ieng harud-duriaw; ki

(1) U Ioannis bad u Jakob.

synran pat kim shym ithuh ba dei u Jisu. Kumta u Jisu U la ong ha ki.

"Ko khun, phim iadon jynbam eiei?"

Ki la jubab ia U:

"Em."

U ong ha ki:

"Bret ia ka jar sha kamon jong ka lieng, te phin shem.

Kumta ki la bret; te kim lah ring shuh ia ka namarba la bun than ki dohkha. Kumta uta u synran, uba u Jisu U ieid, u la ong ha u Petrus:

"Dei u Trai."

U Simon Petrus, haba u iohsngew ba dei u Trai, u la shympiar ialade da ka sopti-lor (namar u la long lymboit) bad u la noh sha duriaw. Hynrei kita kiwei pat ki synran ki la wan ha ka lieng; (namar kim shym jngai na ryngkew, hynrei kumba arspah pruh), ki iatan ia kata ka jar-dohkha. Te ki tang shu hiar ryngkew, ki la iohi ia ki rngading barhem, ba la khreh, bad ka dohkha ba la buh halor, bad u kpu. U Jisu U ong ha ki:

"Wanlam na kito ki dohkha kiba phi la ngat myntan."

U Simon Petrus u la kiew, bad u la tan sha ryngkew ia kata ka jar kaba dap da ki dohkhabah, shispah sanphewlai tylli. Hynrei la ki bun katta, ka jar kam shym praid.

U Jisu U ong ha ki:

"Ale, iabam noh."

Hynrei na kita kiba iabam, ym don uwei ruh uba nud ban kylli ia U:

"Me uei?"

Ba ki tip ba dei u Trai. Te u Jisu U wan, U shim ia u kpu bad U sam ha ki; bad ia ka dohkha

ruh kumjuh. Kane kaba laisien mynta ba u Jisu
U paw ha la ki Synran, ynda U la mihpat na
baïap.

**356. U Krist U aiti ia la ki 'langbrot bad ki blang
ha u Petrus. Ka jingiap jong u Petrus.**

Ioan. 21:15-23.

Kumta ynda ki la dep iabam, u Jisu U ong ha
u Simon Petrus:

"Ko Simon, khun u Jona, me khlam ieid mame
ia Nga ban kine?"

U ong ha U:

"Hooïd, ko Trai, Me tip ba nga ieid ia Me."

U ong ha u:

"To bsa ia ki khun-'langbrot jong Nga."

U la ong biang ha u:

"Ko Simon, khun u Jona, me ieid ia Nga?"

U ong ha U:

"Hooïd, ko Trai, Me tip ba nga ieid ia Me."

U ong ha u:

"To bsa ia ki khun-'langbrot jong Nga."

U ong ha u ha kaba laisien :

"Ko Simon, khun u Jona, me ieid ia Nga?"

U Petrus u la sngewsih ba U la ong ha u lai-
sien: "Me ieid ia Nga?" bad u la ong ha U:

"Ko Trai, Me tip ia kiei kiei baroh: Me tip ba
nga ieid ia Me."

U la ong ha u:

"To bsa ia ki 'langbrot jong Nga. Shisha, shisha,
Nga ong ha me mynba me la dang samla, me la
panpoh ia lade, bad me la iaid kat shaba me mon;



*Khie, leit bran-bran to iathuh ia ki synran
jong U ba U la mihpat. (Page 341)*

hynrei ynda men tymmen, men kner la ka kti, bad uwei pat un pyn-panpoh ia me, bad un ialam shaba mem mon."

Te U la ong ia kane, U pyni da ka jingiap kaba kumno un pyndon-burom ia u Blei. Ynda U la lah ong ia kane, U ong ha u:

"Bud ia Nga."

Haba u Petrus u phai, u la iohi ia uta u synran¹ uba u Jisu U ieid, ba u bud, (uba la shaniah ruh ha ka shadem jong U, ha ka jingkhawai-miet, bad la kylli: "Ko Trai, uei uta uban die noh ia Me?").

Kumta, haba u Petrus u iohi ia uta, u ong ha u Jisu:

"Ko Trai, une pat kumno?"

U Jisu U ong ha u:

"Lada Nga mon ia u ban sah haduh ba Ngan da wan, sa-lei ia me? Ma-Me to bud ia Nga."

Kumta kane ka ktien ka la phriang hapteng ki parabangeit, ba uta u synran un ym iap. Pynban u Jisu Um shym ong ha u: "Un ym iap," hynrei: "Lada Nga mon ia u ban sah haduh ba Ngan da wan, sa-lei ia me?"

357. U Krist U paw ha u lum Galileia ha ki Apostol.

Mt. 28:16-20. Mk. 16:15-18.

Te ki khatwei ki synran ki la leit sha Galileia, sha u lum uba u Jisu U la iabuh. Bad haba iohi ia U, ki la mane; hynrei don ruh kiba la artatien. Te u Jisu U wan hajan, U la kren bad ki, U ong:

"La ai ha Nga ia ka bor baroh ha bneng bad ha khyndew."

(1) U Ioannis, nongthoh Gospel.

U la ong ruh ha ki:

"Namarkata, to leit satlak ka pyrthei, to hikai ia ki bynriew baroh, bad to ialap ia ka Gospel ha ki jynthaw baroh, da pynbaptis ia ki ha ka kyrteng u Kpa, bad u Khun, bad u Mynsiem Bakhuid; da hikai ia ki ban rakhe ia kiei kiei baroh kat kiba Nga la hukum ia phi. Uto uba ngeit bad ba la pynbaptis, un lait-im: hynrei uto ubym ngeit un sha-pynrem. Kine ki dak-ki-shin ruh kin bud ia kito kiba ngeit: ha ka kyrteng jong Nga, kin beh noh ia ki ksuid-ki-khrei, kin kren da ki ktien-ki-thylliej bathymmai; kin rah ia ki bseñ, bad lada kin dih eiei kaba pyniäp, kan ym pynsniew ia ki; kin buh ia ki kti ha ki bapang bad kin koit. Hakhmih ruh, Nga don ryngkat bad phi man la ka sngi, haduh kaba wai noh ka pyrthei."¹

358. Kiwei pat ki Jingpaw jong u Jisu.

Kam. 1:2-3. I. Kor. 15:5-8.

Ha kiba (ki Apostol) U la pynpaw im ruh ia la-de, hadien ka jingshahshitom jong U, da ki bun tylli ki sabut, haduh kata ka sngi kaba la shim noh ia U sha jrong, U paw ha ki haduh sawphew sngi, bad U kren shaphang ka hima jong u Blei; bad ba la iöhi ia U da u Kephas, bad hadien kata da ki khatweingut. Nangta, palat sanspahngut ki parabangeit ki la iöhi ia U, ryngkat: bun na kita ki

(1) Namarba u Jisu U la kular ban iäjsah bad la ka Balang kumta, ka Balang jong U kam lah ban bakla. Kan iai-hikai hok bad beit haduh ban da wai noh ka pyrthei.

sah haduh mynta, bad kiwei ki la iohthiah.¹ Hadien kata la iohi da u Jakob, nangta da ki Apostol baroh. Hynrei khatduh khatwai, la iohi da u Paulus ruh.

3. Ka jingkiew u Jisu sha hneng.

359. Ki Jingkyntu bakhatduh.

Lk. 24:46-49. Kam. 1:4-8.

Te katba U dang iabam lang bad ki, U la hukum ia ki ban ym leit noh na Jerusalem, hynrei ban ap ia ka jingkular jong u Kpa, U ong:

“Ngan phah ha phi ia Uba² la kular jong u Kpa jong Nga: hynrei to iashong ha ka nongbah, tat haduh ynda la pynkup ia phi da ka bor na jrong, ba phi la iohsngew na ka shyntur jong Nga: naba shisha u Ioannis u la pynbaptis da ka um; hynrei sa khydiat sngi naduh mynta, yn pynbaptis ia phi da u Mynsiem Bakhuid.”

Kumta kito kiba la iadon lang, ki la kylli ia U, ki ong:

(1) Na kito ki sanspahngut kiba la iohi ia u Jisu, don kiba dang im, bad don kiba la iap, haba u Paulus Bakhuid u thoh ia kane ka shithi, kumba arphew saw snem hadien ka jing-kiew u Jisu sha hneng.

(2) U Mynsiem Bakhuid uban pyntngen bad sah bad ki synran jong U (Ioan. 14:16; 15:26); Uban hikai bad pynkynmmaw ia kiei kiei baroh kiba U la ong. (Ioan. 14:26).

"Ko Trai, hato ha kane ka por Men khyllie ia ka hima Israel?"

Hynrei U la ong ha ki:

"Kam dei ia phi ban tip ia ka ia ne ka por, kaba u Kpa U la buh ha la ka bor. Hynrei phin ioh ka bor jong u Mynsiem Bakhuid, Uban hiar ha phi, bad phin long sakhi ia Nga ha Jerusalem, bad baroh ka Judia, bad Samaria, bad shaduh bakut ka pyrthei. Kumne la thoh, bad kumne ka dei ia u Krist ban shah bad ban mih-pat na baiap ha ka sngi balai, bad ha ka kyr teng jong U yn ialap ia ka jingpynshitom kylla-jingmut bad ka jingmap ia ki pop, ha ki bynriew baroh, da kaba sdang na Jerusalem. Phi pat phi long ki sakhi ia kine kiei kiei."

360. U Krist U kiew sha bneng.

Mk. 16:19-20. Lk. 24:50-53. Kam. 1:9-12.

Te ynda U la lah kren ia kine kiei kiei baroh, U la ialam ia ki shaduh Bethania; bad haba U la rah ia la ki kti, U la kyrkhu ia ki. Ka la jia ruh katba U kyrkhu ia ki bad ki dang iakhmih, U la khlad noh na ki bad la rah ia U sha bneng. Bad u lyoh u la kah noh ia U na ki khmat jong ki. Bad ia u Trai Jisu la shim noh sha bneng bad U shong ha kamon jong u Blei. Te katba ki dang iapeit shaiñ ba U kiew sha bneng, hakhmih, arngut ki rangbah, kiba kup da ki jaiñkup balieh, ki la ieng hajan jong ki, ki la ong ruh :

"Ko rangbah Galileia, balei phi ia-ieng khmied sha bneng? Une u Jisu Uba la shim noh na phi sha bneng, Un sa wan kumjuh kumba phi la iohi ba U leit sha bneng."

Te ynda ki la iāmane ngon, ki la leit phai noh sha Jerusalem da ka jingkmēn bakhraw, na u lum ba la khot Olib, uba hajan Jerusalem shi-sabbat lynti¹ Bad ki la sah borabor ha ka tempel, ki iā-roh bad kyrkhu iā u Blei.

Hynrei haba ki la iāmih noh, ki la iālap kyl-leng; u Trai ruh U iārap lem bad pynskhem iā ka ktien da ki dak-ki-shin kiba bud.

361. Ka Jingpynkut jong u Ioannis.

Ioan. 20:30-31; 21:24-25.

U Jisu U la leh hakhmat ki synran la jong bun ruh kiwei pat ki dak,² iā kiba ym shym la thoh ha kane ka kot. Hynrei iā kine kiei kiei la thoh ba phin dup ngeit, ba U JISU U LONG U KRIST: U KHUN JONG U BLEI; bad da kaba ngeit, phin iōh iā ka jingim bymjukut ha ka kyr teng jong U.

Une³ u long uta u synran, uba ai sa-khi sha-phang kine kiei kiei, u la thoh ruh iā kine kiei kiei: bad ngi tip ba ka sakhi jong u ka long ka bashisha. Hynrei don ruh shibun kiei kiei kiba u Jisu U la leh, kiba lada yn thoh kawei-pa-kawei, nga tharai, wat ka pyrt hei hi kan ym ngiam⁴ iā kita ki kot kiba dei ban thoh.

(1) Kumba shiteng mer. Kane ka rukom thew jingjingai ka long ba lada uno-uno u leit jingleit tang kat kane ka jingjingai, um pynkheif iā ka sngi Sabbat.

(2) Ki kam-phylla bad kiwei ki kambah.

(3) U Ioannis, Nongthoh jong ka Gospel.

(4) Don bun bah ki ktien bad ki kam jong u Jisu, iā kiba u Ioannis um shym la thoh lut.

REFERENCE

Not to be Lent out

MEGHALAYA STATE CENTRAL
LIBRARY SHILLONG

Call No.

Date,

Library books will give you Joy for Long
If handled carefully with clean hands.